

შალოვა ლადიანი



ბეჟანსენლა

«ს ე ლ მ ე ნ ე ბ ა »

თბილისი

1 9 5 9



შალვა დადიანი

ბ ი ნ ე ს ნ ა რ ი

И как-то весело и больно
Тревожить язвы старых ран!

Лермонтов.

მემუარული ლიტერატურა, როგორც ცნობილია, დიდად მიჩნეული რამ არის მხატვრულ მწერლობაში.

ერთ დროს იყო ისეთი მიმდინარეობაც მსოფლიო ლიტერატურაში, რომ საერთოდ ბელეტრისტიკას ეს ჟანრი (მემუარული) დაჰფარავსო, მაგრამ, რაღა თქმა უნდა, ეს ასე არ მოხდა და, მე რომ მკითხვით, არც შეიძლება მომხდარიყო.

ბალზაკი, ზოლა, ჰიუგო, ლევ ტოლსტოი, გოგოლი, დოსტოევსკი, ილია ქავკავაძე, გიორგი წერეთელი, ყაზბეგი და სხვა ასეთები მუდამ უქცნობი ყვავილები იქნებიან მწერლობით შემოქმედებაში. ეს მომავალშიაც ასე იქნება და განა ამის დამამტკიცებელი არ არის ჩვენში საბჭოთა რუსული და ქართული საბჭოთა პროზა? ამას თითქმის ჩამოთვლაც არ უნდა.

თუმცა ეს იმას არ ნიშნავს, რომ მემუარულ ლიტერატურას თავისი დიდი ღირსება და სიმძიმე არა ჰქონდეს.

მე კი პირადად თუ ვბრძვიდები და ამ მონაქცევზე ვკიდებ ამ ჟანრს ხელს, იმისათვის კი არა, რომ საერთოდ ჩემი ბიოგრაფია თითქო მდიდარია სხვადასხვა მომხიბლავი სათავე-გადასავლო შემთხვევებით, არამედ იმისათვის, რომ მკითხველის ყურადღებას წარვუდგინო თუ ჩვენში, ჩემ დროს (1890—1957-მდე) როგორ გამოვლინდა ერთი შუათანა კაცის ცხოვრება ჩვენს საზოგადოებრივ ასპარეზზე, მით უფრო, რომ ეს ადამიანი (ე. ი. მე) გამოსული იყო იმ წრიდან, რომელიც არც თუ ისე მისდევდა (გარდა მამიჩემის ოჯახისა) მწერლობას, თეატრს და საერთოდ დემოკრატიულ მუშაობას ხალხისათვის.

ამას გარდა, მე მომიხდა კარგა ხანგრძლივი ცხოვრება ამ ქვეყნად და ბევრი რამე ვნახე და განვიცადე, ბევრი ვინმე რჩეულთაგანიც გავიცანი და მათი გახსენება, რალა თქმა უნდა, ერთგვარ ხალისს შექმნის ამ ნაწარმოებს.

ერთი კია, რაც აქ იქნება გახსენებული, იქნება სწორუტყუარად და გულწრფელად გადმოცემული, თუმცა... როდის იყო. რომ გულწრფელად არ ვწერდი, თვით უბრალო გამოსვლებშიც კი.

თვით ნაწარმოები იქნება დაყოფილი ეპიზოდებად ბავშვობიდან მოყოლებული ჩემ დღეინდელ დღემდე და ყოველივე მოთხრობილი იქნება იმის მიხედვით, თუ როგორ რა გამახსენდება.

იმიტომაც ვარქმევ ამ ნაწარმოებს „რაც გამახსენდა“.

პირველი მოგზაურობა

სულ პირველი რა მახსოვს ბავშვობისა?

ჩვენი ოჯახის ცხენებით მოგზაურობა.

მამას ხშირად დავყავდით სოფლადან სოფლად იმერეთში, სამეგრელოში, ქართლშიაც ხან ჩვენს სამემკვიდრო სოფლებში, ეს უფრო დასავლეთ საქართველოში, ხან სტუმრად, ნათესავებთან.

გვიხდებოდა აგრეთვე მატარებლითაც სიარული სოფლებიდან ქალაქებში, უფრო ქუთაისს და თბილისს, ამიტომაც ბავშვობიდანვე შემიყვარდა მოგზაურობა და ეხლაც ხანდაზმული მისი „ტრფიალი ვარ“ (ილიას სიტყვაა). ეხლაც არ ვერიდები შორეულსა და ხანგრძლივ მგზავრობას.

ერთ დროს ხომ „მოგზაური“ დასიც მყავდა. მართალია, მის დაარსებას სხვა, უფრო საზოგადოებრივი ხასიათის მიზეზები ჰქონდა, მაგრამ არ ითქმის, რომ ამ საქმისათვის ჩემს მგზავრობაში დაუზარებლობასაც ხელი არ შეეწყოს.

ბავშვობის დროის მოგზაურობიდან კი ყველაზე პირველად მახსენდება იმერეთში, სოფ. სვირიდან სადგურ აჯამეთზე გამგზავრება. ნათლად მახსოვს. ლაზარე რატიანს, მამიჩემის ამ ერთგულ კაცს, ვუჯექ ცხენზე უნაგირის წინ.

ლაზარე რატიანზე უთუოდ შემდეგშიაც მომიხდება ვრცლად ლაპარაკი, აქ კი ვუბრუნდები ამ ჩემი პირველი მოგზაურობის ამბავს. თუმცა აქ საამბობიც არაფერია. მხოლოდ თუ ვიხსენებ, იმისათვის, თუ რა ჩამაჩნდა გუნებაში.

შეიძლება ისეთ თითქო უმნიშვნელო შთაბეჭდილებებიდან შემდეგ ირკვეოდეს, თუ როგორ მუშავდება ადამიანის ზნე, ხასიათი, სულიერი მიდრეკილება. მეც მიტომ მინდა აღვნიშნო, თუ რა რისგან შედგა ჩემში.

ეს ნაწარმოები ხომ ჩემი ცხოვრების შეჯამებას ემსახურება, ამიტომ არ მინდა გამოეტოვო არც ერთი წერილმანი, რაც კი ოდესმე გულს ჩამჩნევია. ამ წიგნის სხვა რუბრიკებში საზოგადოებრივი მოვლენებიც იქნება მოთხრობილი, მანამ კი პირადად ჩემთვის ჭაჭიროა ვიცოდე, თუ ის კაცი, რომელიც მე „მებარა“ (ჩემ თავზე ვამბობ, რასაკვირველია) მთელი ჩემი სიცოცხლის მანძილზე, როგორი იყო ბოლოს და ბოლოს, და ან მე მას კარგად ვიცნობდი, შესწავლილი მყავდა თუ არა.

ხომ არის დიდ მოაზროვნეთაგან ნათქვამი — თავის თავის ცნობა მეტად დიდი რამ არისო. მე დავუმატებ, თუნდაც მონაქცევზე-მეთქი და ამით აქ მოვჭრი სიტყვას.

ვერ ვიტყვი მაშინ მსიამოვნებდა უნაგირის კოტასთან ჯდომა თუ არა, შემდეგში, სხვა დროს, ძალიან გამჭირვებია ხოლმე. რადგან უთუოდ, რაკი წამოვიზარდე, ველარ ვეტეოლი, მინდოდა თვით მე მემართა ცხენი, დამოუკიდებლად ე. ი. მართო ვმჭდარიყავ, და აკი შედარებით მალე მოვიპოვე „ავტონომია“. 8—9 წლის ბიჭი უკვე თავისუფლად ვაჭენებდი ცხენს ჩვენი ფართო ეზოს მიდამოში სოფ. ბეთლემს (ბერთემს) უბელოდაც კი.

ამ მოგზაურობისას კი ჩემი ყურადღება მიიპყრო იმ გარემოებამ, რომ უკვე დღე ღამეს ეყრებოდა და ბინდბუნდი იყო, სადღაც ცის კიდურს კიდევ აჩნდა მზის ნათელი, ცოტა მოწითალო კვალი. მის აქეთ კი ტყვიისფერი ღრუბლები ირეოდნენ, ეს უთუოდ დასავლეთისაკენ იყო, ეტყობა ამ მხარისაკენ მივდიოდით, მხოლოდ ჩვენს უკან, მაშასადამე, აღმოსავლეთისაკენ, ცა სულ ჩაშავებული იყო და ამის შემხედვარე ბავშვის ნორჩი გონება ერთგვარი გაურკვეველი შიშით იყო შეპყრობილი.

გაურკვეველი შიშით, რომ ვამბობ, ამას აქვს თავისი მიზეზი, რადგან ჩვენს ოჯახში არავინ არასოდეს არ გვაშინებდა პატარებს ჯოჯოხეთით, ან რაიმე სხვა ზღაპრული ჯანდაბებით და მისი ურჩხულებით. ეს მამიჩემისაგან ყველას აკრძალული ჰქონდა და ამიტომ იყო ჩემი შიშიც გაურკვეველი, უფრო ცხოველურ-ინსტიქტიური.

ისე კი, ეხლა მახსენდება, იმდენად მიტაცებდა მგზაურობა

და ისიც ვაქცაცის გულ-მკერდს ამოფარებულს, რომ მაინც და-
მაინც დიდ შედრკომას არა ვგრძნობდი, განსაკუთრებით მა-
შინ, როდესაც ნათელ ცის კიდურისაკენ ვიყურებოდი.

ცხენების ფეხების თქარათქურში თითქო ცოტათი მთვლემ-
და კიდევ და შორეული ჭუჭუმეალის ხმა თითქო მინანავებდა.

აი ეს ჭუჭუმეალი ჩემთვის დაუვიწყარია. პირველად ვის-
მინე მისი ხმა ამ მოგზაურობისას.

მე შემდეგში გავიგე, მოჩიტულზე, რომ დედამიწის ზურგზე
(ჩვენს ცდომილზე) სანამ მუსიკალური ბგერა ბულბულის
მოხიბლავ სტვენამდე ამაღლდებოდა და შემდეგში ადამიანის
ყელის ხმათა კრიმანჭულით დაგვირგვინდებოდა, პირველი
მომღერალი, ანუ ხმის გამომღები, ჭუჭუმეალი იყო და მერმე
ისიც მურუყელ სინათლეში. მას ჰგონია, თურმე, რომ ეხლაც
პირველყოფილი დროა და შებინდდება თუ არა, იწყებს თავის
ფეხების ხახუნს და გამოსცემს ნაზსა და თითქო სეედიან
კილოს.

მე მაინც ასე მეჩვენება და, შეიძლება საკვირველია, მაგ-
რამ მიყვარს მისი მოსმენა. უთუოდ მიტომ, რომ მახსენებს
ჩემს უმანკო ბავშვობას.

მაშასადამე, ამითი დაიწყო ჩემი შეგნება — მურუყელ სი-
ნათლეში ჭუჭუმეალის გალობა!

შეიძლება ამას სიმბოლიური მნიშვნელობაც ჰქონდა ჩემს
ცხოვრებაში.

ვნახოთ!

უხანუკი გემოვნება

ჭუჭუმკალმა გამახსენა: შე მიყვარს აგრეთვე ღამით ჭოტის ყვილი.

საზოგადოდ კი მიჩნეულია, რომ ჭოტის ყვილი თუ საზარლად არა, არასასიამოვნოდ მაინც მიაჩნიათ და სოფელში ზოგიერთებს. მგონი ღლესაც, მისი გაგონება ცუდი რამის მომასწავებლად აქვთ განკუთვნილი.

შე კი იგი მსმენია პირველად იმერეთში, სოფ. კულაშში. საოცარ, თილისმთან მთვარიან ღამეში, დიდ მყუდროებაში, როდესაც ობლად გაისპის ამ უწყინარი ფრთოსნის თითქო გულსაკლავი კენესა.

ღლესაც მისი მოსმენა მაგონებს რომელიღაც, თითქოს ჩემთვის დაკარგულ. პირად ბედნიერებას, რომელიც შეიძლება მღირსებოდა, მაგრამ ხელთ ვერ ვიგდე.

ნაზ. გულის მომწყვლელ მოგონებათა აღმძვრელია.

კიდევ ერთი რამ, მაგრამ ეს სულ სხვა ხასიათისაა: მსიამოვნებს მაზუთის სუნი.

ზოგიერთს გულს ეყრება, თუ ოდესმე მოედინება მისი სუნი.

შე კი ესეც ჩემს ბაღლობაში მაქვს შეძენილი.

ერთ დროს მამა ზესტაფონში ცხოვრობდა. სწორედ იმ ქალაქში, სადაც შე ვარ დაბადებული და სადაც მივიღე ქართული ანბანის პირველი „განარკვი“.

მამა გაკვეთილს განარკვს ეძახდა. მეც უფრო მართებულად მიმაჩნია და ამიტომ ვხმარობ: გაკვეთილი ხომ გაკრილს თუ მოკრილს ნიშნავს. განარკვი კი გარკვეულს, განმარტებულს, და ჩემის ფიქრით ეს უფრო შეეფერება სინამდვილეს.

თუმცა „გაკვეთილმა“ უკვე ისეთი მოქალაქეობა მოიპოვა, რომ მე აღარა ვდაობ. გახსენებისათვის კი საჭირო იყო.

3—4 წლის ვიქნებოდი მაშინ, როდესაც პირველად მაზუთის სუნი მომედიანა.

რკინიგზის სადგურთან, მაღლობზე ვცხოვრობდით და ყოველდღე ვუყურებდი მატარებლის მიმოსვლას, განსაკუთრებით ცალკეული ორთქლმავლის „მანიოვრებს“.

აქ იყო მისწრაფება, მოძრაობა და... მაზუთი.

შემიყვარდა ეს ყოველივე. მისი „ბრუნდი და მართალი“.

მართალმა „მყარალიც“ გამოიყოლია. მე კი შემიყვარდა. არა! მსიამოვნებს.

ესეთი უცნაური კაცი ვარ.

აქედან უთუოდ საწყისი ჩემის უხეირო გემოვნებისა.

მაგ, ქალებში ხშირად ულამაზო ქალები მომწონებია. რასაკვირველია, მთლად მახინჯი არაა, მაგრამ ისეთები, რომელთაც სხვები თითქო ვერ ამჩნევდნენ, რადგან უზადო ლამაზებისაკენ მიიზიდებოდნენ.

მე კი „ძალიან“ ლამაზი ეგრე რიგად არ მიპყრობდა.

მაგრამ მე გამონაკლისი არა ვარ თურმე. მახსენდება ერთი ამბავი.

მყავდა ერთი ბიძა, იასონ წულუკიძე, კაცი დარბაისელი, კუთამახვილი, ძველებური მოშაირე, მოცეკვავე, მომღერალი, კარგი ცხენოსანი და მონადირე. წარმოსადეგი ვაჟკაცი, მხოლოდ სახით შავი ძალზე და არც თუ ძალიან სახიერი. დები კი ლამაზი ჰყავდა. ეს დები ხშირად ეხუმრებოდნენ თურმე — შე უბედურო, რა გეშველებოდა, ქალად რომ გაჩენილიყავიო. იასონი კი ამით ანუგეშებდა: — ნუ გეშინიანთ, მაინც გავთხოვდებოდი, აგერ სეფე მაჩაბელი უსათუოდ შემირთავდაო. ამ სეფეს კი საოცარი, ერთი რაღაც დოღრიალა დედაკაცი ჰყავდა თურმე ცოლად.

მაგრამ მე ძალიან წინ გავრბივარ. ეს უთუოდ იმიტომ, რომ მეჩქარება, რაც კი აქამდე ჩემში მოგონება მოზღვაეებულა, აღუნიშვნელი არ დამრჩეს, 68 წლის კაცს მეშინია ამისი¹.

¹ როდესაც ამ ნაწარმოების წერა დავიწყე, ამ ხნის გიჟავი. ავტ.

კვლევ მოგზაურობა

მახსენდება კიდევ სხვა მგზავრობაც. ესეც სოფლად და ესეც ცხენებით.

მხოლოდ ამ ხელად მამამ სხვაგვარ გვამგზავრა მე და ჩემი და.

მამა ხომ აღრე დაქვრივდა და შვილებთაგანაც მხოლოდ ჩვენ ორნი შეერჩით, მე და მაშო, შემდეგში ცნობილი საზოგადო მოღვაწე აფხაზეთში და განსაკუთრებით ქ. სოხუმში, სადაც დიდი ამაგი მიუძღვის ძველ, ცარიზმის დროს, ქართული სკოლის დაარსებასა, ქართული თეატრის მოწყობასა და სხვა ამგვარ კულტურულ საქმიანობაში, მარიამ ანჩაბაძისა.

მივემგზავრებოდით სოფ. რგანში საზაფხულოდ, სადაც მამას დედისაგან მემკვიდრეობით დარჩენილი მამული ჰქონდა და სადაც შემდეგში შავი ქვა აღმოჩნდა.

მივიდიოდით ზესტაფონიდან ესრეთ წოდებულ დიდწიფლის გზით, მაგრამ მაშინ ასე ადვილი არ იყო მგზავრობა, ისიც ცხენებით და მთელი ოჯახითა და ბარგი-ბარხანით. მაშინ მაინც ასე ეჩვენებოდათ და ამიტომ რაღაც 30—40 კილომეტრის მანძილზე ერთი სამჯერ მაინც სადმე უნდა დაბანაკებულყვნენ და ლამეც გაეთიათ. ჩვენ კი, რაკი გზადაგზა ნათესავები გვყავდა, რასაკვირველია, მათთან შევუხვევდით ხოლმე. უამისობა არც შეიძლებოდა, მამას უგულობასაც შესწამებდნენ. ეს იყო გასული საუკუნის 70-იანი წლების მიწურული და მაშინდელ თავადაზნაურობას, განსაკუთრებით ზემო იმერეთში, ჯერ კიდევ კარგა „სული ედგა“.

ჩვენი მარშრუტი ესეთი იყო: ზესტაფონიდან — დილიკოური, ჭოყოეთი, კაცხი და შემდეგ რგანი.

ჩვენ სულ აბაშიძეებში უნდა გვევლო. ესენი იყვნენ ჩვენი უფრო მახლობელი ნათესავები:



შალვა დადიანის მშობლები: დედა — ლიდა, მამა — ნიკო;
და — მარიაში. 1872 წ.

დილიკოურში დავით აბაშიძესთან, პოეტ გრიშა აბაშიძის მამასთან (კიტას ბიძა იყო).

ჯოყოეთში — კონსტანტინე აბაშიძის ოჯახში, იასონ და გრიგოლ აბაშიძეებთან.

კაცხში — ან კოსტა ან ალექსანდრა აბაშიძესთან.

დავითი, გრიშას მამა, განათლებული კაცი იყო, მშვენიერი მოლაპარაკე, სახიერი, ტურგენევის ჰგავდა, ევროპულად ჩაცმული. თუმცა ბევრი არაფერი გამეგებოდა, მაგრამ ძალიან მიყვარდა დავითის და მამას საუბარი. მივცუტქდებოდი იქვე ახლო მოსაუბრეებთან და ყურს ვუგდებდი. თითქო ვგრძნობდი, რომ კარგ რაღასაც საუბრობდნენ და კარგადაც ლაპარაკობდნენ. დავითს უკვირდა თურმე ჩემი ესეთი „სერიოზულობა“ და მე კი მეფერებოდა, მაგრამ მამას საყვედურობდა თურმე, მეტის-მეტად დინჯად ზრდი შვილებს, ბავშვი უნდა ცელქობდეს, მინდორ-ველს მოედოს, ტოლ-ამხანაგებში „ბურჭალობდესო“. მამა ამისი არც ერთის წინააღმდეგი არ იყო, მაგრამ არც ამ „სერიოზულობას“ მიშლიდა.

ჩემის ესეთის საქციელით ერთხელ, ეს სხვა დროს, ცნობილი პროფესორი ალექსანდრე ცაგარელიც გავაკვირვე თურმე. ის მაშინ პეტერბურგიდან იმისათვის იყო ჩამოსული, რომ მეგარული ენის მეცნიერულად შესასწავლად მასალები შეეგროვებინა და, სხვათა შორის, დახმარებისათვის მამაჩემსაც მიმართა.

მახსოვს, ქუთაისში, მამას კაბინეტში, მაგიდას უჯდა ერთი ლამაზი, შავწვერა, სათვალეზიანი ვაჟკაცი და მაშას ესაუბრებოდა, თან იწერდა რაღებესაც. ეს ხდებოდა ხშირად საღამოობით და მაშინ, როდესაც ესეთ მუშაობის დროს კაბინეტში არავის მომსვლელს არ უშვებდნენ, მე კარგი ასისტენტივით მაგიდასთან წამოსკუპებული ვიყავ და რაკი მაგიდას ხეირიანად ვერა ვწვდებოდი, მაგიდაზე ხელები მეწყო, ზედ კიდევ თავი მქონდა ჩამოდებული და ესე შევცქეროდი ხან მამას და ხან პროფესორს. მეცნიერს ის უკვირდა თურმე, რომ მე არ მეძინებოდა. საკვირველია, რა უნდა აინტერესებდეს ბავშვსო. მე კი თურმე ისე გულისხმიერად ვიყავი, თითქო ყოველივე გამეგებო.

მაგრამ მე ძალიან დავცილდი ჩემს მგზავრობას.

ვიმგზავრეთ კი ასე: ერთ ცხენზე გარდიგარდმო გადაკიდებული იყო ორი მკიდროდ მოწნული კალათი, შიგ რბილად მოგებული საჯდომით. კალათებში კი ცალ-ცალკე ვისხედით და-ძმანი, ნელად მივექანებოდით დიდწიფელის „გაწმოდიალებულ“ გზაზე.

ჩვენ უზრუნველყოფილი ვიყავით გადავარდნისაგან და ცხენს კი მიუძღოდა ჭილავეში ხელჩაველებული რომელიმე გამოცდილი მამას მხლებელთაგანი.

თურმე დიდ ხალისსა და მოწონებას იწვევდა მნახველებში ჩვენი ესეთი მოგზაურობა. ოღრო-ჩოღრო გზაზე და აღმართ-დაღმართებზე მარდად სიარული კარგი ცხენოსნისათვისაც მოსაჩივრებელი იყო, განსაკუთრებით ღამე.

ყველაზე უარესი გზა იყო ჭოყოეთში ჩასასვლელი. სოფელი დაბლობშია გაშენებული და მისასვლელი კი ირგვლივ გორებიდანა აქვს. მე ესე მახსოვს.

სრულიად დაღამდა, ჭოყოეთს რომ მიეუახლოვდით. მართალია, რბილად ვიჭეკით, მაგრამ მაინც მომწუხინდა მგზავრობა. გზა გრძელი მომეჩვენა. როგორც იყო, თქვეს — შევდივართ სოფელშიო, და მართლაც შორიდან აქა-იქ სადღაც გამოჩნდა სინათლე, სადღაც შორს ძალღმა მიაყუფა, მეგონა თუ მივედით კიდეც, აი საცაა შევალთ საღმე ეზოში, მაგრამ სწორედ ამ დროს უეცრად სრულიად დაბნელდა და სადღაც კიდეც უფრო თავქვე ჩავეშვით. ეს გზას არც კი ჰგავდა, ცხენს ხშირად ქვეებზე ფეხი უსხლტებოდა. ეხლა რომ ვიგონებ, ეს უთუოდ ნაღვარევი უნდა ყოფილიყო და სწორედ მისგან გზად გაკვერილი. ზევიდან კი უზარმაზარი ხეების შტოები გადმოგვეფარვოდა და ეს იყო, რომ ღამეს კიდეც უფრო გვიბნელებდა. მივდიოდით თითო-თითოდ გამწკრივებული და ხშირად გვესმოდა შეძახილი, რომ ხის შტოებს არ წამოვდებოდით, მოვრიდებულებიყავით. მაინცდამაინც ამ სიბნელესაც, ეტყობოდა, თვალი შეეჩვია და უკვე ვარჩევდი გზადაგზა კიდეც უფრო ჩაშავებულს რაღაც დაკლანკილ საგანს.

„აჩუ!“ ეძახდა ჩვენი გამძლოლი ჩვენს ისედაც მშვილსა და ქკვიან მერანს და თან ჩვენ გვაფრთხილებდა: — არ შეგე-

შინდეთ, ეს ხის ფესვებია, გველეშაპი არ გეგონოთ, ან ღრიან-კალიო. მაშინ არც ერთი არ ვიცოდი, რადგან, აკი ვთქვი, ესეთი ურჩხულებით მამა არასოდეს არ გვაშინებდა-მეთქი. ამიტომაც უთუოდ მიკვირდა გაფრთხილება; მხოლოდ გამოუცნობის გამოცნობა, ცხადია, ძალზე მინდოდა. ბავშვისთვის მაინც ეს ხომ დიდად სანუკვარია.

შემდეგში განთქმული მხატვრის გუსტავ დორეს ბიბლიურ ნახატებს რომ დავეკვირვებოვარ, იქ მინახავს ამისთანა დაღრან-კილი ხეები და მისი ფესვები.

დასრულდა ეს ნაღვარევი და უცბად კონსტანტინე აბაშიძის ფართო ეზოში კი შევედი...

ამ ოჯახში გამაყვირვა იმან, რომ ერთი მომცრო ოთახი ვნახე, სადაც მხოლოდ ხატები იყო, მაჩვენა თეიფონ დიდმა დიდედამ, კონსტანტინეს მოხუცმა ქვრივმა.

ოჯახში არსად მინახავს, ამდენი ხატები ჰქონოდეთ. ეკლესია ჰქონდა მაგ. სოფ. კულაშში ალექსანდრე მიქელაძეს თავისივე სახლის ერთ-ერთ დარბაზში — კანკელი, ტრაპეზი და ყოველგვარი საეკლესიო მოწყობილობა.

ეკლესია მინახავს ძალიან ხშირად ესეთ ოჯახებში ეზოში, ცალკე, პატარა განკუთვნილი შენობა. კარის ეკლესიას უწოდებდნენ.

სახლში კი არ მინახავს. მაგრამ ალექსანდრე მიქელაძეს ხომ თეატრიც ჰქონდა აგრეთვე თავის სახლში.

თუმცა ამ თეატრზედაც უთუოდ თავის ალაგას ვილაპარაკებ.

კაცში მახსოვს პირველი ნახვა შემდეგში ცნობილი პოეტის გრიშა აბაშიძისა. მაშინ ის გომნაზისტი იყო და, რამდენადაც მახსოვს, მეტად ცოცხალი და დაუდეგარი. ჩვენი მასპინძლისას, ალექსანდრა აბაშიძისას, (გრიშას ბიცოლა იყო) ბევრა ქალიშვილი იყო თავმოყრილი, გრიშა სულ მათ შორის ტრიალებდა და იყო ერთი გახურებული სიცილ-კისკისი, სხვადასხვაგვარი გართობა: ქორბუდობია, ქალაქობია და სხვა ამისთანა. აგრეთვე პირველად იქ გავიგონე შემდეგი ზეპირი, სიტყვიერი ვარჯიშობა:

„— ანზე ვისი ხარ?

- ალავიძის.
- შენი სახელი?
- ანტონი.
- საიდან მოდიხარ?
- არგვეთიდან.
- სად მიდიხარ?
- არადეტს.
- მშვილდი რისი გაქვს?
- ატმის.
- ისარი?
- არყის ხისა.
- რას მოკლავ?
- არჩვს.
- რაში კრავ?
- აპკში.
- ვის მიუტან?
- ამირაჯიბს.
- რას გაჩუქებს?
- აღმასს“.

ერთი სიტყვით მთელი ძველებური „ვიქტორინა“.

როგორც ხედავთ, აქ საჭირო იყო ვარჯიში გეოგრაფიაში, ნადირთა სახელების ცოდნაში, ქართული სახელებისა და გვარის გახსენებაში, ხე-ტყის ცნობაში და აგრეთვე სხვადასხვა ნივთთა ცოდნაშიაც.

ეს, რასაკვირველია, შემდეგმა დაკვირვებამ დამანახვა. მაშინ კი ზოგიერთის სხარტული, სწრაფი პასუხი მაკვირვებდა, განსაკუთრებით გრიშასი და, ცხადია, უფრო სიტყვათა ზგერა მახალისებდა.

ეს თამაში კი გრძელდებოდა საზოგადოთ, მანამ მთელი ქართული ანბანი არ ჩამოითვლებოდა და ძალიან ხშირად ბევრი დიდხანს ჩერდებოდა და „თავს იმტვრევდა“. ხან ისარი შემოაკლდებოდა, ხან ნანადირევი, ხან საჩუქარს ვერ გამოძებნიდა და სხე.

მე არ მახსოვს სად შევითვისე ასეთივე თამაშობა „ბერი ჩამოხტა“-სი.

„ — ბერი ჩამოხტა.

— სად?

— ბეთლემში.

— მონასტერი სად ააშენა?

— ბერიწყუზე.

— მონასტერს რა ჰქვია?

— ბეთანია“.

და აქაც მთელი ანბანი უნდა ჩამოთვლილიყო. ეს უფრო იოლი შესასრულებელი იყო და უფრო ჩემი ხნის ბავშვებს აეარჩიებდნენ ამაში.

იმეამად კაცხისაგან სხვა არაფერი შერჩენია ხსოვნას, გარდა კიდევ ერთი აბაშიძისა: სახიერი კაცი იყო, წვეერგაპარსული და სქელი, შავ-ულვაშებგადაგრენილი. ქართული კაბა ეცვა და საუცხოოდ მოქედილი ხანჯალი ერტყა. ეს იმიტომ მახსოვს, რომ ამ ხანჯალს ძალიან ვეტრფიალებოდი და როდესაც მისი პატრონი, გედეონ აბაშიძე, თავისთან ახლო მიმიყვანდა, მე ამ ხანჯალს ვეთამაშებოდი.

მახსოვს. იმ დღეს გედეონი ძალიან გამხიარულდა სუფრაზე. უთუოდ თამადა იყო, რადგან ეხლა მახსენდება, რომ ის მეთაურობდა იქაურობას. რაღაც უცნაური სასმისებით სეაზნა ღვინოს. ხუმრობდა, მღეროდა, ცეკვავდა და მამას რაღებებსაც ეხუმრებოდა, რაც მამას, საერთოდ დინჯ კაცსა ღვინის სმის სრულიად არა მოყვარულს. ეტყობოდა, ამხიარულბდა.

შემდეგში გავიგე ამ გედეონის ცხოვრებიდან ერთი ეპიზოდი: რომელიღაც გლეხთან მას მიწის თაობაზე დავა ჰქონდა და ამის გამო სასამართლოში ხშირად დადიოდა. სასამართლოში მაშინ იმ არემარეზე მხოლოდ ქ. ზესტაფონში იყო და კაცხიდან იქამდე კარგა დიდი მანძილი გახლავთ. დანიშნულ დღეს გედეონი, რასაკვირველია, ცხენით მიემგზავრებოდა, მისი მომჩივარი თუ მოპასუხე გლეხი, ეგეც, რასაკვირველია, ფეხით მიჩანჩალებდა, მაგრამ გედეონი დაინახავდა თუ არა ფეხით მიმავალ თავის მოწინააღმდეგეს. შემოისვამდა ცხენზე და ისე მიიყვანდა ზესტაფონამდე.

— შენ. პიკო, ფეხით როდის მოხვალ და შენ რომ არ იქნები, შეიძლება მოსამართლემ საქმე გადამიღვასო.

შემდეგ, როდესაც სასამართლო დასრულდებოდა, სულ ერთია: როგორი განაჩენიც უნდა ყოფილიყო, ამ გლენს მაინც არ გაუშვებდა და სადმე სამიკიტნოში გლენტან ერთად კარგა მშვენივრად გადაკრავდა.

როდესაც სხვებს ამისთანა მისი საქციელი აკვირვებდათ, გედეონი უპასუხებდა თურმე:

— დალოცვილებო, მე ამ გლენის წახდენა კი არ მინდა, მეცოდება კიდევ. მხოლოდ თუ ვედავები, მაგას კი არა, შე რუსის კანონს ვებრძვი, რომ ასე სადავიდარაბოდ გაგვიხადა საქმე მეც და ამ გლენსაცო.

2

კაცხის შემდეგ ჩავიდოდით სოფ. რგანს და აქ ზაფხულობით ვისვენებდით თითქმის მთელი ზაფხული.

სააგარაკოდ სოფ. რგანი მართლაც საუცხოოა. თითქმის გამუდმებით მშვენიერი ამინდები დგას და მეტად გრილი ზაფხული იცის. იქაური მთის ჰაერი მარგებელი რამ არის. საუცხოო წყაროები სოფლის ყოველ კუთხეში, დიდრონი წაბლისა და ცაცხვის ხეებით დაყურსული ეზოები, ხავერდოვანი მდელოთი დაფარული არეზარე. მშვენიერი გადასახედავი სოფ. წირქვალისაკენ, თაბაგრებისაკენ, ზრეთისაკენ! ეს განსაკუთრებით აქაურ მებატონეთა სახლ-კარიდან. ეს სოფელი ერთ დროს სულ მთლად სააბაშიო იყო, ჩემსობას კი აქაურ აბაშიძეთაგან მხოლოდ ერთი დათა აბაშიძე იყო დარჩენილი და შემდეგში მისი ვაჟი სანდრო, თორემ ისე დანარჩენი აქაური მამული სამემკვიდროდ ლოლობერიძეებს, ნიჟარაძეს, შემდეგში ამის მემკვიდრე ამილახვარს და დადიანს, მამიჩიშის სახით, რგებოდათ.

ეს სოფელიც ბავშვობიდანვე მყავს შეყვარებული, რადგან აქ გამოძჩენია ტოლ-ამხანაგებიც ჩემს ბავშვურ „ბურჯალობაში“: კავთელაძეებში, ხვედელიძეებში, სამხარაძეებში, გველესიანებში, ყიფშიძეებში და სხვ. მაგრამ ბავშვობაში მყავს უცნობილი და გამეგობრებული აქაური მოზრდილებიც.

უწინარეს ყოვლისა, ჩემსობას ღრმად მოხუცებული, მაგ-

რამ მეტად ჰარმაგი, ცოცხალი და მოძრავი, ბოყოჩა მე-
ნაფირე.

დიდად ხალისიანი კაცი იყო: ოხუნჯი, მომღერალი, შაი-
რების მთქმელი და მეზღაპრე. ეტყობოდა ყველას უყვარდა
და ჩვენ, ბავშვები, ხომ სულ არ ვცილდებოდით, როგორც
კი ის ჩვენსა გამოჩნდებოდა.

ბევრ რასმე გვიამბობდა — ზღაპრებს, ანდაზებს, თავის
თვლით ნანახ ამბებს. სამწუხაროდ, მათი უმეტესობა ხსოვ-
ნიდან გამომქარდა. მახსენდება მხოლოდ ერთი პაწია შემთხვე-
ვა პირადად მისი ცხოვრებიდან:

საღდაც შეკრებილებაში იყო თურმე. უეცრად ეზოში
უპატრონოდ მიგდებული აღვირი ნახა. მიიხედ-მოიხედა, აწ-
ლომახლო არავინ იყო. აიღო და ჩოხის კალთა მიაფარა. გა-
დადგა ნაბიჯი, მაგრამ გაახსენდა — დამალვა არ ეგებისო და
ხმამალლა წამოიყვირა: „ვი ი ს ი ა? ვ ი ი ს ი ა?..“ შემ-
დეგ ხმადაბლა, თითქოს ჩურჩულით დაუმატა „აღვირი“. ასე
ხმამალალი „ვისიათი“ და ნაჩურჩულევი „აღვირით“ შეპოი-
არა იქაურობა და ბოლოს ნანახი მიითვისა.

ერთხელ კიდევ ბატონს ვილაცამ ხაჭაპურები მოართვა.
ბატონი ნაწილს შეექცა და ნაწილი კიდევ ბოყოჩას მიაბარა
ბელელში შესანახად. გავიდა ერთი დღე. ბატონმა ხაჭაპურები
არ მოიკითხა. ბოყოჩას ეგონა, რომ ბატონს ხაჭაპურები და-
ვიწყდა, თვითონაც ყმაწვილი იყო, სულმა წასძლია და ხაჭა-
პურები თანდათანობით გაანადგურა. მეორე დღეს ბატონმა
მოთხოვა ხაჭაპურები ბოყოჩას, თან უბრძანა: — ცივი იქნება
და გააფიცხეო! ბოყოჩა ამოეფარა ბელლის ყურეს და დიდ
საფიქრებელს მიეცა; რომ შეაგვიანდა, დაიბარეს ბოყოჩა. ში-
ნაწყმებმა მოსძებნეს და მიჰგვარეს ბატონს.

— რა უყავ, ბოყოჩა, ხაჭაპურები?

— ფიცხდება, ბატონო.

— კარგი, მალე მოიტანე.

კიდევ რომ შეაგვიანდა, მიხვდნენ როგორც იყო საქმე და
შახსოვეს ბოყოჩას დასათავარი:

„ხაჭაპურები ვერ გავაფიცხე, მაგრამ მე კი შემითიცხეს
გვერდებიო“.

ასეთ მოგონებათა შემდეგ დაგვესვამდა საქანელაზე, რომელსაც თვითონ ზემოიშერულად „საკორწიალოს“ ეძახდა და გვაქანებდა. ზოგჯერ ისე მალლა აგვისროდა, რომ მაგალითად მე „სული შემეკვროდა“, მაგრამ თან გახარებულიც ვიყავი, რომ ასე ცაში ავიტყორცნებოდი ხოლმე.

სამაგიეროდ, როდესაც ბავშვებს ასე გაგვახარებდა, ახლა თვითონ ჩამოჯდებოდა და მარტოკა „კორწიალობდა“. მუხლებს ჰკუმშავდა, შემდეგ სწრაფად წინ გაისროდა ფეხებს და კარგა მალლა ქანაობდა. თან გულით ისე ხარხარებდა, რომ ჩვენც გადაგვედებოდა მისი სიცილი და უმიზეზოდ ვკისკისებდით.

აქვე უნდა გავიხსენოთ ერთი მშვენიერი ადამიანი. წარმოსადეგი ახალგაზრდა, შავთვალწარბა, მხარბეჭიანი, ნიჭიერი და მახვილი სიტყვის პატრონი გოგიტა. სამწუხაროდ გვარი აღარ მახსოვს. ეს სვირელი გლეხი იყო და ბებიაჩემს, მარიამ აბაშიძის ქალს, ხაბაზად ჰყავდა. მუდამ მხიარული, ხალისიანი და საკუთარი შაირების გამომტემელი. ყველას უყვარდა და მე ხომ თითქმის არ ვიშორებდი, რადგან დიდი გამომგონებელი და გამკეთებელიც იყო სხვადასხვაგვარის სათამაშოსი: ხან მეტად მოხდენილს ფანჩატურს ამიშენებდა, გვიმრის ფოთლებით გადახურულს, მხოლოდ ისეთ მომცროს, რომ შიგთითქმის მარტო მე ვეტეოდი, ეს შალვას სასახლეაო და ზედ არავის არ აკარებდა, სანამ ზაფხულის თქეშმა არ ჩაგვინგრიდა საბურველი და გაანადგურა ჩემი ყურე.

შეიძლება „შალვას ყურეს“ სიყვარული აქედანაც ჩამენერგა¹.

ერთხელ კიდევ ხის ორთქლმავალი გამომიკოპიტა. ეს, ახლა რომ ვიხსენებ, მართლაც საუცხოო მოდელივით იყო გამოყალიბებული. საყვირიც კი მოაწყო. მაგრამ ჩემთვის ყველაზე გამხარებელი მისი ორ-ორ წყვილად მორგებული ბორბლები იყო, რომელთაც კბილანა ამოძრავებდა. სხვადასხვაგვარ ბურთებს, ბეწვეულის თუ წითელ-ყვითელ მეშისას ხომ ხშირად მიკეთებდა და აგრეთვე ნაირ-ნაირ ბზრიალებს. დაატ-

¹ ერთხელ შალვას ყურე დავარქვი პაწია აგარაკს, თბილისის მახლობლად სოფ. ბაგეშში.

რიალებდით მიწაზე, ან კიდევ უფრო კარგად ხის იატაკზე, და დიდის სისწრაფით „დაკვიწილდებოდა“. ან ზონარგაბმული თხილის კაკალი, ძაფების გაწევა-გამოწევეით თან რომ ტრიალებდა და თან რომ „ღუოდა“.

მამამ ამ გოგიტას ქართული წერა-კითხვა ასწავლა უკვე 22—23 წლის ვაჟკაცს და უნდოდა სადმე ზეინკლობა მაინც შეესწავლებინა თურმე. აქედან გაიკვლევს გზასაო, მაგრამ გოგიტას დედამ შვილი მალე დააცოლშვილა და თითონ გოგიტასაც, საერთოდ, დიდხანს არ უცოცხლია.

მისი ნაშაირევიდან მხოლოდ ერთი სახუმარო ლექსი შერჩა ხსოვნას.

ზესტაფონში იმ დროს ცხოვრობდა მერაბ ლორთქიფანიძე, მამა ჩვენი ცნობილის მწერლის ნიკ. ლორთქიფანიძისა. მას, სხვათა შორის, ერთი ლამაზი უფროსი ქალიშვილიცა ჰყავდა, სახელად ივლითი, რომელსაც, ცხადია, იმ არემარის ახალგაზრდობა ეტრფიალებოდა. გოგიტას, რასაკვირველია, იმ დროს და იმ მდგომარეობის კაცს, როგორც თვითონ იყო, მერაბის ოჯახთან ხელი არ მიუწვდებოდა, მაგრამ გული მაინც ასე მოიოხა თურმე:

„დედალ-მამალო ფუტკარო,
ლორთქიფანიძეს უთხარო:
ან მომეც შენი ივლითი,
ან ზესტაფონში ნუ ხარო!“

რგანში კიდევ მახსოვს გველესიანების მშვენიერი, იმერულ კილოზე გალობა ადგილობრივ ეკლესიაში და მათ მიერ შესრულებული „სძლისპირები“ ოჯახებში, პურად-ღების დროს.

ეს არ ჩამოუვარდებოდა შემდეგში ჩემ მიერ მოსმენილ განთქმულ ღუმბაძეების, დიდო კალაგანიძის, წერეთლის, ხუნდაძისა და მეძმარიაშვილის მიერ შესრულებულ საეკლესიო და საერო საგალობლებს.

ასეთივე საამური და წარბტაცი იყო ჩემთვის სოფ. ლაშეში დავით აბაშიძის (ღაბუაშვილის) მეთაურობით ნამღერი ქართული ჰანგები.

ყველა ამათ იმთავითვე შემაყვარეს მშობლიური სიმღერები და ბოლომდე მათი ტრფიალი დავრჩი.

ერთ დროს. როდესაც დავეკაბუჯდი, საგალობელთა ესეთა არტისტული შესრულების დროს. სულ ის მესახებოდა. რომ ჩვენი სახელოვანი წინაპრები სტკებობდნენ ამ ჰანგებით ღა იკმაყოფილებდნენ ესთეტიურ მოთხოვნილებას. ამ დროს განსაკუთრებით მახსენდებოდა დავით აღმაშენებელი, თამარ მეფე. რომელთა კულტიც იყო ჩვენს ოჯახში გამეფებული.

ეს იყო ჩემი რომანტიკა.

ამას, ცხადია, დიდად ხელს უწყობდა ის გარემოცვა. ის სულიერი განწყობილებანი, რომელთაც მამაჩემი ამყარებდა თავის ოჯახში. და, როგორც ეხლა ვფიქრობ, ეს უფრო იმი-სათვის — შვილებში გაელვიძებინა, აღეზარდა დიდი სიყვარუ-ლი საქართველოს წარსულისა და მის ზნე-ჩვეულებისადმი.

ასე ვიყავ დიდხანს, სანამ საგანთა უფრო ახლოს გაცნო-ბამ. შედარებით შესწავლამაც არ გამძარცვა ზოგიერთი ილუ-ზიისაგან და არ მომცა ხელში ერთადერთი შიშველი სიმართ-ლე, მოუკაზმელი და შეუღამაზებელი.

3

რგანში პირველად ვნახე სიმინდის წითელი ტარო და ისე შევიცვარე, რომ დიდხანს თავიდან არ ვიშორებდი. აქვე უფრო ახლოს გავეცანი ღორებსა და ინდოურებს. ინდოურის ჭუკებს თითქო ციოდან მალალ ფეხებზე შემდგართ და ძიგ-ძიგებდნენ, თან თუ რამე საკენკს იშოვნიდნენ, ჩაუნისკარტებ-დნენ, გადაყლაპავდნენ და შემდეგ თითქო უკვირთო, ყრან-ტალებდნენ—ეს რა კარგ რასმე წაეაწყდითო. მაგრამ მათ შორის ყველაზე უფრო მართობდა, რასაკვირველია, მამალი ინდოურების გაფხორვა, მანქანის ძრავისებური დაქშინება და შემდეგ თითქო შეტევაზე გადასვლა. თავისიანებზე ეტყობა გავლენა ჰქონდა მათ მრისხანებას, მაგრამ მე კი, 3 თუ 4 წლის -ვაჟაკი“, ვერ დამაშინეს. სამაგიეროდ, ერთმა ღორმა ძალ-ზე დამიბრყვა. ეს იყო ჩვენებური, მოგრძო ღორი და არა ჩამრგვალებული და ზანტი იორკშირულ „მაშკა“-სავით, ქო-ნისაგან საძრაობა რომ აღარა აქვს. ცოცხალი იყო, მოძრავი, ფიცხი, მტკრის ფერი და შავზოლებიანი, რკოს მიიერთმევდა ხშირ მუხნარში. რომ მივუახლოვდი და ახლო დაკვირვება

დავუწყე, თითქო იუკადრისაო არა მკითხეს მიახლოვება, ერთი წემომიტია, ერთი დაშიფრინა ისე, რომ ჩვენს ოდამდე სულ „ქულმოვლეჯილი“ გავრბოდი. შექმდეში უფრო პატივისცემით ვეპყრობოდი ჩემს გამწბილებელს, კარგა დავიხსომე მისი „ვინაობა“; მაგრამ საერთოდ კი ღორების კრებულს, მათ ღრუტუნს, მათ ტალახში ჩუჩქნას, სალაფავით მათ დაპურებას, სულწასულობით ერთიმეორეს რომ კბენენ ზოგჯერ და აკყვირებენ. შორიახლო სიამოვნებით შევცქეროდი. მხოლოდ კიდევ უფრო მახარებდა ჯირკვივით მიგდებული დედა-ღორის დანახვა. გოკები რომ მკერდს მისევინან და თავისებურ ბედნიერებას რომ განიცდიან დედაც და შვილებიც. მართალია, მაშინ მათი „ბედნიერების“ მე არა მესმოდა-რა, მხოლოდ ვგრძნობდი ინსტიქტიურად, რომ აქ რაღაც კარგი აშბავი ხდებოდა და იყო სიმშვიდე და... „სათნოება ქვეყანასა ზედა“.

ამგვარად შევეჩვიე შინაური პირუტყვებისა და ფრინველების სიყვარულს, რაიც ბოლოს დაგვირგვინდა კეთილშობილი ცხენის დიდი ტრფიალით.

ზოგიერთი ცხენი ჩემთვის მაინც ისევე სიყვარულით არის გასახსენებელი, როგორც რომელიმე ჩემი კარგი მეგობართაგანი ადამიანებში. ზოგი ცოტა ხნით, ზოგი უფრო ხანგრძლივ შემხვედრია და გაუტაცნოვარ, ისე როგორც რომელიმე მოხდენილ, მიმზიდველ ქალს ცხოვრებაში და ამიტომ მათ ისე ვერ შეველევ, რომ გზადაგზა საუცხოო არსებანი არ გავიხსენო.

რგანშივე ვიგემე პირველად ვენახში ჩასვლა და იქ მოწყვეტილ ყურძნის ხლება. ეს იყო ბიჭია ლეყავასას. ამ მთაკაცმა, — ძალიან წარმოსადეგი ვინმე იყო. — თვითონ ჩამიყვანა თავის ვენახში და ჩემი ხელით მომაწყვეტინა გაქარვისფერებული საუცხოო მტევანი ბუდეშურისა.

იქვე გავეცან საოცარ სოკოს — ნიყვს, მინდვრად, ტყაპახლოს, გაფცქვნილ კვერცხივით თეთრად რომ წამოგორებულა და შემდეგ, როცა დრო მოვა. ეს კვერცხის ცილა რომ თავში გასკდება და პაწია წითელი ქოლგა თავს ზევით ამოყოფს. ცხელ კეცზე მარილ-წყარის მოსწვავდნენ და გემრიელი რამ იყო, მაგრამ იმას მაინც არაფერი შეედრებოდა, როდესაც ბებიაჩემის, მარიამ აბაშიძის ქალის გადია, მამისოული, რო-

გორლაც შექაზმავდა პაწია ნაკრებად ქოთანში ჩაკრილ ნიყვის სოკოებს და უცნაურ რამ შექამანდს შემოგვძღვნიდა. მამისოულისაგანვე მახსოვს ქოთნითვე მოდულებული რძე. უ, რა გემრიელი იყო! მას შემდეგ რამდენჯერ დამიღვებია სპულენძის კარდალში მოდულებული რძე, მინახავს ამ კარდალში როგორ ქაფქაფებს ეს შემერგო სითხე, მაგრამ მამისოულის ქოთნით მოდულებული მაინც სულ სხვა იყო. უთუოდ ძალიან ძლიერია ბავშვობის პირველი შთაბეჭდილება და ისიც გემოვნების სფეროში.

თვითონ მამისოული? რატომ არ მახსოვს უფრო გარკვევით? ან რატომ არ ვიცი ამ საუცხოო პიროვნების მეტი ასავალ-დასავალი? მახსოვს ერთი ტან-მოჭრილი, თმა-თეთრი, პირ-მწყაზარი მოხუცი, აგურისფერი კაბა ეცვა მულამ, ჩემ მახსოვრობისას, ამისთანავე თავსაფარი და იყო მეტისმეტად ალერსიანი და ჩვენი განმეზივრებელი.

მადლობით მიიღოს ჩემი სიყვარულით გახსენება მისმა უთუოდ კეთილმა გულმა, ვაი, რომ ნირვანაში ჩაღუპულმა, მაგრამ ჩემთვის მაინც მცოცხლებმა და საამურად მოსახსენებმა.

რგანში სააგარაკოდ სხვა მებატონეებიც მოდიოდნენ და მათ შორის, უწინარეს ყოვლისა, მახსოვს დათა აბაშიძე, მეტად თამამი კაცი, ერთ დროს რუსეთის ხელმწიფის კარზე „კანვოით“ ნამყოფი და სამხედრო პირი.

მიუხედავად თავისი თავადიშვილური დარდიმანდობისა, ხელგაშლილობისა და სხვა ასეთი ჯენტლემენური ღირსებისა, ბევრი სხვა კვლავ თავადიშვილური ნაკლულოვანებაც ახლდა: იყო ამპარტავეანი გლეხებთან და თუ გაუვიდოდა, დაუნდობელიც. ჭურდა გლეხს მულამ ეგრძნო, რომ ის ბატონი იყო, „არ იმისი დასადარი!“ და ერთხელ... ჩემ პატარობისას ს. რგანის ჩვენს ეზოში ესეთი სცენის მოწმე გავხდი:

დათა აბაშიძეს ყურში ხელი ჩაუვლია ერთი კარგა მოყვანილი ვაეკაცისთვის და ჩვენი ოდისაკენ მიჰყავს. თან „ვირო, ვიროვო!“ ეძახის.

ვაეკაციც მორჩილად მოჰყვება.

არ ვიცი, რა იყო მიზეზი თავადის ასეთი შემოწყრომისა,

მხოლოდ ეს კი მახსოვს, აივანთან მიიყვანა მისი „მსხვერპლი“, იქ ხელი უშვა, კიბესთან დატოვა, თვითონ ზევით ავიდა და იქიდან გადმოსძახა: შენი ბედი, რომ დადიანის ყმა ხარ, თორემ ჩემი რომ იყო, შენ სეირს გაჩვენებდიო.

ეს „ყმა“ როსტომ კავთელაძე იყო. თავმომწონე გლეხი, შეძლებული და სოფლის თვალსაჩინო პიროვნება. ოდესღაც ჩვენი ოჯახის ხელოსანი, ეხლა მამიჩემის მიერ სრულიად განთავისუფლებული და, მამასადამე, არამც თუ სხვისგან, არამედ საკუთარ მებატონისაგანაც დამოუკიდებელი, მაგრამ უთუოდ ისე ღრმად იყო მის პიროვნებაში ძველი ბატონყმური დამოკიდებულება გამჭდარი, რომ კნიაზ კაცს, ჩინოსანს და ისიც აბაშიძეს, შეურაცხყოფაზე სამაგიერო არაფერი ჰკადრა და პაწია ბავშვივით გაჰყვა, ყურში ხელჩაველებული; აბაშიძე!

მე შემდეგში შევიგენ, რომ ს. რგანში, განსაკუთრებით მოხუცებულები, სწორედ აბაშიძეებს თვლიდნენ, თუ ესე შეიძლება ითქვას, თავის მემკვიდრეობით ბატონებად. სხვები კი, განსაკუთრებით ლიბერალი ლოღობერიძეები, და მამაჩემიც, რომელთაც „გლეხობაც ადამიანებად მიაჩნდათ“, ვერ იწვევდა მათში მებატონეების შთაბეჭდილებას. თუმცა ეს მათ ხელს არ უშლიდა, რომ მათი რიდი და პატივისცემა ჰქონოდათ. მაგრამ ამ გრძნობებს სულ სხვა სათავეები ჰქონდა. აბაშიძე კი მათი ღვთის მიერ მინიჭებული ბატონი იყო, უზუნაესი პიროვნება და მათი შიში და კრძალვა ძვალ-რბილში ჰქონდათ გამჭდარი.

უთუოდ ამით აიხსნება მაშინდელი კავთელაძის მორჩილება-მეთქი. მინდა ვთქვა.

როსტომ კავთელაძეს კი თავისი ტრაგიკული თავგადასავალი აქვს.

თავადერებული კაცი იყო, ფეხმოდგმული და თავისიანებში დაურიდალი.

ჰყავდა ერთი მეზობელი. ჯღერიას ოჯახი, რომლის დაცულშვილებული უფროსი ვაჟი წლობით იყო შორეულ რუსეთში საშოვარზე გადავარდნილი. შინ კი უმცროსი, მცირეწლოვანი ძმა და ახალგაზრდა ცოლი ჰყავდა დატოვებული. აი

ამ ქალს დაუახლოვდა კარმაგი როსტომი და ვინ იყო მათი ხელისშემშლელი, მაგრამ ბოლო ხანებში ქალმა და როსტომმა შეამჩნიეს, რომ ახალგაზრდა ვაჟმა მათ საქციელს ყურადღება მიაქცია. იფიქრეს — გავცემსო და ერთ მათთვის საშინელ ღამეს ნაჯახით დაჰკლეს მცირეწლოვანი ვაჟი. რასაკვირველია, ეს საქმე არ დაიძალა, გადაეცა სასამართლოს და ორთავეს ციხე-ბირში გადასახლება გადაუწყვიტეს.

მახსოვს, ქუთაისში, ჩვენს ბინაზე, პირჩამობნელებული როსტომი რომ დადიოდა და, როგორც შემდეგ გავიგე, ბე-ბიაჩემს სთხოვდა ესაშვალნა მისთვის მამას მეოხებით. ბე-ბიასაც ებრალებოდა თურმე წვრილი ცოლ-შვილის პატრონი, მისი ნაერთგულევი როსტომი, მაგრამ, ცხადია, ღეთისმოსავემა და ქრისტიანული მიტევების გრძნობით აღსავეს ბებიანაც ვერ უშველა აშკარა დამნაშავეს.

მთელი ეს ეპიზოდი იმიტომ გავიხსენე, რომ ეს ტრაგედია ადამიანისა პირველი იყო ჩემს ცხოვრებაში, ე. ი. მისი გაცნობა, და მთელს მის სიგრძე-სიგანეს მაშინ კარგად ვერ ვგრძნობდი, მაგრამ გულში გაურკვეველ სევდის მომგვრელ მოგონებად მაინც ჩამრჩა.

4

სხვა კიდევ ვინ მახსოვს სოფ. რგანში ჩვენი ბავშვობის დროისა? — სახიერი, გვარად ხვედელიძე (სახიერი — ეს სახელია). ხვედელიძეები რგანში ბლომად ესახლენ სხვადასხვა უბანში და ერთი მეორის გამოსარჩევად, გვარის გარდა, სხვა შერქმეული სახელებაც ჰქონდათ, მაგ. ხვედელიძე — ნადირა-შვილი. ხვედელიძე — ბაბილუა და სხვ.

საერთოდ აქაურ გლეხებს ესეთი შერქმეული სახელები ან მთელ მოდგმას ან ცალკე პიროვნებას თითქმის ყველას ჰქონდა. მაგ., ჭლერია, ბაჰია, კოტორა და სხვა.

ესეთივე შერქმეული სახელები გამიგონია დასავლეთ საქართველოში, იმერეთსა და სამეგრელოშიც, მაგრამ აქ თავადაზნაურებშიც იყო გავრცელებული ეს ზედმეტი სახელები, თუმცა ზემოიმერეთში, მაგ., იმავ. აბაშიძეებსაც ჰქონდათ ესეთები: ამილაბრიშვილი, ლაბუაშვილი და სხვ.

სახიერი ბაბილუების ბუღის იყო და დიდი ოჯახიცა ჰქონ-

და, პატრარქალური გლეხის გაუყოფელი ოჯახი. მთელი მოდგმა ამ ხვედელიძეებისა ერთ ჩაფერდებულ კუთხეში ცხოვრობდა კიათურის გადასახედსა და სოფ. ნავარძეთს შორის. მთავარ ეზოში, რომელიც ამ მთელ ოჯახის უფროსსა და პაპას, სახიერს ეკუთვნოდა. იდგა ერთი კარგა მოზრდილი ფიცრული, შემდგარი რიყის ქვისაგან აგებულ კედლებზე. მხოლოდ ერთი მხრით ფიცრული შენობა პირდაპირ ეზოში გადიოდა, მეორე მხარეს კი ორსართულიანი ნაგებობის იერი ჰქონდა, რადგანაც ქვის კედლები ამოყვანილი იყო ეზოს ჩაფერდებულ ნაწილში. ამ ქვემო სართულში უფრო ზამთრობით ცხოვრობდნენ, ზაფხულობით კი იყო ოჯახის საწყობი თუ საკუქნაო. საერთოდ საკირო საოჯახო ნივთთა შესანახი. პური ბეღელში ჰქონდათ, ამ ფიცრულის ცოტა მოშორებით მდგარ პაწია. კოშკისებურ შენობაში. სიძინდა — სასიძინდეში; რომელსაც საჩხერულს უწოდებდნენ. ეს იყო, როგორც ჩვენში, ისე ყველგან მაღალ ოთხ ბოძზე შემდგარი დიდი ყუთით ნაგებობა, ყვერით გადახურული. კედლები, კალათრით ვიწრო წნელით ჰქონდა ლამაზად მოწნული და ჰაერის დენაში დიდი იყო. რომ სიძინდის ტაროები არ „ჩახურებულყო“. მე მგონია თანამედროვე ქართველმა მკითხველმაც იცის, რომ ესეთ სასიძინდეებში სიძინდს ტაროებით ინახავდნენ და არა დაფშენილ, კაკალ სიძინდს. ისეთი გადარჩეული სიძინდისა და ფქვილისათვის ბეღელი იყო განკუთვნილი; ანუ ხულა, სადაც საერთოდ სურსათ-სანოვაგე ინახებოდა. ამავე ეზოში იყო ბოსელიც, საღორეც და სხვა ასეთი საოჯახო შენობები.

წყალი ახლობელ საუცხოო წყაროებიდან მოჰქონდათ. რგანში ხომ ყოველ კუთხეს თავისი საკუთარი და მშვენიერი წყარო აქვს. არ არის არც ერთი ისეთი მოსახლეობა, უბანი მცხოვრებთა, რომელთაც თავიანთ საცხოვრებლის შუაგულ წყარო არ ჩამოუდიოდეს და ასე იყო ბაბილუნივეშიაც.

1 თორნე კი უთუოდ გადახურულ რომელიმე ესრეთ-წოდებულ „სამზად“ შენობაში აქვთ მოთავსებული. აქვე ვარცილი ფქვილის მოსახელი და ხშირად აქვე კერის შუა ცეცხლი, სპადაც ჯაკვზე ჩამოკიდებული კარდალი ჰკიდია სხვადასხვა რამის. მოსახარმად, თახის ქოთნები, ჩამწყრივებული ცეცხ-

ლის პირად, კვლავ სხვადასხვა საკმლის დასამზადებლად, და პატარ-პატარა კეცები, ეს უკვე ხაჭაპურებისა და ადგილობრივი, განსხვავებული გომიჯების გამოსაცხობად.

გომიჯს ჩვენი ქვეყნის სხვა კუთხეშიაც ეძახიან ერთგვარ პურის ნამცხვარს, მაგრამ რგანულ გომიჯისთანას კი არსად შევხვედრივარ.

ჯერ ერთი. რომ ეს გომიჯი უსაფუაროდ ცხვება მრგვალ-მომცრო კეცზე, გამომცხვარს თითქო ურმის თელის სახე აქვს და, როგორც ახლად გამომცხვარი, ისე შემდეგშიაც, მეტად გემრიელია და, როგორც რგანში იტყვიან „პოხიერი“. მთავარი კი ის არის, რომ კარგა მშრალ ალაგას შენახული ეს გომიჯი თითქმის მთელი კვირა ინახება და საკმელად გამოსადეგია. ხანდაზმული მკვიდრნი ამბობენ: — მათ დროს ესეთი გომიჯები ძალიან გამოსადეგი იყო, ომის ან ხანგრძლივი მოგზაურობის დროს.

მაგრამ მე ძალიან ავცდი სახიერსა და მის პიროვნებას.

ჩემსობას, ეს უკვე როდესაც მე დაეჯეკაებული ვიყავი, სახიერი ამბობდა, ას წელიწადს გადაცილებული ვარო. ანგარიშობდა 110 თუ 112 წელიწადს. მე ბავშვობიდან მახსოვს მისი მართლა სახიერი, მწყაზარი სახე, ნამდვილი ქართული იერისა; წვერგაპარსული მუღამ სუფთად, თვით ღრმა მოხუცებულობის დროს, ლოყებსავე, წითური კაცი, ხუჭუჭა თეთრი თმებით და მოგრძო, ხშირი უღვაშებით. არ აკლდა არც თვალს და არც კბილს. მუხლმაგარი კაცი იყო, მაჯაგი ქვეითი, სიარული არ ეზარებოდა; და საერთოდ თავის დროზე თურმე მეტად გამარჯე და შრომისმოყვარე ადამიანიც იყო. ყველაფერი „ხელიდან გამოუდიოდა“, მოუწყინარი ყანის შუშა, ვენახის იშვიათი მომვლელი, საჭიროების დროს ღურგალიც კი, აჩაჩა ურემს ხომ სიამოვნებით „გამოჩლოგნიდა“ ზოლმე და, თუ გაჭირდებოდა, რკინის მკვლელადაც გამოდგებოდა.

საზრიანი კაცი იყო, დაკვირვებული, დინჯი მოსაუბრე, ტკბილ-მოქართულე, მოუფიქრებლად სიტყვას არ იტყოდა, მაგრამ ეს გულჩახურულობის გამო კი არ მოსდიოდა, პირიქით, მეტად თანაზიარი კაცი იყო, ხალისიანი, ერიდებოდა

მსუბუქ ლაყბობას და არც სხვისი მოსწონდა ხოლმე. მოწმე ვარ მისი, რომ თუ ვინმე ესეთ, მისი აზრით, უშინაარსო ლაპარაკს მოჰყვებოდა, თუ შინაური იყო, ლმობიერად შესტუქსავდა და გააჩერებდა, თუ გარეული ან მოსარიდალი, მაშინ დიდის მოხერხებით საუბარს სხვა საგანზე გადაიტანდა.

მის ოჯახში პურ-მარილი უხვი იყო და საქმელ-სასმელი „თავსაყარი“, განსაკუთრებით სტუმრებთან, მაგრამ მეტრის-მეტი ღვინის დაღვევა მას არ უყვარდა. რა თქმა უნდა, ეს პურძვირობით არ მოსდიოდა.

ხომ არ იყო ეს იმის მაჩვენებელი, რომ ჩვენს წინაპრებს, უმეტეს დროში, ლოთობა არ ჰყვარებიათ. არც მაღალ უენებში, წარმოიდგინეთ, და ეს ძველი ჩვეულება კარგა ხანს იყო ჩვენს გლეხობაში შემორჩენილი, განსაკუთრებით ისეთ ადამიანებში, როგორც სახიერი იყო.

თავიანი კაცი რომ იყო სახიერი, ეს იქიდან სჩანს, რომ დიდ, გაუყრელ ოჯახს სიკვდილამდე თვითონ განაგებდა.

ჰყავდა შვილები, შვილიშვილები, ამათი შვილები, რძლები, სიძეები, მგონი ორმოცდაათ სულამდე იქნებოდნენ ყველანი და ამ პაწია ლაშქარს ყოველ ცისმარე დღეს სახიერი ანაწილებდა სხვადასხვა სამუშაოზე: ყანაში, ვენახში, სამწყვესურად, წისქვილში, ტყეში, ბაზარზე, ქალებსაც უჩენდა თავთავიანთ საქნარს: ხორბლის დარეცხვას, გაშრობას, საქსოვი მასალის მიჩენას, სადილ-სამხრის თუ საუზმის დამზადებას და სხვა საოჯახო საქნარს.

ყოველ დილით, ალიონზე, პირდაბანილი, დასუფთავებული, დიდი ყვარჯნით ხელში, თუ ზაფხული იყო, ჩამოჯდებოდა სახლის წინ მდგარ რომელიმე ჩრდილოვან ხის ქვეშ, ეცვა ლურჯა ლაინის გულისპირი და ზედ შინ მოქსოვილი შალის ჩოხა, უფრო რუხი ფერისა, თავზე რაქული იერის, ფრთებჩამოშვებული შალისავე ქუდი. ფეხებზე კვლავ შალის პაკიქები, შინაურივე მოქსოვილი მატყლის წინდები და ტყავის, კიდევებში მოგრებილი, თასმიანი ქალამანი, წელზე ერტყა ტყავის სადა ღვედი და ცალ გვერდზე, შუათანა ზომის ქარქაშიანი დანა. არავითარი სხვა იარაღი ზედ არ ჰქონდა, არც ხანჯალი. არც დამბაჩა. ლეკურს ხომ საერთოდ გლეხები არ

ატარებდნენ. ეს თითქო თავადაზნაურობის პრივილეგია იყო. ჩოხასაც საქილეები ჰქონდა მოკერებული, მაგრამ შიგ მასრები თითო-ოროლას გარდა არც ჰქონდა გაკეთებული. ამ თითო მასრაში, ქილაში კი უფრო ხშირად იყო სადგისი და ზოგჯერ თოფის წამალიც მოთავსებული.

სახიერი კი იქდა და ოჯახის მუშა წევრებს განკარგულებას ძღვედა — ვინ სად წასულიყო და რა საქმე გაეკეთებინა.

როგორც ვთქვით, ასე იყო სულ სიკვდილამდე და მისი ავტორიტეტი ოჯახში, როგორც შემდეგში მისი ნაშიერები გადმოშცემდნენ, ერთხელაც არ შერყეულა. ისეთი იყო მაშინ ადათი, ჩვეულება.

მსიანები შენდევშიაც ვაინც სათნოდ იგონებდნენ გარდაცვლილ პაპას.

სიკვდილითაც მეტად უცნაურად მოკვდაო, მეუბნებოდნენ.

— კარგად იყო, კარმაგად, ჩვეულებისამებრ იმ დილითაც ყველანი დაგვარიგა და გაგვარიგა საქმეებზე, ისაუბმა და შემდეგ ცოტა „მიირულა“. ეს იყო და ეს, შემდეგ აღარ გამოუღვიძნია. თავის სადარაჯოზე დალია სული. არც ერთი კენესა, არც ერთი ოხვრა არ აღმოხდენია, არავითარი „სულთა ბრძოლა“, მომაკვდავებს რომ სჩვევიათ ხოლმე. ნატრობდა კი ბოლო ხანებში, დრო არის მიმიღოს უფალმაო, და თითქო სრულიად არ ეშინოდა სიკვდილისა, თითქო მის შესაგებებლად მზად იყო.

კარგი სიკვდილია, როცა შეურიგდები შეურიგებელს და დასძლევ შენს თავში ცხოველურ შიშს გაქრობისას. ამას დიდი სულის ძალ-ღონე უნდა და ზოგიერთებს უთუოდ შეაღამთ ესეთი.

... მე მჯერა ესა!

თუმცა მეცნიერებაც ხომ ამას ამბობს. რომ ადამიანი ამქაშად არ კვდება ნორმალური, ბუნებრივი სიკვდილით. მასი ბუნება. ზუნდა ძლიერ დაავადებულიც იყოს, ჯერ კიდევ არ არის გაცვეთილი, ანუ უკეთ. სრულყოფილი და საზღვარს მისული. სადაც უნდა ბუნებრივი დასასრული მოვიდეს. მეცნიერება უნდა ეცადოს, ამ ბუნებრივ დასასრულამდე ისე მიიყვანოს ადამიანი, რომ მისთვის აღარ იყოს სიკვდილი

მტკივნეული. მეცნიერებაც უთუოდ ცხოვრების დაკვირვებებთან გამოდის და, ჩემის ფიქრით, სახიერიც ერთ-ერთი საობიექტო მოვლენაა მეცნიერებისათვის.

5

სახიერის გარდა რგანში ჩემთვის გასახსენებელია მეორე პაროვნება. ეს არის სისო შეყრილადე. ეს სულ სხვა ტიპის, დაღურდანა, ეშმაკი, მაგრამ მაგარი გონების პატრონი. ის კაცი ბავშვობიდანვე მყავს გაცნობილი სწორედ რგანში, მაგრამ მას შემდეგ ჩემს ცხოვრებაში დიდხანს ვიყავ მასთან მეგობრად, რგანის გარდა, საკიროების დროს, ხშირად ნეწვეოდა ხოლმე ქუთაისს, სამეგრელოში და ამის გამო ის ეცნობოდა სხვა ჩემს მეგობარსაც. ერთმა მათგანმა კი სისოს გაცნობის შემდეგ მითხრა — მაგას რომ სწავლა-განათლება ჰქონდეს, ბისმარკივით კაცი იქნებოდაო. ბისმარკობისა არ ვიცი. მაგრამ სისო მართლა შეიძლება ერთი მაგარი ქართველი ინტელაგენტი გამოსულიყო თავისი გონებაგაჰქრიაზობის გამო და ფილოსოფიური აზროვნების მიდრეკილებით. საოცარი ლაპარაკი იცოდა: მკვეთრი, შეუპოვარი, დამცინავი და ზედმიწევნილი. აღებული საგანი თითქოს თავის ფართო, ნიჩბივით გაშლილ ხელისგულზე ჰქონდა ათამაშებული, ხოლო როდესაც უნდოდა რაიმე თავის სასარგებლოდ „მოეკვარახჰინებინა“, მაშინ ისე დაბურდავდა ნათელ საქმეს, რომ აუკარგა არ ჩაუკვირდებოდათ საგანს, ვერც თავს გაუგებდით და ვერც ბოლოს.

თუ ვინმეს ხელის გადაფარება უნდოდა თავის სოფელში, ესე მოგაჩვენებდათ, რომ მასზე უსაწყლესი კაცი არავინ იყო, და თუ ვინმეს მტრობა ჰქონდა გულში ჩადებული, იმაზე უბოროტესი ამ ქვეყნად აბა ვინ იქნებოდა.

ძველი დროის სამინისტრო კაცი იყო!

მე იმას ერთი პატარა ჰერცოგი ვეგონე და ამიტომაც მინისტრულად მექცეოდა.

მან იცოდა, რომ მე კნიაში ვიყავ, მემამულე, რგანში შავი ქვა-დამარჩა სამემკვიდროდ; ეთოხევევში — გიშერი, სავანესა და ცხანში — კვლავ სამემკვიდრო, სამეგრელოშიც

ცოტა რამ და აბა როგორ არ უნდა ეპლიქვენელა ჩემს წინაშე, როგორ არ უნდა ეხმარა ყოველგვარი ხერხი სასახლის კარის კაცის დიპლომატიისა. მხოლოდ ხშირად „პირში ჩალაგამოვლებული“ რჩებოდა, როდესაც შემატყობდა, რომ სხვაგან ჰქროდა ჩემი გონება „ჩემმან თავისა წონამან“ (თეატრი, მწერლობა). ყოველდღიური პრაქტიკული ცხოვრება არ მიტაცებდა. ცუდი მესაკუთრე ვიყავ. ამის შეგნება ცივ წყალს გადასახამდა მის აფორიაქებულ ოცნებას და... ცხადია, მთელიდა უღირს მემკვიდრედ ფეოდალ აბაშიძეებისა. და უთუოდ გულდათუთქული იყო, მაგრამ რას იზამდა, უნდა შერიგებოდა ესეთ სუსტსა და თავის ინტერესების შეუფგნებელ მებატონეს.

ხშირად გულში მეცინებოდა: სისო არის ჩემი ვიტტე, ეს მოკახრაკებული მინისტრი ნიკოლოზ მეორისა, მე კიდეც ნაგის ხელში ნიკოლოზი ვარ, რომელსაც ეშინიან თავის მინისტრისა.

ვან იცის, შეიძლება, მინიატურულად ვგავდით კიდეც ამ ხალხს ჩვენს როლში, მე და სისო.

ეს კია — მე არ მეშინოდა სისოსი, მიყვარდა კიდეც. მხოლოდ ძალიან მაინტერესებდა მისი მძლავრი პიროვნება, რომელიც ცხოვრების სიღუბჭიერემ მიაბა სოფლის წვრილმანებსა და მურებს საქმეებში.

მე ის მახსოვს ბავშვობისას ფეხშიშველი, მეტად ღარიბი ოჯახის შვილი, შემდეგ, როდესაც ერთგვარ ხელოსანივით იყო ჩვენს ოჯახში, ქალამანიც ჩაიცვა და ბოლოს, როდესაც ჩემი ჩიჩერონე გახდა ზემოიმერეთის სოფლებში, ეცვა უკვე ბაზარში ნაყიდი ექვსაბაზიანი ჩუსტები.

ბოლო ხანებში კარგადაც დაესახლა და, რაც მთავარია, შეილებს ასწავლა და ფეხზე დააყენა.

ისე კი თვითონ არსად არ უმუშავნია. არც შავქვაში მუშად, არც გადაშზიდველად, როდესაც მისი მეზობლები, მიუხედავად მრეწველთა ექსპლოატაციისა, მაინც იძენდნენ ფულებს და ოჯახს რგებდნენ, არც თუ მაინცდამაინც ყანის მუშაობაში იწუხებდა თავს. ის უფრო გამრიგე იყო, შუამავალი გლეხობაში, მედიატორე სადავო საქმეებისა და მებატონეებ-

თანაც საკირო კაცია — მიწის გაყიდვაში. შავი ქვის იჯარით გაცემაში და სხვ. ამეებში კი იოებდა გასამრჯელოს და სხვის პურმარილზე ხომ გადაყოლილი იყო.

მართალი უნდა ითქვას: თვითონაც, თავის ოჯახში, ხელგაშლილი კაცი იყო, ნაგოაზ როგორც ღარიბსა და ხელშოკლებს; ერჩია სხვისას სტუმრობა.

ჩემი ჩასვლა მისთვის ერთგვარი დღესასწაული იყო. რადგან ზოგი ჩვენი ოჯახისადმი პატივისცემის გამო და ზოკოც ჩემთან რაჰმე საქმის გასაკეთებლად — შავი ქვის ნაკვეთის იჯარით ასაღებად ან სულ შესასყიდად. ხშირად მპატიჟობდნენ და ჩემთან განუყრელ სისოს ხომ სწორედ ეს უნდოდა. ის კი არა, სისო ზოგჯერ თვითონ შეთხზავდა ისეთ გარემოებას. რომ ვისმეს უთუოდ უნდა მიეწვიე და ამის პირველი ავან-ჩავანი სისო იყო.

ძალიან უყვარდა ღვინის სმა და მართლაც კარგადა სვამდა. ტყუილი არ იქნება რომ ვთქვა, რომ ერთ კოკა ღვინოს ერთ იჯრაზე თავასუფლად დალევდა და... არაფერი. ამის შემდეგ შეეძლო თავის ღინჯი ნაბიჯით რგანიდან საჩხერემდე (კარგა დიდი მანძილია, მგონი 12—15 კილომეტრი იქნება) ფეხშიშველად ევლო და იქაც საქმე გაეკეთებინა.

ეხლა როგორი პატივისცემა იცოდნენ სოფლად. მასპინძელი ხომ გემასპინძლობდა შეძლებისამებრ და ყოველივე უხვად იყო, მაგრამ ეხლა ახლო მეზობლები მოიტანდნენ თავიანთ წილს. თითოეული მათგანი ცხრა გომიჯს. ცხრა ხაჭაპურს. ერთ მოხარშულ დედალს და ერთ ხელდოქ ღვინოს. ამ ხელდოქში ერთი სამი ლიტრა მაინც ჩადის უთუოდ. ეხლა წარმოიდგინეთ, რა ხორავი დაგროვდებოდა სუფრაზე და რამდენი ღვინო.

ერთხელ მე ეს ყოველი ზედმეტად მივიჩნიე და ცალქვე ვუთხარი სისოს. რომ ამას ნუ სჩადიან. თუ ჩემგან რამის გაკეთება უნდათ, მე შემოძლიან ისედაც გავუკეთო-მეთქი. თორემ ხალხს ხარჯი მოსდის და რატომ უნდა შევაწუხოთ-თქო.

სისოს სახე მოედრებლა. არ მოეწონა ჩემი „შეხედულება“ და მორიდებით, მაგრამ მაინც შემომპიტია:

— აბა რას პრძანებ, როგორ გეკადრება! შენი რისხვა არა მაქვს, თუ ასე არ მოიქეცი, სულ აგიგდებენ, არაფრად არ ჩაგაგდებენ, იმ მამულსაც ხელში ჩაიგდებენ, შენდანიება-დაურთველად დაიმუშავებენ და, შენი ამბავი რომ ვიცი, ახლა სულებში არ წახვალ საჩივლელადო.

ამგვარად სისომ ჩემს სიკაბუქეში პირველად გამაცნო, თუ რა დიდი მნიშვნელობა აქვს პურმარილს ადამიანთა ცხოვრებაში და ისიც განსაკუთრებით იმერეთში.

მე შემდეგში კარგად გავიგე, რომ პურმარილზე იყო ბევრი რამ დამოკიდებული.

სისოზე კიდევ ბევრი რამ ითქმის, მაგრამ ჩემი ცხოვრების ზოგიერთ ეპიზოდში უთუოდ კიდევ შევხვდებით ამ შესამჩნევ პიროვნებას და ამიტომ კვლავ ვუბრუნდები ჩემი ბავშვობის ამბებს.

6

რგანიდან მახსოვს, ერთ ზაფხულს სოფ. სავანეს გავემგზავრეთ. ცხენებით, რასაკვირველია. კიათურისაკენ ფერდობს რომ გადავადექით, მახსოვს, რალაც უსიამოვნო ქარი ჰქროდა.

საკვირველია! რატომ არის, რომ ზოგჯერ სრულიად უბრალო რამ ასე ძლიერ დაგამახსოვრდება, რომ შემდეგ მთელს შენს სიცოცხლეში გახსოვს. ისეა ეს სიქსიქა ქარიც, თითქო ეხლაც უსიამოვნოდ მივლის მთელ ტანში. ქარი შემოდგომის იყო, რადგანაც სავანეში რო მივედით, იქ უკვე რთველი იყო გაჩაღებული, აქ კი, რგანიდან რომ გადმოვედით, სადამო ხანი იყო და არა სასიამოვნოდ უბერავდა, მაგრამ სავანეში დაგვიამდა და როდესაც მასპინძლის სახლში შევედით, იქ ხომ სულ გამომიკეთდა გუნება. მრავალრიცხოვანი ოჯახი, კარგი შესახედაობის ადამიანები, მხიარული და თავაზიანები, ქალები, განსაკუთრებით ახალგაზრდები, ქალაქურად დარიულები, მაშინდელას ტიურნურებით და წელში გამოკირებული კორსეტებით. ეეკვა, სიმღერა, გართობა, ეს ყოველივე უცბად დატრიალდა ჩვენს გარშემო და უთუოდ დადლილიც ვიქნებოდით 5—6 წლის ბალლი კარგა მანძილის გავლით და მგზავრობით, მაგრამ საერთო ხალისიანმა გარემომ მეც მიმიპყრო.

ეს იყო ხახული აბაშიძის ოჯახი, შეძლებულის და დარბაისელი აზნაურისა. გ. წერეთელს ამისთანა ტიპებიც ჰყავს „კუდაბზიკებთან“ ერთად თავის რომანებში, როდესაც ზემომიერელ აზნაურებს ეხება.

ხახული ბიძად ერგებოდა ჩვენს განთქმულ არტისტს ვასო აბაშიძეს და მე სწორედ ამ სოფელში მაქვს ნახული ვასოს მამის, ალექსი აბაშიძის ორსართულიანი და გრძელაივნიანი სახლი, რომელიც ხახულის ეზოს ზედ ეკრა.

იქვე ვნახე პირველად ყურძნის დაწურვა: ფართო და გრძელ საწნახელში იდგნენ ფეხშიშველა სოფლის ახალგაზრდები და ქარვისებურ მტევნებს ჰყლეტდნენ ფეხით. საწნახელს გამოსადინარში გრძელი ხის ღარი ჰქონდა მიდგმული და იქიდან შორიახლო ჩამარხულ მარნის ქვევრებში მიმდინარეობდა ტბილი ნაქარი.

ამის ცქერამ ერთხანს დიდად გამართო.

აქვე გავიცან პირველად აქაური გლეხი, მამას მორღუ, ჰალარა კაცი იყო და თავზე თურქული ფესი ეხურა. სხვას ვერას ვიტყვი მასზე შესანიშნავს, რადგან მეტი არაფერი მახსოვს მისგან. ეს კი ვიცი, რომ მას მორიდებით და პატივისცემით ეპყრობოდა ყველა, რადგან ის მამას მორღუ იყო და მორღუ ხომ ჩვენში საერთოდ მეტადსაპატიო კაცი იყო გაზრდილის ოჯახში და გაზრდილის მეგობრებისათვის.

ასეთივე პატივისცემით ეპყრობოდნენ აქაურსავე გლეხს, დათია ამჟოლადეს მამაც და ჩვენი მასპინძლებიც. ის ერთ დროს ხელოსანი ყოფილა ბებიას ოჯახისა და თავისი დარბაისლური გონებითა და გამჭრიახობით დაუმსახურებია, როგორც შემდეგში გავიგე, ადგილობრივი გლეხებისა და მეპატრონეების პატივისცემაც კი. უთუოდ დიდი დიპლომატიური ნიჭი გააჩნდა ამ ღირსეულ კაცს, რომ ასეთი სიყვარული ჰქონდა წაძღვანილი „გზად და ხიდად“ ორ შეურიგებელ ფენას შორის. შემდეგში ეს პატივისცემა აღამიანი მახსოვს სამეგრელოშიაც, როცა ის იმერეთიდან ჩამოგვიტანდა ჩვენს სამამულოში მოწეულ საპალნეებით ჩალვადარის ცხენებზე პურსა და ღვინოს, ტბილისკვერს და ჯანჯუხებს და ესეთი თავის მოსვლით დიდად გაგვახარებდა დიდსა და პატარას.

სავენედან წაველით საბაჟოს, აქ ცხოვრობდა ქსნის ერისთავი კონსტანტინე, რომელსაც ცოლად ჰყავდა ჩვენი ნათესავი. ნიჟარაძის ქალი ნატალია, საუცხოო სილამაზის ქალი, ახოვანი და წარმოსადეგი. მისი ქმარი საშხედრო კაცი იყო, მაშინ უკვე სამსახურიდან გამოსული და ეწეოდა სოფლის მეურნეობას. როგორც ამბობდნენ, იყო მეტად ჰუმანიური მებატონე, ლიბერალურად განწყობილი. ძმა ელიზბარ ერისთავისა, რომელიც იყო აქტიური წევრი 1832 წლის შეთქმულებისა. კოტე ერისთავი, უფრო ასე ეძახდნენ კონსტანტინეს, შემდეგში, მოჩიტულზე, მინახავს ქუთაისშიაც, იყო ჩინებული მოსაუბრე, ბევრის მნახველი და ამ ნანახთა უცხო გადმომცემი, ასე რომ მასთან მიყვარდა დარჩენა და მოსმენა მისი ნელის ჰუმორით შეზავებული ნაამბობისა, მაგრამ, საწუხაროდ, თავის დროზე არც ერთი ისინი არ ჩამიწერია, მეგონა, ისედაც დავიხსომებდი, რადგან—საკვირველია!—ზოგჯერ გგონია, ამას რა დამავიწყებსო, გაიხედავ და ხსოვნიდან კი გამქრალა, რაც გინდოდა რომ გხსომებოდა. კოტე ერისთავის ნაამბობი კი ბევრი უთუოდ საყურადღებო იყო, რადგან შეეხებოდა მისი დროის ბევრ საზოგადოებრივ მოვლენას.

აქ, საბაჟოში კი, დამასსომდა ქათმების ინკუბატორი. წიწილების ხელოვნურად გამომჩეკი აპარატი ჰქონდა და დაათვალიერებინა მამას, მაშასადამე. ჩვენც. ბავშვებს, მე და ჩემს დას. ჩვენ. რასაკვირველია, გვიხაროდა წიწილების ნახვა და მიაღერებდა.

მაგრამ რაც აქ უფრო გულს ჩააჩნდა, ეს იყო თვით მისი სასახლე. ეხლა რომ ვიგონებ, ეს იყო მართლა სასახლე, გუმბათიანი შუშის სახურავი ჰქონდა, რგვალსვეტებიანი ერდოზე და დიდ დარბაზში. ეს დარბაზი თითქო საპარლამენტო დარბაზად არის განკუთვნილი, ისე იყო შემორგვალეებული და კედელთან სავარძელჩამორიგებული. შუაზე დიდი ბროლის ქალი იყო ჩამოკიდებული და მის ბროლისავე შანდლებში ყვეთელი, თითქო საეკლესიო სანთლები იყო ჩარქობილი.

საერთოდ ამ შენობამ ჩემზე დიდი შთაბეჭდილება დასტო-

ვა, რადგან სოფლად ჩვენში მანამდე არსად მენახა ესეთი გრან-
დიოზული ნაგებობა და უთუოდ ეს იყო ჩემი პირველი სახუ-
როთმოძღვრო განცვიფრება.

ასეთივე განმაცვიფრებელი შთაბეჭდილება დასტოვა ჩემს
ბავშვურ გონებაში ერისთავიანთ დიდმა ეკიპაჟმა. ეს იყო კარ-
გა სრული ლანდო, რომლითაც გამოგვისტუმრეს თავაზიანმა
მასპინძლებმა მამა-შვილნი რკინის გზის სადგურამდე. მაშინ
კიათურის რკინის გზა არ იყო და ეს შეიძლება ქართლის გომი
იყო. ერთს სიტყვით. ეს არ მახსოვს. მხოლოდ ლანდოთი
მგზავრობა კი. ეტყობა. ძალიან კკუაში დამიჯდა. რადგან თავს
ისე ვგრძნობდი რბილ პალიშებზე. რომ. როგორც ვიგონებ,
დიდხანს არ მინდოდა ეკიპაჟიდან გადმოსვლა.

ასეთივე კარგი მოსაგონარია ჩემთვის სოფ. ლაშე, კვლავ
ზემოიმერეთში. ხორაგაულსა და ძირულას შორის. დავით და-
ბუაშვილის ოჯახში. პირდაპირ კლდეზე გადმოკიდებული ძველი,
ორსართულიანი ოდა, რომელიც გადაჰყურებს მდინარე ჩხე-
რიმელას ლამაზ ხეობას. ეს შენობა ეხლაც მოსიჩანს ხორაგაუ-
ლის სადგურის შემდეგ.

8

და აგრეთვე ქართლში სოფ. ცხრამუხა. ესეც აბაშიძიანთ
მამული, მხოლოდ ქართლელი აბაშიძეებისა. ეს სოფელი თავი-
ნი მდებარეობით ბევრს ვერას დაჰქანდის, რადგან დაცემულ
ვაკეშია, მტკვრის პირად გაშენებული და არც გადასახედი და
არც ტყე თავისებური სილამაზისა მას არ მოდგამს, მაგრამ
თუ რამ კარგი მახსოვს იქაური, ეს არის თვით ჩვენი მასპინძე-
ლი, სალომე აბაშიძისა, დარბაისელი, ძველი ქართველი ქალი,
ნეტად კეთილი და სათნო ხასიათისა. იმავ დროს მახსოვს იქაუ-
რი გემრიელი, ქართლური ლურჯი პური; მახობელა და... სა-
ლომეს მსახური, შავულეაშა რომანოზა.

სახელი დამახსოვდა მისი და გარეგნული იერი. „რომანო-
ზა!“ ეხლაც მესმის ყურში ეს დამახილი. ხშირად ეძახოდნენ და
ასაქმებდნენ რასმე. ისიც სწრაფად და დაუზარებლად ასრუ-
ლებდა.

ცხრამუხაში მახსოვს კიდევ ერთი რამ. ეს ჩემი შერცხვენის
ამბავია.

სალომეს სტუმრები ჰყავდა. სხვათა შორის, ერთი მოხუცი თავადი, გრძელ თეთრულვაშებიანი, მუდამ წმინდად გაპარსულ სახე-პირით, ქართულ კაბაში გამოწყობილი. ცოტა მკაცრი სახე ჰქონდა და ვერიდებოდი. ის კი ცდილობდა ჩემს ალერსს. მაგრამ მე გავუბრუნდი. ერთხელ ნაშუადღევს დამიძახა. რომ მივედი, მკითხა: „შალვაჯან! გშივა პური?“

ვერაფერი ვერ გავიგე და ვერც ვერა ვუპასუხე-რა. თან მერიდება ამ კაცის, თან მრცხვენია, რომ მეკითხება და პასუხი ვერ გამიცია. ვწითლდები, ვყვითლდები, თან „ქირის ოფლს“ მასხამს.

მან კითხვა გამიმეორა. მე ეს ორი სიტყვა შეერთებულად მესმის: „გშივაპური“, ფრანგული მგონია. მაშინ ფრანგი დელამძძე უკვე გვყავდა და ვიფიქრე — ამ ძიას უთუოდ ჰგონია, რომ ფრანგული კარგად ვიცი და იმიტომ მომმართა ფრანგულად-მეთქი.

მამაც მაშინ იქ არ იყო და ამიტომ დასავლეთელმა ქართველმა ვერ გავიგე აღმოსავლურად ნათქვამი სრულიად უბრალო შეკითხვა: „პური გშიანო?“

შევრცხვი „ყაზახი“.

მახსოვს, როდესაც ყველაფერი გამოირკვა, როგორი სიცილი დამაყარეს. ამან კიდევ უფრო შელახა ჩემი თავმოყვარეობა და კიდევ უფრო გამაწითლა.

9

ეხლა სამეგრელო. აქაც ცხენები. მთვარიან ლამეებში კიდევ უფრო ზღაპრულად გამომყურე მთები, გორები და ტეხურის მომხიბლავი ხეობა.

სოფელში ყოველთვის ახალსენაკის სადგურიდან მივდიოდით. ეს იმიტომ, რომ ჩვენ უფრო ქალაქის მცხოვრებნი ვიყავით: პირველ ხანად და შემდეგშიაც მამას სამსახურის და აგრეთვე ჩვენი აღზრდის გამო. სოფელში, საერთოდ, ერთი-ორი ზამთრის გარდა ხილად ჩავდიოდით, ისიც უფრო ზაფხულობით, ანდა რაიმე საოჯახო დაღწინებისა თუ დამწუხრების გამო (ტირილი, ქორწილი).

ახალსენაკში ჩვენი სოფლიდან მუდამ შემოგვეგებოდნენ

ხოლმე ჩვენი ოჯახის ერთგულები მოკეთებები და აგრეთვე მოსამსახურეები.

არსებობს ერთი ფოტოგრაფიული სურათი, ანუ უკეთ არსებობდა. მე აღარა მაქვს. ამ სურათზე გადაღებულია ჩვენი ერთ-ერთი ჩამოსვლა ახალსენაკში, სადაც აღბეჭდილნი ვართ როგორც ჩამოსულები, ისე დამხვდურებიც. კარგა დიდი ჭგუფია და ამ ჭგუფში იმყოფებიან მამას და ბებიას დაზრდილები, ნათლულები, მე და ჩემი დის ძიძები და მორდუებიც, საერთოდ ჩვენი ოჯახის ერთგული და საყვარელი ხალხი.

ჩამოვთვლი ბარემ. მკითხველისთვის ეს სახელები ბევრის არაფრის მთქმელია, მაგრამ ჩემს გულს კი გაახარებს მათი დასახელება და მათი ვინაობის ახმაურება კი ქალაღზე, ჩემი ხელით, ჩემთვის ერთ კოხტა პოემის დაწერას უდრის.

აი როგორ ვიყავით სურათზე წარმოდგენილნი: შუაში მამა და ბებიაჩემი მარიამ აბაშიძის ქალი. იქით-აქეთ მამას მამიდა ნინო ფაღავასი და მისი ქალიშვილი ნატალია. ესენი ყველანი სხედან. მათ კი ირგვლივ თავს ადგანან: მღვდლები მაქსიმე გოგინავა თავის მეუღლით დარიათი და თედორე როგავა აგრეთვე თავის მეუღლით. მათ შემდეგ მურზაყან ბარკალაია თავის ლამაზი ცოლით ბურდლათი. ესენი ჩემი დის მამოს გამზრდელებია, ძიძა და მორდუ. აქვე არიან აგრეთვე არანაკლებ ლამაზი ჩემი ძიძა კატია აღამიას ქალი და გვერდით უდგას ჩემი მორდუ, ნიკოლოზ მზარელუა. ესეც მწყაზარი სახის და მოციინარე თვალების პატრონია. აქავე თავის დროზე სამეგრელოში კარგა ცნობილი, განსაკუთრებით სენაკის მაშინდელ მაზრაში, სტეფანე ჯინორია. ყირიმის ომის მონაწილე, სარდალ პეტრე ხეციას (მხეიძის) ერთგვარი ადიუტანტი და განთქმულ უტუ მიქავას აჯანყების ერთ-ერთი თანამგრძნობი და ხელის შემწყობი. მას მამაჩემთან აერთებს მისი მწიგნობრობა და ერთგვარი მიდრეკილება სიბრძნისმეტყველებისადმი. მე ვცდილობ ჩემს რომან „ურდუმში“ მოვსახო ამ საყურადღებო პიროვნების პორტრეტი.

კიდევ არიან სურათის ჭგუფში ჩვენი ოჯახის ხუროთმოძღვარი, ხელობით ჩინებული ღურგალი, სოფ. რგანიდან ჩვენ-

თან შემოკედლებული. ბეზიას ნათლული დიმიტრი გველესიანი და მამას უერთგულესნი ტეტუა და ლაზარე რატიანი, ეს შემდეგში მამას მარჯვენა ხელი, მოურაეი და პირადი მდივანი.

ყველა ამათ წინ ვდგაერთ პაწიები—მე და მამო.

ჩვენზე წინ კიდევ ფეხმოკეცილი; ფარდაგზე მჭდარი ბეზიას ნათლული სოფიო განგიას ქალი.

ეს სურათი გადაღებულია ერთ-ერთ სენაკელ ხეციას (მხეიძის) ეზოში.

ვაყების უმრავლესობას აცვია ჩოხა-ახალუხი, მხოლოდ იარალი. გარდა მორდუებისა, არც ერთს არ აკრავს. ეს სტილია მამას ოჯახის. მამა თვითონ არავეითარ იარაღს არა ხმარობდა, რადგან მუდამ ევროპულ ტანისამოსში იყო გამოწყობილი, არც ინახავდა სახლში და უთუოდ ამის გამო მისი ერთგული ხალხიც არ ატარებდა. მღვდლები ხომ ანაფორებით იყვნენ და არც ჯერები ჰქონდათ გულ-მკერდზე ჩამოკიდებული. ჯვარი შემდეგში დაჰკიდა ჩვენებურ მღვდლებსაც რუსეთის მეფემ.

ქალები კი, თითქმის ყველა, მეგრულ ყაიდაზე იყვნენ გამოწყობილი: სრული ქვედა კაბა, პატარა გულისპირიანი ჯუბა, წელზე კიდევ ორი ვიწრო სარტყელი ჩამოფრიალებული და თავზეც აბრეშუმის ბადე-ქსოვილი, რომლის წვეტებიც ყურებს უკან იყო გადაგდებული და იქ კი ორი ნაწნავი საკუთარი თმებისა, წელამდე ჩამოშვებული.

მე პირადად აქ. გადაღების დროს, დიდი მარცხი მომივიდა.

მამამ მე და ჩემს დას ყურძნის დიდი მტევნები მოგვცა ხელში და ისე დაგვაყენა.

აკი სხვაგანაც მაქვს აღნიშნული, რომ მამა განსაკუთრებული მეთოდებით გვზრდიდა და აქაც უთუოდ უნდოდა, რომ საერთოდ მოთმინებას ბავშვობიდანვე შეეჩვეოდით. მაშინ ფოტოგრაფი დიდხანს უნდებოდა ჰკრეტას და ობიექტივის მორგებას. ასე რომ გადაღებამდე შეიძლება რამდენიმე ათეული წუთიც გასულიყო და უთუოდ აქაც ასე მოხდა.

მე კი ვერ გავუძეე ცთუნებას და მტევნის კუმპლებს დავუწყე კენკა. სურათში მეტად შემოძარცული მოსჩანს ჩემი მტევანი.

შემდეგში მითხრეს, რომ როცა მე ყურძენს ჰამა დავუწყე,

მამა მაშინ არ იჭდა თურმე ჩვენთან, ფოტოგრაფთან იყო და იქიდან აწესრიგებდა ჯგუფის განლაგებას. მე კი თურმე ჩემნა ძიძამ — უთუოდ შევეცოდე — წამჩურჩულა მეგრულად: „კკომი, კკომი ქოგალეე!“ (კამე, ჭამე, შემოგველეო) და თან მეორე მტევანი დამანახვა. ვითომდა შექმულის მაგივრად საფოტოგრაფიოდ მეორეს მომაწოდებდა, მაგრამ ეს არც ერთს არ დაგეცალდა. მამა მოვიდა, თავის ალაგას დაჭდა, ძიძამ ვერ მოასწრო ახალი მტევნის მოწოდება და ფოტოგრაფმაც გადაიღო სურათი. მითხრეს, რომ მამამ ძალზე დატუქსაო ჩემი ძიძა.

მაშო კი, ჩემი და, თავის სიმაღლეზე დარჩა და მოთმინების კარანტინი ჩინებულად გაიარა.

10

გული არ მითმენს, რომ აქ ერთ ადამიანზე არ შევჩერდე ცოტა ხანგრძლივად. ეს არის მღვდელი მაქსიმე გოგინავა.

ჩემს მკითხველს გაუევირდება, შეიძლება, რომ მე ჩემს მონებებში ზოგჯერ სრულიად უცნობ და თითქო უმნიშვნელო პიროვნებებზე ვჩერდები, მაგრამ ამისათვის მაქვს გასამართლებელი მიზეზები.

ჯერ ერთი, რომ ცნობილ საზოგადო მოღვაწეებზე, რომელთაც კი შევხვედრივარ ჩემი ცხოვრების გზაზე, თავის ალაგას მექნება ზოგზე მოკლედ, ზოგზე ვრცლად გამოთქმული. ჩემი შეხედულება და მექნება აღნიშნული ფაქტები, მეორე კი, მე თვით მჭირდება საზოგადოებრივად უცნობ და ან ძალზე დავიწყებულ პიროვნებათა ასახვაც, რადგან ეს პიროვნებანი გარკვეულ დროს და ალაგას შეადგენდნენ ჩემს სულიერ არეს და თვითონ იყვნენ ან ბუნებით, ან სწავლით, ან მდგომარეობით საყურადღებონი. ამიტომაც ვერ ველევი მათ.

ამჟამად კი ვიხსენებ მაქსიმე გოგინავას.

ეს იყო უსათუოდ ნიჟიერი, გონებამახვილი და გამკრიახი ადამიანი. ბავშვობიდანვე მამაჩემთან ერთად იზრდებოდა თურმე ჩვენს ოჯახში და მამასთან ერთად ვითარდებოდა მისი გონებაც და მისი „სჯის კიდე-განიც“. ბოლოს ხომ სამეგრელოში ერთ-ერთ თვალსაჩინო პიროვნებად ითვლებოდა კიდევ და მას ძალაუწებურად ანგარიშს უწევდა მთელი ოდიშის სასულიერო

იერარქია. უებარი ლოგიკის პატრონი იყო, მეტად ცხარე მოკამათე და თავისი შეუვალი საბუთებით მოწინააღმდეგეს მუდამ ამარცხებდა. ამიტომ ერიდებოდათ, მაგრამ პატივსცემდნენ. რაც მღვდლად ეკურთხა, მას შემდეგ ჩვენს ოჯახს ჩამოშორდა, რასაკვირველია, რადგან დაცოლშვილდა და თავის სახლში უნდა ეცხოვრა, სოფ. უშაფათში. მრევლი კი იქვე ახლო, მეზობელ სოფელში, ფოცხოში ჰყავდა, ასე რომ ჩვენთვის მოუცლელი იყო, მაგრამ როგორც კი დროს ჩაიგდებდა ხელში, უთუოდ მოაკითხავდა მამას მასთან სასაუბროდ, „სულის მოსაბრუნებლად“, საკამათოდ ქვეყნის საჭირობოროტო საკითხებზე და ზოგჯერ რჩევის საკითხავდაც. განსაკუთრებით მაშინ, როდესაც ეს შეეხებოდა სასულიერო სასწავლებლის ბედობას. ამ სასწავლებელს ხომ მაშინ საერთოდ სასულიერო წოდება პატრონობდა, რადგან მათი შვილები უმეტესად აქ სწავლობდნენ. მახსოვს, ერთხელ მთავრობას ჯენაქის სასულიერო სასწავლებელი ფოთში უნდოდა გადაეტანა და ამაზე საწინააღმდეგოდ დიდად აღესილი იყო მამა მაქსიმე. ან კიდევ, როდესაც მეგრულად ათარგმნინა უწმინდესმა სინოდმა სახარება, ლოცვები და მთელი ტიბიკონი ლიტურგიებისა ვითომდა მეგრულთა გასაგისობისათვის. აქაც მაქსიმე პირველი თაოსანი იყო მოწინააღმდეგე ჭკუფცისა და სულ თვალეები უბრწყინავდა, როდესაც მამამ თავის ერთ მოხსენებითს ბარათში, რომელიც შემდეგში ეგზარქოსს გადაეგზავნა და მაშინდელ რუსულ გაზეთებშიაც იყო დაბეჭდილი, მეგრულიდან რუსულად თარგმნა სლავურიდან გადამეგრულებული ზოგიერთი ლოცვა და ასეთის მოიარებით დაამტკიცა სრული მიუღებლობა მეგრულად წირვა-ლოცვის წარმოქმნისა, რადგანაც მეგრულად ეს ლოცვები პირდაპირ პორნოგრაფიული რამ გამოდიოდა.

აგრეთვე დიდად გახარებული იყო მაქსიმე, როდესაც მამამ პრესაშიაც გაილაშქრა საერთოდ სამეგრელოს სკოლებში მეგრული ენის შემოღების წინააღმდეგ. ასეთ მეგობრებად და თანამოაზრეებად დარჩნენ მთავარ საკითხებში მამა და მაქსიმე სულ სიკვდილის კარამდე.

მაქსიმე ამაცობდა, რომ . ის გაბრიელ ეპისკოპოსის ნაკურთხი იყო. ცნობილია — გაბრიელი მღვდლად ისე არავის

აკურთხებდა, რომ არ გამოეცაღნა და მისი სათანადო მომზადება არ შეემოწმებინა. მღვდლობა კი მიტომ ჰქონდა მაქსიმეს თურმე არჩეული, რომ ეს ხალხის წმინდა სამსახურად მიაჩნდა და აკი მღვდლის მაღალ მოწოდებაზე ხშირად ჰქონიათ საუბარი მაქსიმესა და მამაჩემს. თან ნაღვლობდნენ, რომ ბოლო ხანებში მღვდლები იქცნენ „ჩინოვნიკებად“ და მეფის რუსეთის მთავრობის აგენტებად, რომ უკვე მოწოდების გამო და ხალხის სამსახურისათვის კი არ მიდიოდნენ მღვდლად, არამედ ანგარებისა და კეთილმოწყობის მიზნით, და მღვდლადაც მომზადების შეფარდებით კი აღარ აკურთხებდნენ, არამედ ქრთამის გაღებისა და სხვადასხვა ხასიათის შეძენათა გამო.

ასეთი მახსოვს მაქსიმე გოგინავა საზოგადოდ და მამასთან. მაგრამ მივიდეთ ამ კაცთან კიდევ უფრო ახლოს. როგორი იყო ის კერძო ცხოვრებაში? ამის შესახებ ამ საყურადღებო ადამიანის ცხოვრებიდან რამდენიმე შტრიხი გადმომცა მისმა სიძემ, ჩვენს უნივერსიტეტში მომუშავე მეცნიერმა სოკრატ ძიმისტარაშვილმა:

ზაფხულში, სიმინდის ყანის გახურებული თოხნის დროს, მღვდელი მაქსიმე დილის გარიჟრაჟზე ჩადის თავის ყანაში და სანამ მზე ამოწვევრავს, პერანგ და ქვედა საცელის ამარა დილის სიგრილეში თოხნის. ისეთი მარდი მუშაა, რომ მზის ამოსვლამდე უკვე ნახევარი ყანა გათოხნილი აქვს.

შემდეგ მოდის თავის ეზოში და იქ, სადაც მსხლისა და ვაშლის ხეებს, ერთიმეორეზე გადაქდობილთ, ერთგვარ თადის ქვეშ მშვენიერი ჩრდილი შეუქმნიათ, ეძახის მოსამსახურე გოგოს, გააშლევინებს ხალიჩას და ნებივრად გადაგორდება. თან ეტყვის ავიდეს ხეზე და ხილი ჩამობღერტოს. გოგო ადის, მწიფე ხილი ცვივა, მაქსიმეც სიამოვნებით შეეპყევა უბიწო, ცვრით დანამულ ხილს.

ხშირად ეუბნებიან შინაურები: „ბატონო, მიირთვი რამე, სამზარეულოში დამზადებული ნახელოვნები“, მაგრამ მაქსიმე იმ აზრისაა, რომ თვით ბუნების მიერ უშუალოდ მიწოდებულ ნაყოფს ვერაფერი აღამიანის მიერ დამზადებული ვერ შეედრება.

შემდეგ, როდესაც ოჯახი დილის საუზმეს მიუჭდება, მაქ-

სიმეც მიღის მათთან, მაგრამ მხოლოდ პოლინწოს¹ შეექცევა და სხვა რავეს კი არ ეკარება. ამის შემდეგ იძინებს ცოტა ხნით ჩრდილში. სადილობამდე კი წამოდგება, შედის თავის ოთახში და აქ კი ნუ გაეკარებით: შემოუწყვია წიგნები. სასულიერო თუ ისტორიული ხასიათისა, და შიგ ჩაღრმავებულა.

მაქსიმე დიდი ნაკითხი კაცია, უფრო ქართულში. კითხულობს საერო წიგნებსაც და ძალიან უყვარს ილია ჭავჭავაძე. განსაკუთრებით მისი „გლახის ნაამბობი“, სადაც იდეალური მღვდელია გამოყვანილი. ისე უფრო ძლიერია საეკლესიო ლიტერატურაში. მშვენივრად იცის ქრისტიანობის ისტორია, კათოლიციზმი, გრიგორიანობა, მონოფიზიტობა და სხვა მწვალებლური მოძღვრებანი. ის აშეების კარგი ცოდნით არის აღჭურვილი მაშინ. როდესაც სამეგრელოში სხვა მღვდლებმა: ხარისხით დაწინაურებულებმა (ბლალოჩინებმა, დეკანოზებმა და სხვ.). თვით სემინარიელებმაც კი, ასეთები ნაკლებ იციან.

იმ დროს, როდესაც მაქსიმე წიგნებშია ჩაფლული. სადილადაც არ გამოდის სხვებთან. იქვე უნდა მიუტანონ ცოტა რამ, ბევრი არა უნდა რა. საღამოთი კი, მზე გადაიხრება თუ არა, მაქსიმე კვლავ გაქრება. ის ისევე ყანაშია და ბინდბუნდისას, როდესაც შინ დაბრუნდება, ყანის მეორე ნახევარიც უკვე გათოხნილია.

და ასე სულ. უბრალო, მომკირნე გლეხივით თავს დასტრიალებს თავის მეურნეობას ყოველდღიურად და შრომაში ატარებს თავის წუთისოფელს.

ისე კი სრულიად არ არის სხვა მღვდლებივით ანგარი, სულ სვავი და გაუმაძღარი, მარტო მოხვეჭაზე რომ იყვნენ გადაჯებულნი. რასაც მისცემენ მრევლში, შითი კმაყოფილება, ღარიბებს ხომ სრულიად არაფერს ართმევს და ეს იწვევს დიაკვნის საყვედურს, მაგრამ ის ამას არ ეპუება. დავრდომილსა და ავადმყოფს თვითონ ეწევა ხოლმე. ამიტომაც თავის დღეში არ გამდიდრებულა, არც ჩასუქებულა სხვებივით. იყო ასკეტივით ერთი გამხდარი კაცი და სარჩოც იმდენი ჰქონდა, ისიც თავის შრომით შექმნილი, რამდენიც მთლად ულუკმაპუროდ არ სტოვებდა ოჯახსა და თვითონ მას.

¹ ბოლინწო—ღვინოში ჩაწებული პური. ავტ.

როგორცა ვთქვი, სამეგრელოში ახალსენაკს (დღეინდელ • ცხაკაია) ჩავდიოდით რკინის გზით. იქ ჩამოვხტებოდით ვინმე ლაბახუას სასტუმროში. ეს ერთი დაბალი ერთსართულიანი სახლი იყო და იმ დროს მგონი ერთადერთივე მთელს დაბაში. მაშინ ახალი სენაკი სამაზრო ცენტრი იყო, მაგრამ დაბად ითვლებოდა, ქალაქად ეხლა მოიწონა თავი, 900-წლებში, თორემ წინათ ნაგებობით და ქუჩებით ბევრს არას წარმოადგენდა. ქუჩაც მხოლოდ ერთი გრძელი ქუჩა იყო, დაბის შუაგულ და პატარა შესახვევები უფრო რკინის გზის სადგურიდან იყვნენ გაისრულნი. რკინიგზის სადგური მაშინ ქალაქის განაპირად იყო მოთავსებული და მის გადაღმა ქალაქი აღარ იყო, არამედ ცხოვრობდნენ შეძლებული თავადი მხეიძეები თავიანთი მოხდენილი კარ-მიდამოთი განმარტოებულად. მშვენიერი და ფართო ეზოები ჰქონდათ თუ ცაცხვის ხის ხეივანით, ხეხილით შემკული და შიგ ლამაზი, იპერულ ყაიდაზე აგებული ოდებით.

მხეიძეები საერთოდ სამეგრელოში ერთი წარჩინებულ გვართაგანი იყო და ერთ დროს ატარებდნენ თავადის ხარისხს. ამ გვარის წევრები სამეგრელოს ორივე მაზრაში — ზუგდიდისა და სენაკის მაზრაში ცხოვრობდნენ და ორივეგან შეძლებულ მებატონეებად ითვლებოდნენ. ზუგდიდის მაზრაში ყველაზე უფრო განთქმული იყო პეტრე მხეიძე, ყირიმის ომის გმირი, რუსეთის არმიის პოლკოვნიკის ხარისხით დაჯილდოებული და გარდა ესეთი წარჩინებული მდგომარეობისა, საერთოდ სამეგრელოში ყველასაგან პატივცემული მისი პირადი ღირსებების გამო. ზრდილი, გონიერი, გამჭრიახი და როგორც მებატონე, თურმე, არც თუ ისეთი სასტიკი, როგორც ეს მოსალოდნელი იყო.

ის ჩვენი, ბერთემელი დადიანების, მახლობელი ნათესავი იყო. ცოლად ჰყავდა მამიჩემის მამიდა სიღუ (სინდუხტი), თავის დროზე მოწინავე ქალად ცნობილი, თავისი მწიგნობრობით და ხელსაქნარით ცნობილი მთელს იმ არემარეზე და დიდად მიჩნეული პიროვნება. ცნობილი იყო აგრეთვე მისი დიდი მე-

გობრობა ჩემს ბებიასთან, მარიამ აბაშიძის ქალთან, რომლის სულიერი ავლა-დიდება, შეძლებისამებრ, მე აწერილი მაქვს ჩემს „ნიკო დადიანის სილუეტში“. ასე რომ საერთოდ პეტრე მხეიძის ოჯახთან ჩვენი ოჯახები უფრო დაახლოებული იყო, ხშირად დადიოდნენ ერთიმეორეში და კარგი ნათესაური დამოკიდებულებაც ჰქონდათ.

სენაკელ მხეიძეებთან კი ნაკლები ურთიერთობა ჰქონდათ ბერთემელ დადიანებს. მართალია, დიმიტრი და ბესარიონ მხეიძეების დედაც დადიანის ქალის შვილები იყვნენ, მაგრამ ის ჯოლეველი დადიანების სახლთა შვილი იყო და ნათესაობითაც შორს იყვნენ ჩვენგან. ასე რომ მე რომ წამოვიჩიტე, შემდეგ ვიცნობდი ხსენებულ ორ პიროვნებას და სხვა მათ ბიძაშვილებთაც, მაგრამ დაახლოება მაინც შემთხვევას არ მოუტანია. ვიცოდი კი, რომ მათი ოჯახი იყო დიდად სტუმართმოყვარე და ხსენებულ ორ ძმას სიკვდილამდე ეჭირათ მაშინდელ დროისთვის თვალსაჩინო თანამდებობა. ერთი, დიმიტრი, ჩემსობას იყო თითქმის უცვლელი წინამძღოლი სენაკის თავადაზნაურებისა და მეორე, ბესარიონი, მომრიგებელი შუამავალი. იმავ დროს ორივე რუსის არმიის ნასწავლი ოფიცრები იყვნენ. საზოგადოებაშიაც დიდი გავლენა ჰქონდათ და უმეტეს წილად საზოგადოებრივი საკითხები სენაკის მაზრაში მათი გავლენით გადაიჭრებოდა ხოლმე.

აქვე უნდა თქვას, რომ მეგრელი მხეიძეებიც, ისე როგორც იმერეთის მხეიძეები, თავის თავს ჩვენს ისტორიაში ცნობილ გმირების, სამშობლოსათვის რომ ეწამნენ მურვან-ყრუს დროს, დავით და კონსტანტინეს ჩამომავლად თვლიდნენ და ამითი თავი მოსწონდათ კიდევ. სენაკში მასსოვს კიდევ გაცნობა ერთი უთუოდ საყურადღებო პიროვნებისა. ეს იყო ნესტორ ახვლედიანი, ერთ დროს სენაკში სასამართლოს ბოქაულად ნამყოფი. მამა ჩავიდოდა სენაკში თუ არა, ის მაშინვე გაჩნდებოდა მასთან და იყო მათი დაუსრულებელი ბაასი და ხშირად კამათიც. ნესტორი განათლებული კაცი იყო და ცოტა ნილილისტური, მაგრამ მაინც განსაკუთრებული შეხედულება ჰქონდა მაშინდელ ქართულ საქმეებზე: ბანკზე, რომელიც იმ დროს

ჩვენში თითქო „ზემსტკოს“ მაგიერობას ეწეოდა, პრესაზე, თეატრზე და სხვ. უფრო ხშირად მცდარ იყო მისი აზრი ამა თუ იმ საგანზე, მაგრამ ბუნებით ნიჭიერი კაცი იყო, მახვილი ენის პატრონი და ცოტა სუსტი აზროვნების პატრონი ადვილად აიყოლებდა.

ბავშვობისას მე ყოველთვის მიხაროდა მასთან შეხვედრა, რადგან არსებითად ბუნებით კეთილი კაცი იყო, ახალგაზრდობის მოყვარული, და როდესაც მარტო ვრჩებოდით, დიდად მართობდა და შემიქცევდა თავისი საყურადღებო საუბრით. მხოლოდ შემდეგში, ჩემი დავაუკაცებისას, შევამჩნიე, რომ მე არავითარ მაცთურ აზრს არ მინერგავდა. ბოლოს ის თბილისში გადმოსახლდა, ჩაერთა იქაურ ინტელიგენციაში, მაგრამ მათ საქმიანობას სიტყვიერად მუდამ კრიკაში უდგა და თითქო განზე იყო გამდგარი.

ბოლოს დავრწმუნდი, რომ ბუნებით შემკული კაცი, მომზადებულიც, მაშინდელი დუხჭირი დროის წყალობით გზას იყო აცდენილი და, უთუოდ თავისი რბილი ხასიათის გამო, თავისი თავი ვერ გამოეყენებინა საზოგადო ცხოვრებისათვის, თუმცა ამისი შესაძლებლობა ჰქონდა. არც თუ პრაქტიკულად იყო ძლიერი. ცოლთან არ იყო გაყრილი, მაგრამ მაინც, განსაკუთრებით თბილისში, უოჯახოდ ცხოვრობდა. იყო შეყუჟული სადღაც ძალიან იაფფასიან სასტუმროს №-ში და დილით რომ გამოვიდოდა გოლოვინის პროსპექტზე (ეხლანდელი რუსთაველი), გვიან ღამემდე თითქმის შინ არ შედიოდა. არსად არ მსახურებდა. იყო ნამდვილი „ბულვარდიე“ — ბოჰემურის მიდრეკილების პატრონი. თუმცა მოწინავე ინტელიგენციაშიც ხშირად ტრიალებდა და ამ ინტელიგენციას ერთგვარად უყვარდა კიდევ, ოღონდ ნანობდნენ, რომ ამ კაცმა, რომელიც ერთ დროს თავის დარგში კარგ იმედებს იძლეოდა—(აგრონომი იყო უმაღლესი განათლებით) ერთ დროს თბილისის ახლოს, კიკეთში, საუცხოო სანიმუშო ფერმაც კი გაიჩინა და მეყველეობის საქმე სანიმუშოდაც კი დააყენა თურმე — შემდეგში ბოლო ვერ მიაყოლა ამ სამუშაოს და... არჩია ბოჰემობა, თუ უნებლიეთ გახდა ესეთი უსაქმური... თუმცა ბოლოს და ბოლოს რითი ცხოვრობდა ეს ადამიანი, რა სახსარი გააჩნდა

საცხოვრებლად? თბილისში ის ეწეოდა ესრეთწოდებულ კომისიონერობას: თუ ვისმე სახლი ჰქონდა გასაყიდი ქალაქში, რაიღე მამული სოფლად, ან ბანკში დასაგირავებლად, ან რაიმე ძვირფასი ნივთები, ამგვარებში ის მუდამ შუამავალი იყო და ამისათვის, როგორც მაშინ ეძახდნენ, ერთგვარ „კურტაქს“—გაპამრჯელოს ღებულობდა. ერთ დროს სამეგობროში სიმინდის აღებ-მიცემობის საზოგადოების დაარსებაც მოინდომა. მთავრობას საზოგადოების წესდებაც კი დაამტკიცებინა, მაგრამ საქმემ როგორღაც ვერ იხეირა.

ერთის სიტყვით, საზოგადოდ ხელმოცარული კაცი იყო.

სენაკში კი ჩემი ბავშვობისას სხვა ისე გარკვევით არ მახსოვს, მიუხედავად იმისა, რომ მამა ჩავიდოდა თუ არა სენაკში, „ცა და ქვეყნის“ ხალხი ესია.

სენაკიდან მივდიოდით უმეტეს წილად პირდაპირ ბერთემს, პირველ ხანებში ცხენებით და შემდეგში უკვე ეტლებით. მივდიოდით ბერთემს, მაგრამ მამას ჩემი ბავშვობისას საკუთარი სახლი არა ჰქონდა, მის ყმაწვილობისას ცეცხლს გაენადგურებინა მამაპაპეული სახლი და ამიტომ ჩვენც რომელიმე ბიძის სახლს შევეხიზნებოდით ხოლმე მთელის ზაფხულობით. ზამთრობით კი ვიყავით ქალაქებში — ქუთაისში ან თბილისში.

და აი ბერთემი!

მე, როგორც ნათქვამი მაქვს ბევრს ჩემს ნაწერში და როგორც ჩემს ბიოგრაფიებში წერია, ამ სოფელში არა ვარ დაბადებული, არამედ იმერეთში, ქ. ზესტაფონს, მაგრამ ამ სოფლის სიყვარული დღეინდელ დღემდეც მიღვივის გულში.

ცხადია! ბავშვობისა და ყრმობის წლები უმეტეს წილად ამ სოფელში მაქვს გატარებული და, რაც ბავშვობისას „სულს დააჩნდების“, ის საბოლოოდ განუყრელია ადამიანისათვის.

სენაკიდან ბერთემს რომ მივდიოდით, ისეთი ბუნებით შემკული არემარე უნდა გაგვეარნა, რომ...

განა ეყოფა ჩემს კალამს პოეტური ძალა, რომ აეწერო ამ ედემის (საერთოდ ჩვენი ქვეყნის და, კერძოდ, სამეგრელოს და მისი ბერთემის) სიმშვენიერე და მომხიბვლელობა?

მე ყოველთვის, ჩემს მხატვრულ ნაწარმოებებშიაც, ძალიან ვუფრთხი ხოლმე ბუნების აღწერას. ამაზე ზოგი მისაყვედუ-

რებს კიდევ. მაგრამ თუ მაინცდამაინც ზოგჯერ ბუნების აღწერას ვცდილობ, უფრო მაშინ, როდესაც მინდა რომელიმე ჩემი მოქმედი პირის განცდა გადმოვცე, მისი სულიერი განწყობილება, თუ ის (ჩემი მოქმედი პირი) ამა თუ იმ გუნებით როგორ აღიქვამს ხოლმე მის მიერ ხილულ ბუნებას, ან მის მოვლენებს.

პირადად მე კი ბუნების აღწერას იმიტომ ვერ ვახერხებ, რომ ეტყობა ცუდი პოეტი ვარ. თუმცა... სინამდვილეში ჩემზე ბუნებას დიდი გავლენა აქვს და მისი სიტურფით თუ ლამაზი უცნაურობით დიდად მოხიბლული ვარ ხოლმე. თან მგონია, რომ ძალიან დიდის სინაზითაც ვგრძნობ მის სიმშვენიერეს თუ გრანდიოზულობას, მხოლოდ ამის გადმოცემის უნარი არ შემწევს.

ეტყობა ვგავარ იმ მწყემსს, ალფონს დოდე რომ ამბობს: დიდი მომღერალი იყო, მხოლოდ არავის მისი სიმღერა არასოდეს არ გაუგონიაო.

თუმცა ამ დიდი ფრანგი მწერლის დამოწმება რად გეინდა განა ქართველებს არა გვაქვს ანდაზა: „ამირან გულში მღეროდა, ყრმანო, ბანი მითხარითო!“

12

ახალსენაკიდან ბერთემამდე სულ აღმოსავლეთისკენ უნდა იაროთ ნოქალაქის (ნაქალაქევი) „გოქკადილამდე“ (გაქედელი). აქ ხილია მდ. ტეხურაზე გადებული და ამას ეძახიან გაქედელს.

აქ ერთი გზა კვლავ პირდაპირ მიდის, ხიდგალმა მარტვილისაკენ (დღეინდელი გეგეჰკორი), ლებარდემდე, სადაც სამკურნალო წყლები ამოჩუხჩუხებს, და მგონი თვით ასხამდე. ასხი ერთ ჩინებულ მთას ჰქვიან ამ არემარეზე, სადაც ზაფხულობით სამოვარზე ცხენებია და სხვა საქონელს მიერეკებიან ადგილობრივი მეგრელები.

მეორე გზა კი გოქკადილთან ჩრდილოეთისკენ უხვევს და მიემართება სულ განთქმულ სალხინოსა და კურზუმდე, საერთოდ კვლავ ტყეებით დაბურულ მთიან ადგილებისაკენ. ამ კუთხეს ნაწილობრივ უწოდებენ „ლაკადას“ და ქალიპარტიანოს. ლაკადა, ეტყობა, მთიულეთს ნიშნავს საერთოდ და სალიპარტიანო კი იმიტომ, რომ ეს არემარე ერთ დროს ეკუთვნოდა

თურმე ლიბარტიანებს, რომლებიც განსაზღვრულ დროში სამეგრელოს მთავრებად ითვლებოდნენ. და რატომღაც აქაურ მოსახლეებს ესლაც თავი მოსწონთ, რომ ამ კუთხიდან არიან. მართლაც ერჩევიან სხვა, დაბლობში მცხოვრებ მეგრელებიდან ტანადობით, იერით, სიღარბაისლით. აქაური მეგრული ენის სიწმინდე ხომ განთქმულია, როგორც საერთოდ სენაკისა და ზუგდიდის ყოფილ მაზრათა მთიულეთისა: ჩხოროწყუ, მოიდანახე, ხაბუშე და სხე.

და აი თქვენ გაუხვიეთ გოჭკადილიდან ჩრდილოეთისაკენ, რომ ბერთემს ჩააღწიოთ და შეუდექით დედამოკას გზატკეცილს. მაგრამ მე ჯერ ის არ მითქვამს, თუ ხსენებულ ხილამდე რა გზა გამოიარეთ.

გზა ასეთია:

სენაკიდან გამოხვალთ თუ არა, მაშინვე მოხედებით მშვენიერ სანახაობის სოფ. შხეფში. ჩრდილოეთით გორებმოზღულული, დობილოებშეფენილი სოფელი, ქვეით, გზატკეცილის მარჯვენა მხარეს ფართო, დაცემული ქალა მდ. ტეხურამდე, რომელიც სოფელზე კარგა დიდი მანძილით არის დაშორებული. შხეფის შემდეგ კი ქვაშიხორი თავის კარგა მოზრდილი ძველებური ციხის ნანგრევებით. ამ ციხეს ზოგჯერ შხეფის ციხესაც ეძახიან, მაგრამ სინამდვილეში ის ქვაშიხორია, რადგან „ქუაშო ოხორუ“ მეგრულად ნიშნავს ქვის სამოსახლოს, სადაც ერთ დროს უცხოვრიათ სამეგრელოს მთავრებს და იმ დროს, როდესაც ირგვლივ წნელით მოწნულ ფაცხაში ცხოვრობდნენ მოსახლეები, მთავრებს ქვის სასახლე ჰქონიათ და სასახლესთან ციხეც. ციხე მათი თავდასაცავი სიმაგრეც იყო და იმავე დროს დასასჯელ პირთა საპატიჰროც.

არსებობს გადმოცემა, რომ ერთ დროს, როდესაც საქართველო უკვე დაწიწილაკებული იყო რამდენიმე კუთხედ — ჭართლი, კახეთი, იმერეთი, გურია, სამეგრელო და სხვ. ყველა ამეებს ერთიმეორეში საძმო ომი ჰქონდათ ხშირად გაჩაღებული და ხან ერთი კუთხე მიემძლავრებოდა მეორეს, ხან მეორე. ერთი ასეთი ომის დროს მეგრელებს დაუძლევიათ იმერლები, მათი მეფე ხელში ტყვედ ჩაუარდნიათ და სწორედ აქ, ქვაშიხორის ციხეში ჩაუმწყვდევიათ. ეს მეფე მგონი მომკვდარა კიდეც

ტყვეობის დროს ქვაშიხორში. ამ ამბით კი დიდხანს თავს იწონებდნენ ჩემი ბავშვობისა და ყრმობის დროს ხანდაზმული მეგრელი აზნაურები.

ამ ამბის გადმოცემა არსებობდა ჩემ დროს, მხოლოდ თუ ამავე ქვაშიხორის ციხეში რამდენი უსამართლოდ დასჯილი გლეხი, ან მთავრის ურჩი თავადი, ან აზნაური დაღუპულა: თვალები დაუთხრიათ, ან თავი მოუკვეთიათ, ან ხუნდებზე დაუსვამთ და უქმელ-უსმელი, სრულიად უპატრონოთ ციხეში ჩაუღპიათ — ამაზე არავინ არაფერს ამბობს და ჩვენი მატთანეები ხომ სრულიად სდუმან ასეთ მოვლენებზე. არც არის გასაკვირი, რადგან მატთანეებს, როგორც ცნობილია, უმეტეს წილ წერდნენ მეფის, მთავრის, ან რომელიმე გავლენიანი მებატონის ერთგული და „შეთელღერებული“ ყმები, თუ იმ დროის ერთეული დაყუღებული ბერები, ან „კარიერისტი“ ხუცები.

ქვაშიხორში, სხვებთან ერთად, აგერ ახლამდე კიდევ ცხოვრობდნენ დადიანების შთამომავლები.

ხოლო ქვაშიხორს რომ გაცდებით, თქვენ მოხედებით პატარა ქალაქის მსგავს ალაგზე. ეს არის ძველი სენაკი. წინათ სენაკი ერთი ყოფილა სამეგრელოში და ეს სენაკი იყო კიდევ ერთ დროს საბაზრო და სავაჭრო ადგილი ამ არემარეზე. აქ მოდიოდნენ იმერლები, მოჰქონდათ ღვინო, ჰყიდდნენ და სამაგიეროდ ყიდულობდნენ ხარებს, ძროხებს, ზოგჯერ ცხენებსაც, ნაპარავს თუ „არგამას“, ე. ი. ლეგალურს; მოდიოდნენ ბერძნებიც და იძენდნენ აბრეშუმს, სიმინდს და სხვ. თვითონ მოსახლეობა აგრეთვე ჰყიდდა შინაურ ფრინველებს, შინ მოქსოვილ საჩოხე შალებს, პაჭიკებს და სხვ. ერთის სიტყვით, აქ დიდად გაცხოველებული აღებ-მიცემა იყო გაჩაღებული აგვისტოს 1-დან 15-მდე, ე. ი. მარიამობის მარხვაში, როდესაც იმ დროს სოფელს ყანებში საქმე არა ჰქონდა და თავისუფალი დღეებით სარგებლობდნენ.

აქვე ჩემსობას იღვა ახლადგახსნილი ორსართულიანი, ოთხკლასიანი ესრეთწოდებული სათავადაზნაურო სასწავლებელი, რომელიც დიდის ამბით გაიხსნა წერა-კითხვის საზოგადოების მეთაურობით და რომლის გახსნასაც დაესწრო არამც თუ მაშინდელი სამეგრელოს მოწინავე საზოგადოება, არამედ

თბილისიდან ჩამოსული ისეთი თვალსაჩინო საზოგადო მოღვაწეები, როგორებიც იყვნენ დიმიტრი ყიფიანი, ივანე მაჩაბელი, აკაკი წერეთელი და სხვები. ყველა ამათ გარემოების შესაფერი სიტყვები წარმოთქმეს თურმე და უკვე წინასწარ მოკრებილი მოწაფეები ჩააბარეს გამოცდილ პედაგოგებს—აგლაძეს, შარაშიძეს, გოგოლაშვილს და მათ მეთაურს, ცნობილ პედაგოგსა და ქურნალისტს, სამსონ ყიფიანს.

ასე რომ მაშინ ასეთი სკოლის დაარსება სამეგრელოში დიდ ეროვნულ გამოფხიზლებას უდრიდა და აკი ცოტაოდნად თავმოღერილ მეგრელს, ესმოდა, თუ არ ესმოდა მნიშვნელობა ამ გარემოებისა, თავი მოსწონდა და საზოგადოებაში ტრაბახობდა კიდევც.

მხოლოდ თვითონ ძველი სენაკი იმ დროს მეტად მოუწყობელი რამ იყო, ახლა გაიზარდა, გამშვენიერდა, საავადმყოფოცა აქვთ, აფთიაქიც, კლუბიც და ეწვევიან სხვადასხვა კულტურულ საქმიანობას.

ჩემ დროს კი მას ძველი სენაკი ერქვა და ახლაც ასე ჰქვიან. სახელი სენაკი ერთ დროს, როდესაც ფოთისაკენ რკინის გზა იქნა გაყვანილი, წაართვა თეკლათმა, მაგრამ თეკლათი კი არ დაირქვა, არამედ ახალსენაკი და იმიტომ ძველ სენაკს სიტყვა „ძველი“ მაინც შერჩა, თუმცა ახალსენაკმა სულ სხვა დიდი სახელით მოინათლა თავი და ერთი მისი ღირსეული შვილის, მიხა ცხაკაიას სახელი დაირქვა.

ეხლა ყველგან ასე ახსენებენ კიდევც. ერთხელ მოსკოვში ყოფნის დროს დამპირდა ტელეგრამის გამოგზავნა და მარტო „ცხაკაია“ დავაწერე, მაგრამ ფოსტის თანამშრომელმა გამისწორა და დამაწერინა — „მიხაცხაკაია“ ერთად.

რა იცოდა იმ თანამშრომელმა, რომელსაც მიხა ცხაკაია ერთ სიტყვად აქვს მიჩნეული და ადგილის უბრალო სახელწოდება ჰგონია, რომ მიხა ცნობილი რევოლუციონერი და ბოლშევიკია და მით უფრო ის სულ არ იცის, რომ ეს მიხა ჩემი ყრმობისა და სიკაბუჯის მეგობარია, მაგრამ ამაზე შემდეგ. იქ კი, ფოსტის თანამშრომელთან, მეყო იმდენი თავდაპერა, რომ ტრაბახი არ დამიწყია.

ძველსენაკიდან გახვალთ თუ არა, იწყება სორტა. აქედან იწყება უნაყოფიერესი მიწა-წყალი სულ მარტვილამდე ფართოდ გაშლილი ქალებისა.

სორტა ისტორიულად იმით არის შესანიშნავი, რომ ერთ დროს აქ დაბანაკდა თავისი ამხანაგებით სამეგრელოს აჯაყ-ჩიას ავტორი უტუ მიქავა. და აქედან იყო, რომ სამმა მეთაურმა — უტუ მიქავამ, უტუ თოდუამ (იგივე „მართალი თოდუა“) და კოჩა თოდუამ ხელში ჩაიგდეს ძალაუფლება და, რამდენიმე თვის განმავლობაში, განაგებდნენ მთელ სამეგრელოს ბედ-იღბალს.

აქიდანვე იყო, რომ ქვაშიხორში მყოფ მაშინდელ სამეგრელოს დედოფალ ეკატერინესთან მოლაპარაკება გამართეს წელგამართულებმა. მართალია, ამის შემდეგ დედოფალი რუსეთს გაიქცა და შემდეგ რუსის ჯარის შემწეობით მოაქერეს აჯანყება და თავადაზნაურობაშიაც შემდეგში გლეხთა ლაშქარს დაცინვით „უტუს ჯარი“ უწოდეს, მაგრამ სამეგრელოს ქვედა ფენის გმირულ სულში ამ მოძრაობამ წარუშლელი კვალი დატოვა და ხალხის შეურიგებელ სულს ტირანიის დამხობამდე ქელი არ დაადრეკინა.

სორტას შემდეგ მოსდევს კოტიანეთი და ბოლოს გამოდმა ნაწილი ნოქალაქისა (ნაქალაქევი) „გოქკადილამდე“. აგრეთვე მთაგორიანი და კოხტა სოფლები, მეგრული ოდებით დამშვენებული გზატკეცილის პირზე გადაკონდრებული ეზოებიანი, ისეთი ფაქიზი და თითქო ისეთი გამოწმენდილი, ენა რომ დააწო იქაურ მიწას, არავეითარი ჭუჭყი არ აჯყვება.

ეს ხომ განთქმულია, რომ დაბლობ სამეგრელოში, ისე როგორც ქვემო-იმერეთშიც, ეზოები მეტად სანუკვარად გამოიყურებიან ოდის, ან თუნდა ჯარგვალის, ან პიტაფიცრიდან აშენებულ ქოხის წინ. ეზოს შუაგულ საჩრდილობლად რომ ურგიათ რომელიმე დიდი ხე — მუხა, ცაცხვი, ლელვი, ან წიფელა; თუნდა თხმელაც. და მათთან შინ რომ შებრძანდები და ღამესაც გაათევ, ისეთი წმინდა ქვეშაგები, აბრეშუმის პირით შეკერილი საბნით, თავის გაქათქათებული ზეწრებით და საურებით მოგერთმევათ, რომ, როგორც იტყვიან, „თვალი ზედ დაგრჩე-

ბათ“. რაც უნდა ღარიბი იყოს მეგრელი, ქვეშაგებს მეტად ფა-
ქიზად ინახავს.

და აი მივედით „გოქკადილთან“.

როგორც ზემოთაც ვთქვი, აქ გზატკეცილი ორად იყოფა. მდინარე ტეხურის პირას, სადაც ხილია გადებული, ჩემსობას, ხილამდე ერთი ორიოდ სამიკიტნო იყო ჩამოდგმული და ზიდს გაღმა კი მოსჩანდა ძველი. მგონი მეცხრე, თუ მეათე საუკუნეში აგებული კარგა მოზრდილი, შესამჩნევი გეგმით აგებული ეკლესია. მას ორმოცის ეკლესიას ეძახიან, რადგან მტრისგან განაწამები, ეკლესიის მიერ წმიდანებად ჩარიცხუ-
ლი ორმოცი გმირია შიგ დამარხული. მათ საფლავს ეკლესიის ქვედა სართულში ეხლაც უჩვენებენ. ამ მოწამეებს არაბების შემოსევის, მურვან-ყრუს დროს მიაწერენ.

ამ ეკლესიიდან იწყება დიდი ციხის გაღვანი, რომელიც გარს ევლება იქვე ამართულ კარგა მაღალ მთას, რომლის წვეროკანაზეც კარგა მოზრდილი ციხეა წამოდგმული. აი, ამ ადგილს ჰქვიან ნაქალაქევი, ანუ მეგრულად ნოქალაქი, და შემდეგ ეს სახელი გადაედვა მთელ ეხლანდელ სოფელსაც და ამ მთის ძირს მდებარე სამკურნალო წყლებს. ეტყობა აქ ოდეს-
ღაც ძველებური ყაიდის ქალაქი იყო გაშენებული, რადგან იმ დროს ქალაქები თვითონ წარმოადგენდნენ ერთგვარ ციხე-სი-
მაგრეს და ბურჯადაც ერთი დიდი, ჯარის მეომართა შესანახი და მოსახლეობის თავშესაფარი ნაგებობა ჰქონდათ, როგორც აქ მთის წვერზე წამოდგმული ციხე-ბურჯი, რომელიც ირგვლივ, ოთხივე მხრივ გადაჰყურებს სამეგრელოს აქაურ კარგა დიდ ნაწილს და თვალი მიუწვდება იმერეთისა და გურიის საზღვ-
რებამდე. კარგ ამინდში კი, ფოთისაკენ, შავი ზღვაც ადვილი დასანახია. ამბობენ, ამ მთის პირდაპირ კლდეზე ახლაც ინახე-
ბა საბომალო რკინის ლუზაო. მაგრამ ეს ლუზა, რასაკვირვე-
ლია, არ ეკუთვნის არც ამ ორმოცის ეკლესიის და არც ციხის აგების დროს. ის უფრო სხვა დროისაა, თუნდაც წარმოვიდგი-
ნოთ პირველი საუცხოო სილამაზის და ხასიათის ქალის მე-
დევასი, რომლის მამას ბერძნული გამოთქმით ოეტესს და ჩვე-
ნებურად ოტიას ოქროს მატყლოვანი ვერძი ჰქონდა თავის სა-
სახლის კარზე ჩამოკიდებული და რომლის მოსატაცებლად

ბერძენი არგონავტებიც კი ჩამოვიდნენ ჩვენს ქვეყანაში და, მაშინდელ კოლხიდას მართო ოქრო კი არ წაართვეს, არამედ მათმა ერთმა საუცხოო ჭაბუკმა — იაზონმა — მედეაც კი გაიტაცა. აი ამ დროს ზღვით იყო მოფენილი აქაური არემარე და ლუზაც იმ დროინდელი უნდა იყოსო, ამბობდნენ ჩემს დროს აქაური ხნეირი ადამიანები.

თვითონ ციხეს კი, ჩვენს მატთანებს თუ დაეუჯერებთ, პქვიან გოჯის ციხე, ანუ ქუჯისა. ეს ქუჯი ხომ ლეგენდარული ვინმეა და იხსენიებენ როგორც საქართველოს არა ნაკლებ ლეგენდარული პირველი მეფის, ფარნაოზის სიძეს. ასე რომ პირველი მეგრელის სახელი ჩვენს ისტორიაში ქუჯიმ მიიკუთვნა და მეც ჩემს სიჭაბუკეში, ამით გაბრიყვებულმა, პირველად ჩემს საზოგადოებრივ ასპარეზზე გამოსვლისას ფსევდონიმად ქუჯი ავირჩიე. მით უფრო, რომ ქუჯის ციხე ნაქალაქევის მთის მეორე მხარეზე, ზედ ჩემს სოფელს, ბერთემს დაჰყურებს. მხოლოდ შემდეგ შევატყვე, რომ არც „შალვა დადიანი“ იყო მაინცდამაინც შემარცხვენელი და ამ „მარკით“ დაედივარ ეხლაც.

დიდი გალავნის შიგნით, ეკლესიის ეზოში, კიდევ არის ერთი უფრო მომცრო გალავანი, რომლის თავიც ზევით, მთაზე, პირდაპირ ციხე-ბურჯს ებჯინება და ბოლო კი ხიდის ქვემოთ, პირდაპირ მდ. ტეხურზე გადის. ეს თურმე გვირაბია, საიდუმლო გასასვლელ-ასასვლელი ციხისა, რომ მტრის შეუმჩნეველად, საჭიროების დროს, ხალხით და წყლითა თუ სხვა რამ საკვები მასალით მოემარაგებინათ დასაცავი ადგილი. ვარეშე მტერი, ეტყობა, უფრო სამხრეთიდან ადგებოდა ციხეს, ეს გვირაბი კი მათგან მოფარებული დასაველეთისკენ მდებარეობდა. იმავე დროს ამ გვირაბის პირად მდ. ტეხური დიდად ღრმაა და მორევივად არის ქცეული, გვირაბის პირიც კლდოვან ადგილებშია გაყვანილი. ასე რომ გვირაბის შემჩნევა უცნობისთვის არც თუ ისე ადვილია ეხლაც-კი, და ძველ დროს ხომ კიდევ უფრო შენიღბული იქნებოდა.

ამ ციხის ძირს ომი ხშირად ყოფილა თურმე კოლხიდის არემარეზე. ერთ დროს ბიზანტიელები და სხვა დროს არაბები აქეთ მოისწრაფოდნენ, ეხლანდებურად რომ ვთქვათ, თავიან-

თი აგრესიული მიზნების განსახორციელებლად, განსაკუთრებით არაბები, მურვან-ყრუს ჯარების შემოსევის დროს. მურვან-ყრუს სახელი, როგორც სასტიკი და განუკითხავი მტრისა, დღემდე ხალხშია იყო შემორჩენილი და ჩვენი მატთანები ხომ დიღხანს ჩერდებიან ქვეყნისთვის ამ დიდი შეჭირვების ამბებზე. ამბობენ, რომ იმერეთში ხსენებული არაბების შემოსევის დროს არიან გმირულად დაღუპულები დავით და კონსტანტინე მხეიძეები და, ვინ იცის, კიდევ რამდენი დღეს უხსენებელი ვაჟაკი, ვინ იცის რამდენი მათგანი ემსხვერპლა არაბებთან უსწორო ბრძოლას! ასე იყო იმერეთში, ასე მოხდა სამეგრელოშიაც. ჩვენი მატთანე იხსენებს ნაქალაქეთან ომის დროს არაბების ერთ რომელიდაც მძვინვარე სარდალ მერმეროეს, რომელიც რამდენჯერმე შემოესია თავისი ჯარით ქუჯის ციხეს, დიდი ზიანიც მიაყენა ჩვენს ლაშქარსა და მოსახლეობას, მაგრამ ქაბოლოოდ მაინც ვერ დაიმორჩილა ხალხი. ცნობილია, რომ არაბებმა თითქმის მთელი საქართველო დაიპყრეს ერთ დროს და კარგა ხანსაც ბატონობდნენ, მაგრამ კოლხიდის ამ კუთხეში მაინც ვერ იბოგინეს.

ჰმ! მერმეროე! არაბების სარდალი! ჯერ თქვენ სახელი გასინჯეთ!

ჩემს ყურში დღესაც ზღაპრულად ხმაურობს ეს მრავალბგერიანი სახელი.

და აი ამ ადგილებიდან იწყება გზა ბერთემისაკენ. ეს ის ადგილია, სადაც ლამაზი ტეხური თავისი ლურჯი, ანკარა ზვირთებით გამოსულა კლდოვანი მთების ვიწროებიდან, ორმოცის ეკლესიის ძირას თავისუფლად შლის თავის მჩქროლავ ნაკადულებს და ეშვება ფართო ქალებში და მერე ლალად მიექანება შავი ზღვისაკენ.

„გოკყადილთან“ ბერთემს გამგზავრებული სწორედ ამ ტეხურის ნაპირს უნდა გაჰყვეს და შეუდგეს აღმართს, რაიც ამჟამად კარგა ფართო გზატკეცილად არის გაყვანილი „ლაკადისაკენ“, სალიპარტიანოსაკენ.

გზატკეცილი მიუყვება მდინარის პირს, მაგრამ თვითონ კარგა მალაა აწეული სანაპიროდან და კლდოვან მთის ფერდობებს უვლით გარშემო. მთელი გზა ძალიან მოგაგონებთ

განთქმულ დარიალის ხეობას. მხოლოდ მინიატურულად, რა თქმა უნდა, რადგან ამ გზის მანძილი ერთ რაღაც 4—5 კილომეტრით თუ განისაზღვრება, მხოლოდ თავისი იერით მოგაგონებთ აღმოსავლეთ საქართველოს ხსენებულ სამხედრო გზას: იქით—აქეთ კარგა მალლა ამართული მთები, ერთი მხრით უფრო კლდოვანი და მომცრო ხეებითა და ჯაგებით შემოსილი, მეორე მხრივ კი წიწვოვანი ნაძვნარით და ფიქვნარით თავმოწონებული. ხეობა კი თავისთავად ვიწროა, მაგრამ მაინც თვალს ხიბლავს აქაური ბუნება და ფილტვებით ხომ ატყობთ, რომ როგორღაც თავისუფლად სუნთქავთ. ასე, კარგა ხანს, მიდინხართ ესეთ გარემოში, მაგრამ უეცრად ხეობა კიდევ უფრო ვიწროვდება და მალლობებზე მიმავალი გზატკეცილიდან უეცრად დაინახავთ რომ ის ტეხური, რომელიც აქამდე კარგა ფართო კალაპოტში იყო გაშლილი, უეცრად ისე დავიწროებულა, რომ აქედან ისე მოსჩანს — ადამიანმა ერთი კიდიდან ფეხი რომ გადააბიჯოს, მეორეზე დაადგამსო. გეუცნაურებათ მოზრდილი მდინარის უეცრად ასე პატარა ღელედ ქცევა.

ამ ადგილს ჰქვიან „ღელდა-მოკა“ და ამის გამო მთელს ამ გზას „გოქკადილიდან“ სოფ. ბერთემამდე იგივე სახელი ეწოდება: „ღელდა-მოკა“.

„მოკა“ ანუ უკეთ „მონკა“ მეგრულად მძიმეს ნიშნავს. სიტყვა ღელის დამატებით კი, აქ უკვე, ფეხმძიმე ქალის გამომსახველია. ქართულში ფეხმძიმეს ორსულ ქალს ვუწოდებთ ხომ? მეგრულში „ფეხმძიმეს“ სიტყვა „ფეხი“ მოშორებული აქვს, მხოლოდ „მძიმეს“ მეგრელი უმატებს „ღელდას“ და ამით ორსულ ქალს წარმოიდგენს. საკვირველი კია, ქორწილის დროს ფეხის შესახებ მეგრელი კიდევ მღერის: „კუჩხი ბედნიერი“ თუ „კუჩხი ბედნიერი“. აქ კი კუჩხზე, ფეხზე სრულებით არ არის ლაპარაკი. ორსულს კიდევ თავის სახელი აქვს მეგრულში: „უსენო“, მაგრამ ამის გარკვევა შორს წაგვიყვანს! „ღელდა-მოკას“ სახელწოდების გარშემო კი არსებობს ასეთი ლეგენდა:

მურვან-ყრუს დროს, როდესაც მერმეროე გარს ადგა ქუჯის ციხეს და აღებული არა ჰქონდა, ციხესთან ჩრდილოეთის მხრიდან მცხოვრებლებს, ეტყობა, მსვლელობა შეწყვეტილი არა

ჰქონიათ. და აი ერთ დღეს სწორედ ჩრდილოეთის მხრიდან, რომელიღაც სოფლიდან, შეიძლება ბერთემიდანაც, ციხისაკენ მიდიოდა ერთი ორსული ქალი. ეს დაინახეს თურმე იმ არემარეზე მოთარეშე არაბმა ჯარისკაცებმა და ქალს დაედევნენ. ქალმაც შეამჩნია მღევრები და ფეხს გაუჩქარა, მაგრამ აქ კი მდ. ტეხურს მიაღდა. ახლა რა ქნას? „წინ წყალი, უკან მეწყერიო“, რომ იტყვიან, ესეთ მდგომარეობაში ჩავარდა და უკვე სასოწარკვეთილმა ქუჩის ციხეს მიაპყრო თვალი. ციხეში წმ. გიორგის სახელობის ეკლესიაც იყო თურმე და სწორედ ამ წმიდა გიორგის შეთხოვა შეშველებათ.

ლეგენდა ამბობს, რომ სწორედ ამ ქალის ვედრების დროს მოისმა საშინელი ქექა-ქუხილი, შეირყა დედამიწა და ტეხურის ორივე მხრიდან გადმოცვივდა კლდეების უზარმაზარი ქვები. ამ ქვებმა კი ისე დაავიწროვა ტეხურის კალაპოტი, რომ ქალმა თავისუფლად გაადგა ფეხი და მეორე მხარეზე გადავიდა, მხოლოდ როდესაც მღევრებმაც მიაღწიეს ამ ალაგს, დავიწროებულმა მდინარის კალაპოტმა კვლავ იმდენზე გაიწია, რომ ადამიანი იქ ველარ გადააბიჯებდაო.

ამ ამბის შემდეგ დაერქვა ამ ადგილს—„დედა-მოკა“ და შემდეგ მთელ კლდოვან გზატკეცილსაც.

მამაჩემს უნდოდა ამ ლეგენდის შინაარსზე დაეწერა პოემა. დაიწყო კიდეც, მაგრამ, როგორც სხვა ბევრი საგულისხმო ნაშუშევარი, ესეც დაუწერელი დარჩა.

მკითხველს ცოტა გაუკვირდება უთუოდ — რას გვიამბობს ეს შალვა? რა დროს ისტორიული ეპიზოდები და ლეგენდებია, ის გვიამბოს, რაც მას თვითონ გადახდა, როგორ წარიმართა მისი ცხოვრების გზაკვალიო.

მაგრამ ჯერ ერთი იმ ადგილს, სადაც მიცხოვრია კი არა, გზად გამივლია, მისი მღებარეობისა და ავლა-დიდების ამბები გულს ჩამრჩენია, ამასაც მგონი, მნიშვნელობა აქვს ჩემი „თავ-გადასავლისათვის“, და მეორე კიდეც ის, რომ თქვენ მთელს ამ ჩემს ნაწერში შეამჩნევთ, რომ სამეგრელოს სიყვარული ჩემთან მოფრინდება ხოლმე „მსუბუქ ფრთითა“ და... ვერ ველევი. ამას გარდა ვილაცამ თქვა: მოხუცებს უყვართ მონოლოგებიო.

და... იყოს ესრეთ!

მაშასადამე, „დედა-მოკას“ გზაზე ჩვენ წავაწყდით ერთგან მდ. ტეხურის ძალზე შევიწროებულ კალაპოტს, რომლის გარშემოც ოდესღაც უფეთქია ხალხის ლეგენდას, შემდეგ რამდენჯერმე მოუხვევთ მარცხნით და მაშინ, როდესაც ერთის მხრით ისეთი კლდოვანი ფერდობია, გგონიათ თითქო უფსკრულს გადაცქერისო, გეშინიათ, რომ რითაც თქვენ მიემგზავრებით—ცხენით, ეტლით თუ აეტოთი — გზის კიდეზე არ მოსხლტეს და უფსკრულში არ გადაიჩეხოსო, უეტრად, ერთერთი ფერდობის შემდეგ, კარგა ფართოდ ჩავაკებულზე, გამოჩნდება მდინარის პირას დიდი და ლამაზი მინდორი, ლამაზი და ხალისიანი, თითქო გიწევით თავისთან: აქ ჩამობრძანდით, საამური ადგილია და დრო გავატაროთო, მაგრამ, ეტყობა, მარტო დროს სატარებლად არ ჰქონდა ამ მინდორს თავი განკუთვნილი. მის ფართო გულ-მკერდზე ხშირად იყო მშვენიერი სიმინდის ყანები აბიბინებული და ეგეც აძლედა მშრომელებს საზრდოს, თან, როგორც ამბობდნენ, მეტად უხესა და კარგ ხარისხისას. ამ მინდორსაც თავისი სახელი ჰქონდა და უთუოდ აქვს დღესაც: „ჭავახეთი“. ეს კი ვერაფრით ვერ გავარკვეე, თუ საიდან მოვიდა ოდიშში ეს მესხური სახელი. ასე მაკვირვებს მე გურიაშიაც სოფლის სახელი „საჭავახო“. სამეგრელოს ზემოხსენებულ მინდორზე კი გამიგონია, რომ ერთ დროს აქ გვარად „ჭავახიებს“ ედვით ყანებო. შეიძლება ეს ასეც იყოს.

14

ამ მინდორის შემდეგ გამოჩნდება კოხტა ბერთემი.

ერთი 15—20 კილომეტრის მანძილზე თვალი წვდება აღმოსავლეთ-სამხრეთის მხრივ მდ. ტეხურის ნაპირის გაშლილ ფართობს, მეორე მხრივ კი ჩრდილოეთისაკენ კვლავ მთებსა და გორაკებზე შეფენილ სამოსახლოებს.

ლამაზი სანახავია და ვიწროებიდან გამოსულს გიხარიათ, რომ ასეთ შნოიან ბუნების წიაღში მოხვდით.

„დედა-მოკას“ გზიდან ბერთემში შესვლისას, უწინარეს ყოვლისა, თქვენ თვალში გეცემათ პატარა აგარაკზე წამოსკუპებული ციხე-კოშკი. ეს ადგილი ყოფილა ბერთემელი დადიანების მამამთავრის, გიორგის სამოსახლო თავისი მაშინ აუცილებელი

ციხე-კოშკით, რადგანაც, როგორც ცნობილია, ესეთი კოშკები იმ დროის ფეოდალს უთუოდ უნდა ჰქონოდა. ეს იყო მისი ღირსების მაჩვენებელი და იმავ დროს ერთგვარად დამცველი უფრო შინაური მომხედურებისაგან. ეს მომხედურები იყვნენ უფრო ხშირად ადგილობრივი, დრო-დროთი აჯანყებული გლეხები, ყმები ფეოდალისა, ან სხვა თავადები, რაიმე მიზეზის გამო გადამტერებულები, ზოგჯერ თვით მკვიდრი ძმები. და აი ასეთი საგვარეულო ციხე-კოშკი ჩემსობასაც შემორჩენილი იყო ს. ბერთემს მეცხრამეტე საუკუნეშიაც.

ხსენებულ გიორგის ჰყოლია ორი ვაჟი—ალექსი და კოსტა და აი მხოლოდ ამ ორის შთამომავლები ვცხოვრობდით ამ სოფელში. ჩემსობას ბერთემში სულ ვიყავით ხუთი მოსახლე: ალექსის შვილებში—ბესა (ბესარიონ), დუტუ (დიმიტრი) და მამაჩემი ნიკო, ბესა და დუტუს ძმისწული, ტაიას (ტარიელის) შვილი, კოსტას შვილებში კი—სამსონი და დავითი. კოსტას შვილებს შვილება არა ჰყავდათ, უძეოდ გადავიდნენ. ალექსის შვილებში კი შვილებიანი იყვნენ ბესა, დუტუ და მამაჩემი. მაგრამ რაკი დუტუს მხოლოდ ერთი ქალიშვილი ჰყავდა—პარტყუნია (ნათლობით ივლიტა), ვაჟებიანი მხოლოდ ბესა და მამა დარჩა. ბესას ჰყავდა ვაჟი პეტრე, სამხედრო სამსახურში მყოფი, პოლკოვნიკის ხარისხისა და დარჩა მასაც ორი ვაჟი: გულიკო (კონსტანტინე), ინჟინერი, და კოტიკო (ნიკო), მუსიკოსი. მამას კი ვაჟთაგან მხოლოდ მე ვყავარ. ამჟამად კი ბერთემელ დადიანებთაგან ამ სოფელში აღარავინ ცხოვრობს. ჯერ კიდევ რევოლუციამდე ამოვიდგი თქიდან ფეხი და გავიფანტენით.

მეც ჩემი ბავშვობა ნაწილობრივ ზემოხსენებული ხუთი დადიანის ოჯახებში გამიტარებია. ერთი კია, ჩემი ტოლი და ჩემი ხნის ყმაწვილები მათ შორის არა ყოფილან. პეტრე იყო და, ჯერ ერთი ის ჩემზე ხნით უფროსი გახლდათ, მერმე კიდევ ჯერ სამხედრო სასწავლებელში სწავლობდა, შემდეგ კი პოლონეთში მსახურებდა და ჩვენი დაახლოება და მეგობრობა იწყება უკვე მონაქცევზე, როდესაც ის სამსახურიდან გამოვიდა და მეც ცხოვრების დიდ ასპარეზზე ვიყავ გამოსული. ასე რომ, ვიმეორებ, ბერთემში, ჩემს ნათესაებში, არავინ „მფსონი“ არა მყო-

ლია. სამაგიეროდ კარგა ძალი ამხანაგები მყავდა იქაურ გლეხებში, მაგრამ სანამ მათ მოვიხსენიებდე, საჭიროა, ჩემი ფიქრით, დავახასიათო ჩემი ბიკოლა-ბიძაჩემი, რადგან მათი ხასიათი და ცხოვრება აქამდე გამოჰყვა ჩემს მახსოვრობას.

აქ მოსახსენებელი ის არის, რომ არც ერთი ბერთემელა დადიანი არ იყო ყოყლოჩინა და კუდაბზიკა. თავიანთი იმ დროს მიჩნეული ღირსება იკოდნენ და საზოგადოებაში ამით შეიძლება თავმომწონებოდნენ კიდეც, მაგრამ ამას მაინცდამაინც არ იმჩნევდნენ, თვალში არავეს არ ეჩხირობოდნენ და მათი ხასიათი უფრო ღმობიერებისა და სათნოებისაკენ იხრებოდა.

მე შემდეგში დიდად გამაყვირვა ქართველი ბელეტრისტიზისგან აღწერილმა მებატონეებისა და გლეხების აღმამფოთებელმა დამოკიდებულებამ. ბერთემში მიღებული შთაბეჭდილება სრულიად ეწინააღმდეგებოდა მწერლების მიერ აღწერილ სურათებს.

ეგზეკუცია! ეს საშინელი რამ, ნამდვილი „ღვთისრისხვა“ გლეხებისათვის, ჩვენს არემარეზე ხომ არამც თუ არ განუცდიათ იქაურ მშრომელ მოსახლეობას, არც კი მოჩვენებიათ, მაშინ როდესაც სხვა შორეული სოფლებისთვის თავადებისაგან გამოთხოვილი ჭარი, ბოლო ხანებში მაინც 1905 წ. მოახლოებით და შემდეგაც, არც თუ ისეთი იშვიათი მოვლენა იყო.

რა იყო ამის მიზეზი, რომ ბერთემელი დადიანები არ მისდევენ თავის ყმებში მაინცდამაინც დიდ სისასტიკეს?

ჩემის ფიქრით, მეტად კეთილი გავლენა ჯერ ბებიაჩემის, მარიამ აბაშიძის, მისი ჯანსაღი შეხედულება საერთოდ აღამიანზე, რომ მას გლეხიც ადამიანად მიაჩნდა—ბებიას კი უჭერებდნენ, რადგან თავის უმწიკვლო ზნეობით დიდი ავტორიტეტობა ჰქონდა ირგვლივ მოპოებული; შემდეგ კი თვით მამაჩემი, რომელმაც, სხვა რომ არა ვთქვათ რა, ყველა მისი ყმა, სადაც კი იყვნენ, სრულიად უსასყიდლოდ გაანთავისუფლა და საერთოდ ხშირად გლეხების ინტერესების დამცველად გამოსულა თავის სიცოცხლეში როგორც საზოგადო შეკრებულებებში, ისე შინაობაშიაც. მამაჩემი კი ესახელებოდათ საერთოდ სამეგრელოში

და მისიანებში ხომ კიდევ უფრო, ასე რომ ძალიან ძნელი იყო ესეთი კაცის საქციელის წინააღმდეგის რისამე ჩადენა.

საერთოდ თითქმის ყველა ესენი გულკეთილი ხალხი იყო და მათგან მიმძლავრებული გლეხი, ან ვინმე თავადთან, თუ აზნაურთან არავითარი მათი ფიზიკური შეტაკება მე არ გამიგონია და არც მახსოვს.

ეს არც იმით აიხსნება, რომ ისინი სხეულებრივ დაჩაგრულები ყოფილიყვნენ ან სულით გლახაკები, რომ არ შეძლებოდათ ვისიმე გამკლავება, განსაკუთრებით ალექსის შვილებში. ბესა არაფერ იარაღს არ ატარებდა, მაგრამ სამაგიეროდ კარგად ჩამკვრივებული სხეულის პატრონი და მეტად მწყაზარი სახის მქონე, ლამაზი კი, ისეთი ღონიერი იყო, რომ ამბობდნენ, რვა ფუთიან სიმძიმის აწევას ადვილად ახერხებდაო. ღუტუ კიდევ მშვენიერად მოყვანილი ვაჟკაცი, ტანადი, ახოვანი, იერიანი. მისი მცნობნი ამბობდნენ, ღუტუ რა შეკრებილებამაიაც უნდა ნახო, უთუოდ იკითხავ—ეს კაცი ვინ არისო. თავის დროზე მთავარ დადიანის კარზე მსახურობდა დედოფლის საგარეო მხლებლად, სროლასა და ხმლის ხმარებაში განთქმული იყო.

არც თუ ღვინოს ეტანებოდა ეს ორი ძმა—მხოლოდ მაშინ, როდესაც სახლში სტუმრები ჰყავდათ, ან თვითონ იყვნენ სადმე წვეულნი ქორწილში ან ღლეობაზე.

კოსტას შვილებში უმცროსი, დავითი, მეტად კეთილი კაცი იყო. სულ თავს დატრიალებდა თავის პატარა, მაგრამ შემოსავლიან მამულს ბერთემსა და უშაფათში. ამ ორ სოფელში ჰქონდათ საწმენკვიდრო ბერთემელებს. ამიტომ ყოველდღე დავითა, თავის განუყრელ მაჯავ ჯორზე შემეძარი, ჩამოუვლიდა თავის მიწა-წყალს და ცხადია, შეივლიდა ხოლმე თავის ნაყმევების ხან ერთ ოჯახსა და ხან მეორეში. იქ კი უთუოდ მოართმევდნენ თავის ნაბატონარს ან იზაბელას (ადესას) ღვინოს, ან კიდევ უკეთესს, განთქმულ ოჯალეშის ტოლს გუდაათურონს. და დავითიც შეპიკვიკიებული თავის საყვარელ „იჯოუყუზეიტ“-ს შემოსძახებდა. ეს იყო მისგან ხუმრობით გამოგონილი ვითომდა აფხაზური სიტყვა.

მისი უფროსი ძმა სამსონი სულ სხვა ხასიათის იყო. ტანით ერთი ჩია, გამხდარი და არც თუ ძალიან სახიერი, როგორიღაც

გულჩახურული კაცი იყო. ესეც თავს დატრიალებდა თავის მიწა-წყალს, მაგრამ უფრო ხშირად კი ახალსენაკში იყო სასამართლოში, სადაც მუდამ განუწყვეტელი დავა ჰქონდა გაბმული ან თავის ნაყმევებთან, ან ხიზნებთან, ან მეზობელ აფაქიძეებთან, ფალავებთან და სხვ. ეტყობა, ესეთი საქმიანობა თუ არ ახარებდა, ართობდა მაინც და თითქოს ამაზე იყო გადაგებული. ბესა და ლუტუ კი დასცინოდნენ, ახალსენაკის სუღია ბერიძე რუსულად „კნიაზ-სუტიაგა“-ს გეძახისო. სამსონმა გაიგო „სუტიაგის“ მნიშვნელობა, მაგრამ არა წყინდა, ამ დაცივნაზე ერთს ჩუმად ჩაიცინებდა წვერ-ულვაშში.

„სუღია ბერიძე“!

თავის დროზე მთელი მაშინდელი სენაკის მაზრა უმეტეს წილ ემადლიერებოდა თურმე: მეტად სამართლიანი კაცი იყო. საქმეს მუდამ საფუძელიანად გაარჩევდა და უმეტეს შემთხვევაში მხარეების მორიგებას ცდილობდა. თან საქმეების გარჩევის დროს დინჯად ხუმრობდა კიდევ და ამ ხუმრობაში სიმართლეს არკვევდა.

ეს კაცი ერთ დროს გაბედულად შემოვიდა ქართულ ლიტერატურაში. ილია ჭავჭავაძის პირველ უფროს „საქართველოს მოამბე“-ში კარგა მოზრდილი ესრეთწოდებული სათავედასავლო რომანი მოათავსა: „უცნაური ნიშნობა თფილისის მესაიდუმლეთაგან“.

მამაჩემს წყინდა: ამ კაცს ცხოვრების ცოდნა ჰქონდა, კარგი მხატვრული თვალი, კარგი ენაც, და ბოლოს თავისი თავი მარტო მართლმსაჯულებას გადააგო.

აი ამ კაცმა დაარქვა ერთ ბიძაჩემს „სუტიაგა“.

ბიძა-მეთქი, რომ ვამბობ, ასე ვიყავ დაჩვეული ბავშვობიდან და ასე ვეძახდი ყველა ბერთემელ დადიანს, თორემ ალექსის შვილები ბაბუაჩემის, ტაიას ძმები იყვნენ, კოსტას შვილები კიდევ მათი ბიძაშვილები, მამას კი ძმა არა ჰყოლია, ერთადერთი ვაჟი იყო ოჯახისა, ასე რომ მამით მკვიდრი ბიძა არასოდეს არა მყოლია.

არც მამიდეები. თუმცა მათ ყველას ბაბულებს, მამიდას ვეძახდი ბავშვობიდან. ერთი მათგანი ხომ, ნინო ფალავა, სულ თითქმის განუყრელად ჩვენთან იყო, ხან ჩვენსა სოფლად და ქალა-

ქად, ხან ჩვენ მასთან, მის ოჯახში, სოფ. ბანძაში. ეს უფრო იმიტომ, რომ ნინო და მამაჩემი ხნით ტოლები იყვნენ, ბავშვობიდანვე ერთიმეორეს შეჩვეულნი და მამა სხვა მამილებზე უფრო ამასთან იყო დაახლოვებული.

ახლა ბიცოლები. ყველა ეგენი თავადის ქალები იყვნენ, რადგან იმ დროს სამეგრელოშიაც თავადისაგან თუ არ თავადის ქალის თხოვნა, სხვა წოდებიდან „არ ეგებოდა“, მით უფრო დადიანებისაგან. და აი ბესას ჰყავდა ანჩაბაძის ქალი, ერთ დროს ლამაზი და ეშხიანი, მაგრამ მე ის მუდამ, ზამთარ-ზაფხულ, ყოველ ცისმარე დღეს, მწოლიარე მახსოვს. იშვიათად თუ წამოდგებოდა თავის სახლში და გარეთაც რაიმე დიდ დღესასწაულზე თუ წავიდოდა ეკლესიაზე, რძლებთან ხომ თითქმის არ დადიოდა. არც ჩვენსას მახსოვს მისი ამოსვლა, იმიტომ კი არა, რომ სამღერავი ჰქონოდა რძლებთან ან ვინმესთან, ისე, რატომღაც განდეგილივით უყვარდა ცხოვრება და ჩემსობას შინაც თავისი შვილები არა ჰყავდა, გარდა ერთი უფროსი ქალისა, პასიკოსი, რომელიც მხოლოდ დედის გარდაცვალებიდან კარგა ხნის შემდეგ გათხოვდა და ისიც ცოტა ხანში შესული, წაიყვანა გურულმა შალიკაშვილმა და ბედნიერად დალია თავისი დღენი. ბუნებით კი მეტად მხიარული, მეჩანგურე და მომღერალი ქალი იყო და თავის კეთილი ხასიათის გამო მთელ სოფელს უყვარდა, მეც მისგან ძალიან განებივრებული ვიყავი. სხვა შვილები, ვაჟი, მაგალითად, პეტრე, როგორცა ვთქვი, მეტწილად ჭერ გიმნაზიაში იყო, შემდეგ სამხედრო სასწავლებელში და, დაბოლოს, სამხედრო სამსახურში, ასე რომ შინ იშვიათად ბრუნდებოდა. დანარჩენი ორი ქალიშვილი კი ადრე დათხოვდნენ.

და აი ერთხელ, მონაქვევზე, მუდამ მწოლარე ჩემს ბიცოლას, ბესას მეუღლეს, ანჩაბაძის ქალს, მოესურვებინა სამურზაყანოს წასვლა თავის ქალ დესისთან. წასულა კიდევ, ცოტა ხანი მოუთევია კიდევ თავის შვილთან, მაგრამ გამხდარა ავად და გარდაცვლილა კიდევ. აქ მოხდა ერთი კურიოზი: სიძემ, როგორც იტყვიან, „არც აცივა, არც აცხელა“, არავის ჭირისუფალს არ შეატყობინა ადამიანის გარდაცვალება, თავის სახლშიაც, სოფლის ჩვეულებისამებრ, არ მოუწყო შეცხადება და

შეტირილი, კუბოში უჩუმრად მოათავსა მიცვალებული და პირდაპირ გამოუდგა გზას სოფ. ბელიიდან ბერთემისაკენ. ამათ შორის კი დიდი მანძილია და ადამიანი ცხენითაც ერთ დღეს ვერ ჩააღწევს, ამიტომ სიძემ ზუგდიდს მიაღწია თუ არა, გაანსენდა რომ სოფ. ყულისკარში ცხოვრობდა ბესას სიძე—პეტრე მხეიძე და ღამის ბინდბუნდში პირდაპირ მიაყენა მის სახლს მიცვალებული. მხეიძის სახლში მამაკაცთაგანი არაეინ იყო, შინ იყენენ მხოლოდ მოხუცი დადიანის ქალი სიღუ, ბესას და, თავის მოხუცივე მოახლით. კუბოს დანახვაზე თურმე ორთავენი კინაღამ კეუიდან შეიშალნენ. მაგრამ სიღუ გონიერი ადამიანი იყო და როდესაც გაიგო სინამდვილე, შარვაშიძეს არ აგრძნობინა მისი უხეშობა და ჩვეულებრივი ჭირისუფლობა გამოიჩინა. მკვდარი აღარ დაანება სიძეს ბერთემს წასაღებად, თვითონ გაგზავნა კაცი ძმასთან უბედურების შესატყობინებლად და ტირილის დღეც თვითონ დანიშნა თავის სახლში. დანიშნულ დროს ბერთემიდან ჩამოვიდა ბესა თავისიანებით, სხვა ხალხიც შემოკრება სატირალში და შემდეგ პატივისცემითა და სამგლოვიარო „ზარის“ გალობით წასვენებული იქნა მიცვალებული სოფელ ბერთემს თავის სამარხში.

სიძეს უძრავადნენ მის უცნაურ საქციელს, მაგრამ გამოცდილები ამბობდნენ „რა მოეთხოვება კვაჩი შარაშიას, ერთი სოფელში აღზრდილი აფხაზი „შიშტიბუქა“ თავადიაო“.

მეორე ბიცოლა, ეს უკვე ბესას უმცროსი ძმის, დეტუს ცოლი იყო, მინაღორა, ფალავას ქალი. საერთოდ კი შინაურებიც და გარეშენიც გრძელი სახელის მაგივრად შემოკლებით მინას ეძახდნენ.

ლამაზი ქალი იყო, კოპწია. უყვარდა კოხტა ჩაცმა-დახურვა. თან მეტად ზრდილობიანი და მომხიბვლელი ქალი იყო, მაგრამ რატომღაც თავის ოთახიდან იშვიათად გამოდიოდა. თუ ძალიან საპატიო სტუმრები არ მოუვიდოდათ ოჯახში, ისე თავის ოთახიდან ფეხს არ გამოდგამდა და ამის გამო ხშირად უსიამოვნებაც შემთხვევითა ქმრისაგან. სადმე წასვლაც ან ნათესავეებში, ფალავებში, მაგალითად, ან რაიმე დღესასწაულზე, თუ არ დიდის გამოჩინებით, არ უყვარდა: უთუოდ საუკეთესო კაბა

უნდა ცმოდა, საუკეთესო ცხენი და საქალო უნაგირი, ევროპული სედლო, ძვირფასად მოქარგულის ასალით (თოქალთოს ზემოთ ცხენის გავაზე გადასათარებელი ქსოვილი) ჰქონდა, თან კარგა ძალი ამაღაც უნდა ხლებოდა თავის ქმრის წინამძღოლობით, ადგილობრივი აზნაურება: ბარკალაიები, შავდიები, და ასე გამომზეურდებოდა. არც თუ დიდი მეოჯახე იყო, მაგრამ მუდამ ჰყავდა მეოჯახეობაში დახელოვნებული ვინმე ხანში შესული დედაკაცი და ის იყო ღერძი ოჯახისა. თვითონ მხოლოდ განკარგულებას იძლეოდა.

შვილი ერთი ჰყავდათ, ულამაზესი გოგონა, სახელად პარტყუნია. ეს დედის მიერ საალერსოდ შერქმეული სახელი იყო, მეგრული სიტყვიერებიდან გამომდინარე. აი ამ შვილის დიდი სიყვარული ჰქონდა, თავიდან არ იშორებდა, სულ თავზე დატრიალებდა და ამის გამო, როგორც ყველა დედის კაბასთან მიკედლებული ბავშვი, ისიც დედის ერთა, საბოლოოდ გამოვიდა სახით მშვენიერი, მაგრამ მეტად განებივრებული და საკუთარ ნებისყოფას მოკლებული ადამიანი. მაინცდამაინც მინამ პარტყუნიას იმ დროის სათავადაზნაურო პირობების მიხედვით ბრწყინვალე გათხოვება მოუწყო. მიათხოვა ისევ დადიანს, ზუგდიდის მაზრის, წალენჯიხელ დიდად შეძლებულ დიმიტრი დადიანის ვაჟს—ბაძუს.

მე მახსოვს მათი ჯვარისწერა და დიდი ქორწილი იმ დროისდა მიხედვით. პირველად ვნახე ჩვენებური მაშინდელი დროის ნადიმი. სამ ღღეს გაგრძელდა. შვენოდა დუტუს დიდი ოდის ფართო დარბაზს უცხო სტუმრები, ჩამოსული იმერეთიდან, აფხაზეთიდან, გურიიდან. იყო საუცხოო სიმღერები, ცეკვა და ქართული ჰუმორული შეხვედრები სიტყვათა თამაში.

პარტყუნიას ქმარიც ბაძუ ჩამოესახლა ბერთემს, თუმცა თავისი მშვენიერი მამული წალენჯიხაში არ მიუტოვებია და მთელი ოჯახი მორიგისით ხან ბერთემს ცხოვრობდა და ხან წალენჯიხას. ასე რომ ამ ოჯახის ცხოვრება მშვიდად და უღრუბლოდ მიმდინარეობდა. საწყენად ის ჰქონდათ, რომ პარტყუნიას შვილი არ გაუჩნდა და დიდძალი შეძლება ბიძაშვილებზე გადადიოდა საბოლოოდ, მაგრამ ცხოვრება მაინც აუმღვრევლად

მიმდინარეობდა, სანამ თვითონ დუტუ, შედარებით ახალგაზრდა, ფილტვების ანთებით არ გარდაიცვალა.

მას შემდეგ მინაც ლოგინად ჩაეარდა და ცუდმა ავადმყოფობამ, წყალმანკმა, ბოლო მოუღო.

დუტუს დამარხვანზეც დიდი ტირილი იყო მოწყობილი, მრავალი სტუმრებით, მოზარეებით და ქალების მეგრული მოთქმით აკვნესებული.

ყველა ეს ამბავი „ტაბულა რაზასავით“ გულს მაჩნდებოდა უკვე ყრმობაში შესულს და მაცნობდა ადგილობრივ ზნე-ჩვეულებებს.

მესამე ბიცოლა იყო მიქელაძის ქალი, ნასა. ეს სულ სხვა ტიპის ადამიანი იყო. უდრეკი ხასიათის, დიდი ნებისყოფის პატრონი და უყვარდა მბრძანებლობა. ყველანი ერიდებოდნენ ჯა ანგარიშს უწევდნენ. დიდი პატივმოყვარე ქალი იყო და სამაზრო ქალაქიდან ბერთემისაკენ ისე არ დაიძვრებოდნენ მაზრის უფროსი, მომრიგებელი მოსამართლე ან პოლიციის ბოქაული, რომ ნასასთან არ გამოეელოთ და იქ სტუმართმოყვარე მასპინძლის გულუხვობა არ განეცადათ.

თვითონ ნასა კარგი ახოვანი მოყვანილობის და მწყაზარი, მაგრამ ცოტა მკაცრი სახის პატრონი იყო და მისი ქმარი სამსონი, აი ის, რომელსაც მომრიგებელი მოსამართლე ბერიძე „სუტიაგას“ ეძახდა, ერთი ჩია კაცი იყო და თავის ცოლთან ისე გამოიყურებოდა, როგორც ერთი ვინმე მისი შინაური მხლებელთაგანი.

ნასამ აკი არ დაუფასა ქმრობა და მთელი მისი მამული და შეძლება ოფიციალურად თავის თავზე დაამტკიცებინა. ასე რომ ბერთემში ეხლა საძმო მამულში ნასა გამოდიოდა ერთ-ერთ მემკვიდრედ.

ნასამ დიდხანს იცოცხლა. მოუსწრო 905 წლის რევოლუციამ და თავის სახლ-კარიდან გაძევებულა, თავის ქმრის სიკვდილის შემდეგ, რომელიღაც მისი ერთგული გლეხის სახლში გარდაიცვალა თითქმის სრულიად გაღარიბებული და უპატრონო.

შვილი არა ჰყავდა. შვილობილად აყვანილი ჰყავდა თავისა ძმისწული კიტუ მიქელაძე, მშვენიერი და სახიერი ვაჟკაცი,

მაგრამ ჯერ კიდევ ნასას და საბსონის სიცოცხლეში რომელიღაც თემობაზე ცხენმა გადმოაგდო და მოკვდა.

ახლა კიდევ ერთი ბიცოლა, სოფიო, მიქაძის ქალი, სამსონის ძმის დავითის მეუღლე. ესეც ლამაზი და ცოცხალი ადამიანი. ჩემი ნათლია იყო და მისგან, როცა ბერთემს ჩავიდოდი, დიდად ვიყავ განებივრებული.

მხოლოდ საქმე ის არის, რომ მე ჩემი ნათლობაც მახსოვს, რადგან 4 წლის ვიყავი, როცა მომნათლეს.

ძველ დროს მშობლები საერთოდ იპარავდნენ თავიანთი შვილების წლოვანებას და დაბადების თარიღს ყოველთვის მოგვიანოდ აღანიშვნიებდნენ ადგილობრივ მღვდლებს. ეს იმისათვის, რომ სასწავლებელში მიღების დროს ასაკს არ დაებრკოლებინა მოსწავლე. მაგრამ მამაჩემს ამისთანა სიცრუე არ დაქირვებია და ამიტომ მეტრიკაში დაბადების თარიღად მიწერია 1874 წ. და ნათლობისა კიდევ 1878 წ.

ნათლობა ასე მახსოვს: საღამო ხანი იყო. ბიძია დუტუს კარის ეკლესიაზე ხალხი შეკრებილიყო. მეც წამიყვანეს და სანთლებით გაჩაღებულ ტაძარში მოვხვდი. ამბიონთან ემბაზი აღვა, ის დიდი ჭურჭელი, სადაც მოსანათლავი ბავშვი უნდა ჩაუშევან. მახსოვს, ჩემმა მორდუმ, ნიკოლოზა ზარელუამ შემოიტანა კოკით წყალი და ემბაზში ჩაუშვა. ეტყობა ცივი წყალი იყო, რადგანაც შემდეგ დიდი თუნგით აორთქლებული ცხელი წყალი ჩაასხა და ამითი შეაზავა ადამიანის სხეულისათვის ადვილად ასატანი სითხე.

მომკიდეს ხელი ბიცოლა სოფიომ და გიორგი წულუკიძემ, დედიჩემის ძმამ, ესეც თურმე ჩემი ნათლია იყო, მიმიყვანეს ემბაზთან და ძიძამ ტანისამოსი გამხადა. მღვდელმა რაღაც წაილოცა, მგონი ჭვარიც გადმომსახა და შემდეგ წყალში ჩამიშვა. ნელთბილი წყალი მიამა და ჭყუმპალაობა დავიწყე, მაგრამ მამამ შემაჩერა და მიბრძანა, რომ მღვდლისათვის ყური დამეგდო და რასაც ის მეტყობდა, შემესრულებინა. მეც ასე მოვიქეცი. მღვდელმა კიდევ რაღაც ლოცვები აღავლონა. შემდეგ სახეზე და ხელზე ჭვარის სახედ წამცხო ნელსაცხებლად წოდებული ზეთი—მირონი, შემდეგ ამომიყვანა ემბაზიდან და ნათლიებს

გადამცა. იმათ ტანთ ჩამაცვეს და მღვდლის წინამძღოლობით სამეგრეო შემომატარეს ემბაზის გარშემო.

ყველაფერი ეს ძალიან მართობდა, მაგრამ უეცრად მღვდელმა ხელი დამავლო და ეკლესიის საკურთხეველში შემიყვანა. იქ ძალზე ბნელოდა, მღვდელმა ხელი გამიშვა და მარტო დამტოვა. აი აქ კი ველარ შევიქენი კარგ გუნებაზე და თითქო მორიდებით, მაგრამ მაინც ზღუქუნე მოვრთე. ამ მდგომარეობიდან ისევ მღვდელმა გამომიყვანა, კვლავ სინათლიან ტაძარში მომახვედრა და მეც... ავდარმა გადაილო და საქციელწამხდარმა, ხალხის დანახვაზე თითქო ღიმილი მოვიწოდამე, მხოლოდ ლოყებზე მსხვილი კურცხლები მაინც მცვივოდა. ამის დანახვაზე მომვარდა ძიძა და „უი, უი, შენ გენაცვალოს!“ ძახილით ცრემლები მომხოცა. ირგვლივ კი ყველანი ხარხარებდნენ, ხელში აყვავდით და განსაკუთრებით ქალები პირდაპირ ტუჩებში მკოცნიდნენ.

ოო, რა შემეზარა მაშინ ეს ტუჩებში კოცნა და დიდხანს ვარიდებდი ტუჩებს, როდესაც შემდეგში ვინმე ქალი მოინდომებდა ჩემს მოალერსებას და კოცნას.

ეს მანამ... სანამ მე თვითონ კარგა არ წამოვიჩიტე. მაგრამ წამკითხველს რად სჭირდება ამის ახსნა-განმარტება.

ბიცოლა სოფიომ დიდხანს იცოცხლა ბედნიერად თავის ეფილ ქმართან დავითთან, მაგრამ შვილი არც იმას ჰყოლია. მანაც შვილად ერთი მისი მონათესავე ქალი, სახელად შუშუ აიყვანა. ესეც რომ დაქალდა, გათხოვდა, მაგრამ არც ამას ჰყოლია შვილი, ისე გარდაიცვალა.

ამგვარად, ბერთემელი დადიანების, როგორც იტყვიან, „ნატისუსალი“ აღარ არსებობს.

ამჟამად იქ არცერთი ბერთემელი დადიანი არ ცხოვრობს. თუმცა გამოვტეხილვარ, ძალიან მიზიდავს ბერთემს ჩაბრუნება. კარგი იყო ჩემი უკანასკნელი დღეები იქ გამეტარებინა, იქ. მამაჩემის საფლავის ახლოს და მეც იქ დავმარხულიყავ, მაგრამ ეს, ვატყობ, რომ განუხორციელებელი ოცნებაა... „მიზეზთა გამო სხვისა და სხვისა“.

აქ არ შემიძლიან არ გავიხსენო ერთი ჩემი ჩანაწერი

ჩემს დღიურში. თათქო ჩემი ცხოვრების ერთგვარი შეჯამება გამიკეთებია (ნაუცბათევად)...

15

მომყავს დღიურიდან ამონაწერი:

„ერთხელ თავუნას ვუთხარი... ეს იყო მაშინ, როდესაც მე რესპუბლიკის თეატრების გამგედ ვმსახურებდი განათლების კომისარიატში და ჩემი „უბედური რუსიც“ ახალი გამოსული იყო.

ვუთხარი: ბედნიერი კაცი ვარ-მეთქი!

ერთი აღმაცერად შემომხედა. ჩემთვის არ უთქვამს, მაკრამ უთუოდ გაიფიქრა: რა გულუბრყვილო კაცი ყოფილა ეს შალვა, როგორ პრიმიტიულად აზროვნებსო. მე კი ხუმრობით ასე მომმართა: „მართალი ხარ, შალვა, შენც შენი ბედნიერება სხვის „უბედურებაზე“ ააშენეო. მიგხვდი, რომ ჩემს რომანზე ლაპარაკობდა“.

მე მაინც მის შემდეგაც ჩემი თავი ბედნიერ კაცად მიმაჩნია. რა არის ბედნიერება?

უთუოდ ის, რომ დარწმუნდე—ტყუილა არ გიცხოვრია ამ ქვეყანაზე, ბევრს არა, მაგრამ ცოტა რასმე მაინც შენც აკეთებდი ხალხის სასარგებლოდ და ეს დაგიფასდა.

თან... პირადად შენ დიდხანს გაძელ და ფიზიკურად ჯანმრთელი კაცი იყავ. ნუ დავმალავთ ამ მონაქცევზე მაინც: ჩემო საერთოდ მოკრძალებული ცხოვრებიდანაც კი ბევრი სიამოვნება მიმიღია.

ამგვარად, როგორც ამ მინაწერის გადაკითხვის შემდეგ დანახავთ, არ ვიყავ მთლად უბედური კაცი. მაგრამ სჯობია, რომ ვთქვა „უბედო“-მეთქი.

„ბედი“ თითქო მწყალობდა და... გამიტანა, ტკბილ სიბერეს მიმალწევინა.

რალა თქმა უნდა, დიდ ბრწყინვალე ვარსკვლავად არ ვანათებ, მაგრამ პატარა ლამპიონად მაინც შევიმჩნევი.

ჩვენი პარტიისა და მთავრობისაგან მოალერსებული ვარ და ხალხი ხომ—არც ამას ვტრიაბახობ—სადაც კი გამოვჩნდები შეკრებებილებაში და სიტყვით გამოვდივარ, დამსწრეებს პირზე ღრმილი დაკრთისთ...

ეს ჩემი ბედნიერება!

ეტყობა ვუყვარვარ.

თუმცა ჩვენი ხალხის სიყვარულს კარგა ხანია ვგრძნობ. განა რა გავაქეთ ისეთი? შეგნებული მაქვს, რომ მეტის და უკეთესის გაკეთება შემეძლო, მაგრამ ესეც ვიცი, რომ ეს „ჩემდაში სიყვარული“ ჩვენ ხალხს მისი მაღალი, ნიჭიერი შუბლის და მისი მეტად ფართო გულის მეოხებით მოსდის და... მეც აქ ვჩუმდები.

მხოლოდ აი, როდესაც პირადად მე ფიზიკურად სრულიად დავჩუმდები, ესეც ვიცი, რომ ჩვენს ქვეყანაში ერთხელ კიდევ შევეიტან აფორიაქებას:—„სად დავმარხოთ?..“

„ბერთემში, ბერთემში“ გაიძახის ჩემი მკვდარი გული. მაგრამ ამას მკვდარს კი არა, ცოცხალსაც არ დამიჯერებენ.

ამხანაგები კი განაგრძობენ: „როგორ დავმარხოთ, პირველი გამოსათხოვარი სიტყვა ვინა თქვას?“ და სხვ.

მაშინ ვინმე გაიხსენებს და იტყვის:—რა დასანანია, რომ შალვა აღარა გეყავს, თორემ ჩვენი (მწერლების) პრეზიდენუმის დაქინებით მუდამ შალვა იყო ჩვენ მიცვალებულთა დასაფლავებაზე სიტყვის წარმომთქმელად განკუთვნილი...

ჰა, ჰა! (ეს მე ვიციინი!)

ვიცი, რომ კარგად იტყოდაო!

არა, ყმაწვილებო, არა! არ გამადლით ჩემს სიტყვებს, ზოგჯერ ესეთ შემთხვევებში თქვენი დაძალებითაც წარმოთქმულს.

თქვენ მუდამ გეზარებოდათ მიცვალებულზე სიტყვის წარმოთქმა.

გასაგებია!

მე კი... სიტყვები არ მინდა, მაგრამ რაკი ვიცი, რომ ილაპარაკებთ...

ილაპარაკეთ!“

16

ახლა ერთი სათაკილო ჩვეულება მინდა გავიხსენო, რომელსაც სამეგრელოში ჩემი ყრმობისას შევესწარი, მხოლოდ ახლა—„მადლობა ღმერთს!“—ეს ჩვეულება ძირიან-ფესვიანად აღმოფხვრილია ჩემს მშობლიურ კუთხეში.

ეს არის გასული საუკუნის 80-90-ან წლებში კარგა გავრ-

ცელებული ცხენის ქურდობა. ბევრი მისდევდა ამ „ხელობას“, დიდი, პატარა. განსაკუთრებით თავად-აზნაურობის წრიდან და მისი ამჟობი გლახობაც. ზოგი დიდი თავადი მფარველობდა კიდევ ქურდებს და მთელ თავის გავლენას ხმარობდა, რომ ჩავარდნილი დამნაშავე დაეხსნა სასჯელისაგან. ეს კიდევ უფრო იმიტომ. რომ ცხენის ქურდობა შემოსავლიანი იყო. აფხაზეთში მოპარული ცხენი ქ. ხონში „არმაგად“ იყიდებოდა. და ზოგჯერ უფრო შორსაც, მაგ., ზემო იმერეთში, ზესტაფონში. „არმაგი“ ამ შემთხვევაში უდრის „არალეგალურს“, თუმცა ესეთ არმაგებს ზოგჯერ ყალბი მოწმობებიც თანა ჰქონდა და-ყოლილი.

როგორც ვთქვით, იმ დროს ცხენის ქურდობა ძალიან გავრცელებული იყო სამეგრელოში და ამ ლეგალურად მოჩვენებულ „ხელობასაც“ ჰქონდა თავისი წესები. მაგ., ქურდი ცხენს თავის სოფელში, ან მის ახლომახლო არ მოიპარავდა, არც თუ ვინმე გამოჩენილ პიროვნების ცხენებს გაეკარებოდა. ეს სირცხვილი იყო, რადგან ცხენის მოპარვა ქურდ-ბაცაცობად კი არ მიაჩნდათ. ეს მათის წარმოდგენით ვაჟკაცური საქმე იყო და ყოველი ესეთი საქციელი თითქოს გამირული ქმედობისა პოეტურ სა-მოსელში იყო გახვეული. ცნობილ მწერალს უიარალოს (თათარიშვილს), „მაძელუკის“ განთქმულ ავტორს, აქვს სამეგრელოს ცხოვრებიდან ცხენის ქურდობისადმი მიძღვნილი დიდი რომანი და... ერთ დროს სამეგრელოში ბევრი ემდუროდა უიარალოს, საჯაროდ „გამოგვაჰენაო“, მაგრამ იმას კი არ უკვირდებოდნენ, რომ ეს მახინჯი მოვლენა მეგრელების სახასიათო თვისება კი არ იყო, არამედ გამომდინარეობდა სამეგრელოში არსებულ იმ დროის პოლიტიკურ, სოციალური და ეკონომიური მდგომარეობიდან.

მე კი ერთხელ, ჩემი სიჭაბუკის დროს, დავესწარი დიდ ეზოში მშვენიერი ცაცხვის ძირას (ზაფხულში, რასაკვირველია), დარბაისელ აზნაურთა საუბარს, სადაც, სხვათა შორის, ცხენის ქურდობაზე ჩამოვარდა ლაპარაკი. მართალია, იმ დროს უკვე გადავარდნილი იყო ეს ჩვეულება, მაგრამ უნდა მოგესმინათ, როგორის აღფრთოვანებით და შთაგონებით ლაპარაკობდნენ იმ მოვლენაზე... განსაკუთრებით ერთი ზორბა, კარგა ჩასუქებული აზნაური, სახელად კვიტინია. ამ კაცს ნათლობის სახელიც

ჰქონდა: ალექსი, მაგრამ საზოგადოდ საქართველოში, და განსაკუთრებით სამეგრელოში, ხომ აგერ ახლამდე უფრო ამ შერქმეული სახელით იცნობენ ერთიმეორეს.

მან, ამ კეტიწიამ, ბევრი საოცარი შემთხვევა გაიხსენა ცხენიპარია ადამიანების ცხოვრებიდან, ბევრი სასაცილოც, ბევრი ჩავარდნის ამბებიც, მაგრამ მთავარი ის იყო, რომ ყველა ამ ამბებში ის მეტ ყურადღებას საქმის ვაჟკაცურ მხარეს აქცევდა, სახიფათო მდგომარეობიდან მათ მიერ თავის დაღწევას და სხვ.

ვწუხვარ, რომ გაგონილი ეპიზოდები მაშინვე არ ჩავიწერე ჩემ „საკუქნაოში“. ახლა უკვე გამომქარდა ხსოვნიდან. საგულისხმო კი იყო.

რაღა თქმა უნდა, ცხენიპარიებს სდევნიდა მაშინდელი პოლიცია, მაგრამ სოფლის მოსახლეობა ყოველთვის ცდილობდა, რომ შემჩნეული პიროვნებები არასოდეს არ გამოემყლავენებია და თუ სოფელში საიდანმე მოპარული ცხენი აღმოჩნდებოდა, მას პატრონი ვედარ ცნობდა, რადგან პირველი დალი (ტავრო) ყოველთვის ახლად იყო მეორე დალის დაკვრით შეცვლილი და გადასწორებული. ასე რომ ნამდვილ პატრონს ხშირად უჭირდა იმის დამტკიცება, რომ ცხენი მისი საკუთრება იყო და მისი ოჯახიდან მოპარული. ცხენიპარიები კი, ზოგი განსაკუთრებით, ისე იყვნენ დახელოვნებულები, რომ ნაცნობების კი არა, უფრო შორეულ მეპატრონეთა ცხენების ნაკვალევსაც კი არჩევდნენ და გამოიცნობდნენ—ეს ამა და ამ კაცის ცხენის ნაკვალევიაო.

ასე რომ ცხენის ქურდობა და ამ ნაქურდალის „აღებ-მაცემობა“, თუ შეიძლება ესე ითქვას, ძალიან გავრცელებული იყო, მაგრამ ქურდ-ბაცაცობა კი მოსახლეთაგან ძალზე იდევნებოდა, ქათმის თუ ყველის ქურდი, თუნდა თხილისაც... „თხაპარია მეგრელი“—ეს უფრო დაცინვითი და დამამცირებელი სახელწოდებაა მეზობლების მიერ შერქმეული. ჰოდა, ესეთ მეწვრიმალე ქურდს სოფელში არ გააჰქანებდნენ. ასეთი ქურდობა მეტად საძრახისი იყო და ესეთ „სულწასულებს“ სოფელი (მეზობლები და სხვა მახლობლები) თვითონა სჯიდნენ. ასე რომ, როდესაც სამეგრელოში დრომოკმულ ქურდობაზე გვაქვს ლაპარაკი,

მხოლოდ და მხოლოდ ცხენიპარიობა უნდა ვიგულისხმოთ, რადგანაც, როგორც ზევით მოვიხსენიე, ეს ვაჟკაცურ საქმედ მიაჩნდათ.

უბედურება კიდევ ის იყო იმ დროს სამეგრელოსათვის, რომ ხალხი სწავლას არ ეტანებოდა. უმეტრებისა და ცრუმორწმუნეობის სიბნელით იყო ხალხი მოცული. არც თუ სკოლები იყო სოფლებში, თუ არ ვიანგარიშებთ სამრევლო სკოლებს, ისიც მხოლოდ მეცხრამეტე საუკუნის ოთხმოციან წლებში შემოღებულს. მაგრამ ეს სკოლებიც თავის სიმაღლეზე ვერ იდგა და ბავშვები ქართულ წერა-კითხვას თუ ითვისებდნენ, ისიც გაჭირვებით, უფრო საეკლესიო ლოცვებს ზეპირობდნენ, და სკოლიდან გამოსვლის შემდეგ აქა-იქ „მამაო ჩვენო“ თუ ახსოვდათ.

არც თავად-აზნაურთა წრე მისდევდა სწავლა-განათლებას. იშვიათად. უფრო სამღვდელოების ვაჟები სწავლობდნენ ჯერ სასულიერო სასწავლებლებში (მარტვილსა თუ ახალსენაკში) და შემდეგ თბილისის სემინარიაში, ისიც აქა-იქ. მხოლოდ ეს კია: ამათგან შემდეგში უმეტეს ნაწილად რევოლუციონერებისა და პოლიტიკურ მოღვაწეთა კადრები იქმნებოდა.

მართო ერთი მიხა ცხაკაიას დასახელება რად ღირს.

მე კი, როდესაც ბერთემში ეცხოვრობდი, ყმაწვილობიდან უფრო გლეხების ბავშვებში გავერიე და მათგან შევიძინე ტოლამხანაგები. სამწუხაროდ, მათი უმეტესობა ცოცხალი აღარ არის. ჩემ ხანამდე თითქმის ვერც ერთმა ველარ მოაღწია, მაგრამ ჩემს ხსოვნაში ისინი მაინც დაუვიწყრებად დარჩნენ, განსაკუთრებით ივანე კვატიძე, ერი ბალათურია, ჯოტი ხუბუნაია, ერმილე გვაძაბია, ერთი-ორი კიდევ როგავათა ოჯახებიდან და მღვდლის შვილები ევტროპი და თეოფინე როგავები.

ამათთან მითამაშნია, მიბურთავნია, მიჭიდავნია, სირბილას შეჭიბრში მიმიღია მონაწილეობა. უხუმრიათ და მიხუმრნია, აგრეთვე ზოგჯერ მათ უამბნიათ ჩემთვის რაიმე უცნაური ზღაპარი ან მათ მიერ შეთხზული სათავგადასავლო რამ და ჩემთვისაც უთხოვნიათ, რომ მათთვის რაიმე შეამბნა ან წამეკითხა „დედაენიდან“ თუ „ბუნების კარიდან“.

ასე რომ ერთიმეორეში მკვიდრო მეგობრობა გავვიჩაღებია და ეს დრო ჩემთვის ერთგვარ მითოლოგიურ მოვლენას წარ-

მოადგენს. თითქო მიზნედილს, დაუჭერებელს, მაგრამ რეალურ საფუძველზე კი დამყარებულს.

ზემოდასახელებულთაგანს ზოგიერთს მე ვასწავლე ქართული წერა-კითხვა. ეს მას შემდეგ, რაც მე ცოტა უფრო წამოვიზარდე და მათი ერთგვარი მადლობაც დავიმსახურე. ამისათვის ჩვენს ოჯახში მოსული სტუმრები მაქებდნენ და მამხნევებდნენ; ეს გულს უხაროდა, მაგრამ გარკვევით მახსოვს, ამისათვის თავი არ მომიწონებია და ჩემი პიროვნება თითქოს კულტურტრეგერად არასოდეს არ წარმომიდგენია.

ისე კი ზოგჯერ დავდიოდი მახლობელი გლეხების ქოხებსა თუ უფრო მოხდენილად აშენებულ „პიტაფიცარა“ სახლებში და საერთოდ თითქო უნებლიეთ ვეცნობოდი მათ კარ-მიდამოს.

ერთ დროს, სიყმაწვილისას, ერთი უხეირო ლექსიც კი ვუძღვენი ასეთ მოსახლეობას. მახსოვს, ასე იწყებოდა:

ხრჩოლავს კვამლი, ბეუტავს ცეცხლი
მიქელიას დაბალ სახლში...

ცხადია, ეს „ნაწარმი“ უფრო რაფ. ერისთავის პანგებით იყო მონაბერა.

ძალიან ღარიბულად ცხოვრობდნენ. ხარ-კამეჩი იშვიათადად თუ ჰყავდა რომელიმე მათგანს, ყანებს ერთიმეორეში ნათხოვარი ხარებიტა და სახნისით თუ ხნავდნენ. ძროხებიც არ გააჩნდათ. ყველსა და რძის ნაწარმს: ყველს, მაწონს, ნაღულს და სხვ. ძალიან ეტანებოდნენ, მაგრამ ამისათვის თითქმის უნეტესობას თხები ჰყავდა და ამითი გადიოდნენ იოლას, მათი სადილი თუ ვახშამი კი უფრო მოხარშულ ლობიოსა და სქელ კეცის მჭადისაგან შედგებოდა, ან „ლეკერისაგან“—ეს იყო კანაფხალი მწნილად ჩიღებუი, დამმარული, და ამითი ამოიყორავდნენ კუქს. რძე და ფაფა კი უფრო ბავშვებისათვის იყო განკუთვნილი. ღვინოს არ ეწყობოდნენ, რადგან იმეამად ვენახები არა ჰქონდათ, ობმა და ფილოქსერამ გაანადგურა თურმე. აქა-იქ მადლარი იზაბელასა ან ადესის ვაზი ხეირობდა, როგორც უფრო მაჯაგი ჯიში და მისი ღვინო ჰქონდათ, მაგრამ ყველას მაინც არ მოეპოვებოდა.

სამაგიეროდ ს. ბერთემს ორი მდინარე ჩამოუდის, ერთი კარგა მოზრდილი, ლაქვარღოვანი ტეხური და მეორე უფრო

იმომცრო, გურძემია. ეს უკანასკნელი უფრო ხშირად მღვრიე იყო, რადგანაც მის სათავეში უფრო ხშირად წვიმდა ხოლმე და ამის გამო დიდი მომატებაც იცოდა. ზოგჯერ დაბლობში ყანებს გადუვლიდა და ნათესს წალეკდა, სამაგიეროდ მისი ნალექი დიდად ანაყოფიერებდა საყანეებს.

და აი ამ ორ მდინარეში კარგა ძალ თევზს იჭერდნენ. იყვნენ ისეთი გლეხები, რომლებიც ამ თევზაობაზე იყვნენ გადაყოლილნი და თავიანთი კვების საქმეს ამით იმსუბუქებდნენ, მაგრამ ყანის მუშაობაშიაც ყოჩაღები იყვნენ. სააღდგომოდ, მარტში, აპრილში, ბევრს თავიანთი ყანები სიმინდით დათესილი ჰქონდათ. სათესურად ჩემსობას ბერთემში სიმინდის გარდა სხვა არაფერს არ ხმარობდნენ, აღარც ღომს, აღარც ფეტვს. ღომი იშოვნებოდა, მაგრამ იშვიათად, ისიც თავადების ოჯახში. სხვაგან ღომისღომის მაგივრად სიმინდის ფქვილის ღომს შეექცეოდნენ. ფეტვის ნამცხვარს „ქუმუს“ მე ბავშვობაში გხლებივართ, მაგრამ ეს უფრო ჩემი ძიძის სახლში და მამიდასას ბანძაში.

ოო, ძიძასთან სულ სხვა ამბავი იყო. უთუოდ ჩემი და ჩემიანების წვევის გამო. ჩემი ძიძა და მორღუ სხვა სოფელში ესახლნენ, მაშინდელს უფალიკარში და ჩვენი სტუმრობა იყო ზეიშობა და ზადიკობა, დიდი სტუმრიანობა. ჩვენ გარდა იკრიბებოდნენ ყველა მეზობლები ჩემი მორღუსი, განსაკუთრებით მისი მოგვარეები. სიმღერა, ცეკვა, მხიარულება იყო გაჩაღებული. სუფრა ხომ საესე იყო ნაირ-ნაირი სანოვაგეებით. აი ფეტვის ნამცხვარი პირველად იქ მახსოვს. თაფლში მოზედილი ფეტვის ნაფქვავეი, მგონი მოხარშული და არა გამოცხობილი, მეტად გემრიელი იყო და ბავშვს ტკბილეულის ქამა მახარებდა.

ამგვარად, მე ბავშვობაში თითქო კარგა შევეჩვიე სოფლურ, პრიმიტიულ ცხოვრებას და ერთ დროს მე თვითონ მიწის დამუშავებასაც მოვკიდე ხელი. ჩვენს ეზოში საბოსტნე და საყვავილე ადგილი მივიჩინე, მე თვითონ დავბარე და თოხათ გავაფხვიერე კვლებად ამოყვანილი დასათესი თუ დასარგავი ადგილები.

ასეთს ჩემს მუშაობას გლეხები აღმაცერად უყურებდნენ: ნებიერობს ბატონიშვილი, თორემ მაგისგან მიწის მუშა აბა სა-

იდან გამოვალ! თავად-აზნაურები კი პირში დამცინოდნენ, განსაკუთრებით სტუმრად მოსულები და მიძრახავდნენ ჩემს ვებოსტნეობას. მამასაც უძრახავდნენ ჩემს ასეთ საქმიანობას. მე არ ვიცი ამაზე რას ეუბნებოდა, მაგრამ მე კი არ მიშლიდა, პირიქით, მამხნევებდა და ერთ დროს „იმერ და კომპანიის“ ორგანიზაციიდან საუკეთესო თესლებიც, შემოწმებული და გამომდგარი, გამომიწერა მოსკოვიდან. თან თვითონ მასწავლიდა რა როგორ დამეთესა, შემდეგ როგორ უნდა გადამერგო და სხვა. ასე რომ, როდესაც „ჭირნახული“ (უთუოდ ჭირნახული; საქმის შესაფერი სიტყვაა!) მოვიწიე, ისეთი კომბოსტოები გამოვიდა, თითო თითქმის ერთ ფუტს მაინც აიწონიდა და ნესვეები ხომ... ისე ჩაყუდებულყო ბოსტანში, როგორც რომელიმე კარგა მოზირდილი ლოდი ან საშენი ქვა, და დამწიფებული თავისი ფერით და სურნელებით მნახველებს იზიდავდა. ასეთი ჩემი „მოსავლანობა“ მეზობელ გლეხებსაც მოეწონათ და თუმცა ჩემი „მონადეობისა“ (მუშური უნარისა) არც თუ ისე სჯეროდათ, მაგრამ თესლი და ნერგები კი წაღეს და თვითონაც შემდეგში მოიყვანეს მაღალხარისხოვანი ნიმუშები მცენარეულობისა.

11—12 წლის ვიქნებოდა, როდესაც ამ მებოსტნეობას შევეუდექი, მაგრამ მარტო მე რას გავაწყობდი და აი ჩემი ზემოთ დასახელებული ძმა-ბიჭები მეხმარებოდნენ, განსაკუთრებით უფრო მურუხ საქმის კეთებაში: ნაკელის მოტანა ურიკებით, სარწყავი წყლის მოზიდვა სარწყულებით და სხვ. ისე რომ „ბატონკაცობა“ სრულიად გულუბრყვილოდ, მაგრამ მაინც შემინარჩუნეს ჩემმა გულწრფელმა და ძვირფასმა ამხანაგებმა.

მე კი დიდად მოხიბლული ვიყავ მათი ყანების დამუშავებით და განსაკუთრებით მიყვარდა სიმინდის თოხნის დროს მათი ნადური სიმღერები, ყველაზე უფრო მათი „ოდოია“. ოდოია ხომ ჩვენის მითოლოგიით მიწის ღმერთი ყოფილა და ეს გუნდური სიმღერა თუ გალობა, უფრო გალობა ჩემის ფიქრით, ამ ღმერთის ჰიმნი უნდა იყოს.

რა სამწუხაროა, რომ ჯერჯერობით არც ერთს ჩვენს ნიჭიერ კომპოზიტორს არ გამოუყენებია ეს მძლავრი ჰანგი თავის ნაწარმოებში, როგორც ლეიტმოტივი რომელიმე შრომის პროცესისა.

და აი 12 წლის მოზრდილი ყმაწვილი (ჩასკენილი და ჩამკვრივებული არ ვიყავ, მაგრამ კარგა მაღალი ვიყავ, „გაგინგილებული“) ვეწეოდი მხოლოდ მიწის მუშაობას და სხვა ყოველივეს თითქო ჩამოშორებული ვიყავ: გონებრივი სამუშაო, წიგნი, სწავლა!

სწავლაზე აქაც უნდა ვთქვა ის, რაც რამდენჯერმე მილიარეზია საჯაროდ:

სრულიად უსწავლელი კაცი ვარ!

ე. ი. არ მიმიღია არავითარი სისტემატური სწავლა-განათლება და არც არასოდეს არავითარ სკოლაში არ ვყოფილვარ...

ჰა, ჰა!

აქ მახსენდება ჩვენი ნიკიერი პოეტის კარლო კალაძის ნაშახვილევი. ის ხომ ცოტა კვიმატიანია და გახსენების დროს ყოველთვის გვიამბობს ხოლმე შემდეგ ეპიზოდს:

„ერთხელ რომელიღაც საღამოზე მწერლები ვიყავით მაწვეული და ჩვენ შორის გვერივნენ—გრიშაშვილი, ქუჩიშვილი და დადიანი. გამოვიდა შალვა და სხვა თავის ნაწერების წაკითხვის დროს ესეც მოიხსენია, „მე სრულიად უსწავლელი კაცი ვარო“. შემდეგ გამოვიდა ქუჩიშვილი და ამანაც თავისი მქუხარე ლექსების წაკითხვის შემდეგ განაცხადა, რომ უსწავლელი კაცია. ბოლოს გამოვიდა გრიშაშვილი და ამანაც არ გაუჩრია თავის ნაწერებში სიტყვა, უსწავლელი ვარო? დანარჩენი მწერლები შევწუხდით: რას ჩადიან ეს ყაზილარები, ხალხს სწავლით აღსავსე ადამიანებად მივაჩნევართ, ბრძენთა უბრძენებად, ფილოსოფოსებად და ესენი კი თითქო ტრაბახობენ: არ მასწავლია, არ მისწავლია, სრულიად უსწავლელები ვართო. რას იტყვის ხალხი? კაცო, ეს ადამიანები ჩვენ მწერლებად მიგვაჩნია, ზოგიერთი მათგანი თვალსაჩინოდაც, ესენი კი რას ამბობენ, ან როგორია ამის მოსმენა ახალგაზრდობისათვის? ხომ იფიქრებს ახალგაზრდობა, რომ სწავლა არაფერი საჭირო არ ყოფილაო“ და სხვ.

მე პირადად 4 წლის ვიყავ, რომ წიგნიერი გავხდი და ისიც შინაობაში. თუ როგორ მოხდა ჩემი პირველი გაცნობა ქართული ანბანისა, ეს მე მრავალჯერ მაქვს ნათქვამიც და დაწერილიც, ისე რომ ამაზე აქ სიტყვას აღარ გავაგრძელებ.

არითმეტიკა კი გამაცნო ს.ბერთემში ათონის ქართულ მო-

ნასტრიდან ჩამოსულმა ახალგაზრდა ბერმა ქანტურიამ. ის ბიძაჩემს ბესოს შვილს უნათლავდა და ჩვენს ოჯახთან დაახლოებული იყო. რომ შემატყო, არითმეტიკასთან მწყურალად ვიყავი, გამაცნო მისი ოთხივე მოქმედება, მაგრამ უნდა გამოვტყდე, რომ შემდეგში ვერ გავამართლე მისი იმედები და დღესაც ნაწვევების დაყოფა-გამრავლება ძალიან მიძნელებდა.

ინგლისელი მწერალი ჯერომ-ჯერომი ამბობს, ბავშვობისას ჩვენ დიდად გვაწუხებს ზოგიერთი საგნის შეთვისება თუ ათვისება, განსაკუთრებით გრამატიკისა და არითმეტიკისაო, მაგრამ რომ წამოვიზრდებით, დიდები გავხდებით, მაშინ ვიგრძნობთ მათ სარგებლობასო.

ეს მართალია, მაგრამ მე, განსაკუთრებით არითმეტიკა, არასოდეს არ გამომდგომია ისე, რომ უმისოდ საძრაობა არა მქონოდა.

ეს უთუოდ იმიტომ, რომ დიდი პრაქტიკის კაცი არ ვიყავი. ჰა, ჰა! ბოლოსდაბოლოს მთელი ჩემი დღენი ჩიტივით ვცხოვრობდი და მოგეხსენებათ, რომ ბელურებს, მაგალითად, არითმეტიკისა ძალიან ცოტა რამ უნდა ესმოდეთ...

მხოლოდ უსწავლელობა კი არაფერი სატრაბახოა და თუ ამაზე კარლო კალაძე დაიცინება, მართებულიც არის და ჩვენ, მისგან დასახელებული სამი მწერალი თუ ვალიარებლათ ჩვენს უსწავლელობას, იმიტომ კი არა, რომ ეს „გვეტრაბახნა“, არა! ეს ჩვენ მოვიყვანეთ მხოლოდ როგორც ფაქტი ჩვენის ბიოგრაფიისა.

რატომ დავრჩი უსწავლელი ანუ უკეთ რატომ დამტოვა მამაჩემმა უსწავლელად? მამა ზოგჯერ თავის ზარჯითაც კი საშუალო და უმაღლეს სასწავლებლებში აგზავნიდა სხვა ყმაწვილებს, შორეულებს თუ ახლობლებს, მეგობრები უძრახავდნენ—შენს შვილს რად არ ასწავლიო. მამა კი იმას იმიზეზებდა, რომ დღეინდელი ჩვენი სკოლა (ცარიზმის დროისა) ტვინს ულაყებს ბავშვებს განსაკუთრებით ბერძნულსა და ლათინურის ენის გაკვეთილებით და საერთოდაც ეს სკოლები დღეს უფრო რუსიფიკატორულია, რათა ახალგაზრდობისაგან კარგი მოხელეები, „ჩინოვნიკები“ გამოიყვანონო.

რაც თავი მახსოვს, მამა სულ ეეროპისავენ მიისწრაფოდა.

უნდოდა ემოგზაურა ევროპაში და ჩვენც, თავისი შვილები, დაძმანი თან წავეყვანეთ, რომ გავცნობოდით იქაური კულტურის დონეს და შემდეგ, სამშობლოში დაბრუნებულებს, ჩვენი მოწოდებისამებრ აგვეჩიია რომელიმე დარგი სამუშაოდ და ხალხის საკეთილდღეოდ.

17

ოო, ხალხი! ხალხის სამსახური! ეს იყო უდიდესი დედააზრი ცხოვრებისა ჩვენს ოჯახში, მამას მიერ დადგენილი და განმტკიცებული.

ოლონდ ამის შეგნება გვიან მოვიდა ჩემამდე.

ეს უფრო უნდა მივაწერო იმ დროს, როდესაც უკვე სცენაზე მუშაობა დავიწყე, როგორც პროფესიონალმა მსახიობმა და სალიტერატურო ასპარეზზე გამოვედი.

მართალია, ამ შეგნების პირველ გაღვივებას ხელს უწყობდა ჩემი საკუთარი, ხელნაწერი ჟურნალის „მოზარდის“ გამოცემაც, მაგრამ მაშინდელი ჩემი ყმაწვილური მწერლობაც და სცენით გატაცებაც უფრო, ჩემის ფიქრით, წაბაძულობით იყო უმთავრესად გამოწვეული. პროგრამული იდეა ხალხის სამსახურისა კი უფრო შეგვიანებით არის შექმნილი და ეს უთუოდ უფრო რელიეფურად მაშინ გამოჩნდება, როდესაც ჩემს მწერლობასა და თეატრალურ მუშაობას ცალკე გავიხსენებ.

მანამ კი ვიყავ ისე „ტლუ ბიჭი“.

მართალია, მალე შევიყვარე კითხვა, ისიც მხოლოდ ქართულენაზე, რადგან რუსულს გვიან დავეუფლე, მაგრამ ეს კიდევ არ იყო ის დვრიტა, რომლის მეოხებით შემდეგ ჩემი საზოგადოებრივი მუშაობა უნდა წარმემართა.

ამიტომ თითქო მხოლოდ სოფელში ვიყავ ჩატრიალებული.

სოფელში კი ბერთემის გარდა სხვაგანაც ბევრგან მიცხოვრია, თვეობით, მთელი ზაფხულობით. მხოლოდ განსხვავება ის იყო, რომ სხვა სოფლებში შემთხვევას არ მოუტანია, რომ ტოლამხანაგები გამეჩინა, განსაკუთრებით ისეთები, როგორიც ბერთემში მყაედა: უბიწონი, გულწრფელები, უეშმაკონი და საკვირვლად დინჯი ხასიათისა. მე არ მახსოვს, რომ ოდესმე მათ რაიმე აყალმაყალი აეტეხათ, ან ერთიმეორეს წაჰკიდებოდნენ,

ხელით შექნებოდნენ. ყოვლად წესიერი და გულღია ხალხის შვილები იყვნენ.

ერთხელ, ჩვენთან, ბერთემში სტუმრად იყო მწერალი დეტუ მეგრელი და მე და ჩემს ამხანაგებს რომ დაგვაკვირდა. იხუმრა თურმე: საიდან შეურყევეია შალვას ასეთი ბიჭები? ყველანი ფილოსოფოსებად გამოიყურებიანო.

აქ ჩემი დაცინვაც იყო, რადგან მე ბავშვობაში, როგორც ზემოთაც მაქვს ნახსენები, ბავშვისათვის უჩვეულო, მეტად სერიოზული სახე მქონდა.

ახლა ვიგონებ: რა გაურყვენელები იყვნენ ეს ჩემი ამხანაგები. შემდეგშიაც, როდესაც მე მათ, სხვაგან გამგზავრების გამო, დროებით ჩამოვშორდებოდი, როცა ყველა ჩვენ წამოვიზარდენით, სქესობრივად რა სპეტაკები იყვნენ—არავითარი გახუმრება გოგოებთან, არავითარი ლაზღანდარული სიტყვა და საქციელი მათ არა ჰქონდათ. თუ კი ვინმე ჩვენი ხელზე მოსამსახურე ვაყი, ან რომელიმე სტუმარი მათ ამ საგანზე ჩამოუგდებდა „საკიჟიმაჟიკო“ საუბარს, ერთბაშად წითლდებოდნენ, ყვითლდებოდნენ, ან უეცრად გაიქცეოდნენ და მიიმალდებოდნენ.

მე კი ჩვენს სტუმრებში, უფრო თავადაზნაურთა წრისაგან ან შინამოსამსახურეთაგან ხშირად შევეუგულიანებივართ და წავეუქეზებივართ სქესობრივ ადტკინებისათვის, მაგრამ დახეთ ჩემი ამხანაგების გავლენას (მე იმათ ვაწერ ამას), არაფერი არ გამეგებოდა და მათი უხვირო ღრეკა და გამასხრება სულ სხვა, საწინააღმდეგო შთაბეჭდილებას ტოვებდა ჩემზე.

აქი ვამბობ „ტლუ ბიჟი“ ვიყავი-მეთქი.

სხვა სოფლებში—ბანძას, საწულუკიძეოს, ჯიხაიში უფრო მარტო ვიყავ ჩემთვის. ამ ადგილებში უფრო სხვა წრე მეხვია გარს: თავადაზნაურობის წარმომადგენლები. ბანძაში—ფალავები, საწულუკიძეოში—წულუკიძეები, ჯიხაიში—ლოლობერიძეები, ლორთქიფანიძეები. ყველა ესენი ჩემზე უხნესი ადამიანები იყვნენ და მე, შედარებით ბალს, თავს არ მიყადრებდნენ.

მე კი მათი მომწონდა მშვენიერი თვალტანადობა, გამოწვიპული ჩოხა-ახალუხი, უფრო ხშირად იმ დროს მოსირმული წულა-მესტი და კოხტა იარაღი. თან საკვირველი ზრდილობიანი საქციელი, განსაკუთრებით უფროსებთან და ქალებთან. მათი

მხიარულება, ცეკვა-თამაში, ფალაგებში ხომ მათი მომხიბლველი და გულში ჩამწვდომი მეგრული სიმღერები, განსაკუთრებით ნელი ლილინი სხვადასხვა მუსიკალური ნიუანსით აღსაეს.

ამ სიმღერებმა მეც გამოიტაცა და, მართალია, ეტყობა, რომ ბუნებით მუსიკალობა შემდგამდა, მაგრამ საამისო ხმა არა ჰქონდა და მეც უფრო ბანის პარტიას შევეკედლე. ეს რომ შემამჩნიეს, თვითონ დამიწყეს გავარჯიშება. მეც და ჩემს დას მათსა, რომელსაც მშვენიერი ძლიერი კონტრალტო აღმოაჩნდა და ძალიან მალე გურულ „ხელხვავს“ საუცხოოდ ასრულებდა. ასე რომ ამის შემდეგ ფალაგებში არ იყო ისეთი წვეულება, რომ უფროსებთან ერთად ორივე და-ძმანი არ მივეწვიეთ და განსაკუთრებით მაშოსთვის არ ემღერებინათ ახლად შეთვისებული სიმღერები.

სიმღერის ჩვენი მასწავლებლები იყვნენ: დათა ფალავა, ქიშვარდი ფალავა და მათთან ხან გუჯუ და ხან კოწი ფალავა.

მეტად საამური მოსასმენი იყო მათი ჰანგები. ხან გულმოწყლული ქვეყნის დარდით „შავო დილა, შავდილა!“, ხან „გულო, შავ-გულო, გამოაცხადე ვინ შემოგავლო სევდისა ბადე“, ხან საკისკისო „პატარა საყვარელი“ და ხან გამყივანი „ხელხვავი“ თუ „კუჩხი ბედნიერი“ და სხვ.

ყველა ამათ დიდი მუსიკალობაც შედგამდათ და კარგი ხმებიც ჰქონდათ, მაგრამ მათ შორის მეტად უზადო და ძლიერი ტენორის პატრონი იყო ქიშვარდი.

რა დასანანია, რომ იმ დროს ამ კაცს არ შეეძლო მუსიკალური განათლება მიეღო და ღირსეული და დიდი ადგილი დაეჭირა ჩვენს ვოკალისტებში.

ეეჰ, ღუხჭირო დრო! რამდენი ნიჭი დაღუპულა გაუფურჩქნავად!

განა მარტო მუსიკაში, მწერლობაში, გნებავთ ფილოსოფიაში და სხვ.

ერთხელ, მონაქცევზე, სულწასულობამ დამძლია და განსვენებულ აკადემიკოსს ჩვენს გამოჩენილ ისტორიკოსს ივანე ჭავჭავაძის ვკითხე: მეგრული სტუდენტობა რაიმეში იჩენს თავის უნარს თუ არა-მეთქი?

მან თავისებურის ზრდილობიანობით მიპასუხა: ბატონო შალვა, მეგრელ სტუდენტებს აქვთ მიდრეკილება სიბრძნის-მეტყველებისადმი.

როგორც ვიცით, ძვირფასი ივანე ქართულად ფილოსოფიას სიბრძნისმეტყველებას უწოდებდა.

ამგვარად ჩემთვის ბანძა იყო ის კუთხე, რომელმაც პირველად ჩვენებური ხალხური სიმღერების სიყვარული ჩამინერგა. თუმცა მამაჩემს თვითონ უყვარდა მუსიკა, სახლში მუდამ გვექონდა მუსიკალური ინსტრუმენტები: პიანინო, ფისგარმონია. ეს უკანასკნელი უფრო იმისათვის, რომ ხალხური სიმღერების შესრულება ამ საკრავზე უფრო მოხერხებული იყო და მამაც პიანინოსა და ფისგარმონიაზე კარგის ოსტატობით უკრავდა ხოლმე ჩვენებურსა თუ უცხოურ ჰანგებს. სიმღერით არა მღეროდა, მაგრამ დიდი მუსიკალური გემოვნება რომ შედგამდა, ეს კი ცხადია. თვითონაც თხზავდა მუსიკალურ ნომრებს და ზოგიერთ მათგანს მე და ჩემი და ვმღეროდით კიდევ: „ოჰ, სახიერო!“, „მინდორ-მინდორ მიედლიდით“ და სხვ. მაგრამ აქ აღსანიშნავი ის არის, რომ ჩვენ, მამა-შვილები, ორკესტრანტულ მუშაობასაც ვეწეოდით. აქ უკვე გამოყენებული იყო ჩვენებური ჩანგური, ჩანგი და გიტარა. მამა საუცხოოდ ფლობდა ჩანგურს და შემოძლია ვთქვა, რომ პირდაპირ ვირტუოზობით ასრულებდა განსაკუთრებით ქართულ ჰანგებს, ჩემი და უკრავდა ჩანგს, მე კი გიტარით აქაც ბანის პარტიებს ვასრულებდი.

საკვირველი ის არის, რომ მე თითქო შემდეგშიაც ცხოვრებაში მუდამ დამხმარე ელემენტად ვიყავ გამოვლინებული. არც სიმღერაში—დაწყება ან მოძახილი მე არ შემეძლო, მხოლოდ ვეხმარებოდი ბანით და თამამად ვიტყვი, რომ ცოტა სამკაული არ შემქონდა გუნდის სიმღერაში.

მაგრამ ბანზე ერთ ღროს მაქვს დაწერილი პატარა მინიატიურა. ეს თითქო გამართლებაა ბანის როლისა და... თავის ღროზე ეს შეიძლება საამაყოლაც მიმაჩნდა.

აქ ვერ ვითმენ, რომ ჩემი მინიატურა სრულიად არ მოვიყვანო:

„ცა-ფირუზ. ხმელეთ ზურმუხტში“ მყოფმა ლალად დაიწყო თავისი საგალობელი.

„მისი კრიალა ხმა ისარივით გასრიალდა ცის კამარაში და იქ ათას ბგერად განიბნა.

„მაგრამ აგერ მოძახილმა შემოუკრიმანქულა, გაუწვა და ჩაეგრიხა პირველ ხმაში.

„დახატა და მორთო-მოკაზმა.

„ეს იყო შეყვარებულთა მორთოლვარე გულ-მკერდი, ერთიმეორეზე გადაწული.

„მათი სულთქმა-ოხვრა, მათი სიხარულით შეეცვლება იყო უცხო ჰარმონია გულისა და სულის დამატყვევებელი.

„მაგრამ აგერ ბანმა წამოუღულღუნა.

„თითქო გვირგვინი დაადგაო შეყვარებულთ.

„თითქო ამ უცხო და საკვირველ შენობას, შექმნილს ორის ხმისაგან, გუმბათად მოევლინაო.

„და წარიზიდნენ ეს ხმები.

„პირველი წკრიალებდა, სრიალებდა დაურიდებლად. მეორე თან მისდევდა, მისი მომრთველი, მხატვარი. მესამე კი, ბანი, თითქო ამ ორის სადავე ხელთ უჭირავსო, ცოტა აკავებდა გალაღებულ ხმებს, ცოტა აცლიდა მათ სიმკვეთრეს, გამყივანობას. უგურგურებდა, უყვავებდა კუთხე-ძგიდეებს, აჩუქურთმებდა ხელოვნურად.

„დიად, ბანი ცოტა კონსერვატორი იყო და უფლების მოყვარულიც. თვით კი მაინც მათი შემამკობელი იყო.

„სადავეს ხშირად წევდა უკან, მაგრამ ბრძოლის სულს მაინც არ ახშობდა. სიმამაცის თვით იყო გამომხატველი.

„თვითონ თავისით კი არას წარმოადგენდა, როგორც მეფე, რომელსაც სამეფო აღარა აქვს, როგორც სარდალი, რომელსაც ჯარი არა ჰყავს.

„მაგრამ მათთან მაინც მეფე იყო, მაინც სარდალი, სამკაული და მშვენება გალობისა — ბანი.

„და ბგერდნენ სამივენი ხმაშეწყობილად. ახლა კი ზოგჯერ სპარსული ბაიათი ესპის ყურს.



ილია ჭავჭავაძე.

„გულსაკლავია მისი კილოვნება, ბევრი მოთქმა-კენესაა შიგ-
„მაგრამ მაინც განმარტოებით ბგერს თავისთვის, როგორც
თვითონ მისი გამომთქმელი სპარსი, ქვისმტვრეველი მუშა.

„ან კიდევ ზოგჯერ იტალიური რომანსერო შეეხება სას-
მენელს.

„წარმტაცია, ვნებათაღმძვრელი.

„მაგრამ ჩემთვის მაინც სულ სხვაა გადაშლილს სივრცეში
ლაღად მოკრიალე ხმა, მოძახილით შეკრიმანჭულება და ტკბი-
ლი ღუღუნე დინჯის, მამაცის ბანისა“.

ამგვარად სიმღერაში ბანი ვიყავ, მსახიობობაში უფრო რე-
ზონიორი, რომელიც პიესაში თითქმის უმეტესად დამხმარე
ელემენტად გვევლინება, ერთის სიტყვით, მთავარი როლი მას
არ ეკუთვნება. და მწერლობაშიაც, მაგ., დრამატურგიაში, ჩემ-
სობას ქართული რეპერტუარის სიმცირემ მის დასახმარებლად.
ჩემი უნარის გამოყენება მიმაჩნევინა საჭიროდ, შემდეგ ბელეტ-
რისტიკაშიაც...

მაგრამ ამეებებს შესახებ ხომ ცალკე მექნება უთუოდ საუ-
ბარი ამ ნაწერში.

ერთის სიტყვით დამხმარე ადამიანად ვიყავ თითქო გაჩენი-
ლი... თავს მაინც სასარგებლო კაცად ვგრძნობდი.

ილია ჭავჭავაძე ჩემს ხსოვნაში

სოფ. ბანძაში ჩემი ბავშვობისას მომიხდა ერთი თითქო უცნაური შემთხვევის განცდა.

ეს ის იყო, რომ ილია ჭავჭავაძე, ეს ბუმბერაზი კაცი იმ დროისა, მთელ საქართველოს მიერ პატივცემული და დაფასებული მისი საზოგადო მოღვაწეობისა და მწერლობის გამო, პირველად ვნახე... სამეგრელოში, სოფ. ბანძაში მამიდა ნინოს სახლში.

მე კი ბავშვობიდანვე ვიცნობდი მის სახელს. მარტო ნაწერებით კი არა.

ჩვენს ოჯახში, დიდ აკაკისთან ერთად, დიდებულ ილიას კულტი იყო გამეფებული.

მამაჩემი პირადი მეგობარი იყო ილიასი და ხშირად გვიამბობდა მის ნათქვამს, მის ნამოქმედარს.

აკი მამა თავის „საამდროო გამოცანებში“ (ზმაკიდურებში) ასეთი აღტაცებული სტრიქონები უძღვნა მას:

„იმას ვერა ჰგავს ვერავეინ გრძნობის მცოცხლები მწერალი:
ლომია, ოდეს განრისხდეს, მუდამ ძმობისა მღერალი.

იტყვის მართალს და გზიანსა, უპყრია მართლის მწვერვალი,
არის ზნე-ქველი, მზნე-მსრბოლი, მედგარი, მოუფერალი“.

მახსოვს, როგორი აღფრთოვანებით ვკითხულობდით 1888 წ. გაზეთ „ივერია“-ში ფელეტონებად ჩამომწკრივებულ „ოთარა-ანთ ქვირის“, და მამა როგორ ქება-დიდებას ასხამდა ამ საუცხოო ნაწარმოებს.

და სულ ასე. ილიას მოწინავე, ილიას პოლემიკური წერილები, განსაკუთრებით „ი ისტორია“ და „ქვათა ღაღადი“ იყო ჩვენს ოჯახში აღტაცებისა და ქება-დიდების საგანი.

აქედან ჩამენერგა სიყვარული და მოწიწება ამ რჩეულ კაცისადმი.

და აი, ილია პირველად ვნახე... სამეგრელოში...

თბილისიდან კომისია იყო ჩამოსული მინგრელსკის ბიბლიოთეკის ჩასაბარებლად.

ცნობილია, რომ თავისი მდიდარი ქართული ბიბლიოთეკა, აღსავსე ძველის მანუსკრიპტებით, მინგრელსკიმ შესწირა მაშინდელ „ქართველთა შორის წერა-კითხვის გამავრცელებელ საზოგადოებას“, რომლის თავმჯდომარედაც იყო ილია და რომლის კომისიასაც მეთაურობდა იგი იმჟამად.

ბანძაში ვიყავით სტუმრად ნათესავეებში. გაზაფხულის ერთ მშვენიერ დღეს ფართო ეზოში ცხენი შემოაჭენა ერთმა წერწე-ტა მეგრელმა და მამას გადასცა, „ჰანჰანიძე“ მოდის შენთანო.

ჩვენ ვერ გავიგეთ ვინ იყო ეს „ჰანჰანიძე“, მაგრამ მამას სცოდნოდა, რომ ილია უნდა ჩამოსულიყო, დიდად გაიხარა და ჩვენც გვახარა ეს ამბავი.

მართლაც ცოტა ხნის შემდეგ ეზოში შემოვიდა ასე 20—25 ცხენოსანი, რომელთა შორის, სხვებზე ცოტა წინ, იონა მეუნარგიას თანხლებით, გამოჩნდა კარგ ბედაურზე მჯდომი პირბუ-დადი და თვალეზმცინარე აღამიანი.

მამა რომ მიეგება, ვიცანით, ეს ილია იყო.

გავიგე აქ ყოფილხარ, ნიკო, და გულმა არ მომიტმინა არ მენახეო, დაახლოებით ასეთი იყო ილიას პირველი სიტყვები.

და გაჩაღდა საუბარი, რამდენადაც მახსოვს, ჩასაბარებელ ბიბლიოთეკაზე, საერთოდ ძველ მწერლობაზე და განსაკუთრებით ერთ ძველს შესამჩნევ წიგნზე „ნებროთიანზე“, რომელსაც მამა დიდად აქებდა; ბავშვობისას ჰქონდა თურმე წანაკითხი და მოელოდა, რომ მინგრელსკის ბიბლიოთეკაში აღმოჩნდებოდა.

ზოგს ეხლანდელს მკვლევარს ზღაპრად მიაჩნია „ნებროთიანის“ არსებობა, შეიძლება იმიტომაც, რომ დღეს აქამომდე არ აღმოჩენილა, ზოგი მას „ადამის წიგნსაც“ უწოდებს, მაგრამ მამა ამბობდა, რომ ეს იყო რაღაც შესანიშნავი კრებული, მგონი უფრო აპოკრიფული ხასიათისა და ზოგჯერ იგონებდა კიდევ იქიდან სხვადასხვა მხატვრულ ნათქვამს და შიარს.

მამას თვით ჰქონია ეს წიგნი, მაგრამ როდესაც მისი ბიბლიოთეკა ცეცხლს უმსხვერპლია, „ნებროთიანიც“ იქ დაღუპულა.

შემდეგში ისტორიკოსმა თედო უორდანიამ მამას სიტყვათ აღწერა ეს წიგნი თავის „ქრონიკებში“, მაგრამ თვით ხელნაწერი, როგორც ვთქვი, დღემდე მაინც დაკარგულია, თუმცა უკუვაგლოთ ეს „სიტყვის მოტანილი“ ამბავი.

ამ წიგნის გარდა, მახსოვს, საუბარი გადავიდა თანამედროვე საკითხებზე: ბანკი, თეატრი, გაზეთი, ქართული ენა; უმთავრესად კი თვით სამეგრელო, მისი წარსული, აწმყო და მომავალი.

და აი აქ იყო, რომ პირველ დაირხა ილიას შესამჩნევი ფრაზა: სამეგრელოში ვარ და საქართველოს ვხედავო.

* * *

მეორეჯერ ვნახე ილია უკვე თბილისში, მის სახლში, მაშინდელ ნიკოლოზის ქუჩაზე, № 21, საცა „ივერიას“ რედაქცია იყო მოთავსებული.

რაღაც დღესასწაული იყო, მამა უქეიფოდ იყო და მე გამგზავნა თავის მაგიერ მისალოცად.

უნდა გენახათ ჩემი გახარებაც და ჩემი შეწუხებაც.

შეწუხება იმიტომ, რომ, გამოვტეხილვარ, ჰაბუტკობისას მეტრამეტი მორცხვი და უკანდახეული ვიყავი. აბა ილიასთან როგორ უნდა მომება თავი სიტყვებისათვის!

შეველ დიდ დარბაზში. რასაკვირველია, ევროპულად, მაგრამ სადად იყო მორთული, არაფერი გადამჭიქული, არაფერი ბრჭყვიალა, გარდა იმ მძივებისა, თალთან რომ იყო სალუქ ფარდასავით ჩამოკიდებული და დარბაზს ორად ჰყოფდა.

ძალზე ცხელოდა და მეც ორმაგ ოფლში ვიწურებოდი: ცალკე სიცხისა და ცალკე მოკრძალებისაგან, თან დიდი უბედურება:

ცხვირსახოცი დამვიწყებოდა.

ამან ის სითამამეც კი წამართვა, რაც გზაში მოვიმარაგე, მაგრამ საქმეს რას უშველიდა.

დარბაზში ილიას მეუღლე დამიხვდა და ერთი შუახნის წარ-

მოსადეგი კაცი; როგორც შემდეგში გამოიჩვენა, კონსტანტინე ჩიკვაიძე იყო, მგონი, უნივერსიტეტით ილიას ნაამხანაგარი.

ილიას მეუღლემ ჩვეულებრივის თავაზიანობით მიმილო და, წარმოიდგინეთ, მაშინვე ილიას მოსაყვანად წავიდა. მაპიჩემის პატივისცემისათვის თუ!..

მართლაც არ გასულა დიდი ხანი, რომ მძივებმა გაიწკრიპლეს და ილიას ჩასკვნილი და ბრგე ფიგურა გამოჩნდა.

გამოძვითხა მამის ამბავი, დანანა, რომ უქეიფოდ იყო, ბოლოს ერთი-ორი სიტყვა ჩიკვაიძეს გაუზიარა და შემდეგ ისევ მე ამხედ-დამხედა.

ოფლმა იწყო წყურწყური. უთუოდ ვწითლდებოდი, ეყვითლდებოდი, ავიწურე, საქციელი წამჩნდა. ოფლსაც ვერ ვიზოცავ.

ილია მეკითხება:

— სად სწავლობ, ყმაწვილო?

მოგეხსენებათ, რომ მე არსად სკოლაში არასოდეს არ ვყოფილვარ და ესეც მოვახსენე, თან გულს მომეშვა, მივხვდი, იმტომ ამხედ-დამხედა, რომ ეგონა რაიმე მაშინდლური სასწავლებლის ფორმაში ვიქნებოდი გამოწყობილი. მე კი, 14—15 წლის ვაჟს, ცივილური ტანსამოსი მეცვა.

როცა გაიგო ჩემი ვითარება, შემდეგი წარმოსთქვა:

— მამათქვენი ჩვეულებრივი ბილიკით მავალი კაცი არ არის.

ეს იყო და ეს. ეს იყო პირველი და უკანასკნელი საუბარი ილიასი ჩემთან.

ნახვით კი კიდევ ვნახე ორჯერ.

* * *

ერთხელ თბილისის ბანკის კრებაზე, როცა პირველად დაიწყო მაჩაბლის და ილიას შეტაკება.

ქართული თეატრის დარბაზში ხდებოდა სხდომები, იქ, საცა ახლა გრიბოედოვის სახელობის რუსული დრამაა. არწრუნისეული შენობა, თვით ილიას ინიციატივით, ახლად იყო შეკეთებული, ჭერზე მსოფლიო გიგანტი მწერლები იყო მოხატული.

პარტერში ისხდნენ ბანკის წევრები და სხდომაზე ხმის მქო-

ნენი, ლოყებსა, აივანსა და ქანდარაზე კი დანარჩენი საზოგადოება.

გულის ფანცქალით ვუგდებდი ყურს ორატორებს, ვუკვირდებოდი, ვეცნობოდი ხალხს, ზოგი ძალიან მკვერამეტყველი იყო, მაგრამ უფრო რუსულად. მიკვირდა ეს ამბავი, რადგან იმაზე წინ ქუთაისშიც დავსწრებივარ საბანკო კრებებს და იქ თითქმის ყველა ქართულად იყო მოსაუბრე. ჩვენთვის დაუვიწყარია ქუთაისში: კირილე ლორთქიფანიძე ცოტა გრძლად, მაგრამ დასაბუთებით და მშვენიერის ქართულით მოლაპარაკე, მიხეილ დარახველიძე, ცხარე და ნიჭიერი ორატორი, ან დარაბაისცილი მოქართულე ლეჩხუმელი იასონ გელოვანი და ბევრი სხვა.

აქ კი ასე არ იყო! მხოლოდ როგორც კი გამოჩნდებოდა ტრიბუნაზე ან ილია, ან მაჩაბელი, მაშინვე მთელი დარბაზი ახრიალდებოდა: ქართულად, ქართულადო. და ისინიც იწყებდნენ იშვიათი ორატორული ნიჭის ქართულად გადმოშლას.

მაჩაბელი ფიცხი ორატორი იყო, ტემპერამენტიანი, სწრაფი მოლაპარაკე. გამიგონია: ფრანგი საზოგადო მოღვაწე გაჰბეტა. ერთ წუთში რამდენიმე ასეულ სიტყვას წარმოსთქვამდა, მაგრამ ისე მკაფიოდ, რომ ყველასათვის გასაგები იყო. მე მგონი ასეთი იყო მაჩაბელიც.

ილია კი პირიქით: აუჩქარებელი, დინჯი, ტემპერამენტითიქოს სულ არ ეტყობოდა, თუმცა შინაგან აუცილებლად ბობოქარი, თითქო მტკვარივით მღორედ, მაგრამ მძლავრად, წამლევავად მიძლინარე.

დაუვიწყარია ჩემთვის მაჩაბლის მაშინდელი პირველი გამოსვლა ილიას წინააღმდეგ: სახე—გაფითრებული, მღელვარე ხმით იწყებს იგი, რომ იძულებულია გამოვიდეს იმ კაცის წინააღმდეგ, რომელსაც მთელი საქართველო აფასებს და რომელსაც, როგორც უებრო მწერალს, თვით იგი თაყვანს სცემს, შეჰდევ კი გადადის ბანკის საქმეებზე და მოჰყავს საბუთები ილიას თითქოს სიზარმაცისა, დაუღვერობისა, განსაკუთრებით „კონვერსიის“ საქმეში. მე ამ „კონვერსიის“, საბანკო ოპერაციებისა და ბალანსისა ვერა გავიგე რა, მაგრამ ჩემი ქაბუკური გული

კი დაატყვევეა მაჩაბელმა. ეს დამმართა უფრო მისმა წინასიტყვაობამ, რადგან ვიწამე მისი გულწრფელობა.

მაგრამ აგერ გამობრძანდა ილია.

საოცარია!

ხუმრობს. თითქოს არაფერი საბუთი. ხალხი ხარხარებს, მაგრამ თანდათან გრძნობთ, რა გამანადგურებელია ეს ხუმრობა.

სხვათა შორის, ილია ამბობს: ჩვენ ასეთი დამფასებელია ცა გვყავდა, რომელიც მამულის შესაფასებლად ასეთ ცნობებს გვაძლევდა: ამა და ამ ალაგას ერთი შენობა დგას, რომელსაც ოთხი კედელი აქვს და ოთხივე ერთიმეორეს შეკუყრებსო.

ხარხარი.

თურმე ეს დამფასებელი ერთ ღროს ვანო მაჩაბელი ყოფილა, ილიას თქმით; თუშცა, ცხადია, ეფექტისათვის იყო ეს დახასიათება ილიას მიერ მოყვანილი.

ანდა თავის სიზარმაცეზე, სამსახურში გვიან მოდისო, რომ ამტყუნებდნენ:

— ზოგი კაცი შეიძლება გვიანაც მოვიდეს და მხოლოდ ერთი საათი დაჰყოს სამსახურში, სამაგიეროდ იმდენი შეიძლება გააკეთოს, რასაც მეორე მთელი ერთი კვირის განმავლობაში ვერ გააკეთებს, რაგინდ ადრეც მოდიოდეს სამსახურში და სულ შიგაც ტრიალებდესო.

დაახლოებით ასე.

ახლა ილიამ მომხიბლა საერთოდ მთელი თავისი ნათქვამებით ამ კრებაზე, თავისი შეუვალი ლოგიკით და გამანადგურებელი ჰუმორით.

და ასე მერყეობდა ჩემი სიმპატია ამ ორ კაცს შუა, და განა მარტო ჩემი, გამოუცდელის, ახლადშეღერებული ქაბუკისა, არამედ ბევრად ჩემზე გამოცდილებისა, თან დიდად სწყინდათ, რომ ილიასა და მაჩაბლის შორის ესეთი დავა ატყდა და თანდათან მწვავე ხასიათს იღებდა.

დანადგლიანებულებში ერია მამაჩემიც და მისი ნადვლიანობა მის შვილებს, მე და ჩემს დასაც, გვასევდიანებდა.

* * *

კიდევ შევხვდი დიდ ილიას ქუთაისში. გაბრიელ ეპისკოპოსს მარხავდნენ.

მე უკვე 22 წლის ახალგაზრდა ვიყავ და სხვა ბევრთა შორის მეც მინდობილი მქონდა მოწესრიგედ ვყოფილიყავ. და უნდა გენახათ, როგორ ვამაყობდი, რომ მკლავზე საამისო ნიშანი მქონდა და სადაც გავივლიდი, ხალხი ჩემს განკარგულებას ემორჩილებოდა.

ჰე, რა ხარ, ახალგაზრდობავ! რა პატარა რამ გართობს და თავბრუს გახვევს!

ეკლესიაში ვართ, გელათში. უკვე მოთავდა სიტყვები სასულიერო პირებისა: რუსი ეგზარქოსისა, ეპისკოპოსებისა და სხვ. ხალხში გაისმა: „ილია, ილია სად არის?“. მამამაც მანიშნა, წადი, მოძებნეო; ხალხი გაირღვა და ილია მოვძებნე ეზოში, ეთხოვე, წამობრძანებულიყო, ვიცოდით, რომ სიტყვა უნდა ეთქვა; ჯგუფში საუბრობდა ხალისიანად და მე რომ მივადექი ბოქაულივით. უეცრად ეს კაცი შეიცვალა, სახე კუმტი გაუხდა, თითქო წარბებიც შემოუქურუხანდა, მაგრამ სიტყვაშემოუბრუნებლივ მორჩილად წამომყვა.

ახლა რომ მოვდივარ, როგორ ვამაყობ! იცით, ვინ მომყავს? გაიწით, მოგვეცალენით!

რასაკვირველია, ამას ხმამალა არ ვამბობ, მაგრამ ან განა საჭიროა გაფრთხილება? უბირშაც კი იცის, ვინ მოდის—ახლა ირგვლივ ისმის: „ილია ქავექავაძე!“ თუ არც გაუგონია, მაინც გრძნობს, რომ ვილაც დიდი კაცია, რადგან ისეთი მოკრძალებით და სიყვარულით არის ნახსენები.

აი შევედით ტაძარში. გზა გავუქერ და მივაყენე ამბიონთან, მეც გვერდით ამოვუდექ.


განა ახლა წავალ სადმე? ასე ახლოს და ისიც ვისთან?

ვინა სთქვა, ილია ტემპერამენტიანი არ არისო?

ჯერ არ იწყებს სიტყვას, მესმის მისი გულის ბაგაბუგი. მკერდი ადის და ჩადის. ეს რა არის? შეკრთა? რა სათქმელია!

ეს ის არის, რომ შინაგან მოზღვავებული სათქმელი ბობოქრობს და ეძებს თავის მხატვრულ გამოსავალსა.

დაიწყო, გარეგან თითქო დამშვიდდა. მაგრამ მკერდი მაინც ადის და ჩადის. ისე ახლოს ვდგავარ, რომ თვალნათლივ ვხედავ, მესმის მისი გულისძგერა, ამ მკერდიდან აღმომხდარი ხმები.



აკაკი წერეთელი.

რა ბედნიერი ვარ ამ წუთას!

და დაუვიწყარია ჩემთვის ეს წუთი. მეცხრამეტე საუკუნის საქართველოს ბუმბერაზის გულისძგერა მომისმენია ესე ახლოს და თითქოს შევექრილვარ მის ლაბორატორიაში, სადაც ითხზებოდა ჩემი თანდასწრებიღ ილიას ნაქედი სიტყვები.

მან დაახლოებით ასე დაიწყო: „დიდბუნებოვანი კაცი იმითაც არის შესამჩნევი, რომ რომელი მხრიდანაც არ უნდა მოუწარო, ლამაზი სანახავია“.

მეც ამით გავათავებ, მხოლოდ ამჟამად მისი სიტყვები დემთვით მასვე მიუდგეს.

ისევ სოფლებში

გარდა ბერთემისა სხვა სოფლებში ცხოვრებამ ვერავენ ამ-
ხანაგი ან დაახლოებული მეგობარი ვერ გამაჩენინა, განსაკუთ-
რებით ჩემი ტოლი, ჩემი ხნის ყმაწვილი და ვიყავ განმარტოე-
ბული, თავისთავის ამარა.

და...

ასე დაჯიჩი სულ ჩემი ცხოვრების ბოლომდე, თითქო „სუ-
ლით ობოლი“. რაღა თქმა უნდა, შემდეგში მეგობრები თითქო
გამიჩნდა. მაღ ჩემდამი დამოკიდებულებას, რასაკვირველია,
ზოგიერთებისას, დიდად ვაფასებ, მათი გულთბილი მოპყრობა
ბევრჯერ განმიცდია, მათი გამოცდილებითაც ბევრი შემიძენია,
მაგრამ მაინც ვიგონებ ხშირად პუშკინის ამ მუნასიბს:

Всегда так было и бывало
Таков издревне белый свет:
Ученых много, умных мало,
Знакомых тьма, а друга нет.

და ეს თითქო უმეგობრობა იმიტომ კი არა მჭირდა, რომ მე
ჩემი თავი რაღაც განსხვავებულ კაცად მყავდა მიჩნეული და
თითქო სხვებს ვუუკადრისობდი—ღმერთმა დამიფაროს!—ან
იმიტომ, რომ მე პირადად ძალაან გულჩახვეული კაცი ვიყავ, მი-
უჯარებელი. პირუკუ! ვინც კი მიცნობდა, იმან იცის, რომ მე მუ-
დამ დიდი თანაზიარი ვიყავ ადამიანებისა, გულახდილი და...
ამყოლ-დამყოლი, მაგრამ როდესაც საკუთარ თავთან მარტო
ვრჩებოდი და ჩემს ცხოვრებას თვალს გადავაველებდი, მწვავედ
ვგრძნობდი სულიერ მარტოხელობას.

სოფ. ბერთემის გარდა, სხვა სოფლებში უფრო თავადაზნა-
ურთა წრის ხალხი ტრიალებდა ჩემ გარშემო. მათ შორის, რა-
საკვირველია, მე, ჯერ ბავშვსაც და შემდეგ უფრო მოჩიტულ-

საც, მეტწილად ახალგაზრდობა მიზიდავდა. უწინარეს მათი გარეგნობა. მწყაზარი სახე, ტანადობა და შემდეგ ჩაცმულობა— წელში გამონაკეთული ჩოხა-ახალუხი, წულა-მესტი, ქამარ-ხანჯალი, ლეკური, მათარა, მათრახი და სხვ. ყოველივე ეს ჩემთვის ისეთი მაცთური რამ საგნები იყო, რომ ბავშვობიდანვე მისი ტრფიალი შევიქენ და დიდხანს ვნატრობდი, რომ მეც მათებრ მოვრთულიყავ; ეს კი მხოლოდ ჩემს სიჭაბუკეში მომიხერხდა და ამაზე იყო, რომ თავის დროზე დიდებული აკაკი წერეთლისაგან ლმობიერი საყვედურიც მივიღე.

დიდებულ აკაკიზე ჩემს „რაც გამახსენდა“-ში ცალკე თავი მაქვს განკუთვნილი, მაგრამ აქ გული არ მითმენს, რომ ეს პატარა ეპიზოდი არ მოვიყვანო:

ქუთაისში ვარ, ახალ ცოლშერთული, და უფრო ხშირად ჩოხა-ახალუხს ვატარებ. შუადღეა. ზაფხული. თეატრში წარმოდგენები არ არის და მეც გამოვდევარ ბულვარში, რომელსაც გიორგი წერეთელმა თავის „ედიშერ ქველბაქიანში“ რომის ფორუმი უწოდა. რომის ფორუმისა რა მოგახსენოთ და, თავს დროზე ეს ბულვარი მართლაც იყო შესაკრებელი მთელი ქუთაისის მოწინავე საზოგადოებისა.

კოხტად „გამოკანკლულ“ ახალგაზრდა ქალ-ვაჟების გარდა, რომლებიც, ცხადია, უფრო საარშიყოდ და სალალობოდ იკრიბებოდნენ, აქ იყრიდა თავს ქუთაისის მაშინდელი ინტელიგენცია, რომელთაც ჰქონდათ მსჯელობა პოლიტიკურ საკითხებზე, ადგილობრივ „საჰირბოროტო“ საგნებზე — ქალაქის თვითმმართველობის საქმეზე, საადგილმამულო ბანკის ვითარებაზე, ქუთაისში გაზეთის გამოცემაზე და სხვა ამგვარზე. აქვე მოისმენდით ჩვენს მწერლობაშიც თავის დროზე კარგა ცნობილი, ერთ-ერთი თერგდალეულთაგანის, კირილე ლორთქიფანიძის დამჭდარს, ჰკვიანურს და შეუვალის ლოდიკით სავსე საუბარს, ცნობილი ადვოკატის მოსე ქიქოძის „გამყივან კამათს“, კოტე მესხის სხარტულ გამოთქმებს და სხვა.

აქვე იყვნენ საზაფხულოდ ჩამოსული სტუდენტები, რომელთაც დინჯ საუბარში შემოჰქონდათ თავიანთი მღელვარე პროტესტის ჰანგები, რაიც იქცა რევოლუციონურად მომართული ახალგაზრდების უფრო მძლავრ იერიშებად და ქალაქის

ბალი ბოლოს გადაიქცა ამ რევოლუციონერთა ერთ მთავარ, ვითონდა ლეგალურ თავმოსაყრელად, სადაც ჩემსობას ცნობილი მიხა ცხაკაია თავისებური დინამიტური საქურვლით აიარაღებდა მის მიმყოლ ჯგუფებს.

ყოველივე ამის გამო ქუთაისის ბულვარი იზიდავდა სულ სხვადასხვა აღზრდისა, მსოფლმხედველობისა და მდგომარეობის ხალხს.

მეც ამ „მიზიდულებში“ ვერაიე.

მოვდივარ ჩერქესკიანი და იარაღში ჩამკდარი. ლეკური, ხანჯალი ზედ მარტყია. ახალგაზრდა ვარ და უთუოდ ნაბიჯიც მტკიცე მაქვს და შესახედაობაც „დამოუკიდებელი“.

დავინახე აკაკი ჩემს პირდაპირ, მარტო მოზრძანდება.

მივეგებე. ღიმილით ხელი ჩამომართვა, ამხედ-დამხედა, ჩაიქირქილა:

— როგორ ცოტნე დადიანივით გამოწყობილხარ?

ვიგრძენ საყვედურის კილო და ცოტა შევეწითლდი. მან უფრო მტკიცედ განაგრძო:

— სულ მიატოვე საზოგადოებრივი საქმიანობა? თეატრი? მწერლობა?

გულმა რეჩხი მიყო: ვაიმე! აკაკიც ტანისამოსს აქცევს ყურადღებას... ღმერთი-რკჟული, შეძლებისდაგვარად არც ერთი არ ნაპიტოვებია, მაგრამ ჩემმა ჩოხა-ახალუხმა, უთუოდ, ლეკურ-ხანჯალმა მიყო ეს „საჯაყი საქმე“ რომ აკაკის აღარ მოგეწონე.

ეს მისთვის არ მითქვამს. თავი ვიმართლე, არც ერთი არ მიმიტოვებია-მეთქი, მაგრამ არ ვიცი დარწმუნდა, თუ არ დარწმუნდა!

მახსოვს, თითქმის მთელი დღე მოწამლული მქონდა. ვიცოდი, რომ „ჩერქესკიანობა“ თავადაზნაურული მუქთახორობის, „ლოთობისა და სკანდალისტობის“ სინონიმი იყო უმრავლესობის თვალში. მაგრამ უმრავლესობა ხომ სხვა იყო და აკაკი სხვა, რად უყურებდა ისიც ჩოხოსანს ასეთი „ავე თვალით?“ განა ტანისამოსს ასეთი მნიშვნელობა აქვს? შინაარსი უნდა იყოს საქმე და არა გარეგნობა.

ასე ვფიქრობდი მაშინ.

რატომ აკაკიმ ვერ გამიგო-მეთქი და... ვწუხნდი.

იმავ დროს მხიბლავდა აგრეთვე ამ ჩოხოსნების მოხდენილი ცეკვა — ქართულიც და ევროპიულიც. მაგ. ს. საწულუკიძეოში იყვნენ ახალგაზრდა ანტონ წულუკიძე, რუსხელმწიფის კარზე „კონვოის ოფიცრად“ ნამყოფი, კარგი მოყვანილი ვაჟკაცი, რომელიც საუცხოოდ ცეკვავდა განსაკუთრებით მაზურკას; შემდეგში იმერეთში განთქმული მოცეკვავე ლეკურისა ნიკო ფალავა. მეც ამიყოლია მათმა ხელოვნებამ, ვბაძავდი, ზოგჯერ კიდევ კინალამ ფეხები დავიმტვრიე, მაგრამ ხეირიანი მოცეკვავე ვერასოდეს გამოვედი. მიუხედავად იმისა, რომ მაშამ თვითონ შეადგინა მუსიკა კადრილის ყველა ფიგურისათვის, თვითონ უკრავდა და შინაობაში გვაცეკვებდა ყველას. შემდეგშიაც, როცა ქუთაისში რეჟისორობა დავიწყე და კარგად მქონდა შეგნებული, რომ მსახიობს თავისი ტანის მოქნილობა უნდა შედგამდეს და, მაშასადამე, ყოველგვარ ადამიანურ ცეკვა-როკვასაც დაუფლებული უნდა იყოს, დასისათვის მოვიწვიე სპეციალისტი, ცეკვის მასწავლებელი ალელოვი და ვამაცადინებდი დასს, მეც ვღებულობდი ვარჯიშში მონაწილეობას. ბევრმა დასის წევრმა კარგად შეითვისა ეს ხელოვნება, მე კი, როგორც ზემოთაც ვთქვი, რიგიანი მოცეკვავე მაინც ვერ გამოვედი. ეტყობა ამაში უნიჭო ვიყავ და ვერც თუ ისე მიმიზიდა.

ამ შემთხვევაში მაინც „ტლუბიქად“ დავრჩი და სერიოზულ ნაადრევ „ფილოსოფოსად“. ჰა, ჰა, ჰა!

* * *

უფრო ხნიერებაში კი ჩემთვის ხსოვნიდან წარუშლელია დედით ბიძაჩემი, დედიჩემის ძმა, გიორგი წულუკიძე. ის სახლობდა სოფ. საწულუკიძეოში, ჰქონდა მშვენიერი სახლ-კარი და საკუთარი ჩარხის წისქვილი თავისი ფართო ეზოს გვერდით, სადაც არაერთხელ ვმჯდარვარ ბიძაჩემთან ერთად და ვისმენდი მის ტკბილ სასმინარ საუბარს; ხანაც მარტოკა, ღარებში მოჩუხჩუხე წყალის მაცქერალი ან თვით წისქვილის ბორბლების ტრიალსა და სარეკელას მიჩერებული, მივცემივარ „ფიქრთა გერიობას“.

ბიძაჩემი გიორგი, როგორც სხვა იმდროინდელ სოფლებში მცხოვრები თავადი, ჩოხოსანი იყო. ისეთი ფაქიზი მატარებელი ტანსაცმლისა და მთელი სხეულისაც იშვიათად მინახავს. კარგა დიდი წვერი ჰქონდა მოშვებული, ჩემსობას სრულიად გათეთრებული, მაგრამ ისეთი სპეტაკი, რომ დიდხანს თვალს ვერ მოაშორებდით. ასეთივე კარგი მომვლელი იყო თავისი ოჯახის ავეჯეულობისა, საწოლისა, პირსაბანი ტაშტისა, თუნგეულობისა და სანოვაგისათვის განკუთვნილი ჭურჭლეულობისა. ამას ყველას თვითონ კი არ უვლიდა, არამედ მის მეუღლეს და ოჯახის შინამოსამსახურეებს ჰქონდათ დაეალებული, რომ არც ერთ საოჯახო საგანს არასოდეს არავითარი ლაქა არა ჰქონოდათ და არც დამტვერიანებული გამოეტანათ. ასევე უვლიდა თავის იარაღს. ატარებდა უფრო „სმიტ და ვესონის“ სისტემის გრძელ რევოლვერს, რომელიც ჩოხის ჩერქეზულ ქამარზე ჰქონდა დაკიდებული თავისი მეშის ბუდით, იმავე ქამარზე ჰქონდა დაკიდებული საშუალო მოყვანილობის ხანჯალი. უბრალო მეშის ქარქაშში ჩადებული, მხოლოდ სახელური ჰქონდა სპილოს ძვლისგან გაკეთებული. სხვა იარაღს, მაგ. ლეკურს, არ ატარებდა, მაგრამ რასაც ატარებდა, ის იარაღიც არასოდეს არც ჩემსობას და თურმე არც სიყმაწვილეში არ უხმარია და ბუდიდან არ ამოუღია.

ასეთივე დაკვირვებით უვლიდა თავის ცხენ-უნაგირს. და ცხენები ხომ, რომ იტყვიან, „თავს ურჩევნოდა“ და მუდამ ისე გავარდარებული ჰყავდა, რომ საამური იყო. მე თვით მინახავს, რომ მეჭინბესაგან სამურელით და ძაგრისით გაწმენდილი ცხენი მას კიდევ გაუსინჯავს თავისი ხელსახოკით და შეუმოწმებია, ცხენის გავა-ტანი ჭუჭყიანი ხომ არ არისო. ცხენების სადგომი თავლაც სუფთა, დაგვილი, მოწმენდილი იყო.

იცოდა ცხენების შერჩევაც და მუდამ საუკეთესო ჯიშის, მოყვანილი და ცქვიტი ცხენები ჰყავდა.

.. ამიტომ ამბობდნენ ირგვლივ, გიორგი საუკეთესო „ბზინდარი“ არისო — ეს იყო ძველებური სახელი ცხენების კარგი შემნახველის და მომვლელისა.

თვითონ კი, მგონი ქუთაისის გარდა, ეტლში არასოდეს არსად არა მგდარა, თუმცა მისობას ეტლები უკვე ჰყავდათ ხონ-

სა, სოფ. საწულუკიძეოსა და ახლომახლო სოფლებშიც კერძო მეპატრონეებს. ის, სულ ბოლომდე, უფრო ხშირად, ცხენით დაიარებოდა.

საერთოდ კი დიდი მოგზაური კაცი არ იყო, არც თუ ნადირობას ეტანებოდა.

მხოლოდ ერთხელ წამიყვანა საკურდღლოდ, ისიც იმისთვის, რომ ჩემთვის გაეცნო სპორტის ეს სახეობა. უფრო კი თავის სახლში იჯდა სოფ. საწულუკიძეოში, თავს დასტრიალებდა თავის კარ-მიდამოს, განსაკუთრებით მის ჩარბის წისქვილს. სტუმართმოყვარე იყო, პურმარილიანი, მაგრამ ღვინოს დასათრობად არც თავის სახლში და არც სხვისას არ ეტანებოდა. რესტორანში თუ სადმე სოფლის დუქანსა თუ სამიკიტნოში შესვლა არ უყვარდა, მიუხედავად იმისა, რომ მისი ბიძაშვილები, ადგილობრივი თავადაზნაურობა გადაყოლილი იყო ღვინის სმასა და ქეიფს.

სახლში კი სტუმრები მუდამ ბლომად ჰყავდა და იმათ უხვად უმასპინძლდებოდა, მაგრამ რაკი იცოდნენ მისი ხასიათი, მაინცდამაინც დასათრობად ღვინოს არც სტუმრები ეძალეობდნენ.

ჩვენ, მისი ნათესავები, უფრო პატარები — მისი დისწულები — ზაფხულობით მასთან ხშირად ვიყავით და ისიც ხშირად გვეხუმრებოდა. მაგ., სადილობისას, სანამ მთავარ კერძს შემოიტანდნენ, შევექცეოდით ყველსა და პურს ან რამე ფხალეულს, ერთ-ორ ლუქმას პირში ჩაიდებდა თუ არა, ვითომდა ძალიან კმაყოფილი წამოიძახებდა:

— უპ, მეც გავძეხი და ჩემი სტუმრებიც!

რაზედაც ჩვენ ყველანი ავხუვლდებოდით:

— არა, ბიძია, არა! რა დროს გაძლომა... — და სხვა.

სამაგიეროდ ჩვენც გავუგეთ, რომ ხუმრობა უყვარდა და დილ-დილაობით უმღერდით ხოლმე:

წვიმს, თოვლს, ხოშაკლავს,
მასპინძელი ხბოს დაკლავს! —

რაზედაც ის გაცინებული წამოიწევდა სკამიდან, ვითომდა ჩვენ საცემრად და შემოგვიტევდა:

— დიახ. თქვენმა მზემ! ხბო კი არა ის არ გინდათ?! ღამეკარგეთ, თქვე ცინგლიანებო, თქვენა!

და აგვიტყდებოდა ხარხარი და ვეძლეოდით მხიარულებას.

დაღხანს გაძლო. მგონი ოთხმოც წელს მიაღწია და ისე ჩავიდა საფლავში, რომ მეზობლებისა და მისი მცნობი ადამიანების პატივისცემა არ მოჰკლებია, როგორც ცხოვრებაში ყოვლად პატიოსანს და უმწიკვლო ზნეობის კაცს.

თავის სიცოცხლეში არავითარ საუკუღმართო საქმეში არ გარეულა, მაგ., ცხენის ქურდების მფარველობაში, ყაჩაღების გადამალვაში თუ სხვა რამ ამისთანებში, მაშინ, როდესაც ირგვლივ მისი რანგის ხალხი, განსაკუთრებით თავად-აზნაურები, ასეთ „საქმიანობას“ არ ერიდებოდნენ.

არც თუ მისი რომანებისა გაუგონია ვისმე. ის იყო დიდი ერთგული ოჯახისა და მეტად მოყვარული თავისი მეუღლის, ფატმან წულუკიძის ქალისა. მეუღლე მაზედ ხნით უფროსი იყო და არც თუ ძალიან სახიერი, მაგრამ მათს დამოკიდებულებაში შავ კატას არასოდეს არ გაუბრენია და ორთავენი, ერთიმეორის ერთგულნი, შეჰხაროდნენ თავის ერთადერთ ქალიშვილს ლუბას. საწყენად მხოლოდ ის ჰქონდათ, რომ ეს მშვენიერი, ახოვანი და პირმწყაზარი ქალიშვილი გაუთხოვარი შემოაბერდათ. ლუბა არც მათი გარდაცვალების შემდეგ გათხოვილა. ამის მიზეზი, ჩემის ფიქრით, უწინარეს ყოვლისა ის იყო, რომ თვითონ ლუბას, მიუხედავად იმისა, რომ მთხოვნელები კარგა ბლომად ჰყავდა ახალგაზრდობისას, თვალში არავინ არ მოსდიოდა და მისი გული მათ არ ეკარებოდა; მხოლოდ რომ შებერდა, შემდეგ, რა თქმა უნდა, მთხოვნელებმაც იკლო, თუმცა მას საქმრო უთუოდ აღმოუჩნდებოდა, რადგანაც კარგი სახლ-კარისა და გვარიანი მამულის მემკვიდრე იყო: გარდა საწულუკიძეოსი, რაქაშიც ჰქონდა მამული და, ანგარების გამო მაინც შეირთავდნენ, მაგრამ თვითონ ლუბა იყო უცნაური ზასიათის: მამაკაცური საქციელი ჰქონდა და ქალური სინაზის მიმზიდველობა სრულიად არ გააჩნდა. პირუკუ! ის მუდამ ვაჟებს ეჯიბრებოდა ცხენოსნობაში, ბურთაობაში, ნადირობაში და სხვ. ასე რომ მასთან მყოფ ვაჟს ასეთ ვაჟურ ადამიანთან არშიყობა არ შეეძლო დაეწყო და

თვითონ ლუბა სრულიად ვერ გრძნობდა ასეთ მოთხოვნილებას. მისი ასეთი ხასიათი უფროსობდა საქმროებს და ისინიც ვერიდებოდნენ.

ბიძია გიორგისას მე ვყოფილვარ პატარაობისას, შემდეგ სიკაბუქეში და ბოლოს მოწიფულობის დროს, უფრო ზაფხულობით და ხშირად თვეობითაც, მაგრამ ამ საყვარელ კაცს თავისი ცხოვრების ნირი არასოდეს არ შეუცვლია.

ზოგჯერ, როდესაც დავაუკაცებელი ვიყავი და მას შევხვდებოდი ან მისას, ან ჩვენსა ქუთაისში თუ სოფელ ბერთემში, ჩამომიგდებდა ხოლმე რევოლუციურ მოძრაობაზე ლაპარაკს და ბევრ რასმე მეკითხებოდა. ეგონა, რომ მე დიდი მცოდნე ვიყავი ამ ისტორიული ამბებისა და მისი მიმდინარეობისა. შემდეგ წამოიტყოდა:

— არა, რაღაც კარგს კი აკეთებენ ეს ახალგაზრდები, მაგრამ მე მაინც ბევრი რამ არ მესმის. აი თუნდა გიგოს შვილი საშა (შემდეგში ცნობილ რევოლუციონერ საშა წულუკიძეზე ამბობდა) — რაღაცა კარგი განზრახვები კი აქვს ვატყობ... ჰა, ჰა, შენც იმისთანა ხარ, ბიჭო... — და სიყვარულით აღსავსე თვალებს შემომანათებდა.

— არა, ბიძია, არა, მე მხოლოდ სცენაზე ვჩხიკინობ რაცხას...

„რაცხა!“

თუ ეს სიტყვა წამომცდებოდა, მაშინვე გამახსენდებოდა ჩვენი სასიქადულო არტისტი ლადო მესხიშვილი, იმერლებს რომ დასცინოდა ასეთ ქართულს:

„ვინცხა, რაცხა, საცხა!“

ბიძია კი მეუბნებოდა:

— ჰო, ვიცი, ვიცი! არც შენ ხარ პატიოსანი კაცი! სულ ჩვენ, თავადაზნაურობას რომ დაგვცინი სცენიდან! თუმცა რა? ვრობხელ მეც მათამაშეს სცენაზე. წულუკიძეებმა დავდგიოთ ზონში გიორგი ერისთავის „გაყრა“ და მე სულ „ვაი არა აქ შენ პავლესა, ჰოო!“ მაყვირეს...

— ბიძია, ეგ ზომ გროტესკული როლია... შენისთანა დარბაისელი კაცი და მაგისთანა სათევარი?

— რაო? სათევარიო? ეგ რალა არის?

— სათევარი, ბიძია, ქართულად როლს ჰქვიან და ჩემის ფიქრით. „თევა“ ღამის თევისაგან უნდა იყოს წარმომდგარი. ჯერ როლის შესწავლისათვის რომ ათევე ღამეს და შემდეგ თვითონ წარმოდგენის დროს...

— ჰო, ჰო, რას არ იტყვის ეს ბიჭი!

კიდევ უნდოდა რაღაც ეთქვა, მაგრამ მე აღარ ვაცალე...

— აა, ახლა კი მივხვდი... სასცენოდ შენი ნიჭი გამომ-
ყოლია, ბიძია!

— ოჰ, დაიკარგე იქით! — ვითომ გაჭავრებულმა შემოპი-
ტია. შემდეგ ისევე მოძრაობის ამბებზე გადავიდა და ბოლოს
შინც მდაბიური შეხედულება გამოთქვა: — მხოლოდ თავი არ
წააგოთ, ბიჭებო, თავი! ხომ იცი კულაშელი ურიები რას
ეუბნებიან შენისთანა ახალგაზრდებს: „რას შობით, ბოშო,
თქვენ? თქვენ მეერევიტ რუს-ხენმწიფეს?“

და ხშირად ასეთ სახუმარო დიალოგად იქცეოდა ჩვენი
საუბარი.

სოფ. საწულუკიძეოში ცხოვრობდნენ სხვა წულუკიძეე-
ბიც და რაკი მე უფრო მათ შორის ეტრიალებდი, ბარემ იმათ-
ზედაც ვიტყვი ერთ-ორ სიტყვას.

იყო კიდევ სხვა გიორგი წულუკიძე. ესეც ამ სოფელში
ესახლა, მაგრამ ბიძაჩემ გიორგისაგან რომ განესხვაებინათ,
„მაღალს“ ეძახდნენ. მართალია, არც ბიძია გიორგი იყო ტან-
დაბალი კაცი, მაგრამ ეს მეორე გიორგი მართლა რაღაც არა-
ჩვეულებრივად მაღალი იყო და შეეფერებოდა კიდევ ეს
შერქმეული სახელი. ისე კი, ეს მაღალი გიორგი, მეტისმეტად
თავმდაბალი და დემოკრატი კაცი იყო. არ თაკილობდა ფიზი-
კურ მუშაობას ყანაში, ტყეში. თვითონ ხნავდა, თვითონ თეს-
და და მოჰყავდა ჰირნახული, თვითონ ჰკრიდა ტყეში სავენახე
მარგილებს, შეშას და სხვ. გლახობაში მეტად პოპულარული
იყო. ბედნიერად და მშვიდად ცხოვრობდა თავის კეთილ ცოლ-
თან ერთად. მათი ერთადერთი საწუხარი ის იყო, რომ შვილი
არა ჰყავდათ.

ამის მიღმა ცხოვრობდა დათა წულუკიძე, ოდესღაც მგონი
მაზრის თავადაზნაურთა წინამძღოლად თუ იმავე წოდების
დეპუტატთა საკრებულოს დეპუტატად ნამყოფი. ჰყავდა ორი

ვაჟი — ალექსანდრე და ივანე, ესენიც ცოლშვილიანები — და მწეოდნენ ჩვეულებრივ იმ დროს მიღებულ თავადაზნაურულ ცხოვრებას: სტუმრიანობა მათ ოჯახებში და სხვაგანაც მათ მიერ წასვლა ნათესაობაში კელაშს, ჭიხაიშს თუ სხვაგან, რასაკვირველია, საქეიფოდ და დროს გასატარებლად. იმავ დროს არც ერთი მათგანი არ იყო ნასწავლი. საშუალო სკოლის კურსიც კი არ ჰქონდათ დამთავრებული, როგორც საერთოდ უნეტეს ნაწილს თავადაზნაურობისას, — თითქმის ყველანი გიმნაზიის თუ სხვა სკოლის მეოთხე კლასიდან იყვნენ გამომხტარნი, ან პირდაპირ გამორიცხულები.

ეს მეოთხე კლასი თავად-აზნაურთა ახალგაზრდობისათვის თითქმის გადაულახავი რაღაც ჭებირი იყო და ამაზე ხშირად ერთიმეორეში დაიცინებოდნენ კიდევ. დათას ერთ ვაჟს კი 70-იან წლების რუს-თათართა ომში ჰქონდა მონაწილეობა მიღებული და წმიდა გიორგის ჯვრით იყო დაჯილდოებული. ეს ჯილდო კი ძალიან სასახელოდ იყო მიჩნეული, რადგანაც მას ომში მამაცობისა და გმირობის გამოჩენისათვის აძლევდნენ.

დათა წულუკიძის მიღმა, სოფლის პატარა მოედნის მეორე მხარეზე, ესახლა სამსონ წულუკიძე.

არსებითად არც სამსონის ოჯახი განსხვავდებოდა სხვა იმერელი თავადებისა და მისი მოგვარეების — წულუკიძეების ოჯახებისგან: იგივე სტუმართმოყვარეობა, ქეიფი, მხოლოდ უფრო თავშეკავებით, ვიდრე სხვა ოჯახები, საღაც მამაკაცები თვრებოდნენ უგრძნობელობამდე და ხშირად ერთიმეორეზე ღანჯლებიც დაუტრიალებიათ.

ასე არ იყო ამ ოჯახში. მას უფრო სხვანაირი, თუ შეიძლება ესე ითქვას, „წესიერი“ ელფერი ედვა და ამის მთავარი მიზეზი იყო სამსონის მეუღლე ეფროსინე, ლორთქიფანიძის ქალი — ცნობილი საზოგადო მოღვაწის, ილია ჭავჭავაძის თანამოსაქმის, ძველი „თერგდალეულას“, კირილე ლორთქიფანიძის და.

ძალიან მინდა მოვხზო ამ საუცხოო ქალის სურათი, თუმცა გამიჭირდება კი, რადგანაც ის არა ჰგავდა არც იმ ლოცვავედრებასა და ოჯახის მურებს საქმეებზე გადაყოლილ მანდილოსნებს, რომელთაც ამის გარდა თითქმის სხვა არა ახსოვთ-რა

ცხოვრებაში. ასეთები კიდევ იყვნენ ეფროსინეს დროს, თუნდაც ჩემი ბიცოლა. ბიძია გიორგის მეუღლე ფატმან, წულუკიძის ქალი: მეტად გულკეთილი და ადამიანთა თანაზიარი, მაგრამ დილით, სისხამ დილაზე რომ წამოდგებოდა და რალაც საშინაო ფრიალა კაბას გადაიცვამდა (როგორც შემდეგში დავაკვირდი, ევროპული „პენიუარის“ მაგგვარ რალასაც წარმოადგენდა), თავსაც რომ წაიკრავდა თეთრი მანდილით, დაუტრიალდებოდა შინამოსამსახურეებს და ყველას თავის საქმეს მიუჩენდა, განსაკუთრებით ქალებს. ერთი მუხჯია ჰყავდა, ქალი, და მისი საქმე იყო ბამბის პენტა და საბან-ლეიბის ბამბის ამოდება, კერვით ამ საბან-ლეიბებს შემდეგ სხვა ქალები ჰკერავდნენ. მეორე ჯუჯა-ძატუ, ეგეც ქალი, განაგებდა საქარეულოს, იყო მისი შეფი. ჩემთვის აქამდე დაუეიწყარი პატარა. წკირებივით წვრილ შამფურებზე მის მიერ წამოცმული და შემწვარი ქათმის კუჭმაჭი, რაიც ქონის უცნაურ ბადეში იყო გახვეული. ხაქაპურები ხომ... „თითებს რომ ჩაატანდი“, იმისთანა. კიდევ ბევრ სხვა სანუგებარობსაც აკეთებდა ძატუ განსაკუთრებით პატარა თიხის ქოთნებში, „კვანოებში“, მხოლოდ ხორცეულის დიდი ნაჭრების კეთება, ძატუსავე მეთვალყურეობით, დათმობილი ჰქონდათ მამაკაც მზარეულებს, ისე, როგორც პურის — გომიჯების და ლავაშების ცხოზა — ხაბაზებს. ყველა ამგვარებს რომ მოისაქმებდა ბიცოლა ფატმანი, შემდეგ პირს დაიბანდა, ანუ უკეთ — მოსამსახურეები დააბანიებდნენ. ისიც თმებს გადაივარცხნიდა, პატარა ნაწნავებს ყურებზე ამოივლებდა კავებივით, ზედ დოლბანდს და ხელმანდილს გადაიხურავდა, ტანზედაც კაბას გამოიცვლიდა, უფრო საგარეო იერისას, ფრსტლებსაც გაიხდიდა, დაბალქუსლიან ფეხსამოსს ჩაიცვამდა და უსმელ-უქმელი, უზმომზე, გაემართებოდა მისი ოთახის აღმოსავლეთით მაღლა კედელზე მოთავსებულ ღვთისმშობლის ხატისკენ.

აი აქ იწყებოდა... „ლიტურგია“.

ფატმანი იდგა ხატის წინ, ხშირ-ხშირ პირჯვარს იწერდა, ჯერ რალაც. გრძელ ლოცვებს ზეპირად „აღავლენდა“, შემდეგ კი სასულიერო წიგნებიდან „ეამნი“-დან თუ „კურთხევანი“-დან კითხულობდა გაუთავებელ, გაკიმულ „მონოლოგებს“. თან

მეტანიასაც აქა-იქ ერთგულად ატანდა. ასე რომ ეს ფატმანის ლოცვა ზოგჯერ ისე გრძელდებოდა, რომ ბიძია გიორგი იქ-ლებული იყო სასადილო ოთახიდან დაეძახნა: „ფატმან, ბეჩა! ნუ მომკალი შიმშილით“. წესად იყო შემოღებული, რომ უფატმანოდ „პურად ღება“ არ შეიძლებოდა.

ზოგჯერ ლოცვის დროს, პატარაობისას, მე შევიპარებოდი ფატმანის „სამლოცველოში“ და თვალყურს ვადევნებდი მის საქციელს. ის კი დამინახავდა თუ არა, მაშინვე ასე მიმართავდა ღვთისმშობელს: „ღედაო ღვთისავ, შეიწყალენ პატარა მონა შენი შალვა, შალვა დადიანი, საცოდავ ლიდიას (ეს დედაჩემის სახელია) ერთადერთი ვაჟი. მიეცი ჯანმრთელობა და გაზარდე სასახელო კაცი“... და კიდევ რაღაც ამგვარი.

ასეთი ჩვეულებისა და საქციელისა იყო ბიცოლა ფატმანი და აქა-იქ საქართველოს ყველა კუთხეში კიდევ იყვნენ ასეთი გადამქიკებული მლოცველები და ღვთისმოსავეები, მხოლოდ ეფროსინე არ იყო ამისთანა.

არც იმისთანა იყო, როგორც სულ სხვაგვარი ხასიათისა და საქციელის კნეინები იყვნენ: კოპწიები, პრანკიები, სულ უმარილით თუ სხვა ემულსიებით რომ ცდილობდნენ გალამაზებას, უკანასკნელი მოდის კაბებით და „შლიაპებით“ რომ ირთვებოდნენ და თან.. მამაკაცებთან არშიყობას არ ერიდებოდნენ... უფრო ხშირად ესრეთ წოდებულ „ფლირტზე“ რომ იყვნენ გადაგებულნი.

არა, არც ესეთი იყო ეფროსინე!

სახემწყაზარი ქალი იყო და არც არავითარ საღებავს არა ხმარობდა. მშვენიერი ტანადიც. იცვამდა ქართულ კაბას თავის გულისპირით და წელზე ჩამოშვებული ფართო, მოქარგული სარტყელებით. თავზეც თავსაკრავს ხმარობდა თავის ჩიხტიკოპიანა და თავიდან წელამდე საუკეთესო ხარისხის ლეჩაქი ჰქონდა გადმოფარებული.

სიტყვა-პასუხი ზრდილი ჰქონდა და ხმის ტემბრიც არც გამყივანი, ზოგჯერ კაპასობის იქით რომ იმალება, და არც მოღუღუნე, გაუბედაობისა და დარცხვენის მაუწყებელი რომ არის.

საამური იყო მისი დინჯი საუბარი, ის უფრო ქართულად

ლაპარაკობდა და არც კი ვიცო, რუსული იცოდა თუ არა. მე ისიც კი არ ვიცო, სადმე სასწავლებელში ნასწავლი იყო თუ არა. მაგრამ დაკვირვებული კაცი შეატყობდა, რომ საკმაოდ განათლებული, გონებაგახსნილი ქალი იყო. ეს ეტყობოდა მის პაწია ბიბლიოთეკას, სადაც ჩვენი ქართველი მწერლების მაშინდელი დროის პატარ-პატარა წიგნაკები იყო დალაგებული: გრიგოლ და ვახტანგ ორბელიანები, მგონი ცნობილი მწიგნობარის ზაქარია ჭიჭინაძის მიერ გამოცემული; აკაკი, უფრო სოსიკო მერკვილაძის საფასურით დაბეჭდილი მომცრო ბროშურები. ილიას პროზა: „გლახის ნაამბობი“, „კაცია-აღამიანი?!“ სხვა რამ იმეამად ცალკე წიგნად ილიასი არა იყო-რა; გიორგი წერეთლის „პირველი ნაბიჯი“ და ალ. ყაზბეგის რამდენიმე მოთხრობა.

ოო, მე თვითონ შევსწრებივარ, ეფროსინე თავის ფართო და გრძელ აივანზე რომელიმე კუთხეში მიმჯდარი, სახეზე სხივგადაფენილი რომ კითხულობდა ყაზბეგს. ვინ იცის შემამდენეჯერ!

მგონი რომ ეფროსინე ბუნებით რომანტიკოსი იყო.

ამას გარდა გამიგონია, რომ ეფროსინემ მშვენიერი მოსაკითხი ბარათების წერა იცოდა თურმე. დეიდაჩემის თეოლინასაგან გამიგონია. ესეც თავისებურად განვითარებული ქალი იყო და მხატვრული ლიტერატურა ძალზე უყვარდა. ამან რუსულიც კარგად იცოდა და აი ამას უამბნია ჩემთვის, ეფროსინე რომ მოსაკითხ ბარათს დასწერს, ეს მარტო მოსაკითხი კი არ არის, პატარ-პატარა ამბებია შიგ მოთხრობილი, ნამდვილი ნოველებიაო.

საუბარში კი არ ეტანებოდა ამბების მოყოლას და ქორიკანობა ხომ მისთვის ისე მიუღებელი იყო, რომ აკი მეზობლები, კნეინები თუ სხვა დედაკაცები, მასთან ქორიკნობას ვერ ბედავდნენ.

როგორ შეძლო მან ამის მიღწევა, ჩემთვის გამოუცნობია. აგრეთვე ჩემთვის გაურკვეველია თუ საიდან ჰქონდა ოჯახში დამყარებული საოცარი დისციპლინა და წესიერება მოსამსახურეებში, თვით სტუმრებშიაც კი. ყველამ იცოდა, რომ ის არასოდეს არ უნახავთ მყვირალი და „გაკაპასებული“: მიუხე-

დავად ამისა, ყოველივე თავის რიგზე იყო მის ოჯახში. ყვე-
ლაფერი თავის განსაზღვრულ საათებში: დილის ტუალეტი,
ჩაი და საუზმე, სადილი, საღამოს ჩაი და ზოგჯერ, თუ სტუმ-
რებიც იყვნენ, ვახშამიც. თან ყოველივე თავის დროზე მოკ-
ვირვებული — სურსათ-სანოვაგე, შესაყერავი ქსოვილები თუ
სხვა რამ. მის სახლში მყოფთ ყველას რაიმე საქმე ჰქონდა
მიჩენილი და ისინიც უყვირლად, შეუშფოთებლად ასრულებ-
დნენ თავიანთ მოვალეობას.

არც ბევრი მოსამსახურე ჰყავდა: მოურავი, ან უფრო საქ-
ნო ნაწილის გამგე, მზარეული და ერთი-ორი გოგო, მრეცხა-
ვი და ხელზე მოსამსახურე, მაშინ, როდესაც სხვა თავადებას
ოჯახებში ბუზებივით ირეოდნენ შინაური და გარეული „დამხ-
მარეები“ და ხშირად იყო ერთი აურზაური ერთმანეთში, შური,
ქორი და ხშირად დიდი უსიამოვნება, რაც ხშირად მთელი
მეზობლების „საკბილო“ ხდებოდა, მათი დაცინვისა თუ გან-
სჯის საგნად. ბატონყმობა დიდი ხნის გადავარდნილი იყო, მაგ-
რამ სოფლის ჩამორჩენილი ელემენტები — ზარმაცები, მუქ-
თახორები — მაინც ეტანებოდნენ მებატონის ოჯახებს, სადაც
ასე იყო თუ ისე, ცოტა რამ გამოსარჩენს მაინც მოელოდნენ.

ეფროსინესას, როგორც ვთქვით, ასე არ იყო.

და დიდის სიამოვნებით ეტანებოდა მის ოჯახს უფრო
ინტელიგენცია, ადგილობრივი თუ სტუმრად ჩამოსული, მეტ-
წილად ხონის პედაგოგები. იმ დროს ხონში არსებობდა ესრეთ
წოდებული საოსტატო სემინარია და იქაური მასწავლებლები
საღამოობით ხშირად მოდიოდნენ ეფროსინე და სამსონისას.
ამათში იყვნენ რუსებიც, და მათ შორის, ერთი თურმე მეტად
საყურადღებო კაცი, დიდად განათლებული და ნათელი პიროვ-
ნება. ვინც იცნობდა, ყველა ემადლიერებოდა. ის იყო ხსენე-
ბულ საოსტატო სემინარიის უფროსი, ხელმძღვანელი, და ისე
ჰქონდა საქმე დაყენებული, რომ მასწავლებლებიც კარგა მომ-
ზადებულნი და შერჩეული ჰყავდა და მოწაფეებსაც ღირსეუ-
ლად ამზადებდნენ. ამ სასწავლებელმა შემდეგში ბევრი მისცა
საზოგადოებას ერთგული მუშაკი საზოგადოებრივ ასპარეზზე.
ზოგი შესანიშნავი პედაგოგი გამოვიდა, ზოგი მეტად საყუ-
რადღებო ლიტერატორი და სხვა.

მე კი სემინარიის ამ ხელმძღვანელის ნახვამ (სამწუხაროდ, გვარი აღარ მახსოვს) პირველ ხანად ძალიან გამაყვირვა. შედარებით ახალგაზრდა კაცი იყო, სახიერი, კარგად ჩაცმული, ზრდილობიანი, მაგრამ ავადმყოფი. ესეთ ახალგაზრდას თავი უძიგძიგებდა... განუწყვეტლივ... და სანამ არ მიეჩვეოდით, მანამ ძნელი იყო ყურება. მიეჩვეოდით მხოლოდ მაშინ, როდესაც დაილაპარაკებდა. მისი აზრიანი და შინაარსიანი ლაპარაკი გავიწყებდათ მის თავის ძიგძიგს.

და აი ამ კაცმა ერთი ხონელი ულამაზესი, ახალგაზრდა ქალი შეირთო ცოლად. ყველა გააკვირვა ამ ამბავმა და ბოროტი ენები ამბობდნენ, ქალმა კარიერისთვის, ე. ი. საზოგადოებრივი მდგომარეობისათვის გაჰყიდა თავი და მალე ნახავთ, იმ თავმოძიგძიგეს ოჯახს ლომებივით „კავალრები“ როგორ შეესევინაო, მაგრამ... ამ მშვენიერი ახალგაზრდა ქალის სასახელოდ უნდა ითქვას, რომ ის ქმრის ნამდვილი და ერთგული მეუღლე გამოდგა.

ცულლუტ ახალგაზრდა ეაყებს მხოლოდ ის ჰქონდათ დარჩენილი, რომ დაიცინებოდნენ: „როგორ კოცნის ეს ლამაზი გოგონა ამ თავძიგძიგას? რას უშერება, თავს გაუჩერებს თუ როგორ?“ ზოგი ამტკიცებდა — ვერ გაუჩერებს, ტუჩებს აცდენსო, და იყო ამაზე ერთი სიცილ-ხარხარი.

ამათ გარდა, როგორცა ვთქვი, ადგილობრივი სხვა ინტელაგენტებიც იყრიდნენ თავს სამსონისა და ეფროსინეს ოჯახში. ეს უფრო საღამოობით და იყო საუბარი მიმდინარე პოლიტიკისა თუ საზოგადოებრივ საკითხების გარშემო.

ეფროსინე თვითონ ესეთ საუბარში აქტიურ მონაწილეობას არ ლებულობდა, მაგრამ, თითქო შეკრებილთა იღუმალი შეთანხმებით, იქ მყოფთა თავმჯდომარედ ითვლებოდა და ამის გამო საუბარი ცხარე კამათში თითქმის არასოდეს არ გადადიოდა.

ქმარი ეფროსინესი იყო ერთი უწყინარი, ბუნჩულა კაცი, ოჯახში მისი ყოფნა თითქმის არ იგრძნობოდა. არც ყვირილი, არც გაჯავრება ვისმეზე, არც კი ერეოდა ოჯახის მართვა-გამგეობაში. ის მსახურობდა ქუთაისის საადგილმამულო ბანკში დამფასებლად და ჯამაგირი, რასაკვირველია, სახლში მოჰქონდა.

თან ყოველდღე მიდიმოდიოდა ქუთაისსა და ხონს შუა. ამ ორ ადგილს შუა მხოლოდ 25 კილომეტრია და სამსონი ასწრებდა დილით სამსახურში მისვლას ქუთაისში და სადილობისას შინ დაბრუნებას.

ასე რომ ოჯახის საქმე ეფროსინეს ეკითხებოდა და ჩვენ უკვე ვიცით ისიც, თუ როგორ უყვარდათ ის და რა სათნოებით უძღვოდა ამ საპასუხისმგებლო საქმეს ეფროსინე. სამსონს კი, სტუმრებთან საუბრისას ცოტა ხნის შემდეგ, უყვარდა ქალადის თამაში და მსურველთ ეთამაშებოდა ნაკლებ აზარტულ სათამაშოს: პრეფერანსს, რამსს და სხვ., ამას მოჰყვებოდა ვახშმობა უფრო შეზავებული ხუმრობით და მახვილსიტყვაობით და ნაკლები ღვინის სმით.

ზოგჯერ ქუთაისიდანაც ეწვეოდნენ სამსონის ოჯახს მოწინავე ადამიანები, მათ შორის კირილე ლორთქიფანიძე, ძმა ეფროსინესი, დავით წულუკიძე, ვეროპაში განსწავლული ინტელიგენტი, ზოგჯერ ნიკო ნიკოლაძეც სოფ. ჭიხაიშიდან, სადაც მაშინ მას სოფლებისათვის გაჰყავდა მდინარე ცხენისწყლიდან სარწყავი არხი და საწულუკიძეოც მის რჩევა-დარიგებას მიჰყვებოდა; ზოგჯერ თვითონ აკაკი ეწვეოდა... და მაშინ ხომ „გაბედნიერებული“ იყო ეფროსინე, მთელი მისი ოჯახი და მეზობელი წულუკიძეებიც.

აკაკის, რაღა თქმა უნდა, შეჰქონდა დიდი სხივი ყოველგვარ დიდსა თუ პატარა შეკრებილებასში, თავისი მაღალი აზროვნებისა, მახვილგონიერებისა თუ მახვილსიტყვაობისა, ზოგჯერ კი კვიმატიანი მოსწრებულ სიტყვებისაც. ამიტომ უყვარდათ ყველგან, ამიტომ ვერ ელეოდნენ, ამიტომ ესიენ გარშემო.

გარდა ყველა ამეებისა, ეფროსინეს ძალიან უყვარდა საერთოდ ამბების მოსმენა, თუ კი ვინმე კარგი მომთხრობელი იყო ამბებისა, და აკაკის აბა ვინ დაეტოლებოდა...

ის კი არა, როცა მე უკვე დავვაჟეკაცდი, შეხვედრისას, ყოველთვის რასმე მაამბობინებდა ეფროსინე. მაგრამ აქ საყურადღებო ის არის, თუ როგორი უშუალო მსმენელი იყო ეს დარბაისელი ქალი. ამბის ყოველ ნიუანსს მასზე დიდი გავლენა ჰქონდა და პატარა სამწუხარო დიდად დაამწუხრებდა, სამ-

ხიარულო ხომ ზოგჯერ თითქმის თავშეუკავებელ სიცილ-ხარხარს იწვევდა.

ერთხელ ვუამბე რომელიღაც რუსულ ლიტერატურულ ჟურნალში ამოკითხული ანეგდოტური ამბავი. მოთხრობას რუსულად „Господин скромник“ ეწოდებოდა და შიგ გამოყვანილი იყო ერთი მეტისმეტად მორიდებული ყმაწვილი კაცი. მის უფროსს და მის თანატოლ ამხანაგებს ყველას უყვარდა ეს ყმაწვილი, რადგან ის იყო უმწიკვლო ზნეობის ადამიანი, დაკისრებულ მოვალეობათა ზუსტი შემსრულებელი და სხვათა მორიდებული ხასიათის გამო ხშირად უხერხულ მდგომარეობაშიც ვარდებოდა, მაგრამ მისდამი სიყვარულსა და პატივისცემას ეს არას აკლებდა. სამსახურში მის უფროსსაც ძალიან მოსწონდა და ხშირად ეპატიჟებოდა თავისთან, მაგრამ ეს მაინც ვერ ბედავდა მისვლას, მხოლოდ ერთხელ კი, როგორც იყო, გაბედა და ეწვია. ზაფხული იყო, ახალი ნასადილევი და უფროსიც თავის აივანზე გრილოში იყო წამოწოლილი. ყმაწვილი რომ ეწვია, დიდად გაიხარა და საუბარი გაუბა. „სკრომნიკიც“ აძლევს ლაკონიურ პასუხს, „ჰო, არა“, თან ოფლი წკურწკურით ჩამოდის სახეზე და ხშირ-ხშირად ცხვირსანოცით იმშრალებს. უფროსმა შეამჩნია, რომ ყმაწვილ კაცს ძალზე ცხელოდა, შორიანლო ჰიქით წყალი იდგა და მიუთითა: გასაგრილებლად დალიეო. „სკრომნიკმა“ ბევრი იუარა, ბოლოშიც მოიხანდა შეწუხებისათვის, მაგრამ უფროსი ისე ჩააცვივდა, რომ ძალისძალით დააღევინა. სმის დროს „სკრომნიკს“ კინაღამ გული აერიო, მაგრამ მეტი ჩარა არ იყო. მოითმინა და ისევ თავის სკამზე დაჯდა. ამ დროს ოთახიდან გამოვიდა ოჯახის დიანახლისი და მაგიდას მიაშურა. დაკლილი ჰიქა რომ დაინახა, თითქმის შეჰკივლა: „ვინ დაცალა ეს ჰიქაო?“ საქმის ვითარება რომ გაიგო, ერთი საოცრად გადაიკისკისა: „ეს რა გიქნიათ, ჰიქაში ხომ სასაქმებელი ზეთი იყოო“. უფროსი ძალიან შეწუხდა: „ჩემი ბრალია, მე დავაძალე, მეგონა, თუ გაციებული ლიმონადი იდგა ჰიქაშიო“ და... შეწუხდა, თუძკა „სკრომნიკს“ დიდხანს აღარ დაუცდია და შინისაკენ მოკურცხლა.

მეორეჯერ კიდევ ეს „სკრომნიკი“ ეწვია თავის ტოლს, ახალ-

გაზრდა თანამოსამსახურეს საღამო ხანს. მასპინძელ კოლქმარს გაეხარდათ მისი მისვლა და არ იცოდნენ, რითი ეცათ პატივი. ჩაი დააღვივნეს, ტკბილი ნამცხვრები და მურაბებიც მიართვეს. მსუბუქმა საუბარმა და ხუმრობამ კარგა ხანს გასტანა. მაგრამ მოთავდა ყველაფერი. სასაუბროც შემოელიათ. დაღამდა კიდეც, აგერ უკვე 9 საათია. „სკრომნიკი“ კი ზის თავის სკამზე გაუნძრევლად. შესრულდა ათიც. მასპინძლები შეშფოთდნენ: სტუმარს ხომ ვერ გააგდებენ, არა-და სტუმარი არ ინძრევა. ამაზე მასპინძელთაგან ქმარი ხმამალა ამბობს:

— უპ. უკვე ათი საათია. მეთერთმეტე იწყება, გესმით? ტრამეაის ხმა ნაკლებ ისმის...

ცხადია, ეს ნიშანია იმისი, რომ სტუმარს დაგავიწყდა შინ წასვლა, დრო არის უკვეო. ეს კარგად ესმის სტუმარს, მაგრამ არ ინძრევა.

კოტა ხნის შემდეგ მასპინძლის კოლი ეკითხება „სკრომნიკს“:

— როდესაც თქვენ სახლში გაგვიანდებათ, როგორ შედიხართ თქვენ ბინაში? მეზობლებს აღვიძებთ თუ თვითონა გაქვთ ცალკე გასაღები?

სტუმარი ამაზე დიდის მორიდებით და ზრდილობით უპასუხებს: „ცალკე მაქვს გასაღებიო“ და თან სკამიდან წამოიწევა.

მასპინძლებს ჰგონიათ, ახლა კი გვეშველა და წავაო, მაგრამ თქვენც არ მომიკვდეთ! — სტუმარი ისევ ჯდება და თითქო უფრო საფუძვლიანად.

გადის კიდეც კოტა ხანი და უკვე შეშფოთებული დიასახლისი წამოდგება და ამბობს:

— უკვე ძალზე გვიანია. ახლა საღა წახვალთ. მართალია, ჩვენ ძალიან ვიწროდ ვცხოვრობთ, მაგრამ აგერ ტანტზე დაგიგებთ და მოისვენეთ...

ამის საპასუხოდ „სკრომნიკიც“ მარდად წამოდგება თავის სკამიდან და დიასახლისს მოახსენებს:

— მე დიდი ხანია მინდოდა წასვლა, მაგრამ თქვენ ჩემ ქულზე იჯექით და ვერ შეგაწუხებთ!..

ამაზე ეფროსინეს აუტყდა სიცილი, მაგრამ როგორი სიცილი? უშუალო, ბავშვური და მოურევნელი.

ამ სიცილში მე დავინახე ეფროსინეს სრული უზადო და სპეტაკი პიროვნება.

ამ ჩემი „სკრომნიკის“ ამბავს ეფროსინესთან ერთად ისმენდნენ მისი ქმარი სამსონი და ერთი მისი ბიძაშვილთაგანი, ოხუნჯი იასონ წულუკიძე.

მე ამბავი დავასრულე, ეფროსინე კიდევ იცინოდა. ამ დროს იასონი დემონსტრატიულად წამოდგა თავისი სკამიდან და ვითომ სერიოზულად ხმამაღლა წარმოთქვა:

— კაცო. ვილატის ქულზე ვზივარ. მგონია შალვას ქუდია... არ დაგაგვიანდეს. ბიძია, წადი სახლში...

მაგრამ ვერ გამაბრძოლა.

— არა, ბიძია, არსადაც არ მივიღივარ და ჩემი ქუდი კი აი აგერ ჰკიდა.

უჩვენე სადაც ეკიდა და... ატყდა ხელახალი სიცილ-ხარხარი და იმ ღამეს ვახშმადაც კი დამტოვეს.

ასე რომ სოფ. საწულუკიძეოში და მის არემარეზე ეფროსინე წულუკიძე ერჩეოდა სხვა ქალბატონებში თავისი თითქო უბრალოებით, მაგრამ იმავ დროს შესანიშნავი სულიერი სიმადლით, და საღამოობით მის ოჯახში სტუმრების თავმოყრას რიგითი და ჩვეულებრივი ქეთის ხასიათი კი არა ჰქონდა, არამედ უფრო როგორიღაც მაღალი დონის იერი ეძლეოდა. აქ შეკრებილებში, როგორც ზემოთაც ვთქვი, უფრო ინტელიგენტები სქარბობდნენ და მათი საუბარი მეტწილად მიმდინარე საზოგადოებრივ საკითხებს ეხებოდა. ასე რომ, მე რომ მკითხვოთ, ეფროსინეს „საღამოები“ უფრო სალონურ ხასიათს ატარებდნენ და თვით ისიც შეიძლება მინიატიურულად, მაგრამ არსებითად მაინც საფრანგეთის განთქმულ ქალს მაღამ რეკამიეს მივამსგავსოთ.

მთავარი საზრუნავი კი მაინც ეფროსინესა და სამსონისათვის მათი ერთადერთი ქალიშვილი — ცუცუნია იყო. შინ ასწავლიდნენ და ამისთვის ჰყავდათ დაქირავებული დედამძღებები თუ ისე, პირდაპირ მასწავლებლები. როგორც დედისერთა, მეტად განებივრებულად იზრდებოდა. აქ ეფროსინეს

დასძლია დედობრივმა სანტიმენტალობამ და ქალიშვილი სა-
თანადოდ ვერ აღზარდა. ნებისყოფას მოკლებული, მერყევი
ხასიათის ქალი დადგა შემდეგში.

ერთხელ ამ გოგონას მასწავლებლად ჰყავდა მეტად მოხდენილი ქალი, თამარ მესხი. ადგილობრივი ახალგაზრდობა თავს დატრიალებდა და ისიც, უთუოდ, თავმომწონეობდა, მაგრამ თავის გულის კარი მაინც არავის გაუღო, რადგან მას ჰყავდა საქმრო, საუცხოო, განათლებული ყმაწვილი კაცი და მისი ერთგული იყო.

აქ გული არ მითმენს, რომ ჩემი „გატაცებაც“ არ მოვიხსენიო. მე უკვე სცენაზე გამოსული ჭაბუკი ვიყავი და, რასაკვირველია, მეც მოვიხიბლე „თამარით“ და ერთ დროს ვითომ ლექსად ასეთი ზმა ვუძღვენი:

ვითა მარადის ცაზე მზე
მე სხივითა ვარ მოსილი.

არ გაქრა, მხოლოდ ზრდილობიანი ღიმილი გამოიწვია.

ქ ე რ ა ქ ე რ

გასული საუკუნის ოთხმოცდაათიან წლებიდან, სოფლებში ხანგრძლივ ცხოვრებას თითქმის სულ ჩამოვშორდი. ხანდახან ზაფხულობით თუ მომიხდებოდა იქ ყოფნა. და აი 1892 წლიდან ქუთაისში დავიწყე ცხოვრება. ქალაქებში მანამდისაც მიცხოვრია. მაგალითად: თბილისში, ქუთაისში ისიც ზამთრობით, ბავშვობისას. 1881 წ. მამამ თბილისში ირჩია ცხოვრება და აქტიურად ჩაება საზოგადო მუშაობაში: გაზ. „დროებას“ რედაქციაში და „ვეფხისტყაოსნის“ პირველ სარედაქციო კომისიაში, რომელსაც ხელმძღვანელობდა მსცოვანი გრ. ორბელიანი და წევრებად იყვნენ: ილია და აკაკი, ივ. მაჩაბელი. პ. უმიკაშვილი, ს. მესხი, დ. ერისთავი, ი. მეუნარგია და სხ. ყველა ამათთან დაახლოვებამ გამოიწვია ჩვენს ოჯახში ამ ხალხის ხშირი სტუმრობა და მეც, ჯერ კიდევ ბავშვი, გავეცანი ამ სასახლო ხალხს, რასაკვირველია მე მაშინ არ გამეგებოდა თუ ვინ იყვნენ ისინი, მაგრამ მამაჩემის მათთან დარბაისლური საუბარი და ერთი მეორესთან განკრძალვითი დამოკიდებულება მეც თითქო მანიშნებდა, რომ განსხვავებულ ხალხთან გვეკონდა საქმე. ხშირად საუბარში ისინიც იცინოდნენ, კარგადაც ხარხარებდნენ, განსაკუთრებით აკაკის ან მეუნარგიას ლაპარაკის შემდეგ. მხოლოდ მე ერთს არ მეცინებოდა, რადგანაც (გახსოვთ?) „ტლუ ბიჭის“ ფილოსოფიური განწყობილება ჯერ კიდევ თან მახლდა. თუმცა ყველა ისინი რიგრიგობით მეფერებოდნენ, გამომესაუბრებოდნენ კიდევ, მაგრამ ყველაზე მეტი დაახლოვებული მაინც იონა მეუნარგიასთან ვიყავი. ილიას მოფერება მხოლოდ ერთხელ მახსოვს. საყელოში თითი ჩამიყო და თითქო მომილიტინა. მე ეს დიდათ არ მსიამოვნებია. მაგრამ ის მხიარულად იღიმებოდა და მეც თავი შე-

ვიკავე. ზოგჯერ ნატო გაბუნიაც ერია ამ კრებულში და როდესაც თხოვდნენ დაირაზე დაკვრას, ისიც ამღერდებოდა და დიდის ხელოვნებით ასრულებდა სხვადასხვა ქართულ ჰანგებს. მე მათი მუსიკალობის ძალიან ცოტა მესმოდა, მაგრამ სინარჩარე ნატოს მიერ შესრულებულ ჰანგებისა, მეც მხიბლავდა.

ამ სტუმრებში ხშირად ერია ერთი რუსი, ვინმე სიმბორსკი. ძალიან კარგი ჟურნალისტი და იუმორისტი იყო თურმე და ყველა ამ წრის ხალხს უყვარდათ. განსაკუთრებით მეგობრობდა იონა და სტუმრებში, თითქმის მუდამ, ერთი მეორის გვერდით ისხდნენ და ჩუმად ერთი მეორეს რაღაცას ეოხუნჯებოდნენ. იონა ჩვენსას ძალიან ხშირი სტუმარი იყო, მე ვუყვარდი და ძალიან მანებივრებდა. ისე არ მოვიდოდა რომ რაიმე სათამაშო არ მოეტანა ჩემთვის და ამ კრებებზედაც, როდესაც ვინმე ორატორობდა, ხშირად დამიძახებდა, მუხლებ შუა დამიყენებდა და რაღაცას მეხუმრებოდა. იქვე მჯდომი სიმბორსკი ამის გამო დამიახლოვდა და მეც ეს კაცი როგორღაც შემიყვარდა.

ოო რამდენი ვიტირე, როდესაც ჩვენთან ამბავი მოიტანეს — სიმბორსკიმ თავი მოიკლაო. არა მგონია, რომ ჩემზე დიდი ჭირისუფალი მას ყოლოდეს ვინმე. არც ეხლა ვიცი მიზეზი მისი თვითმკვლელობისა, მაგრამ მაშინ კი ბალსს, როგორც მახსოვს, დიდად გული დამწყვიტა.

ამ საღამოების გარდა მამაჩემთან ხშირად მოდიოდნენ ცალკეული პიროვნებანიც, რადგან თბილისელები პირველად გაეცნენ მამაჩემს ამ ხანებში. ეტყობათ მოეწონათ, მიტომ, რომ მამას ერუდიტის დიდი სახელი გაუვარდა, განსაკუთრებით ქართული ენის მეცნიერული მცოდნისა. ეს იმით იყო გამოწვეული, რომ მამას დიდი ბიბლიოთეკა დაჩენია მემკვიდრეობით ძველი მანუსკრიპტების თუ წიგნებისა და რა კი საოცარი მეხსიერების კაცი იყო, თითქმის ზეპირად ახსოვდა ზოგიერთი ძველი შესანიშნავი წიგნის შინაარსი და ცალკეული ადგილებიც. მაგალითად ზეპირად იცოდა ადგილები „ნებროთიანიდან“. სამწუხაროდ ეს „ნებროთიანი“, — სხვა მის მდიდარ ბიბლიოთეკასთან ერთად, ცეცხლს ემსხვერპლა, როდესაც მამაპაპეული სახლი დაეწვა. მამას, როგორც ვთქვი, სა-

ხელი გაუვარდა ძველი ქართულის დიდი მცოდნისა და მის სიცოცხლეში არ გამოხულა ძველი ლიტერატურიდან ქართული წიგნი ისე, რომ მისთვის რჩევა არ ეკითხათ. საერთოდ კი ენის შესახებ ხშირად უხდებოდა ბაასი ჩვენს მოწინავე მწერლებთან და ის არ იყო მომხრე არქაისტული სიტყვების აღდგენისა, მაგრამ ზოგიერთი, თითქო მოძველებული სიტყვის ხმარებას, მაინც იცავდა, რადგანაც ეს სიტყვები ნამდვილი ქართული წარმოშობისაა და აღებულ საგანს სწორ-უტყუვარად გამოსახავსო.

აქვე უნდა მოვიხსენიო, რომ თბილისის ზოგიერთ ოჯახებს მე და ჩემი დაც პატარაობისას გავეცანიით. ამ ოჯახებში უფრო ხშირად დავყავდით ჩვენს მფარველს და მოსიყვარულეს იონა მეუნარგიას, მისი წყალობით ჩვენ ვესტუმრეთ სამეგრელოს უკანასკნელ მთავრის დას ნინოს, მუხრან-ბატონის მეუღლეს, და აგრეთვე ჩვენს სასიქადულო პოეტს გრ. ორბელიანს. მახსოვს მისი ქარმაგი მოყვანილობა გენერლის საშინაო ფორმაში; მხიარულად მიგვიღო ბავშვები. რაღაცეები გაგვეხუმრა კიდევ, მხოლოდ როდესაც მე მის პატარა „ეტაყერკას“ ჩაკეებით დაუწყე ცქერა, გაიღიმა და მითხრა: „ოჰ ყმაწვილო! ეგ ნაწერები ჩემსავეთ ბებერი და დამტყერიანებული არისო“.

ამ წელიწადს თბილისში პირველად ვიყავი და ქუთაისის გარდა ასეთი დიდი ქალაქი, რასაკვირველია, მანამდე არ შენახა. ღამე იყო, როდესაც ჩვენი მატარებელი თბილისში ჩაწოდდა. ჩვენ უნდა წავსულიყავით მაშინდელ სასტუმრო „კავკაზ“-ში. სასტუმროს გამგემ მამას ლანდო გამოუგზავნა მე ამის დანახვაზე დიდათ გაეხიზარე, რადგანაც მკითხველს ახსოვს, რომ ლანდოს იმერეთში, სოფელ სავანეში კოტე ერისთავის ოჯახში გავეცანი.

მკითხველს უთუოდ გაუკვირდება, ვინ არის ეს შალვა დადიანი, რომ თავის პატარაობისას სულ ლანდოთი „დაგულაობდაო“. უთუოდ თავის ალაგას მკითხველს გავაგებინებთ თუ ვინ ვარ მე და რა წრიდან წარმოშობილი.

თბილისში ჩამოსვლისას დიდათ გამაკვირვა ქალაქის სანახაობამ: მეტად გაბრწყვიალებული იყო. ჯერ ერთი: მაშინ თბილისს აიკის (გაზის) ლამპიონებით ანათებდნენ, თანაც იმ



მაშუ დადიანი-ანჯაბაძისა და შალვა დადიანი.

დღეს თურმე ხელმწიფის კარის რაღაც დღესასწაული იყო და ანტიკომ წითელ-ყვითელი ქალაქის ფანრებით არემარე იყო მოჭიკჭიკებული, ამისთანა მე არაფერი მენახა და ამიტომ ეს დიდხანს ჩამრჩა გულში.

მეორე: მკითხველს მოეხსენება, რომ 1881 წ. მოკლეს რუსეთის იმპერატორი ალექსანდრე მეორე. იმის გამო, სწორედ ჩვენი სასტუმროს პირდაპირ, მაშინდელ ერევნის მოედანზე, გამართული იყო პარადი. ქარებით ივსებოდა მოედანი და ეტლებით მოქრიალებდნენ ნაირ-ნაირი გენერლები. მე სასტუმროს ნომრის აივნებიდან გადავყურებდი მთელ მოედანს. გამოჩნდა თუ არა, მაშინვე შევიცანი ჩემთან უკვე „დამეგობრებული“ გრ. ორბელიანი. ამანაც ძალიან გამახარა, მხოლოდ გამაკვირვა, რომ სპილენძისებური ქვაბი თავზე ეხურა და ზედ რაღაც დიდი ფოჩები ჰქონდა გადმოფენილი.

ამას გარდა კიდევ მახსოვს ქ. თბილისში დიდი მეგობრობა მაპიჩემის და სერგეი მესხისა. ეტყობა ძალიან უყვარდათ ერთი მეორე, რადგან ხშირად შემოდისოდა სერგეი და მხიარულ ბაასში იყვნენ გართული.

მახსოვს: სოფ. ბერთემს მამა შეუძლოთ იყო და იწვა. ფოსტიდან მოგვივიდა გაზეთები. ლაზარე რატიანმა მამას წაუკითხა ცნობა, რომ აბასთუმანში გარდაცვლილა სერგეი მესხი. ავადმყოფი მამა წამოჯდა ლოგინზე. და დიდხანს იჯდა ხმა ამოუღებლივ. ცრემლი არ შემინიშნავს. იმავე დღესვე მამამ დასწერა ლექსი მიძღვნილი სერგეი მესხის ხსოვნისადმი და გაგზავნა კიდევ რედაქციაში, მაგრამ. რამდენაც მახსოვს, ლექსი არ დაუბეჭდავთ, ვითომ იმის გამო, რომ სერგეი მესხის სიკვდალს ძალიან ბევრი გამოეხმაურა, მამას ლექსიც ცოტა გვიან იყო მისული და ამდენი „გახმაურება“ საჭიროდ არა სცნეს. ეს ჩვენ შემდეგში გავიგეთ. მამა კი დიდათ შეწუხებული იყო.

პირველი გაცნობის შემდეგ, მე ხშირად ჩამოვდიოდი ამ ქალაქში, ბოლო ხანებში კი გამუდმებით ჩვენს დედაქალაქში ვცხოვრობ. მაგრამ თბილისზე მე ამ ნაწერშიაც უთუოდ ბევრჯერ მექნება ლაპარაკი.

სოფლის დატოვების შემდეგ. როცა 16—17 წლის ვიყავი

(ეს იყო 1892 წ.) გადავსახლდი ქუთაისს, მაშინ მამა ცოცხალი იყო და პირველ ხანებში მე და მამა სასტუმროში ვცხოვრობდით. შემდეგ მამამ დაიქირავა თეთრ ხილთან ახლოს მშვენიერი ორსართულიანი სახლი, საუცხოვო ბაღით და ეზოთი — დები ნიკოლაძეებისა. და მეც მთელი სიკაბუჯე ამ ბინაში გავატარე. ამ სახლში ერთხელ მოეწყო საქველმოქმედო საღამო, რომელსაც დიდი საზოგადოება დაესწრო. აქ, ამ საღამოზე მომივიდა ერთი „კონფუზი“. რაღაც ბარათებს ყიდდენ ქალიშვილები. ერთ-ერთი მათგანი მომადგა მეც და მითხრა — ერთ-ერთი ბარათი შეიძინეთ თქვენცო. მამა შვილების აღზრდის საქმეშიაც თავისებურ პედაგოგიურ აზრს ადგა და ასეთ მოწიფულ ვაჟკაცსაც, როგორც მაშინ მე ვიყავი, ჯიბის ფულს სახარჯად არასოდეს არ მაძლევდა, — ყმაწვილს ფულის საყვარული არ გაუჯდესო. მე კი ქალიშვილის მომართვაზე გავწითლდი, გავყვილდი. რა მიმეცა, როდესაც ჯიბეზე არაფერი მქონდა, მაგრამ ისევ ქალიშვილმა გამომიყვანა უხერხულ ჰდგომარეობიდან: „თქვენ უთუოდ წვრილი ფული არ გაქვთო“ და თვითონ გასრიალდა. მე კი შევრცხვი „ყაზახი“!

ამგვარად თავისუფლად ითქმის, რომ ჩემი სიკაბუჯე ქუთაისში გავატარე. ნიკოლაძის სახლი, სადაც ჩვენ დავსახლდით, მოცულობით დიდი იყო: მამას ჰქონდა საკუთარი კაბინეტი — სამეცადინო ოთახი თავის დიდი ბიბლიოთეკით და აქვე ღებულობდა თავის სტუმრებს, საზოგადო მოღვაწეებს და ავადმყოფებს. უნდა ვიცოდეთ, რომ მამა მრავალმხრივ განათლებული კაცი იყო და, სხვათა შორის, შესწავლილი ჰქონდა სამედიცინო მეცნიერებაც. ამიტომ მას დიდი სახელი ჰქონდა განთქმული მოსახლეობაში და დიდძალი ხალხი ესეოდა, როგორც სოფლად მყოფობის დროს ისე ქუთაისშიდაც. მათ მამა, რასაკვირველია, სრულიად უფასოდ ღებულობდა და უწერდა რეცეპტებს აფთიაქიდან წამლები მისაღებად. მამას ჰქონდა მრავალი სამედიცინო წიგნი, და სხვათა შორის, რამდენიმე კრებული რეცეპტებისა, აქიდან მამა ამოიწერდა ყოველ ცალკეულ ავადმყოფისთვის საჭირო წამლებს და რეცეპტს ზედ წააწერდა ლათინურად „Copia“. ეს იმისთვის, რომ მამას ოფიციალური ნებართვა არა ჰქონდა ექიმებისა, თუმცა ჩვენი აფთია-

ქები თანდათან მიეჩვიენ მამას მიერ დაწერილ რეცეპტებს, შეეკოხხენ კიდევ გუბერნიის ექიმთა მთავარ სამმართველოს, მან განკარგულება გასცა. დადიანის რეცეპტები არ დაებრკო-ლებინათ, რადგან დარწმუნდნენ, რომ დადიანის დიაგნოზი შეუმცდარი იყო. ცნობილი ექიმი სამსონ თოფურია აღტაცე-ბული იყო მამიჩემის ასეთი სპეციალური ცოდნით და ხშირად თვითონ უგზავნიდა საექვო და მძიმე ავადმყოფებს გასასინჯად. რომ წამოვიჩიტეთ მამა ხშირად მე და ჩემს დას გვესაუბრებო-და მეცნიერების სხვადასხვა დარგებზე, ანატომიაზედაც დაგ-ვიწყო ცნობების მოწოდება, — მაგრამ მე და ჩემმა დამ ანა-ტომიას გული ვერ დაუდევით. ჩემი და მუსიკით იყო გატაცე-ბული, მე კი ჩემთვის ვლიტერატურობდი და განვაგრძობდი ჩემი ხელნაწერი ეურნალის გამოცემას.

ამ დიდ სახლში იყო სხვა ოთახებიც. ერთი დიდი დარბაზი საერთო სტუმრების მისაღები, მეორე კარგა მოზრდილი დარ-ბაზი სასადილოთ განკუთვნილი და სხვა ოთახებიც ჩვენი ოჯა-ხის წევრთათვის. ერთი მათგანი მამამ მეც მომიჩინა, სადაც მე ვატარებდი ჩემს ლიტერატურულ მუშაობას, მაგრამ მე ასე-თი ჩაკეტილი მუშაობით არ დავკმაყოფილდი, გავეცანი ქუთა-თურ გიმნაზიელებს, ვისაც მწერლობა და ლიტერატურა აინ-ტერესებდა დაკიახლოვე და თითქმის კვირაში ერთი დღე და-ვადგინე შესაკრებად. ამაში იყვნენ უფროსი კლასების მოწა-ფეები: პართენ გოთუა, სიმონ ჯაფარიძე, გიორგი ავალიანი, სილოვან გაბუნია და საშა წულუკიძე და კიდევ სხვები, რომ-ლებსაც ამჟამად ვერ ვიხსენებ. გარდა ნიკო ლორთქიფანიძისა, რომელიც, როგორც ხნით უმცროსი, შემოგვიერთდა შედარე-ბით უფრო მოგვიანებით.

გიმნაზიელებს ჰქონდათ თავიანთი ხელნაწერი ორგანო. არ მახსოვს რა ერქვა და წამოიჭრა აზრი, რომ ჩემი „მოზარდი“ და მათი ორგანო გავგვეერთებინა. ამ საკითხს რამდენიკე სხდომა მოვანდომეთ, მაგრამ ორგანოს სახელო ვერ გამოუძებ-ნეთ, დასახელებული იყო სიტყვა „უყი“, ამ სიტყვას უფრო დასავლეთ საქართველოში ხმარობენ და ნიშნავს ხელუხლებელ და დასამუშავებელ მიწას, ანუ ყამირს. ამ სიტყვას კი ჩვენ ისე არ მივეტანეთ და საერთოდ ამ ორგანოს გამოცემა არ განხორ-

ცელდა. რადგან ზაფხულმა მოაღწია და გიმნაზიელები დაიქსაქსნენ. მე კიდევ სცენამ გამიტაცა და უფრო აქტიურ მუშაობას იქ შეუდექი.

ზემოხსენებულ ამხანაგებში: პართენ გოთუა შემდეგში ცნობილი ჟურნალისტი და რედაქტორი რუსული გაზეთებისა. ჩემ დროს კი ის წერდა პიესებს. ერთერთი პიესა — „კენკის ყრა“ მგონი ცალკე წიგნათ გამოსცა კიდევ. თავის მემკვიდრეთ კი დაგვიტოვა საუტხოო ახალგაზრდა, ნიჭიერი დრამატურგი და რომანისტი ლევან გოთუა.

სიმონიკა ჯაფარიძე იყო ცნობილი ექიმი და საზოგადო მოღვაწე ქიათურაში.

გიორგი ავალიანი. იყო სცენისმოყვარე და კარგი სასცენო მომავალიც. ჰქონდა, მაგრამ ეს არ ინება და გახდა თვალსაჩინო ფარმაცევტი.

სილოვან გაბუნია — სტუდენტობის დროს მოსკოვში გამა-ამხანაგდა სტუდენტების წრეში მიაღებინა ჩემი თავი. თერთნ იყო ამ წრის დიდი ავან ჩავანი. შემდეგში, როდესაც მთავრობამ ეს წრე დაშალა, სილოვანიც დაატუსაღეს, მაგრამ მერვე მაინც აღიდგინა თავი და იურიდიული ფაკულტეტი დაასრულა და თბილისში ადვოკატობას შეუდგა. მხოლოდ დიდხანს არ დატლია და მალე გარდაიცვალა.

საშა წულუკიძე. — მე ის გავიცანი მაშინ, როდესაც ორივენი ბავშვები ვიყავით. ის იყო ვაჟი ხონში ცნობილი მებატონის თავად გიგო წულუკიძისა. მე კიდევ ზაფხულობით საწულუკიძეოში ბიძაჩემ გიორგი წულუკიძესთან ჩამიყვანდნენ ხოლმე. ამ ორ ოჯახს ერთი მეორეში მსვლელობა ჰქონდა. საშა და მე თითქმის ტოლები ვიყავით და ბავშვურ თამაშობაში ერთი მეორეს შევეჩვიენით, ასე რომ, ამის შემდეგ, ჩვენი მეგობრობა თანდათან უფრო მტკიცდებოდა. ის ძალიან მალე წავიდა მოსკოვს და დაბრუნდა უმაღლეს ცოდნით აღჭურვილი, რევოლუციონერი მარქსისტი. ამის შემდეგ მისი რევოლუციური მოღვაწეობა საერთოდ ცნობილია ჩვენს ლიტერატურაში და ამის აღწუსხვას მე აქ არ შევუდგები, მხოლოდ ვიტყვი, რომ ცოტა ვულდაწყვეტილი ვარ: მე მისი ცხოვრებიდან დაგწერე პიესა: „იდეა გაამარჯვებს“ (ეს მისი სიტყვებია. რომელიც სიკვდილის

დროს წარმოსთქვა) პიესა ეხება, რასაკვირველია, მის რევოლუციურ მოღვაწეობას, მწერალთა კავშირი და ჩვენი თეატრები იცნობენ ამ პიესას, თითქოს მოსწონთ კიდევ, მაგრამ ჭერ-ჭერობით ეს პიესა არც არსად დადგმულა და არც დაბეჭდილა...

ზემოსხენებულთა გარდა, შემდეგ, როგორც ზემოთაც მოვიხსენიე, ჩვენ წრეს შემოემატა, ჭერ გიმნაზისტობის დროს, შემდეგ ხარკოვის უნივერსიტეტში ნამყოფი და ავსტრიის ლიობენში უმაღლეს სწავლამიღებულნი ნიკო ლორთქიფანიძე, რომელმაც თავი ისახელა თავის საუცხოვო ბელეტრისტიკით და ჩადგა მოწინავე ქართველ მწერალთა რიგებში; მე მასთან ნათესაური კავშირიც მაახლოვებდა. ის იყო ჩემი დეიდაშვილი, და როდესაც ჩვენი ოჯახი ქუთაისში ცხოვრობდა მაშას მეთაურობით, მაშინ ნიკოს ოჯახთან კიდევ უფრო დაახლოვებული ვიყავით. საერთოდ ეს ოჯახი ითვლებოდა ერთ მოწინავე ოჯახათ, ნიკოს მამა მერაბ ლორთქიფანიძე მსახურობდა მომრიგებელ მუშაველად და მრავალრიცხოვან შვილებს მიაღებინა სათანადო სწავლა, ვაჟები ხომ სუყველა მშვენიერი საზოგადო მოღვაწენი გახდნენ, ალექსანდრე, იასონი და ბოლოს თვითონ ეს ნიკო. ნიკო ჩემზე უმცროსი იყო ხნით, მაგრამ თავიდანვე მე უფრო დაახლოვებული ვიყავი მასთან, ვიდრე სხვა ძმებთან. ამას უთუოდ უწყობდა ხელს ჩვენი პროფესია. უფროსი ძმები კი, თავის დროზე თვალსაჩინო მოღვაწეები იყვნენ საზოგადოებრივ ასპარეზზე; ამგვარად მე იმ ხანებში დავუახლოვდი ქუთაისის მოწინავე ახალგაზრდობას და განსაკუთრებით საშა წულუკიძის მეოხებით ვესწრებოდი სხვადასხვა რეფერატებს და დისკუსიებსაც კი, რომელიც ეწყობოდა მოწინავე ოჯახებში. რეფერატი უფრო განკუთვნილი იყო ლიტერატურულ თემებზე. იმ დროის მწერალთა — დავით კლდიაშვილის, შიო არაგვისპირელის და სხვათა ნაწერების გარჩევაზე; საერთოდ მაშინდელი ქუთათური ინტელიგენცია წარმოადგენდა მეტად საყურადღებო ჯგუფს, რომელიც თავდადებულად მუშაობდა ქართული კულტურის ამაღლებისათვის. ისინი ბევრნი იყვნენ, მაგრამ მე აქ ჩამოვთვლი ზოგიერთ მათგანს: გიორგი ზდანოვიჩი, ძველი რევოლუციონერი და ნაკატორღალი, შემდეგში

ჩვენს ლიტერატურაში ცნობილი მაიაშვილის ფსევდონიმით და აგრეთვე როგორც თვალსაჩინო საზოგადო მოღვაწე; დავით ჰიქელაძე, ლიტერატურაში „მეკვლეთ“ ცნობილი, ის ილია ჟავჭავაძემ მიიწვია თავის „ივერია“-ში და ერთ დროს ფაქტიური რედაქტორობაც კი დაუთმო ამ გაზეთისა; გრიშა აბაშიძე. მეტად ნიჭიერი პოეტი და ძალიან მახვილი სიტყვის კაცი. ამის დასასურათებლად უნდა მოვიყვანო ერთი ეპიზოდი: ქუთაისში იყო აგრეთვე ერთი მშვენიერი ახალგაზრდა ინტელიგენტი — სიმონ ქვარიაძე, ის საზღვარგარეთ იყო ნასწავლი და ქუთაისის საზოგადო მოღვაწეობაში აქტიურ მონაწილეობას ღებულობდა, მწერლობდა კიდევ, წერდა ლექსებს, მოთხრობებს; პუბლიცისტურ წერილებს და სხვა. ერთხელ ჩვეულებრივი დისკუსია ეწყობოდა ხსენებულ წრეში ქართული ლიტერატურული ენის სიწმინდის შესახებ და სხვათა შორის ერთმა წინადადებაც კი შემოიტანა — ქართული ანბანისათვის ჩამოეშორებინათ ძნელად ასაბგერებელი ანბანები — „ძ“, „წ“, „ყ“, ამან დიდი აურზაური გამოიწვია. გრიშა აბაშიძემ ხმა აიმაღლა და მიმართა სხვებზე უფრო შეხუმრებულ სიმონ ქვარიაძეს. „საყვარელო სიმონ, ქართულ ანბანს „ძ“ რომ გამოვაცლოთ, როგორ იქნება? ვთქვათ მინდა მოგწერო წერილი: „ძვირფასო სიმონ! როდესაც „ძ“ არ მექნება, მოგწერ — ვირფასო სიმონ!“ და შეიქნა ხალხში ხარხარი. გრიშა აბაშიძე დიდი მეხსიერების კაცი იყო, ის ხშირად ღებულობდა კოტე მესხის წარმოდგენებში მონაწილეობას ქუთაისში და საკმარისი იყო გადაეთვალეურებინა როლი, რომ ზეპირად ცოდნოდა. ერთხელ კოტე მესხმა თეატრში მოიტანა ზუდერმანის პიესა „მშობლიურ ქერ ქვეშ“. ეფემია მესხს გადასცა როლი არტისტი ქალის, რომელსაც ერთ ალაგას საუცხოო, მაგრამ მოცულობით ძალიან დიდი მონოლოგი აქვს განკუთვნილი, ეფემია მესხი დაეჭვდა — ამხელა მონოლოგს რა დამასწავლისო, მაგრამ გრიშა შეეშველა: მოყვა და მოყვა და ეს უზარმაზარი მონოლოგი ხელად ჩააბულბულა...

რასაკვირველია, მე შემეძლო სხვა ქუთათურ ინტელიგენტების დასახელება, მაგრამ ეს ძალიან შორს წამიყვანს, და თუ მათგან ზოგიერთი დავასახელებ ეს იმიტომ, რომ მათ ჩემზე

ერთგვარი გავლენა ჰქონდათ თავის დროზე. უთუოდ მეც აქა-
მომდე იმათი რაღაცა მაცხია.

მკითხველო, რა მენაღვლება, ვიტრაბახებ მეც. ჩემი ხნის
ამყამად ქვეც აღარ გორავს. ასე რომ ზორბა ტყუილებიც
რომ ვთქვა ვინ გამისწორებს, ვინ არის მომსწრე?


თუმცა ვეცდები ნაკლები ვიცრუო.

ამიტომაც აქედანვე გადავეშვები იმ სამყაროში, რომელ-
მაც იმ დროს ასე მოურევნელად გამიტაცა.

ეს არის ქართული თეატრი.

თეატრის გარშემო

თეატრს კი გავეცანი ჩემი ბავშვობიდან. მამაჩემი უცნაური კაცი იყო: 3—4 წლის შვილები დაეყავდით დიდ თეატრში. პაგალითად: თბილისში ოპერაში და რუსულ დრამატიულ თეატრშიდაც. 14—15 წლის ვიყავი მამამ ქართულ წარმოდგენაზე რომ წაგვიყვანა, ეს მოხდა ასე: რაღაც ეკლესიის დღესასწაული იყო მეორე დღეს და წინაღობით მამამ ეკლესიაში მწუხრზე წაგვიყვანა. აკი ვამბობ—მამა უცნაური კაცი იყო მეტი: რას გაუგებ მის პედაგოგიურ მოსაზრებებს! წაგვიყვანა ეკლესიაში და მთელი მწუხრი მოგვასმენინა. მერე ფეხით მოგვიყვანა ქართულ თეატრში. ეს იყო ეხლანდელი გრიბოედოვის თეატრის შენობა. მე სიონის ეკლესიის შთაბეჭდილებით ვიყავი აღსავსე: ეფისკოფოსის ჩაცმულობით, რომელსაც რამდენიმე მღვდელი ემსახურებოდა. მთავარი დიაკვნები თავიანთ კვერექსებს, როგორც თეატრში აქტიორები თავის გრძელ მონოლოგებს, ხმამაღლა წარმოიტყობდნენ და საცეცხლურით ხალხს გუნდრუქს აკმევდნენ. იმავე დროს საქართველოს ეგზარქოსის საუცხოვო მგალობელთა გუნდი, განთქმულ ლოტბარ აუშეფის ხელმძღვანელობით რუსულ დიდებულ საეკლესიო საგალობლებს ასრულებდა. მე დიდხანს ვიყავი საეკლესიო რიტუალის ცერემონიებით მოხიბლული და ხშირად, როდესაც მარტო დავრჩებოდი ჩემს ოთახში ბავშვობისას, ჩემებურად მთელ წირვას ჩავატარებდი. იმ საღამოს, როდესაც მამამ ფეხით მოგვიყვანა სიონიდან თეატრში, მე ჯერ კიდევ საეკლესიო რიტუალებით ვიყავ მთვრალი და გზაში მარტო იმას ვნატრობდი—ანდენი ცარიელი ფაიტონები მორიხინობს და რა იქნება ჩავსვას მეტი. მაგრამ ამ ფიქრში ჩვენ უკვე მიველით თეატრში. იქ თურმე წარმოდგენის დაწყებამდე კარგა ხანი რჩებოდა, ამიტომ მამამ შეგვიყვანა ბუფეტში და ჩაი დაგვაღევიანა, ესეც



შ. დადიანი — „იმეჯეკობი“. სპექტაკლის მონაწილენი ავტორთან ერთად.
„ზუგდიდი“, 1917 წ.

ჩემთვის ახალი ამბავი იყო. საერთოდ, ოჯახების გარდა ჩაი ახალ მქონდა დალეული. აქ კი ყველაფერმა გამაკვირვა, ცალკე მაგიდებმა, ლაქიების თეთრმა ფუსტმალეებმა და ჩაიზე მიტანილმა სხვანაირმა ბისკვიტებმა. ამასობაში, ეტყობა, წარმოდგენის დრომაც მოაღწია და მამამ შეგვიყვანა ლოქაში, როგორც შემდეგში გავიგე, თურმე თბილისში ახლად ჩამოსულ სიმონ სვიმონიძის სადებიუტოდ იდგმებოდა დავით მესხის ისტორიული პიესა „ბაგრატი მეორე“. აქ მე მომეწონა ვასო აბაშიძე, რომელიც ასრულებდა ტუსაღის როლს. საპატიმროში ჯაჭვით მიბმულს ეტყობა ძალზე შიოდა და ხმა მალლა ნატრობდა სხვადასხვა ქართულ გემრიელ საკმელებს, მხოლოდ ამ ნატვრას ისე გადმოსცემდა, რომ მე ლოქაში მჯდომი სიცილით ხმამაღლა ვკვლოპინებდი, რამაც ხალხში გამოიწვია მეტი ხარხარი. თვითონ დებიუტანტი სიმონ სვიმონიძე, მშვენიერი შესახედობის ვაჟკაცი, ქართულ ქულაჯაში გამოწყობილი, რაღაც იგრჩებოდა და ერთ ჩიხტაკობიან ქალს ეხვეოდა და კოცნიდა. ეს თურმე საქართველოს დედოფალი ყოფილა, და ეს მე სულ არ მომეწონა, რადგან ჩვენს ოჯახში თამარ მეფე ქეთევანი და შუშანიკი სულ სხვანაირად მქონდა წარმოდგენილი. აგრეთვე აქ მომეწონა სცენა—ქართველ დარბაისლების მიერ დარბაისლური სალამის მიცემა. ეს ერთი რაღაც გაკვირვებული ცერემონია ყოფილა და მეც ბევრი ვიციან და ვაციან ხალხიც. მაგრამ თეატრში იმ ეამად ისე არაფერი მომწონებია, როგორც ოპერა დემონში აფოთეოზის სცენა, როდესაც თეთრ ღრუბლებზე დაწოლილი თამარი ზეცაში მიჰყავთ ანგელოზებს.

ქუთაისშიც წაგვიყვანა მამამ რომელიღაც ქართულ წარმოდგენაზე და თუმცა პიესის შინაარსისა არაფერი გამიგია, გულიანად ვიციანოდი, რადგანაც ცხოვრებაში ჩემი საყვარელი კაცი სიმონიკა მიქელაძე, სცენაზედაც კომიკურ როლს ასრულებდა. სიმონიკა მამასთან ხშირად დადიოდა და ბუნებით ხუმარი კაცი იყო და მე მიჩვეული ვიყავ მის ოხუნჯობას. მხოლოდ აქ, ქუთაისში გამაკვირვა ფარდის წინ რაღაც მორგვალეული საბუღარივით რომ იდგა. ფარდის ახდის შემდეგ, ამ ბურულიდან მოისმოდა კაცის ხმა, და ჩვენ გვესმოდა ის სიტყვები, რომელსაც სცენაზე მდგომი ადამიანები ლაპარაკობდნენ.

ამავე სიმონიკა მიქელაძემ სცენიდან ბევრი მაცინა სოფელ კულაშში, სადაც თავის დროზე კარგათ ცნობილ ალექსანდრე მიქელაძის ოჯახში მამაჩემი შეიღებით სტუმრად იყო მიწვეული, — აი ამ ალექსანდრემ, ერთ საღამოს, უთუოდ მამაჩემის გასართობად, თავის დარბაზის სცენაზე, გაითამაშა რაღაც ვოდვილი. უნდა ვიცოდეთ, რომ ალექსანდრე დიდებულად ესახლა. ჰქონდა ერთ ეზოში ორი სასახლე. ერთი იყო განკუთვნილი მისი ოჯახისათვის, მეორე კი მომსვლელ სტუმრებისათვის, სადაც ოთახები დაყოფილი იყო სასტუმროების მსგავსად, იმავე დროს ერთ სახლში ჰქონდა დიდი დარბაზი სცენის ბაქანით, და მეორეში კი პატარა კარის საყდარი, რომელსაც კარის ეკლესიას უწოდებდნენ. როგორც ზემოთ ვთქვი, ალექსანდრემ გაითამაშა ვოდვილი, აქტიორებათ მხოლოდ ორნი იყვნენ: თვითონ ალექსანდრე და ზემოთ მოხსენებული სიმონიკა. ალექსანდრე ასრულებდა სადალაქოში შემოსულ მუშტრის როლს, სიმონიკა კი თვითონ დალაქს. ორივემ თავიანთი მანქვაგრეხით სიცილით დახოცა ხალხი. მე ხომ ჩვეულებრივისამებრ ხმა-მალლა ვხარხარებდი.

ყველა ამეებმა, უთუოდ, უნებლიეთ შთამინერგა მსახიობის სიყვარული და შემდეგ მოჩიტულზე 14—15 წ. ვაჟი, როცა შემთხვევა მომეცემოდა, ქართულ წარმოდგენას უთუოდ ვესწრებოდი. აქ კი შემეყვარდა ზოგიერთი მსახიობი, უწინარეს ყოვლისა მაკო საფაროვი. — შეუღარებელი ნიკის პატრონი. არანაკლებ ტალანტის მქონე ნატო გაბუნია, სწორუპოვარი კომიკი ვასო აბაშიძე და ვალერიან გუნია, — მაშინ სრულიად ახალგაზრდა, მშვენიერი შესახედი, მომხიბლავი ბარიტონალური ხმის პატრონი და ძალიან მომინდა მეც მეთამაშნა და გუნიასთანა მსახიობი მეც გავმხდარიყავი.

იმავე დროს თბილისში ჩამოვიდა მთელ მსოფლიოში განთქმული ტრაგიკოსი ერნესტო როსი. მას თითქმის მთელი მისი რეპერტუარი შექსპირის პიესებისაგან ჰქონდა შედგენილი. მამაჩემი რას გაუშვებდა რომ, როგორც შექსპირის დიდ თაყვანისმცემელს და ზოგიერთი მისი პიესების მთარგმნელს, ეს წარმოდგენები უნახავი გაეშვა. შეიღებიც თან დაყვავდით. ზე

თან დამქონდა რუსული თარგმანი შექსპირის პიესებისა და რაკი იტალიური არ ვიცოდი, წარმოდგენის სცენებს მორიგისით მივყვებოდი და ხან როსის ვუსმენდი და ხან ტექსტს ვკითხულობდი.

როსი უკვე ხანში იყო შესული და ყველას გაუკვირდა, როდესაც გამოაცხადა, რომ „რომეო და ჯულიეტაში“ შეასრულებდა რომეოს როლს, მე დიდათ გაოცებული დავრჩი ერთ სცენაში როსიმ ჯულიეტას რომ აკოცა. ეს კოცნა ხანგრძლივი იყო. და როდესაც ტუჩი მოაშორა ჯულიეტას, რომეოს თითქოს რაღაც სიხარულის ოხვრა აღმოხდა. ეს დიდათ მოუწონეს გაზეთების რეცენზენტებმა, უქვეს „რეალიზმი“ და თეატრში ხომ ოვაციით დააჯილდოვეს.

აქ უნდა დავიტრაბახო. რომ ერნესტო როსი პირადად გავიცანი. ეს ასე მოხდა. ანტრაქტებში როსისთან შედიოდნენ საერთოდ საზოგადო მოღვაწეები და მისი თაყვანისმცემლები, ულოცავდნენ, ქებას ასხამდნენ. ისიც სამაგიერო პასუხს აძლევდა. ერთხელ მამასთან ლოჯიაში შემოვიდა, თავის დროზე კარგათ ცნობილი ჟურნალისტი, ალექსანდრე ამფითიატროვი და თხოვა მამას, რომ წაპყლოდა და როსის გასცნობოდა, მამა დაეთანხმა და თან მეც წამიყვანა, გაეცნო, ცოტახანს ისაუბრეს და შექსპირზედაც ილაპარაკეს. თარჯიმნობა ამფითიატროვმა იკისრა, ბოლოს როსიმ მე ამხედ-დამხედა და იკითხავინ არისო, სცენა ხომ არ აინტერესებსო, მამამ უპასუხა—მგონი ასე უნდა იყოსო. მაშინ ერთი კილო ამხედ-დამხედა მუშტრის თვალით და. მე რომ მკითხოთ, მაინც და მაინც ვერაფერი შეიღობი სანახავი ვიყავი, ერთი რაღაცა გაგინგილებული გამხდარი ქაბუკი ვიყავ. მან მხარზე ხელი დამადო და თქვა—შეიძლება აქიდან აქტიორი გამოვიდესო—„აქტიორ ტრიბუნ“! ეს ასეც გამოვიდა, როდესაც შემდეგში სცენაზე დავიწყე მუშაობა—რეზონიორების ამპლუაში ვიყავ უფრო მარჯვე. „აქტიორო ტრიბუნიც“ ამასვე ნიშნავს.

ჩემი დიდ სცენაზე გამოსვლა ქუთაისში მოხდა. მე ხომ მწერლობით ვიყავ გატაცებული და გარდა საკუთარ ნაცოდვილარებისა, ზოგ ზოგ რამეს ვთარგმნიდი. ერთხელ გადავთარგმნე კი არა. გადავაკეთე, როგორც მაშინ იყო მიღებული, უცხაო

სახელები ქართულ სახელებით შევცვალე და დავარქვი „სიო გმირი“ (აღფონს დოდეს „ლილია“).

მაშინ ქუთაისში კოტე მესხმა ჩამოაყალიბა პროფესიონალური დასი და ყველა მონაწილეს დაუნიშნა გასამრჯელო. საქმეს კარგი პირი უჩანდა; ცნობილი მსახიობი ფეფიკო მესხი მაშინ დაწინაურდა, „მარგარიტა გოტიე“ და სხვა ასეთი საპასუხისმგებლო როლები მან ამ სეზონში დიდის ნიჭიერებით განახორციელა, შემდეგ თბილისის გასტროლებზე თავი დიდათ ისახელა. დასში სხვებიც იყვნენ ნიჭიერები. დესპინე ივანიძე, შემდეგში ცნობილი შემსრულებელი დრამატიული და კომიკური როლებისა; ევგენია ჩხეიძე, დედა ჩვენი სახალხო არტისტის ნინო ჩხეიძისა, ადრე გარდაცვლილი მაშო ჩხეიძე (უფროსი და ნინო ჩხეიძისა). კაცთაგან: ვასო ბალანჩივაძე, მეტათ ნიჭიერი, სახასიათო როლებიც ჩინებული შემსრულებელი. მისი ფილიპე ბარბაქაძე კლდიაშვილის პიესაში, დღესაც დაუვიწყარია. დათიკო ჩარკვიანი—„ლუბოვნიკების“ შემსრულებელი. ვასო გორგაძე, მაგარი რეზონიორი, დათიკო მესხი უფრო იმერულ როლების გამსახიერებელი და საერთოდ დიდათ ნიჭიერი კაცი თეატრში, დეკორატორი, რეკვიზიტორი, ბუტაფორი, მთარგმნელი, ავტორი პიესების, ლექსების და სხვადასხვა საესტრადო ნომრებისა. იმავ დროს იგი იყო მშვენიერი ყურნალისტი. კიდევ იყვნენ სხვებიც: მინდელი, ქურციკიძე, გაბაშვილი, მალრაძე, გაბიჩვაძე და შემთხვევიდან შემთხვევამდე პოეტი გრიშა აბაშიძე და სხვანი. თვითონ კოტე მესხი ხომ იყო პრემიერი, რეჟისორი და ხელმძღვანელი თეატრისა; დგამდა კარგ პიესებს და საერთოდ ანსამბლს აქცევდა დიდ ყურადღებას. აი ამისთანა თეატრში მივიტანე ჩემ მიერ „გადმოკეთებულ“ „სიო გმირი“. გავიდა ხანი და ერთ საღამოს ბულვარში კოტე მესხმა დამიძახა და მითხრა — „ქუჩი“, შენ კარგი პიესა გაგიკეთებია, მაგრამ სიო გმირის შემსრულებელი 15 წლის ვაჟი არა მყავს და შეიძლება შენ მოკიდო ხელიო. მე, როგორც ყველა ახალგაზრდამ, ასეთ შემთხვევაში დავირცხვინე, დავფრთხი. უკან დავიხიე, მაგრამ კოტემ გამამხნევა: აი ხვალ მოდი ჩემთან დილის რეპეტიციაზე და მაშინ ვნახოთო. მეც მივედი დანიშნულ დროზე და მაშინ კი მითხრა — სიო გმირს ჯერ

დავეთხოვით და ეს როლი მანამდე აიღე, რომ სცენას გაეჩვიო, თან „მარგარიტა გოტიეში“ ერთი ეპიზოდური როლი გრაფ დევირეისა გადმომცა. უნდა გენახათ რა სისწრაფით შევისწავლე ეს როლი, რომელიც რაღაც ფურცელნახევრისაგან შესდგებოდა და მორიგ რეპეტიციებზე ისე ჩაუბარე, რომ ერთხელაც არ წაებორძიკებულვარ. როდესაც ჩემი სათეუარი გავათავე, შევატყვე, რომ მხიარულად შემომპქეროდენ და განსაკუთრებით დათიკო მესხი გამამხნევებელი გამომეტყველებით და თითქო დაცინვით მიყურებდა, შემდეგში მონაქცევზე ვეკითხებოდი დათიკოს და ისიც მიხსნიდა, რომ მას აგონდებოდა ქართული ანდაზა — ახალი ცოცი ქარგად გვისო; ეპ, ჩემო შალვა, ჟერ რა იცი შენ სიცოცხლეში რამდენი ტექსტის შესწავლა დაკვირდება, განსაკუთრებით თუ ოდესმე შექსპირს ეზიარე...

ამგვარად, გრაფის როლით შევდგი ფეხი ქართულ სცენაზე და პლებები თითქმის აღარ შიკადრებია. მთელ ჩემ სიცოცხლეში სცენაზე არც ქართული თეატრის ცნობილ მსახიობ ვასო ბალანჩივაძესავით იმერული წამისევია და არც ქართულ მსახიობებივით „შენმა მზემა“ მითქვამს, არ გამომდიოდა და უფრო დიდმა ტრაგიკოსმა რომ დამარქვა „აქტიორ ტრიბუნ“ ასეთი დავრჩი ბოლომდე. ვეც თითონ არ ვცდილვარ მოტრფიალე ვაჟთა როლების შესრულებას... ერთხელ ქართული თეატრის ულამაზესმა, „ენეპრემიერამ“ ბაბო ავალიშვილისამ დიდათ გაიკვირვა, როდესაც „ურიელ აკოსტაში“ მოხუცი ფილოსოფოსის დე-სილვას როლი გადმომცეს, როგორ ესეთი ახალგაზრდა შეასრულებს მოხუცსაო. მაგრამ სცენაზე ისე წავიდა ჩემი საქმე, რომ ერთ დროს „მეფე ლირადე“ ავმაღლდი.

და აი ამ დებიუტიდან „მარგარიტა გოტიეში“, ეს იყო 1893 წლის 3 მარტს, ფეფიკო მესხის ბენეფისზე, ქართულ სცენას არ ჩამოეშორებივარ თითქმის მთელი 30 წლის მანძილზე.

ეს პირველი გამოსვლა სცენაზე მაშინდელმა რეცენზენტმა გაზეთ ივერიაში დიდათ დაათვასა და მომავალი სასცენო მუშაობა ქებით დამილოცა. ასე რომ მკითხველებო, იცოდეთ — ქართულ სცენაზე მე ქებით ვარ შემოსული, მხოლოდ უნდა გამოვეტყდე — ვერაფერი შვილი აქტიორი ვიყავი, მაგრამ
6. შ. დადიანი .

ერთგვარი ხრიკი ვიხმარე, და სცენას თუ არ ჩამოვშორდი, იმისათვის, რომ უფრო რეჟისორობას მივყავი ხელი, სეზონების ხელმძღვანელობას და დასების ჩამოყალიბებას. ეს ეშმაკობა ვერ გამიგო თეატრმა და თავისთან დამარჩინა. არ ითქმის, რომ მისი საქციელი გამართლებული არ იყოს, რადგან მე მასთან ნუოფმა პიესების წერასაც მივყავ ხელი, ამბობენ ზოგიერთი მათგანი ისე კარგია, რომ დღესაც კი იღვმება ქართულ სცენაზე. აი მაგალითად, როდესაც მე ამ ფრაზას ვწერ (1958 წ. 27/VI), მარჯანიშვილის თეატრში საყვარელ ვერიკოს და ვასო გოძიაშვილის მეოხებით ჩემი „კაკალ გულში“ კვლავ აპირებს მოძიავალ სეზონისათვის „გაჩხრიალებას“.

საერთოდ, მე სცენაზე მუშაობა დამაწყებინა, ჩემი შეგნებით, სასცენო ძალთა სიმცირემ. რეპერტუარი მეტათ ღარიბი კქონდა ჩემსობას თეატრს. ქართულ ორიგინალურ პიესას თითბზე ჩამოითვლიდა კაცი, ასევე იყო სცენის მუშაკებითაც: გარდა ჩვენი ბუმბერაზებისა, საერთო შემადგენლობა დასში უკვლგან მეტათ მდარე ხარისხის იყო. ვაყებთაგან მცირე ცოდნის და სასცენო უნარმოკლებულნი ეტანებოდნენ, უფრო ხშირათ სასწავლებლის მეოთხე კლასიდან გამოსულნი, ისინი, რომელნიც ვერსად სამსახურში ვერ მოეწყვენენ.. ქალაქებშიდაც ასევე—ბელურებივით შემთხვევით მოფრენილი ჩიტუნები; უფრო ამან გამაბედღინა სცენაზე დარჩენა, თუმცა როგორც ეთქვი, არაფერი დიდი აქტიორი ვიყავ, მაგრამ ცოდნით და განვითარებით ბევრ სხვებს ვჯობდი. ამისათვის დავრჩი კიდევ თეატრში. სხვა რა მოგიტხროთ ჩემი სასცენო „მოღვაწეობისა?“ მთელი საქართველო მაქვს შემოვლილი თეატრალური გასტროლებით. სეზონობით ვმსახურობდი თბილისში, ქუთაისში. ბაქოში, ბათუმში, ჭიათურაში. ეს ზამთრობით, მხოლოდ როგორც კი გამოზაფხულდებოდა მე და ჩემი ამხანაგები მოვედებოდით მთელ საქართველოს და ხან ქართლის რომელიმე სოფელში ამოვყოფდით თავს, ხან კახეთში, ხან სამეგრელოში, გურიაში, იმერეთში, აფხაზეთში, თვით სვანეთის მისადგომებშიაც კი. ერთხელ კავკავსაც კი მივალწიეთ (ახლანდ. ორჯონიკიძე). ჩემთვის დაუფიწყარია ჩვენი დასის იქ ყოფნა. ერთი რომ იმ ეამად კავკავში დიდძალი ქართველობა ცხოვრობდა. მთელი

კოლონია ჰქონდათ შექმნილი და ჰქონდათ თავიანთი ეკლესია, სკოლა, დრამატიული წრე, ბიბლიოთეკა და სხვა. ჩვენი ჩასვლისთანავე კავკაზის მოწინავე ინტელიგენციამ თავისი გულისკარი ფართოდ გაგვიღო, მათში ერია ერთი ფრიად განათლებული სასულიერო პირი — მღვდელი ნათიძე, ის დიდად გვეზმარებოდა სცენის მოწყობაში, მაგრამ ერთხელ მეტად გამაკვირვა იმ მღვდმარეობამ, რომ კვირა დღეს, წირვის დროს, ამბიონზე გამოვიდა სამოსელით შემოსილი მღვდელი ნათიძე და ხალხს გამოუცხადა: „ყმაწვილებო, არ დაგავიწყდეთ, რომ დღეს ჩვენი სკოლის სცენაზე წარმოდგენას გამართავენ ქართული თეატრის მსახიობები შალვა დადიანის მეთაურობით“ და ამის შემდეგ ხალხს მოუყვა—რა პიესა იდგმებოდა, ვინ რა როლს ასრულებდა და საერთოდ ქართულ თეატრს რა მნიშვნელობა ჰქონდა. ერთი სიტყვით ქართულ დასს საოცარი რეკლამა გაუკეთა ეკლესიის კათედრიდან სასულიერო პირმა და თან კობტა ლექციაც ჩაუტარა. და სანამ კავკაზში ვიყავით ჩვენს სპექტაკლებს ასე მოყვრულად ეკიდებოდა ქართული ეკლესია.

კავკაზში მგზავრობიდან კიდევ უნდა აღვნიშნო ერთი ეპიზოდი. მატარებელში ჩვენთან ისხდნენ ჩოხოსანი ლეკები. ჩვენ, ვაჟი მსახიობები, უღვაშგაპარსულნი ვიყავით. ეტყობოდა ეს არ მოსწონდათ ლეკებს და შეგვეკითხენ—რა ხელობის ვიყავით. როდესაც აუხსენით, დიდხანს ვერ მიგვიხვდნენ თუ რა პროფესია იყო ჩვენი პროფესია. ბოლოს სხვებზე უფრო ხანდაზმულმა თავის ამხანაგებს თითქო ცირკი დაუხატა და ჩვენ ტაკიმასხარებად გამოგვიყვანა... ეს ჩვენებმა იწყინეს და ჩვენი შეთანხმება არაფრით არ მოხერხდა. დიდათ გვიძრახავდენ უღვაშგაპარსულობას. ბოლოს კიდევ, რომ გაიგეს, რომ მე კინაზი კაცი ვიყავი, სულ მუხლებზე ირტყეს ხელები და ერთი მათგანი კიდევ ძალიან შემომეხვეწა; თუ კაცობა გწამს და, თუ ძმობა იცი, ამიერიდან ჩემი ხატრით უღვაშები მოუშვიო. მეც შევეპირდი და სიტყვა არ გამიტეხია: ზაფხული დგებოდა, სეზონი არსად მოგველოდა და მეც უღვაშების გაპარსვა დიდხანს არ დამჭირდებოდა.

ულვაშის გაპარსვა კი არამც თუ სოფლელ ლეკებში, არა-
 ნედ თვით ქუთაისის ინტელიგენციაშიც კი საძრახ საქმეთ ითვ-
 ლებოდა; ასე, რომ თვით ჩვენი მსახიობებიც კი, გარდა ლადო
 მესხიშვილისა. თოქმის 905-დე არავენ ულვაშს არ იპარსავდა.
 ის კი არა, ზოგიერთ მსახიობთაგანს ისეთი წვერები ჰქონდათ
 მოშვებული რომ თვით კათალიკოსს ეკადრებოდა. უნდა გენა-
 ხათ ქართველი მსახიობის გაქირვება მაშინ, როდესაც რო-
 ნელთა ცხოვრებიდან პიესა იყო წარმოსადგენი, ზოგიერთ
 მსახიობს თავის სქელ ულვაშებზე ჯერ სქელი წებო უნდა
 წაესვა და შემდეგ ზედ ტილოს ნაჭერი დაეკრა, რომ უულვაშო
 გამოჩენილიყო, მაგრამ ეს არაფერი, სიმწარე მაშინ აღგებო-
 და. როდესაც ეს ტილო უნდა მოეხსნა და ულვაშების ნაწილი
 ძალაუნებურად მოეწიწნა, უნდა მოგესმინათ ასეთი მსახიო-
 ბის ლანძღვა და თავბედის წყევლა! ამის შემხედვარე ლადო
 მესხიშვილი გულიანად ხარხარებდა — „რა არის ყმაწვილებო,
 გაიპარსეთ ეგ ულვაშები, რას გიკეთებთ?“ მაგრამ ვასო ბალან-
 ჩივაძე როგორ გაიპარსავდა მის სქელ ულვაშებს და პატარა
 პლანყეს, როდესაც ის, გარდა აქტიურობისა, გიმნაზიაში პე-
 დაგოგობდა და მხატვრობას ასწავლიდა, ამასთან მთელი ქუ-
 თაისიც თავიდანვე იცნობდა მის წვერულვაშით გამწყაზრულ
 სახეს! ასე იყვნენ სხვებიც, მაგალითად ულამაზესი ყმაწვილკა-
 კი, სცენის მოყვარეთ შემოსული კოწია ქურციკიძე. რომელ-
 საც ისეთი წაბლის ფერი წვერები ჰქონდა ორ მტკაველზე ჩა-
 მოშვებული, რომ ავ თვალს არ დაენახებოდა. მას ამითი მოს-
 წონდა თავი საზოგადოებაში, ქალებსაც ამ წვერებით აწონებ-
 და თავს და განა ამისთანა სამკაულს შეელეოდა?! მეტნაკლე-
 ბათ ასე იყვნენ სხვებიც, და მეც ამ წვეროსანთა შორის გავე-
 რიე, მეც ღიღხანს ვატარებდი ჩემს პატარა გაწყებილ ულვა-
 შებს, ახალგაზრდა ვიყავ და ვიცოდი, რომ ხალხში ჩემ ულვა-
 შებსაც ჰქონდა გასაყალი.

და ეს კიდევ არაფერი, რომ სხვა მხრივ მაინც ხელშეწყო-
 ბილი ყოფილიყო ქართულ სცენაზე სპეციალურად მომუშავე.
 კოტე მესხს უფრო სცენის მოყვარეები ჰყავდა, მან მათ მხო-
 ლოდ 1892—93 წ-ში დაუნიშნა ჯამაგირი. თორემ პროფესიო-
 ნალი არც ერთი არ იყო და ეს ასე იყო ქუთაისში კი არა, თვი-

თონ თბილისშიაც, მიუხედავად იმისა, რომ თბილისში 70-ან წლებში დაარსდა პროფესიონალური დასი და მას შემდეგ არსებობა არ შეუწყვეტია; დასის ხარჯებს ძირითადად ჰფარავდა წარმოდგენების შემოსავალი, მაგრამ, როდესაც ეს შემოსავალი ვერ გასწვდა ხარჯს, ილია ჭავჭავაძემ, ღიმიტრი ყიფიანმა და სხვებმა დააარსეს ესრეთ წოდებული „დრამატიული საზოგადოება“, ეს საზოგადოება კრებდა საწევროს თავის საზოგადოებაში, და რაც მთავარია, აწყობდა საქველმოქმედო საღამოებს, სეირნობებს და ამ შემოსავლით უძღვებოდა სეზონის საქმეებს. სეზონები მაშინ რამდენიმე თვე გრძელდებოდა. იწყებოდა სექტემბერ-ოქტომბერში, ხან უფრო გვიან და წყდებოდა აუცილებლად ან თებერვალში, ან მარტში, რადგან ამ თვეებში დიდი მარხვა იწყებოდა და მაშინდელი მთავრობისგან დიდ მარხვაში სათეატრო წარმოდგენები და სანახაობები სასტიკად აკრძალული იყო; მაშასადამე მაშინდელ ქართულ მსახიობს 5—6 თვის განმავლობაში ჰქონდა სახსარი არსებობისა და ისიც მეტად შეკვეცილი. ჩემსობას მე არ მახსოვს რომ დასის უპირველეს წევრს, რომელიმე დიდ მსახიობს, ან რეჟისორს ჰქონოდა 100 მან. მეტი. საერთოდ ჯამაგირები იწყებოდა 10—15 მან. და ძლივს ძლივობით მიადწევდა 50—60 მან. იყო ერთი შემოსავლის წყარო—ეს მაშინ, თუ მსახიობა თავის ნიჭით, სასცენო ოსტატობით დაიმსახურებდა საზოგადოების ყურადღებას, მას უმართავდნენ ბენეფისს. მსახიობს ეძლეოდა ერთი საღამო სხვადასხვა პირობებში, უმთავრესი კი ის იყო, რომ ამ საბენეფისო შემოსავლიდან უმეტესი წილი მობენეფისეს ეძლეოდა.

ეს იყო და ეს. თბილისშიაც, ჩვენს დედაქალაქში ასე იყო, რაღა თქმა უნდა, ქუთაისშიაც ასე იყო. ქართული წარმოდგენები საზოგადოების უმეტეს ნაწილს სამადლო საქმედ მიაჩნდა და საზოგადოდ მსახიობები უყვარდა, მაგრამ მათი ხელობა მაინც სათაყილოდ მიაჩნდა; ჩემსობასაც განსაკუთრებით ჯალებს, უძრახავდნენ სცენაზე შესვლას.

ამგვარად იყო მსახიობებში ფრაზა — ერთი ორი თვე თორემ მერე თვითონ არ ვიცით რითი ვცხოვრობთო, ცისა და მიწის შუა ვართ ჩამოკიდებულიო. ამიტომ იყო, რომ კარგი, ნი-

კიერი, განსაკუთრებით ნასწავლი ახალგაზრდა თეატრში სამუშაოთ არ მოდიოდა.

მსახიობთა შორის უთუოდ უნდა დავასახელოთ ყოვლად ღირსეული, მაღალი ნიჭის პატრონი ფეფეია (ფეფეიკო) მესხი. გარეგნობით ეს იყო საშუალო სიმაღლის და სიძქის ადამიანი. სახე ფართო ჰქონდა და როდესაც გრიმს გაიკეთებდა, სცენიდან ლამაზიც მოსჩანდა. ამას, რასაკვირველია, ხელს უწყობდა მისი მწყაზარი, ლამაზი, გრძნობიერი გამომეტყველების თვალეები. საქციელი და მიხვრამოხვრა ქართულად ზრდილი ქალისა, ხმა ჰქონდა მშვენიერი—არც ძალიან წვრილი და არც მაინცდამაინც ბოხი. თითქო უფრო კონტრალტო, მაგრამ ისე მსუბუქი, გეგონებოდათ მეტათ სალუქ ქსოვილში ვეხვევიო. ნასწავლი იყო, ქალთა გიმნაზიის საშუალო სკოლა დამთავრებული ჰქონდა და მხატვრულ ლიტერატურას როგორც კლასიკურს, ისე თანამედროვეს, კარგათ იცნობდა. ამისათვის მისთვის ადვილი იყო ტიპების გარჩევა და მუდამ სწორუტყუვრად იძლეოდა რეალისტურ სახეებს. მრავალმხრივი უნარი ჰქონდა მოქმედ პირთა გამოსახვისა, და არასოდეს არ ემსგავსებოდა მისი ერთი როლი მეორეს. ის სულ სხვა იყო მედიაში და სულ სხვა იყო „მარგარიტა გოტიეში“, ასევე ზენინაში სხვა და „პირვეულის მორჯულებაში“ — კატარინას როლში — სხვა.

პირად ცხოვრებაში იყო მეტად სამეგობრო, კარგი მრჩეველი და მაღალი გემოვნების ადამიანი, თუმცა თვითონ, მიუხედავად მისი დიდი არტისტობისა, მუდამ ჩრდილში იდგა და თუ პირადათ მას არ მიმართავდით არასოდეს არ იჩემებდა საზოგადოებრივ საკითხების გადაჭრას. იმავე დროს, როგორც მთელი ოჯახი მესხებისა, ეწეოდა ლიტერატურულ მუშაობას, თარგმნიდა პიესებს, მოთხრობებს და სხ.

მეორე მსახიობი ქალი სწორედ იმავე ხანებში მყავს გაცნობილი, როდესაც გავეცანი ფეფეიკოს. ეს იყო ბაბო ავალიშვილი — პირველი პროფესიონალი ქართველი მსახიობი ქალი, იგი პირველი შევიდა მუდმივ მსახიობად ქართულ სცენაზე. გარეგნობით იყო ერთი ულამაზესი ქალი, მაღალი, წერწყეტა, გულშვერად სავსე და საერთოდ ახოვანი ადამიანი. განათლებული ქალი იყო, კარგათ ერკვეოდა როლების ახსნა-განმარ-

ტებაში, და თითქო არაფერი აკლდა მის სასცენო ოსტატობას, მაგრამ ერთი მთავარი კი აკლდა: ეს იყო მაღლი ნიჭიერი მსახიობისა! ის ყველა როლებში ერთნაირი იყო. გარეგნობით მუდამ ლამაზი და კაბით თუ შეიცნობდით რომ სხვადასხვა როლს ასრულებდა. როგორც ადამიანი, პირდაპირ სანიმუშო იყო. კარგი სამეგობრო. უანგარო. გაჭირვების ამტანი და სხვა. დიდხანს ემსახურა ქართულ თეატრს და სანამ სხვა ნიჭიერი ქალები შემოვიდოდნენ თეატრში, მანამ პირველი და წამყვანი როლებიც შემსრულებელი იყო. ჯანსაყუთრებით ლაღო მესხიშვილს დიდხანს ბაბო ავალიშვილისთანა პარტნიორი არა ჰყოლია.

ბოლოს მძიმედ გახდა ავად. ახლობელმა ამხანაგებმა და განსაკუთრებით ცნობილმა ექიმმა სიმონ თოფურიამ დიდათ მოუარეს, მაგრამ ავადმყოფობამ თავისი გაიტანა.

მესამე ჩემი საამაყო ცნობილი ქალი ქართულ თეატრში, ხნით ჩემზე უმცროსი, ჩვენი სასახელო და სასიქადულო ნუცა ჩხეიძეა. მე არ ვიყავი თეატრში, სეზონ გარეშე გამოსულიყო ერთ საქველმოქმედო წარმოდგენაში და თავი ესახელებინა.

მაგრამ სანამდი საყვარელ ნუცაზე ვიტყოდე ერთ ორ სიტყვას, მინდა გავიხსენო დედა მისი ევგენია ჩხეიძისა და ნუცას უფროსი და მაშო. ევგენია არ იყო მუდმივი წევრი პროფესიონალური დასისა, მაგრამ სხვადასხვა სახაჟიათო როლებს კობტად ასრულებდა.

სულ სხვა იყო ნუცას უფროსი და მაშო. ეს იყო პირდაპირ შექმნილი ახალგაზრდა როლების შემსრულებლად, რომ ეცოცხლა ნუცას არც ის ჩანოუვარდებოდა თავის ნიჭით. მაგრამ აი ერთ საღამოს მე და განსვენებულ მაშოს მოგვიხდა კოტე მესხის საბენეფისოდ პიესა „რუსთაველში“ კარგა საპასუხისმგებლო როლების შესრულება, მე ვთამაშობდი ლიპარიტ ორბელიანს, ის კი ახალგაზრდა ქალის როლს, რომელიც ვაჟურად იყო გადაცმული და სახელად მალხაზს ეძახდნენ.

ის თეატრი, სადაც კოტე მესხი სეზონს ატარებდა, ხის იყო, სპეციალურად იმპერატორ ალექსანდრე მესამის ჩამოსვლისათვის შიგ ქალაქის ბალის შუაგულში აშენებული. ძალიან ლამაზი

ნაკეთები იყო. მშვენიერი ჩუქურთმებით შემკული, მაგრამ ეს იყო საზაფხულო პავილიონი და ზამთრობით არ თბებოდა. ორთავენი—მე და მაშო ჩხეიძე—იმ ღამეს გავცივდით თეატრში და ორივეს ფილტვების ანთება მოგვივიდა. სამწუხაროდ მაშო ერთი კვირის შემდეგ გარდაიცვალა, მე კი „გამოვძვერი“ და აი ხომ ხედავთ, რამდენი ხნის შემდეგ, რამდენი ხნის კაცი რამდენს გელაპარაკებით.

თუმცა საჯარო ლაპარაკსაც სწორედ იმ ხანებში დავეჩვიე. სწორედ საცოდავ მაშოს დამარხვაზე წარმოვთქვი ჩემი პირველი საჯარო სიტყვა. და მერე ისეთი სახელი გამიყარდა მიცვალებულებისათვის სიტყვის თქმისა, რომ ახლაც კი მწერალთა კავშირი მუდამ ვე მაგზავნის სამგლოვიარო სიტყვების სათქმელად, სხვა ოქროპირი ორატორები კი ჩუმად არიან...

ახლა ჩემსობას გამოსულა დიდი სასახლო არტისტი ქალა ნუცა ჩხეიძე... ის პირველად გამოვიდა ქუთაისის სცენაზე ზაფხულში, როდესაც სეზონი დასრულებული იყო. უთუოდ ამიტომ მეც ვერ მივიღე მონაწილეობა ამ წარმოდგენაში. ჰა, ჰა! უჩემოდ ისკუბა და გაანათა ქართული სცენა, რაღაც საქველმოქმედო წარმოდგენა უნდა ყოფილიყო, იდგმებოდა ჭიაკომედის პიესა „დამნაშავეის ოჯახი“ (კორადო), სადაც ნუცა აქრულებდა კატორღელის ქალიშვილის როლს. იმ დღევანდელი მოწონება თან დაჰყვა მის არტისტულ ნიქს და დღემდე ეს შარვანდელი მას არ ჩამოსცილებია; მართალია ის ამჟამად ხანდაზმულობის გამო სეზონებში აღარ ირიცხება, მაგრამ ყოველი მისი გამოჩენა საზეიმო საღამოებზე დიდ აღტაცებას იწვევს. ახსენდებათ მისი ზეინაბი, მედეა, მარგარიტა გოტიელევანი, სამეგრელოს მთავარი და სხვა მრავალი, დრამატიულტრალიკული როლები; პატარა, მაგრამ მშვენიერი აგებულების მქონე; მომხიბვლელი თვალების, გულში ჩამწვდომი ხმის პატრონი, მართლა დედოფლობდა ქართულ სცენაზე და უცხოეთიდან ჩამოსულ მნახველებსაც კი აკვირვებდა მისი გულწრფელი განცდა განსახიერებულ ადამიანებისა, მისი ხერხი რეალისტურ ხელოვნებისა. ასე რომ დღესაც მისი არტისტული სახელი მომაჯადოებლად დარჩა ქართულ თეატრის ისტორიაში.

ნუცა ჩხეიძეს გარდა სცენისა, ფეხი უდგია ქართულ მწერ-

ლობაშიაც და ამას წინად გამოსცა ძვირფასი მოგონებანი თავისი ცხოვრებისა.

ჩემთვისაც დაუვიწყარია მაშინდელი ქართული წარმოდგენები ქუთაისის თეატრში. კოტე მესხის, და შემდეგ ლადო მესხიშვილის მეთაურობით.

კოტე მესხს არ დასცალდა დიდხანს ჩვენთან მუშაობა, რადგანაც ის ლამაზი ხის პავილიონი, სადაც ჩვენ წარმოდგენებს ვმართავდით, დაიწვა და კოტე მესხიც თბილისში გადასახლდა. ასე რომ ჩვენ, ქუთაისის სცენის სხვა მოყვარულები, უხელმძღვანელოდ დავრჩით, მაგრამ რადგან დიდი ჯურვილი გვქონდა თეატრში მუშაობისა, ამიტომ დარჩენილებმა შევადგინეთ ამხანაგობა და ხარაზოვისეულ მინგრეულ თეატრში დავიწყეთ წარმოდგენების მართვა.

საქმეს სათავეში ჩაუდგენენ ზემოხსენებული ვასო ბალანჩივაძე (კომპოზიტორ მელიტონ ბალანჩივაძის ძმა) და მალაქია ბოლქვაძე, შემდეგში რუსეთში ცნობილი ქურნალისტი, მაშინდელი სახელმწიფოს სათათბიროს ბეჭდვითი ორგანოების ხელმძღვანელი. სხვებიც იყვნენ ჩვენთან წევრებათ, მაგრამ მათი უმრავლესობა ჩვენ არ შეგვრჩა, რადგან უსახსრობამ მათ სხვა სამსახური მოაქებინა. რევოლუციამდე ჩვენთან იყვნენ და საქმეს უანგაროთ ემსახურებოდნენ მიხეილ ჯანოევი (ნემო). გიორგი თუთბერიძე, კოწია ქურციკიძე. ვასო აბულაძე, ბოკორიშვილი და სხვანი.

ყველა ამათ ერთი მეორეში ძალიან კარგი ამხანაგობა გვქონდა და ჩვენი საქმისათვის ნამდვილად თავდადებულები ვიყავით. ქუთაისში გაემართეთ ერთ-ორი წარმოდგენა საჭირო თანხის შესაგროვებლად და გავსწიეთ სამოგზაუროდ შავი ზღვის სანაპირო ქალაქებში. რეპერტუარში გვქონდა ერთი რაღაც ძველი პიესა ჯორჯაძისა „ჰაეროსტატი“ და ვალერიან გუნიას „ვაის გვეყარე, უის შევეყარე“. ეს პიესები იმიტომ იყო არჩეული, რომ ორივე პიესაში ორ-ორი ქალის მეტი არ არის და ჩვენ გვეყავდა ივანიძის ქალი, უკვე კარგათ გამოცდილი მსახიობი და ერთიც ახალგაზრდა ცომაიას ქალი.

აქ უნდა მოვიხსენიო ერთი ჩემი სამარცხვინო საქციელიც: მამა ჯერ კიდევ ცოცხალი იყო და ჩემს აქტიურობას არ უყუ-

რებდა მაინცდამაინც კარგი თვალით. ყოველთვის მეუბნებოდა—მალეა აქტიურობა კარგია, მაგრამ ხალხი შენიდან მეტს მოელისო, ამიტომაც ჩვენი არტისტიული მოგზაურობის შესახებ არაფერი მითქვამს მამისთვის. სამოგზაუროდ ფულების სესხება დაგვჭირდა, ერთმა ჩემმა გიმნაზიელმა მეგობარმა, რომელიც თანაუგრძნობდა ჩემს თეატრალურ მუშაობას (პატარა რუსული ბროშურაც კი მათხოვა, სადაც ინგლისის განთქმული არტისტის გალიკის ცხოვრება იყო აღწერილი) მომცა მამამისის ვერცხლის პორსიგარი, რათა დამეგირავებინა და ფული შემეტანა სამოგზაურო ფონდში. მეც ასე მოვიქეცი, მაგრამ ვინც ფული მომცა, იმან გამგზავრებამდე შემიყვანა სადღაც დუქანში, ვითომ და გზის დასალოცად არაყი დამალევიანა. მე მაქვს ნათქვამი, რომ ღვინოს უკვე ვსვამდი, მხოლოდ არაყი არ მქონდა გასინჯული. და აქ კი ერთ კვანჩხს (რიუმქას) მეორეც მოყვა. უჩვევს მიაბა და რამდენიმე ერთად გადავკარი, ამან კი ისე შემათრო თურმე, რომ მეგობარი მიხვდა — სახლში მარტო ვერ წავიდოდი, ჩამსვა ფაიტონში, მომიჯდა თვითონ და შინ მიმიყვანა. მე ჩვენ ბინაზე ცალკე ოთახი მქონდა განკუთვნილი, ამ ოთახს შესავალიც ცალკე ჰქონდა. როდესაც მსახურმა ასეთ დღეში მყოფი დამინახა ჩუმად შემიყვანა ოთახში და ოთახის ქუჩაზე გამავალი ფანჯარა გააღო. ამასობაში დასის წვევებმა ვაგზალში დამიწყეს თურმე ძებნა — სად არის რატომ არ მოდისო, რომ კარგა შევიგვიანე კოწია ქურციკიძე და მეორე ამხანაგი გამოგზავნეს ჩემს სახლში, იმათ იცოდნენ ჩემი ოთახი საითაც იყო და გაღებული ფანჯრიდან მე რომ მწოლიარე მნახეს, ამიყვანეს და ფანჯარაში გადამაძვრინეს, მერე არ ვიცი როგორ, მგონი ეტლით, ვაგზალში მიმიყვანეს. აქ მეც გამოვფხიზლდი და შევეუდღეით მოგზაურობას. მხიარულად ვიმოგზაურეთ, რადგან ვასო ბალანჩივაძე და მიხეილ ჭანოევი ძალიან ხალისიანი ადამიანები იყვნენ.

ერთხელ ფოთიდან სუფსაში დაგვჭირდა გასვლა, აქ ეტლით მოგზაურობა გვჭირდებოდა და რადგან ღამე იყო, ჩვენც გაუფრთხილებამდე გზის პირად მდებარე დუქანში დავბინავდით. ზოგი მიწვა-მოწვა, ზოგიც საუბარში გაერთო, ზოგმა კერძი მოითხოვა. მე არაფერი მინდოდა და ტახტზე წამოვწექი, ზედ ვილაცის

ნაბადი წამოვიხურე. ცოტა ხნის შემდეგ ვიგრძენი რომ ჩემს ნაბადში ვიღაც შემოძვრა, იმანაც თავი მიღვა ძილად, ამასობაში ვიღაც ხნიერი კაცი შემოსულიყო ღუქანში და ვასობალანჩივადეს და მის ამხანაგებს სუფრაზე მიჯდომოდა და განკარგულებებს იძლეოდა როგორც მასპინძელი; ეს მოიტანეთ, ეს მოართვით „ვეი, პლენ!“ ჩვენიანებს ეს კაცი გაუმაპინძლდა. როდესაც გათენებამ მოაწია და სინათლე შემოვიდა ღუქანში, გაიხედეს და ეს მასპინძელი სადღაც გამქრალიყო, რაღას იზამდნენ, მთელი დანახარჯი მოგზაურმა დასმა გადაიხადა.

უკვე წასვლის დრო იყო. მე დამიწყეს გალვიძება, დაუწყებებნა ცომაიას ქალს — სად დაგვეკარგავო, ამ დროს მე წამოვდექი, ნაბადი გადავიხადე და ცომაიას ქალიც ჩემთან დაწოლილი აღმოჩნდა.

არა მკითხველებო, არა, ორთავენი ისეთი უბიწოები ვიყავით, როგორც ანგელოზები. თუმცა ხარხარი გამოიწვია ჩვენშაერთად წოლამ.

მოვიარეთ ბათუმი, ფოთი, სოხუმი, სადაც არც თუ განებივრებული იყვნენ იმ დროს ქართული წარმოდგენებით ეს ქალაქები, და ჩვენს დასშიდაც არ გვერია ისეთი სახელოვანი მსახიობი, რომ მის სახელს მიეზიდა საზოგადოება.

დიდებული აკაკის არ იყოს „ჩვენ უჩინონი“ ჩავდიოდით საგასტროლოდ და აფიშების გარდა ჩვენ წარმოდგენებს სხვა რეკლამა წინ არ უძლოდა, მაგრამ თვითვე ამ ქალაქში გამოგვიჩნდებოდა თითო გულშემატკივარი, და ის დარბოდა ოჯახებში, ხალხს აგულიანებდა წარმოდგენაზე წასასვლელად და ბილეთებსაც ასაღებდა. ასეთები იყვნენ: სოხუმში ანტონ ქარცივაძე, მაშინ სრულიად ახალგაზრდა ყმაწვილკაცი, ჩოხოსანი, თითქო მარტო კარტის მოთამაშე და მოქეიფე, მაგრამ თეატრალური საქმის მართლა მოყვარული კაცი, შემდეგ ბათუმში ნატარიუსად ნამყოფი და ერთი კარგი ინტელიგენტთაგანი; ფოთში კოწია მიქაბერიძე, იმ დროისათვის უკვე კარგად ცნობილი საზოგადო მოღვაწე და საშხედრო ექიმი, და ბათუმში — ადგილობრივ სცენისმოყვარეთა მეთაური სტიოპა ხარაზოვი, და ჩვენი სასახელო მწერალი დავით კლდიაშვილი.

ყველა ამათი მეოხებით თითქმის უსარალოთ თავდებოდა ჩვენი გასტროლები, მაგრამ ფოთში ერთი მანდილოსანი ჩავვაცივდა, მის რომელიღაც ღარიბ სტუდენტის სასარგებლოდ. ერთ-ერთი ჩვენი წარმოდგენა გაგვემეორებინა, ბილეთებიც წაიღო გასასაღებლათ, მაგრამ იმედი არ გაუმართლდა და წარმოდგენის მთელი ხარჯები ჩვენს ამხანაგობას დააწვა კისერზე. ამის შემდეგ ჩვენ სოხუმში უნდა წავსულიყავით და სამოგზაურო ბილეთების ფული ძლივს მოვხიკეთ ერთიმეორეში. თვითონ სოხუმში კი, ზემოხსენებულ ქარცივაძის მეოხებით, ადვილობრივ ბანკში გაგვიხსნეს კრედიტი. ჩემის ხატრით, როგორც დადიანს, ალექსანდრე შარვაშიძემ მოგვიწერა ხელი ვექსილზე და როგორც მაშინ ვასო ბალანჩივაძე ამბობდა „ვალებიდან ამოვტყაპუნდით“.

ქუთაისში დაბრუნების შემდეგ ჩვენი ამხანაგობა შეუდგა მომავალ სეზონზე ზრუნვას, მაგრამ რა კი ვიცოდით, რომ ჩვენ ახალგაზრდებს, როგორც არტისტებს, ისეთი ნდობა საზოგადოებაში არა გვქონდა, ამიტომ გადავწყვიტეთ დასის მეთაურად თბილისიდან ლალო მესხიშვილი მოგვეყვანა.

ის მაშინ უკვე დაავადებული იყო, თავისი საუცხოვრო ხმა დაკარგული ჰქონდა. თბილისში უანგაემენტოდ ცხოვრობდა; არავინ არ იწვევდა. ჩვენ კი ვირისკეთ და ერთხელ რომელიღაც წარმოდგენაზე საგასტროლოთ მივიწვიეთ, მაგრამ ძალიან შევეწუხდით რომ ის ამ დროს მართლა ჩიფჩიფებდა და ხალხს ნაკლებად ესმოდა მისი სიტყვები, მაგრამ ისეთი სახელი ჰქონდა მოხვეჭილი ჯადოქარი არტისტისა, რომ ამ წარმოდგენაზე ხალხი თეატრში არ ეტეოდა.

შევადგინეთ ამხანაგობა, ჩაეუმატეთ ახლებიც და ლალოს ხელმძღვანელობით გავხსენით სეზონი, ეს იყო და ეს; ლალო მართლა მონდომებით ჩაუდგა სათავეში სეზონის წაყვანას. თითონაც ხმა თანდათან გამოუკეთდა და ხალხს უკვე უხაროდა მისი სცენაზე გამოსვლა, იმავე დროს თან შემოიზარდა შემდეგში სახელმძღვანელო არტისტები: ნუცა ჩხეიძე, საშა იმედაშვილი, იუზა ზარდალიშვილი და სხვები და ამ გვარად რაღაც ათი წლის განმავლობაში ქალაქ ქუთაისში ისეთი ბრწყინვალე სეზონები ჩაატარა, რომ თვითონ თბილისის თეატრსაც კი შურდა.

თვითონ იყო საუცხოვო სილამაზის პატრონი, მისი დიდ-
რონი და აზროვანი თვალები საკიროების დროს სცენაზე იყ-
ნენ გამომეტყველნი საყვარულისა და სათნოებისა, სიძულე-
ლისა და ბოროტებისა, მრისხანებისა და სასოწარკვეთილებისა
და ყველაფერი ეს დიდის ძლიერებით მიდიოდა მაყურებლამ-
დე და მაყურებლის გულს ატოკებდა, ამშვიდებდა, მრისხანე-
ბას გვრიდა... შუა ტანის კაცი იყო, მაგრამ მკვრივად ჩასხმუ-
ლი, კარგი ტანადი და უთუოდ ამიტომ ყოველგვარი ტანისა-
მოსი, კლასიკური და თანამედროვე, ერთნაირის სიკობტავით
აჯდა მის სხეულს. აგერ კლასიკური პეტრონიუსი — რომაულ
მანტიებში გამოხვეული, გაიოზ ფაღავა — ჩვენებურ ჩოხა-
ახალუხში გამოკობტავებული, ლევან ხიმშიაშვილი — ქართუ-
ლი ქულაჯით დამშვენებული, მელანქოლიური ჰამლეტი, სა-
შუალო საუკუნეთა ჯუბასა და მოსასხამში. ხან სამხედრო ჯაე-
შან-აბჯარში გამოწყობილი და ხან თანამედროვე პიჯაკსა და
ჰალსტუკში, — ყველა ამეებში მუდამ საუცხოვო სანახავი იყო.

მაგრამ, ეს შეეხება მხოლოდ გარეგნობას, შინაგანი განც-
დების გადმოცემა ხომ საოცარი იცოდა. მისი უსიტყვო პაუზე-
ბი ხომ განთქმული იყო. მეცა მაქვს ეგ აწერილი მისთვის გან-
კუთვნილ წერილში.

ისე ცხოვრებაში იყო მეტად სასიყვარულო კაცი, ნაზი სუ-
ლისა და გულჩვილი, მეტად თანაზიარი ადამიანებისადმი და
მუდამ მზადმყოფი შეჭირებულთა დასახმარებლად. არც იყო
ყოყლოჩინა და გაამპარტავნებული ხალხის მოწონებით. თუმ-
ცა იმავე დროს ის იყო ამაყი სულიერად და იცოდა თავისი
ფასი და არც არასოდეს ის არ უნახავთ უფლებამოსილი დიდი
კაცის წინაშე მოკუნტული და დაკნინებული. იმავე დროს ის
იყო ფრიად განათლებული. ის იყო უნივერსიტეტის სამედი-
ცინო ფაკულტეტის მეორე კურსიდან გამოსული, და გარდა-
ამისა, იყო საერთოდ საზოგადოებრივ საკითხებში გარკვეული
და განვითარებული ადამიანი, ასე რომ, ის არ იყო შემოზღუ-
დული მარტო სააქტიურო კირ-ვარამით. მას შეეძლო თამამად
დასწრებოდა როგორი დონისაც გინდათ შეკრებილებას, და
თავის ცოდნით და შეგნებით ღირსეული ადგილი დაეკირა.

მის დროს არამც თუ ჩვენში, საქართველოში, არამედ რუ-

სეთში და ევროპაშიდაც კი, ნიკზე არ ვამბობ, ეს ხომ თავის-თავად იგულისხმება, ინტელექტუალურად ამისთანა მომზადებული არტისტის მოძებნა ძნელი იყო. ყოველივე ამისათვის ძლიერად უყვარდა ჩვენს ხალხს. სადაც კი წარმოითქმებოდა ლადო მესხიშვილის სახელი, ხალხს თითქო რაღაც ბედნიერება მიანიჭესო, სიხარულის იერი გადაეფინებოდა სახეზე.

ეს იყო, მართლაც რომ საქართველოსათვის ერთი უშესანიშნავესი ფიგურა.

ქუთაისში ჩემი თეატრში ყოფნის დროს კიდევ იყვნენ სხვა საყურადღებო მსახიობები: მიხაკო (მიხეილ) ჯანოევი („ნემო“) და გიორგი თუთბერიძე; მიხაკო ჯანოევი უნავერსიტეტის რომელიდაც კურსიდან ავადმყოფობის გამო იყო გამოსული. გონებამახვილი, ფრიად განათლებული კაცი. ავადმყოფობამ შეუშალა ხელი, თორემ ცხოვრების რომელიმე დიდ დარგში იქნებოდა უსათუოდ შესამჩნევი პიროვნება, მაგრამ სტუდენტობის დროს გამხდარა მგონი ტიფით ავად, ძლივს მოურჩენიათ. შემდეგში დიდათ განერვიანებულა, ისე რომ უბრალო გაფაჩუნებაც კი მასზე გავლენას ახდენდა და შეაწირალებდა; როდესაც მას გარდაეცვალა მისი უნცროს დათაგანი, მეტის მეტი ნერვიული გახდა, თუმცა უაქიმეს, გამოაბრუნეს, მაგრამ ხელების ძიგძიგი მაინც შერჩა, ბუნებით კი მაინც ხალისიანი და ცოცხალი კაცი იყო, ვერ გაძლო უსაქმოდ და სცენას მოაშურა. ის, შთამომავლობით სომეხი, იყო ქუთაისში დაბადებული და აღზრდილი, მესაკუთრეც კი, ასე, რომ ვინ არ იცნობდა მას ქუთაისში. გადახჩუებულ ბებერ დედაკაცებიდან პატარა გონებამდე. სახლიდან გამოსული ყოველ დილით ჩამოუვლიდა ამ ხალხს და შეჰქონდა მათში დიდი ორომტრიალი, იყო დამცინავი და ჰქონდა დიდი ნიჭი წაბაძვისა. ესახლა ქალაქის ცენტრიდან მცირე მოშორებით, პატარა შეღმართის ქუჩაზე, ყოველ დილით უნდა გაევილო მთავარი ქუჩა თავის ბულვარით და მიეღწია თავის თეატრამდე, გზაში შეხვედრილებს გააციუნებდა, გააჯერებდა, წაბაძავდა, ებრაულ სცენებს წაუყითხავდა, აქა იქ განგებ ჰორსაც ჩაურთავდა და თითქმის მთელი ქალაქი აფორიაქებული ჰყავდა. განსაკუთრებით ეხერხებოდა ებრაელების ცხოვრებიდან სცენების გადმოცემა და ისე შე-

ზავებული ჰქონდა ეს სცენები, რომ ებრაელებში არავითარ შეურაცყოფას არ იწვევდა და იმავე დროს მათი ყოფაცხოვრების გამომხატველი კი იყო. უნივერსიტეტიდან დაბრუნების შემდეგ, ის ჭერ სცენისმოყვარეებში ღებულობდა მონაწილეობას, შემდეგ კოტე მესხის დასში, ბოლოს ჩვენ შემოგვეერთდა და თითქმის სიკვდილამდე ქუთაისის თეატრს არ ჩამოშორებია. ყველასათვის საყვარელი კაცი იყო, დასის ყველა წევრთან შეხუმრებული იყო, მაგრამ იგრძნობდით, რომ ყველას მისი დიდი პატივისცემა ჰქონდა. მე ხომ თავიდანვე დამიმეგობრდა და უნდოდა, როგორც გამოუცდელი ახალგაზრდა, სწორ გზას არ ავცდენილიყავ, ამისათვის ქადაგებას კი არ დამიწყებდა ხოლმე, როგორც უფროსებმა იციან, არამედ ამხანაგურად სახუმარო ამბების მოყოლით თან მაკინებდა, თან ჩამაფიქრებდა ხოლმე. მეც მას ვეტანებოდი და ხშირად დამყავდა მამაჩემთან, რომ ამ ორი სხვადასხვა კაცის ნაფიქრი და ნაცადი სიტყვები მომესმინა.

ჩვენთან დასში იყო სასულიერო სემინარია-დამთავრებული გიორგი თუთბერიძე. ეს იყო მეტათ დინჯი ახალგაზრდა, მუდამ წიგნებში ჩალრმავებული და მიღებული როლებით გატაცებული. უყვარდა უფრო მარტოობა, მაგრამ საზოგადოებაში, ნადიმებზე მშვენიერი მომღერალიც იყო, ძალიან კარგი ტენორი ჰქონდა. საერთოდ ჩვენს დასში იყვნენ კარგი ხმის მქონენი და როდესაც საერთო სუფრას მიუსხდებოდით, ჩვენს სიმღერას სიამოვნებით ისმენდნენ სხვა სუფრაზე მსხდომნიც.

უთუოდ მოგეხსენებათ, რომ ქუთაისი, დიდებული აკაკის თქმისა არ იყოს „საეარდო და სამაისო“ იყო ჩემსობასაც, თანაც მეტათ ხალისიანი და მომღერალი ხალხით სავსე. ასეთ მომღერლებისაგან შესდგებოდა ერთი წრე ახალგაზრდა მოქეიფე თავადებისა, რომელთა შორის განთქმულნი იყვნენ ბონდო მიქელაძე, კოკინია მიქელაძე, კოტატი შუბლაძე, მინა ბოლქვაძე და სხვა. ამ წრეს ჩვენი დასის მომღერლები არ ჩამოუყარდებოდნენ, და ამ მხრივაც, მსახიობობის გარდა, ხალხში ცნობილნი ვიყავით.

ერთი მეორეში გვქონდა კარგი და მკიდრო მეგობრობა, თითქმის ყველა ჩვენგანი ღარიბი იყო და ხშირად ჭიბეცარიე-

ლი, მაგრამ გულს არ ვიტყვით, საზოგადოებაში მაინც ამ-
ყად გვეჭირა თავი და იმ დროის პოლიტიკურ და სხვა საკირ-
ბოროტო საკითხებზე ჩვენც დიდი კამათი გვექონდა ხოლმე.
ვასო ბალანჩივაძის გარდა თითქმის უცოლოები ვიყავით, თი-
თონ მიხაკოც კი, მაგრამ მათ სასახელოთ უნდა ითქვას, რომ
ყველახი სპეტაკი საქციელისანი იყვნენ, ერთი რამ უზნეო და
უხეში რამ ჩადენილი მე არ გამიგონია მართლაც; გულუბრყვი-
ლო და სულიერად წმინდა ადამიანები იყვნენ, მარტო თეატრს
შეჰხაროდნენ, ხელოვნებას შეტრფოდნენ, ლაღო მესხიშვი-
ლისთანა არტისტული ხელოვნება უნდოდათ შეესწავლათ და
საერთოდ ქართულ თეატრს თავიანთი შრომით გამოდგომოდ-
ნენ.

მე პირადად, მამა რომ გარდაიცვალა და ჩვენი ოჯახი დაი-
შალა ქუთაისში, გიორგი თუთბერიძესთან ერთად დავიჭირავე
ოთახი და პირველად დავიწყე დამოუკიდებელი ცხოვრება.
სრულიად გამოუცდელი ვიყავი, მაგრამ გიორგისთან ყოფნამ
ბევრი რამ სასიკეთო შემძინა: დისციპლინაობა ჩემს საოჯახო
ცხოვრებაში, წესრიგი, დროს განაწილება კვებისა და მუშაო-
ბისათვის, არავითარი ზედმეტი, არავითარი ხელზე გადაყოლა
არ არსებობდა გიორგის კოდექსში და მეც ამან ამიყოლია.
საკვირველია კიდევ ერთი რამ, მე ხომ მსახიობი ვიყავ და ისიც
ახალგაზრდა, ეტყობა მეც მოეწონდი ახალგაზრდა გოგოებს და
მომდიოდა მათგან სატრფიალო „უსტარები“, მაგრამ მე მათ
არ გამოვხმაურებივარ, როდესაც ქალთა გიმნაზიის კართან ჩა-
მოვიარდი მარტოხელა, გიმნაზიის სხვადასხვა ფანჯრებიდან
გადმოყოფდნენ თავს გიმნაზიელი გოგოები და ცალკალკე
გაიძახოდნენ—„დადიანი დუშკა“, „დუშკა დადიანი“. მე ამეეპს
არ ვიმჩნევდი და, როგორც მოაზროვნე ფილოსოფოსი თავის
აზროვნებაში ჩაღრმავებული, ამაყად ჩავიარდი მათ წინ.

ეპ, რა კარგი დრო ყოფილა თურმე.

აი ასეთ ხალხში ვერიე და ასეთ ცხოვრებას ვეწეოდი ჩემს
სიკვამყისას ქუთაისის თეატრში.

მაგრამ მთლად უმანკოები არ ვიყავით ქუთათური ყმაწვი-
ლები, ღვინოს ხშირად ვსვამდით, ვთვრებოდით კიდევ, მხო-
ლოდ საღამოობით რეპეტიციების ან წარმოდგენების შემდეგ.
ხარჯს კი უსწორდებოდით, ან ჩვენს შორის მოკრებილ ფულე-

ბიოი, ან უფრო ხშირად, ჩვენი პატივისმცემელი ხალხის გამაჰ-
პინძლების წყალობით.

ჯერ-ჯერობით მე არ მომიხსენებია ჩემი პირველი გზის გამ-
კაფავი და მასწავლებელი თეატრის ანაბანაში, უთუოდ შესა-
ნიშნავი ფიგურა ჩვენი თეატრისა, კოტე მესხი.

ეს იყო ტანმოკრილი, კარგა ჩამკვრივებული სხეულის
პატრონი. ბოლო ხანებში ცოტა მუცელი წამოეზარდა, თორემ
ისე ყველაფერი გამოზომილი და სიმეტრიული ჰქონდა. სახე
გაბადრული, წვერ-ულვაშ გაპარსული ჩემ ღროს და მშვენიე-
რი მოყვანილობის თვალების პატრონი. ეს თვალები თითქოს
საგვარეულო თვალები იყო მესხების ოჯახებისათვის! კოტე,
ივანე, სერგო, ნესტორი—ეს ვაყებში, ქალებში— ფეფიკო და
ნუცა ასეთი საუცხოვო და შესამჩნევი თვალების პატრონები
იყვნენ. უფრო ცისფერი იერი დაკრავდათ, ჩხია და უცნაური
სითხით საესე, რომელსაც ცვალებადობის დიდი უნარი შესდ-
გომოდა, განსაკუთრებით მათ შორის უნცროსი დის ნუცას
თვალებს.

აქვე უნდა მოვიხსენიო ერთი უცნაური ამბავი: ხსენებული
ნუცა მეტად მოზღნეილი ტანადი და იერიანი ქალი იყო. ვაუ-
თხოვარი იყო და ქუთათური კავალრები თავს დასტრიალებდ-
ნენ. მთელ ქალაქს უყვარდა მოსი სახის და ხასიათის გამო. ერთ
ზამთარში ქუთაისისათვის უჩვეულოდ დიდი თოვლი მოვიდა,
კარგა ბლომად სახურავებზე დასდო თოვლი და სახურავებიდან
საწვეთებზე ჩამოეშვა ყინულის ლოლუები, ერთ-ერთ სახლის
წინ. საქმეზე მიმავალ ნუცას სახურავიდან მოწყვეტილი ერ-
თი გრძელი ლოლუა შლიაპაზე დაეცა, თავი გაუხვრიტა და
იქვე სული გააცხოვინა...

დაუბრუნდეთ ისევ კოტეს.

კოტე გიმნაზიადამთავრებული და სკენით გატაცებულე პა-
რიზს წავიდა იქაური თეატრების და ფრანგული სასცენო
ოსტატობის შესასწავლად; საქართველოში დაბრუნებულმა თან
ჩამოიტანა დიდი სიყვარული ფრანგული რეპერტუარისა, უნა-
რი სამსახიობო ხელოვნების გამოვლინებისა; მეგობრები პირ-
შააც დასცინოდნენ, რომ მას ქართული მეტყველების აქცენ-
ტიც კი ფრანგულთან ჰქონდა შეფარდებული. მხოლოდ ამას

კოტესთვის ხელი არ შეუშლია, რომ ქართულ სცენაზე გამოე-
სახა უდიდესი ტიპები ევროპელ კლასიკოსებისა. უმათავრესად
კი ის იყო სახასიათო როლების შემსრულებელი. ვისაც კი ის
უნახავს, მისთვის დაუვიწყარია მის მიერ შესრულებული ნერო-
ნის როლი, პატა წულუკიძე, პეტრუჩიო, აზნაურის როლი
ჩეხოვის „ალუბლის ბაღში“, ნაპოლეონი და სხვა.

კოტე იყო საერთოდ მეტად განვითარებული კაცი. აქტიურ
მონაწილეობას ღებულობდა მისი ძმის—სერგეი მესხის გაზეთ
„დროებაში“ და მის მომდევნო პრესაშიაც, იმავე დროს ის
თარგმნიდა და თვითონაც წერდა ორიგინალურ პიესებს, ხში-
რად ხელმძღვანელობდა თბილისსა და ქუთაისში დრამატიულ
სეზონებს, ხან მარტო და ხან ვასო აბაშიძესთან, ან ვალერიან
გუნიასთან ერთად. რეჟისორობით ხომ ყოველთვის დასში
ერთ-ერთ მორიგე წამყვან რეჟისორად ითვლებოდა. ამასთან
იყო ძალიან მახვილი ენის პატრონი და მშვენიერი მოლაპარაკე.
მის მომსწრეებს ძალიან კარგათ ახსოვთ მისი ნამახვილევი და
მოსკოვში მის მიერ ნათქვამი სიტყვა მცირე თეატრის იუბი-
ლეიზე დღესაც დაუვიწყარია. მან უთხრა განთქმულ არტისტს
ერმოლოვას ქალს: „როცა მე გნახეთ ზეინაბის როლში ნათლად
განვიცადე თუ საქართველოს ბედზე როგორ სტიროდა რუსის
ქალი ქართული ცრემლებით“, იუჟენის კიდევ ასე შეეხუმრა:
„შენ უღალატე საქართველოს, მაგრამ ეს ლალატი შენი „ლა-
ლატით“ გამოისყიდევ“.

ერთია შესამჩნევი:

ქუთაისის ქართული თეატრი, გარდა თავისი პირდაპირი
დანიშნულებისა, ერთგვარად ემსახურებოდა ქართული ინტე-
ლიგენციის აზროვნების გაღრმავებას და სიფაქიზეს. მაშინ
ქუთაისი, მეტწილად, წარმოადგენდა მოვაკრე ხალხის და და-
წესებულების მოსამსახურეთა ლიანგს, მათში ერია აგრეთვე მო-
ქეიფე თავადაზნაურთა წრე და ძალიან მცირე ნაწილი ინტელი-
გენციისა. ასე რომ ქუთაისის თეატრის შემადგენლობა თავის
აზროვნებით მაინც ოაზისს წარმოადგენდა, მხოლოდ მათ შო-
რის, მათ შეკრებილებაში, თუმცა ლეგალურს, მაგრამ ძალიან
გაბედულს სიტყვებს და იდეათა აღიარებას მოისმენდით.

მართალია, მაშინ ქუთაისში მუშაობდა საშა წულუკიძის

მეთაურობით არალეგალური „იმერეთის კომიტეტი“, მაგრამ ქუთაისის დასს მაინცდამაინც დიდი დამოკიდებულება არ ჰქონდა მასთან. არც თუ რევოლუციურ მოძრაობაში ლებულობდა მონაწილეობას, მხოლოდ აქა იქ, თითო-ორიოლა დასის ახალგაზრდა წევრი ლებულობდა სხვადასხვა მარქსისტულ წრეებში საიდუმლო მონაწილეობას.


ასე მაგალითად: ჩვენთან მუშაობდა აქტიორად მეტად ცოცხალი, ნიჭიერი ახალგაზრდა ნესტორ კალანდარიშვილი. ის დაკისრებულ როლებსაც საუცხოვოდ ასრულებდა ხოლმე და ღვინის სმაში და ქეიფშიაც მონაწილეობდა. მხოლოდ ჩვენ ის გვაკვირვებდა, რომ რეპეტიციების დროსაც ნესტორი სადღაც დიდი ხნით დაიკარგებოდა, და როდესაც მას რეჟისორი უსაყვედურებდა, ის რაღაც ისე სახუმარო მიზეზებს დაასახელებდა, რომ მისი დასჯა აღარავის აღარ უნდოდა, მით უფრო, რომ მის დროს დასი ამხანაგობას ეკუთვნოდა და ჩვენ ჯარიმებს და სასჯელებს აღარ მივდევდით. ბოლოს მაინც გამოვარკვიეთ, რომ ის თურმე რომელიღაც რევოლუციონერ წრეში საიდუმლოთ ლებულობდა მონაწილეობას. და ჩვენც მეტი პატივისცემით გავიმსჯვალენით მისდამი. შემდეგში ხომ მან დიდთ თავი ისახელა ციმბირში რევოლუციონერ ბრძოლებში და კოლჩაკის დამარცხებაში, ასე რომ მას რომელიღაც ციმბირის ქალაქში, სახელი არ მახსოვს, ძეგლი აქვს აღმართული. ისე კი პირადად ცხოვრებაში მეტად საყვარელი კაცი იყო, კარგი სამეგობრო, ხუმარა და ცოტა ფოციანიც. სხვათა შორის ნარდს თამაშობდა მშვენიერად, მაგრამ როდესაც საჭირო კამათელი არ გამოუვიდოდა, ახტებოდა-დახტებოდა, კამათლებს გინებდა დაუწყებდა, თავბედს იწყევლიდა, ხოლო როდესაც ცოტათი დამშვიდდებოდა თვითონვე აუტყდებოდა ხარხარი.

ამგვარად ქუთაისის დასიდან, თითო-ორიოლა ამხანაგი, ჩვენც არ ვიცოდით ისე მუშაობდა არალეგალურ რევოლუციონერ წრეებში. ის კი არა საბრძოლო იარაღები, ხელყუმბარები და სხვა ამგვარი დიდი საიდუმლოებით მზადდებოდა ჩვენი თეატრის საბუთაფორიო და სარეკვიზიტო განყოფილებაში. ყოველივე ამას მეთაურობდა ჩვენი სცენის ე. წ. მაშინისტი აწ განსვენებული სერგო ჭელიძე. რასაკვირველია, პოლიცია ამას

სუყველათერს თვალ-ყურს ადევნებდა, მაგრამ მაინც, როდესაც თეატრში, ანტრაქტების დროს, პარტერი დაბნელდებოდა, მთელი თეატრი არალეგალურ პროკლამაციებით მოიფინებოდა და შემდეგ, როდესაც გაანათებდნენ თვითონ ლაღო მესხიშვილი გამოდიოდა (ხანდახან გრიშში მოქმედ პირის ტანისამოსში) და ხალხს მიმართავდა მგზნებარე სიტყვებით. ამის შემდეგ იყო რომ პოლიცია ერეკებოდა ხალხს თეატრიდან და ატუსაღებდა კიდევ. მაგრამ ხალხი მაინც „მარსელიოზას“ სიმღერით იშლებოდა. დატუსაღებულებში ხშირად ერია სცენის მუშები, თვითონ ჭელიძეც. მაგრამ რადგან მათ გასამტყუნებელ, ხელის-ჩასავლელ საბუთს ვერ უპოვნიდნენ, ხშირად ათავისუფლებდნენ თუ იმ დამეს არა, მეორე დღით მაინც. თუმცა პოლიციის უნდარმერის სისასტიკეს ვერ გადაურჩა ერთი მშვენიერი ახალგაზრდა, საუცხოო ინტელიგენტი, რომელიც ჩვენს დასში მოკარნახედ მსახურობდა — თეოფილე მშველიძე; როდესაც ის კაზაკებს მიჰყავდათ დატუსაღებული, ეითომ გაქცევა დააპირაო და გზაშივე მოჰკლეს.

ისე-კი მკითხველს მოეხსენება, რომ ქუთაისში ქართული დასი მესხიშვილის მეთაურობით, კაზაკების საწინააღმდეგოთ თეატრის წინ ბარკადებს უდგა სათავეში, მაგრამ რასაკვირველია, ასეთ ზომების მიღებაზე ყველას უარი უნდა ეთქვა, რადგანაც ცარიზმის მთავრობამ ქუთაისს და მის გუბერნიას ალიხანოვის დამსჯელი რაზმი შემოუსია.

ამგვარად ჩემი განვითარება სიჭაბუკის დროს მიმდინარეობდა უფრო ქუთაისის თეატრის კულუარებში; აქ, ცხადია, მთავარი ჩემი განმანათლებელი უფრო რეპერტუარი იყო, დრამატურგია. მსახიობებში და თეატრის გარეთაც კამათი შექსპირზე, იბსენზე, ჰაუპტმანსა და მირბოზე, რომელთა პიესებს ხშირად ვდგამდით, იყო ჩვენი შეხლა-შემოხლის საგანი. აქ, რაღა თქმა უნდა, ჩამოგვერეოდა ცოტა სუსტად მოაზროვნე რევოლუციონერი და შემოჰქონდა თავისი ამაღელვებელი ნაკადო, მაგრამ ერთ გარკვეულ აზრს მაინც ვერ ვადგებოდით. მე სწორედ ამ დროს გამიტაცა ანარქისტების მიერ გამოცემულმა პატარ-პატარა ბროშურებმა. მაშინ საქართველოში მუშაობდნენ განთქმული ძმები გოგულები კომანდო და სხვ. და რაღა თქმა



კობე მესხი.

უნდა განსაკუთრებულად კომანდო დიდად მომზადებული კაცი იყო, ძალიან გამჭრიახად წერდა... იმ ხანებში მე წაგიკითხე კარგა მოზრდილი წიგნი რუსი მხატვრის სერგეი მაკოვსკისა „მშვენიერებაზე“, ეს წიგნი ისეთ გუნებაზე დააყენებდა კაცს, რომ რევოლუციონური ბრძოლა კი არაა საჭირო ადამიანთა განთავისუფლებისათვის, არამედ ხელოვნება იხსნის კაცობრიობას სიდუხჭირისაგან, მხოლოდ ამას დრო უნდა, ხალხის შემზადება; ევოლუცია და არა რევოლუცია! რადგან რევოლუცია არის ძალადობა, მიძალეა და არა თვითშეგნების ნაყოფი. ასეთ გუნებაზე დამაყენა მაკოვსკიმ, მაგრამ როდესაც ანარქისტებში გავეცანი უფრო დიდ მოაზროვნეებს, როგორც კრაპატკინს, ელიზე რეკლიუსს, სულ სხვაგვარ მოვიანათლე, მხოლოდ როდესაც მაქს შკილნერი გადავიკითხე, ჩემს აზროვნებაში ავხტი და დავხტი, ძალიან მომეწონა მის მიერ უარყოფა სახელმწიფოს მართვა გამგეობისა, რომ არ უნდა არსებობდეს საერთოდ სახელმწიფო ერთეული, არ უნდა იყოს სახელმწიფოს სათავეში არც ხელმწიფე, არც პრეზიდენტი, არც პარლამენტი. ხალხი უნდა იყოს თავისუფალი და ამ ხალხს უნდა შეადგენდეს დიდად მომზადებული, განათლებული, თავისუფალი, დამოუკიდებელი პიროვნებანი. ანარქისტებს არც პოლიცია, არც მეომარი ჯარი ჰყავდათ გათვალისწინებული. რაღა სახელმწიფოები არ იქნებიან, ვიღა ეომება ერთი მეორეს და რაკი ინდივიდები, ცალკეული პიროვნებანი იქნებიან დიდად მომზადებულნი, მაშასადამე, არაეითარი დანაშაულის ჩადენას არ ექნება ადგილი და არც პოლიცია და არც სასამართლო საჭირო აღარ იქნებაო. ჩემისთანა გრძნობიერ კაბუქისათვის მაშინ ეს პრიმიტიული შეხედულება საზოგადოების წესწყობილებაზე მეტად მომხიბლელი იყო და კარგა დიდხანს ვიყავ ტყვედ ამ ორი დებულებისა, რომ ერთეული სახელმწიფო არ უნდა არსებობდეს და ქვეყანას იხსნის ხელოვნება. ესეც მანამ, სანამ მიმდინარე რევოლუციურმა ცხოვრებამ სულ სხვა რამ არ დამიმტკიცა და რეალურ გზაზე არ მატარა. კარგი ის იყო, რომ მანამდე ჩემ შემუშავებულ დებულებას არსად არ ვქადაგებდი და ამხანაგებშიაც კი ძლივ ვიტყოდი რამეს ამის შესახებ. ეს უთუოდ მისთვის, რომ ჩემთვის ნამდვილი დომინანტი „ხალ-

ხის სამსახური“ იყო. ზემოთაც მაქვს ნათქვამი, რომ მამას ადამიანის უდიდეს მოვალეობად ხალხის სამსახური მიაჩნდა. როგორც ხედავთ მეც ამ გზას გავყევე და ამ გზაზე რაც ვნახე და განვიცადე იმაზე ვლაპარაკობ.

ასე რომ მე უფრო ვტრიანლებდი მსახიობთა წრეში და თითქმის ყოველ დღე დილიდან საღამომდე მათთან ვიყავი რეპეტიციებზე თუ სპექტაკლებზე. ისე, რასაკვირველია, ქუთაისში ვიცნობდი ზოგიერთ ოჯახებს, მაგრამ მე მათთან არ დავდიოდი, მიუხედავად იმისა, რომ ხშირად მისაყვედურებდნენ, რატომ ჩვენთან არ დაბრძანდებითო. დავდიოდი, ისიც იშვიათად, მხოლოდ ერთ ოჯახში. ეს იყო დეიდაჩემის ელპიტის, შერაბ ლორთქიფანიძის ოჯახი. ეს იყო ერთი მოწინავე ოჯახი, სადაც საღამომობით ხშირად იკრიბებოდნენ ქუთათური ინტელიგენტები და ჰქონდათ სჯაბაასი და კამათი იმ დროის საქართველოს საკვირბოროტო საკლდეებზე. თვითონ ოჯახიც მრავალ რიცხვანი იყო—ხუთი ქალი და სამი ვაჟი ამშვენებდა ამ ოჯახს. ჯერ თვითონ დეიდა ელპიტი განსახიერებდა იყო ნამდვილი ძველებური ქართველი ქალის ტიპისა, შემდეგ თვითონ მერაბ ლორთქიფანიძე, რომელიც არ იყო დიდი ნასწავლი, მაგრამ ბუნებრივი გონება და ნიჭი იმდენად ეხმარებოდა, რომ საზოგადოებრივ საქმიანობაში აქტიურად მონაწილეობდა. მისი ორი უფროსი ვაჟი—ალექსანდრე და იასონი ამშვენებდნენ ქართველ ინტელიგენტთა წრეს სხვადასხვა საზოგადოებრივ სამსახურით და მათი სულ უნცროსი ძმა ნიკო ლორთქიფანიძე ხომ ერთ-ერთ დიდ პროზაიკოსად გვევლინება მეოცე საუკუნის პირველ ნახევარში.

ალექსანდრე და იასონი მათი სტუდენტობიდან მახსოვს, როდესაც მათ ქუთაისის გიმნაზია დაასრულეს თავიანთ ამხანაგებთან ერთად თითქმის ყოველ საღამოს მოდიოდნენ მამაჩემთან, მათ შორის ერივნენ შემდეგში ცნობილი ნიკო მარი, მწერალი პეტრე მირიანაშვილი, რომლის კალამსაც ეკუთვნის „აბესალომ და ეთერის“ ლიბრეტო და სხვ. მათ მამასთან უფრო ძველ ქართულ ლიტერატურაზე და ძველ ქართულ სიტყვებზე ჰქონდათ საუბარი. ზოგ უცხო სიტყვებსაც აქართულებდნენ, თარგმნიდნენ და ერთი მეორეში ისე ხმარობდნენ.

მე ასე ათი-თერთმეტი წლის ბავშვი ვიქნებოდი, მაგრამ მეც იმათში ვერიე და ვისმენდი მათ ლაპარაკს და ოხუნჯობას. ასე მაგალითად, აქამდე მახსოვს სიტყვა „ენდალმა“, რაც ქართულად ნიშნავდა დიპლომს. ამაზე მახსოვს ერთი მათგან შეთხზული სახუმარო ლექსი:

„შენი ენდალმა
წაიღო წყალმა,
გონს ვერ მოგაგო
სამშობლოს ვალმა“.

ჩემი აქტიურობისას მე, აგრეთვე, ასე თუ ისე, ვმეგობრობდი ქუთაისის თავადაზნაურთა ახალგაზრდობის წრეს. ჩოხა-ახალუხში გამოწყობილნი მშვენიერი შესახედაობის ყმაწვილები ქეიფის და არშიყობის მეტს არაფერს აკეთებდნენ, მაგრამ მათ შორის ყოფნა მაინც სასიამოვნო იყო, რადგანაც თითქმის ყველანი მოსწრებული სიტყვის პატრონები იყვნენ, განსაკუთრებით პიბინია მიქელაძე და სერგია ერისთავი. ისინი მთელ ამ წრეს თითქო შეთაურობდნენ. დათიყო მიქელაძე, ბონდო მიქელაძე, ნიკო ფალავა და კიდევ სხვა ფალავები და მიქელაძეები... მათი ქეიფი ხომ განთქმული იყო. საუცხოვო სიმღერები, მოსწრებული სიტყვები და ზრდილობიანი საქციელი ერთიმეორეში. არავის არასოდეს არ ახსოვს, რომ მათ რაიმე სამარცხვინო საქციელი ჩაედინოთ საზოგადოებაში. მიუხედავად იმისა, რომ ყველა მათგანი უსაქმური იყო, ზოგიერთის გარდა. სხვა მხრიდანაც ჩამოსულ სტუმრებს აოცებდა და ხიბლავდა მათი ასეთი კეთილშობილური საქციელი, ზოგი მათგანი თანაუგრძნობდა კიდევ რევოლუციონერებს ქუთაისში.

მეც კინალამ ჩამითრია ამ წრემ თავის მიმართულებაში. სწორედ იმ დროს ცოლიც შევირთე, მაგრამ ძალიან ჩამაფიქრა ჩემმა პირადულმა მომზადებამ: რას წარმოვადგენდი? ერთი უეციი ჩოხა-ახალუხში გამოწყობილი ისეთივე „ტლუ ბიჭი“, როგორც ვიყავ ბერთემში. ამიტომ გადავწყვიტე წავსულიყავ რუსეთს და უმაღლესი სწავლა მიმელო. მხოლოდ წასასვლელად მოსკოვი ავირჩიე, რადგან მქონდა წაკითხული, რომ მოსკოვი გულია რუსეთისა, პეტერბურგი ტვინი... და აი ჩავედი მოსკოვს.

მოსკოვს მარტო მივდიოდი და ამ ქალაქს სრულიად ვერ
 ვიცნობდი, მაგრამ გზაში აღმომიჩნდა ერთი კეთილშობილი
 პიროვნება. ვინმე რუხაძე, სამწუხაროდ სახელი არ მახსოვს.
 ნაქარი დიდი ქუთათური ვაჭრების ელიგულაშვილებისა და ის
 შეიქნა ჩემი ჩიჩერონე. თუმცა გზაშიდაც არ მაკლებდა ყუ-
 რადღებას, ერთად ვსაუზმობდით, ერთად ვსადილობდით და
 ერთად ვსაუბრობდით. ჩვენი მატარებლით პეტერბურგს მი-
 დიოდა, აწ გარდაცვლილი, მეტად ნიჭიერი ახალგაზრდა სტუ-
 დენტი კუქიკო მიქელაძე. ძალიან ცოცხალი კაცი იყო, ხუმარ-
 რაც და თან მამის სახლში დაჩვეული იყო კარტის თამაშს.
 მამამისი იყო ერთ დროს დიდი მეჭამულე, მოქეიფე და სტუ-
 მართმწყვარე კაცი. ამ მგზავრობისას კუქიკო ჩვენს კუპეში
 ჩამოჯდა და სასაუბრო რომ შემოგვევლია, წინადადება მოგვცა—
 კარტი ვითამაშოთო, ჩვენც დავეთანხმეთ და კარგა ხანს ვთამა-
 შობდით. ძილის დრომ მოაწია და მე კარგა წაგებული ვიყავი
 და ჩემი მეგობარი რუხაძეც. მაგრამ თამაშის გაგრძელებას ძი-
 ლი ვარჩიეთ. გათენდა თუ არა, საუზმის შემდეგ, ისევ შევუდე-
 ქით თამაშს. თამაშის დროს შემოგვემატა პეტერბურგს მიმავა-
 ლი ქორქია. შემდეგ კიდევ ერთი ახალგაზრდა ჩამოჯდა ჩვენ-
 თან. ჩვენ მოთამაშეებს დათქმული გვექონდა, რომ არავინ უცხო
 თამაშში არ მიგველო, მაგრამ კარგა ხანმა რომ გაიარა, რუხაძემ
 თავი დაანება თამაშს. არ ვიცი მოწყინდა თუ წაგების გამო.
 დავრჩით სამნი: მიქელაძე, ქორქია და მე, ჩვენ განვაგრძეთ
 თამაში, ის უცხო კი ძალიან მონდომებით გვიყურებდა, შემდეგ
 განაცხადა, რომ მას სურს თამაშში მონაწილეობა მიიღოს. კუ-
 ქიკომ გამოკითხა ვინაობა და იმანაც უპასუხა, რომ ის არის
 დერპტის უნივერსიტეტის სტუდენტი, გვარად ლაშხი. ჩვენც
 შემოვიერთეთ. ეს ის დრო იყო, რომ კარგა ღამდებოდა და ამ შე-
 მოერთებულმა ისეთი დღე დაგვყავინა, რომ კინაღამ ფულები-
 დან გავიცალენით. თითონ ლაშხი ძალიან წუხდა ჩვენს წაგებას
 და პირველმა იმან შემოგვთავაზა, რომ თამაში მეორე დღისათ-
 ვის გადაგვედო და ჩვენც ასე მოვიქცეთ. მეორე დღეს კუქი-
 კოს მოუვიდა ხელი და ლაშხს თითქმის მისი მოგებული სულ
 ჩამოართვა, მეც გამიცარიელდა ჯიბეები. ამ დროს ჩვენ უკვე
 მოსკოვს ვუახლოვდებოდით, მივედით კიდევ, შევედით სად-

გურში, მე უნდა ჩამოვსულაყავ, კუჭიკო პეტერბურგს მიდიო-
და, ქორქიაც, ლაშხი კი ამ „პასაჟირების“ ფაქციფუცში სადღაც
დაგვეკარგა. მე და კუჭიკო ძალიან შეეწუხდით. რადგან შე-
ვატყვეთ, რომ ლაშხს ფულები აღარ ჰქონდა, მაგრამ რას ვი-
ზამდით. კუჭიკომ მითხრა—ის ხომ დერპტს მიდის, მაშასადა-
მე ის პეტერბურგს უნდა ჩავიდეს და გზაში მოვძებნი სადმეო.
მაგრამ შემდეგში კუჭიკო რომ ვნახე, მითხრა—არ მიინახავსო,
ასე რომ მე და კუჭიკომ უნებლიეთ „გავყვლიფეთ“ ერთი
ქართველი სტუდენტი. მშვენიერი ყმაწვილი, კეთილი და
ზრდილობიანი.

ჩამოვხტი მოსკოვში და მაშინვე ჩემი რუხაძე ამედეგნა:
„შენ ვერ იცნობ შალვა მოსკოვს, მე წანომყევი და სასტუმრო-
საც მიგაგნებინებო“. ჩავჩქით „ვანკაში“, მაშინ ვანკები და
ლიხაჩები იყო მხოლოდ მოსკოვში. რუხაძემ ლუბიანკაზე მო-
მიყვანა. იქვე სასტუმრო იყო, სადაც ქართველი ვაქრები და
ნოქრები ჩამოხტებოდნენ თურმე, მეც იქ დამაყენა. მოვისყე-
ნეთ, ვისადილეთ და სადამოც შეიქნა. რუხაძემ გამიყვანა სას-
ტუმროდან და ფეხით წამიყვანა, მითხრა ასე უფრო გაეცნობი
ცენტრალურ ქუჩებსო. გავედით კიდეც ტვერის, ახლანდელ
გორკის ქუჩაზე და გავყევით იქ, სადაც ეხლა პუშკინის ძეგლი
დგას, იმის ცოტა აქეთ იყო ელისეევის კაფე. რუხაძემ შემიყ-
ვანა, დამსვა ერთ მაგიდასთან, თვითონ გაიარ-გამოიარა და ბო-
ლოს ორი მშვენიერი რუსის გოგო მომიყვანა სტუმრად.

ასე მეძაობით დაიწყო ჩემი ცხოვრება მოსკოვში.

მაგრამ არა, ეს ტყუილია, ამითი ნამეტანი ცილს ვწამებ
ჩემს თავს, მე ამ გზას არ გავყოლივარ.

მოსკოვში უწინარეს ყოვლისა გავიცანი ქართველი სტუ-
დენტობა, რადგანაც ვეძებდი ისეთ ახალგაზრდა სტუდენტებს,
რომლებსაც ახლად დამთავრებული ჰქონდა გიმნაზია და კარ-
გათ ახსოვდა საშუალო სკოლის საგნები, რათა ესენი ყველა
გაერკვია და ესწავლებინა ჩემთვის, რადგან სახლიდან დამაბა-
რეს, რომ ჭერ ატესტატი აიღე და ისე გახდი უნივერსიტეტის
სტუდენტი. გაცნობილ სტუდენტებში მირჩიეს ახლად კურს-
დამთავრებული ევგენი გეგეჟკორი ამეყვანა მასწავლებლად.
ის მაშინ არც ისე აშკარად სოციალ დემოკრატობდა. უთუოდ

ამიტომ არც კი ცდილა ჩემთვის დაენერგა მისი მოძღვრება, წხოლოდ ისე კი მაქებდა თურმე: „რა ნიჭიერი კაცია შალვა, ძალიან მალე ითვისებს საგნებსო“. მე კი რა მექნა, თორემ ძალიან მეზარებოდა ესეთი „უჩინიკური“ სწავლა, მაგრამ შემდეგში გავიცანი უკვე უხუცესი სტუდენტთაგანი ლეო ნათაძე, შემდეგ ცნობილი მენშევიკი და ჟურნალისტი, და იმან სულ დამინგრა ჩემი გეგმები, მითხრა: „რად გინდა დიპლომი ან, უნივერსიტეტში სწავლა, ისე განვითარდი, წაიკითხე შეისწავლე მაგ. პოლიტიკური-ეკონომია, სხვადასხვა სოციალისტური წიგნები, მიიღე საერთო განვითარება და შემდეგში რა გზასაც გინდა იმას დაადექიო“. ამასობაში მე ქართველ სტუდენტთა სათვისტომოში მიმიღეს და მეც მოუწყინრად ვესწრებოდი მათ კრებებს. ერთხელ მეც წამაკითხეს მოხსენება მამიჩემის ცხოვრების და შემოქმედების გარშემო, იქვე, ამ სათვისტომოში, გავეცანი პლენაროვის ერთ არალეგალურ ბროშურას, სადაც ის სვამდა საკითხს, რომ მთელი რუსეთი გადაქცეულიყო ფედერატიულ სახელმწიფოდ, იპერიიაში შემავალ ყოველ ეროვნებათა მიხედვით, რომ ყოველ ეროვნებას თავის ფედერატიული ერთეული ჰქონოდა. მაგრამ სტუდენტობაში ყველა არ ემხრობოდა ამ მოსაზრებას, თუმცა ხარკოვის სათვისტომომ მაშია ორახელაშვილის, (რომელიც მაშინ ხარკოვის უნივერსიტეტის სტუდენტი იყო) მეთაურობით გამოგვიგზავნა მათი მოსაზრება და ჩვენ გვთხოვდა გამოგვეთქვა ჩვენი აზრი. ჩვენმა სათვისტომომ მე დამავალა ეს პლენაროვის მოსაზრება გადაეღო ჩვენს მანქანაზე, რასაკვირველია ეს ძალიან საიდუმლოთ უნდა მომხდარიყო და მეც გამაგზავნეს ერთ-ერთ სტუდენტის ბინაზე, სადაც ყველაფერი მზად დამხვდებოდა გადასაბეჭდად და შემდეგ მომეტანა სათვისტომოს ხელმძღვანელებთან, მაგრამ დახეთ ბედს. სწორედ მაშინ, როდესაც არალეგალურ ქალაქებს ვებქდავდი, იმ საღამოს სათვისტომოს სხდომა ჰქონია, რაჟაყ, რასაკვირველია, მე არ დავსწრებივარ, ჩემი დამზადებული ქალაქით წამოვედი სათვისტომოსკენ და გზაში შემხვდა ჩემი მეგობარი სილოვან გაბუნია და ქართულად მომაყვირა კიდევ: „ცოცხალი ხარ?“ შემდეგ ამიხსნა, რომ წუხელ ქანდარმერია თავს დასხმია სათვისტომოს და ვინც იქ

იყო, ყველანი დაუტუსაღებიათ. ასე რომ შენ სათვისტომოს
 სულ ნუ გაეკარები და არც შენ ბინაზე წახვიდე, იმიტომ, რომ
 დანამდვილებით ვიცი, შენც გაუჩხრეკიხართ და ეხლა რაც შენ
 მოგაქვს არალეგალური ნაშუშევიარი, სადაც გინდა იქ გააქრო.
 ეს მითხრა და გამშორდა. ერთხანს ვიდექ გაცხუნებული და
 არ ვიცოდი რა ზომები მიმეღო. შემდეგ გავსწიე. იქვე ახლოს
 ხიდი იყო მასკვა-რეკაზე და ვიფიქრე — წყალში გადავადებ
 მეთქი, მაგრამ ხიდის მოაჯირს რომ გადავადექი, ჯერ ერთი —
 ხიდზე უამრავი ხალხი მიდი მოდიოდა და არ შეიძლებოდა რო-
 მელიმე იმათგანს არ შეენიშნა, ის კი არა, როდესაც წყალს
 გადავჩერებოდი, ერთი ორი კაცი შედგა ჩემთან, თან მკითხეს
 რამ დაგაინტერესა, რას ჩაჩერებიხარ მაგ მდინარესო. მეც
 ძლივს მოვახერხე მეპასუხნა — ეგერ პატარა „პარახოლი“ რომ
 მოდის, იმას შევჩერებივარ მეთქი, ამ ჩემს პასუხზე იმათ ჩაი-
 ფრუტუნეს და გამშორდნენ. უთუოდ იფიქრეს — ეს ვილაცა ხა-
 მი კაცია, მოსკოვში ჯერ არ ყოფილა იმიტომდა ასე გამოშტე-
 რებულიო. მე კი სიმწრის ოფლს მასხამს. როგორ მოვიშორო
 ეს არალეგალური ლიტერატურა და გავწიე ისევე სილოვან-
 გაბუნიას ბინაზე; ის ცხოვრობდა ებრაელების ოჯახში და მე-
 იმ ოჯახს კარგად ვიცნობდი. იქ ქალები შემომეგებნენ და და-
 მიწყენს უბრალო საუბარი, მე კი გული მისკდება. სად დავ-
 მალო, სად წავილო? უეცრად მოვიფიქრე — მოდი ფეხსაღ-
 გილში შევალ და გადავადებ მეთქი, მაგრამ მე არც ისე ში-
 ნაური ვიყავ ამ ოჯახში და ისიც ქალებთან როგორ უნდა ვა-
 მემხილა ჰაპირფარეშოში შესვლა და ამიტომ ეს აზრი უკუ-
 ვადე და უფრო მოხერხებული ადგილის მოსაძებნად ქუჩაში
 გამოვედი, დავინახე იმპერატორ ალექსანდრე II-ს ძეგლი
 თავის გალავნით ფერდობზე; ბალის პირად გადამდგარი. ახლო-
 იყო და იქ მივაშურე. ძეგლს ბალის მხრიდან მივადექი გალა-
 ვანთან. გალავანს ჰქონდა ისეთი ადგილები, უჯრებივით გამოყ-
 ვანილი, რომ მოვინდომე იქ გადამემალა, მაგრამ ზევით ძეგ-
 ლისკენ რომ ავიხედე, მოაჯირიდან თავზე ვილაც დამყურებდა,
 მე ტანში გავსწორიდი; ის „ზედამხედველი“ მოშორდა მოაჯირს,
 მაშინ ისევე მოვინდომე გადამალვა, მაგრამ ზევიდან ახლა ვილაც
 სხვა გამოჩნდა. არ იქნა და არა, ვერ მოუხერხე გადამალვა. ჰო,

რა გავწვალდი, სულ თავბედი ვიწყევლე, მაგრამ ბოლოს გამახსენდა და საჩქაროდ გავწიე კბილის ექიმ თეიმურაზ ხორავასთან. მშვენიერი კაცი იყო, დიდი ინტელიგენტი. რომ მივედი პაციენტები ჰყავდა, მაგრამ მე სიამოვნებით შემეგება. იმასაც ცოდნოდა სათვისტომოს დატუსალების ამბავი და გაუხარდა, რომ მე გადარჩენილი ვიყავი. პაციენტები რომ გაისტუმრა, მე გაუზიარე ჩემი გაჭირვების ამბავი, ბევრი იცინა, შემდეგ მიმიყვანა გერმეტიულ ფეხთან და მითხრა მომეც შენი ავლადიდებაო და ჩემს ქალაღებს შიგ ღუმელში შეუძახა და, რასაკვირველია, მეც თავისუფლად ამოვისუნთქე.

ამის შემდეგ მთელი ერთი კვირა არ გავკარებდევარ ჩემს ოთახს, შემთხვევით შემხვდა და წამიყვანა ჩემმა კარგმა ნაცნობმა ივლიანე ქავთარაძემ, რომელიც თურმე მოსკოვს დამხლევევ საზოგადოების საქმეებზე იყო ჩამოსული, იმავე დროს იყო დიდი პურმარილის კაცი; მოქეიფე, კარტის მოთამაშე და აშეებში ატარებდა დროს. მეც არ გამიშვა, მითხრა: მეც ამ დღეებში მივიღივარ საქართველოში და ერთად წავიდეთო, შენ ეხლა ფული არ გექნება, ტელეგრამა დაუკრათ შენს სიმამრს და სამგზავრო ფულს გამოგიგზავნისო. მეც ასე მოვიქეცი.

მოსკოვში კიდევ გავეცანი ერთ რუსის ოჯახს, ვინმე სობოლევს. ძალიან დამიახლოვდა და ხშირად მიეყავიდი თავის ოჯახში, მასთან სადამოობით ხშირად იკრიბებოდა ათი-ხუთმეტი ქალი და კაცი. ზოგი ინჟინერი, ზოგი ექიმი და სხვადასხვა პროფესიის ადამიანები. მე არ მერიდებოდნენ და როგორც გამოვარკევე ესერები იყვნენ. არალეგალური წრე ჰქონდათ და მეცადინეობდნენ. თვითონ სობოლევი ძალიან განვითარებული კაცი იყო და მისი საუბარი ღეჭკიებს უდრიდა. მე კი ყველაფერს მასმენინებდნენ, მაგრამ არაფერს არ მავალეობდნენ. ერთი რამ კი ჩამრჩა გუნებაში, როდესაც ჩამოვარდა ლაპარაკი გალილეიზე და თქვეს დედამიწა მრგვალიაო, ერთი ახალგაზრდა წამოღგა და დაგვიმტკიცა, რომ ახლა მიწა მრგვალი კი აღარ არის, არამედ „ტეტრაედრს“ წარმოადგენსო. ე. ი. თითქო ოთხკუთხოვან, გვერდებში შეკრებილ ფიგურასო. ამან ყველა გააკვირვა და მე კი ჩამრჩა გულში.

საქართველოში ქავთარაძე ველარ წამოვიდა, მე შინიდან მო-



ლადო მესხიშვილი.

მივიდა ცოტა ფული და საქართველოსაკენ გამოვემგზავრე. ჩემს მეუღლეს შევატყობინე, რომ ზესტაფონში ამა და ამ დღეს ვიქნები მეტქი, მეუღლე დამხვდა ზესტაფონში, მაგრამ მითხრა: ქუთაისს უნდა წახვიდე მამაჩემთან და მე ხვალ ჩამოვალ. მეც ვიყიდე ქუთაისის ბილეთი და რაონის სადგურზე რომ ჩამოვედი, იქ დამხვდა მთელი კამპანია ჩვენი მოქეიფე თავად-აზნაურებისა. ნაღვინევი იყვნენ, სიმაპრთან არ გამიშვეს. ჩემი ბარგი-ბარხანა კოკინია დგებუაძემ წაიღო თავის სახლში, მე კი აქ შემატოვა მოქეიფეებს, შეიპირა რომელ რესტორანშიდაც ვიქნებოდით. მეც ამ პირველ დღიდან შევეუდექი ქუთაისის სავარდო და სამაისო „მოღვაწეობას“, მაგრამ სანამ ამეებო ალწერას შევეუდგებოდე, მანამდე უნდა მოვიხსენიო ის მცირე, მაგრამ მაინც „ბაგაი“, რითაც მოსკოვის თეატრალურმა ხელოვნებამ დამტვირთა და რაც მე საქართველოში წამოვიღე.

ცხადია, რომ მოსკოვში, გარდა დიპლომის აღებისა, მე პირადად უფრო თეატრებს მივეტანე, შედარებით „გამოცდილი“ აქტიორიკ ვიყავი, თეატრი საერთოდ დიდად მიყვარდა და მოვინდომე იქაური წარმოდგენების გაცნობა. განსაკუთრებით სამხატვრო თეატრისა, ის მაშინ (1903 წ.) ახალი დაარსებული იყო, მაგრამ მაინც დიდი სახელი ჰქონდა მოხვეჭილი, თუმცა მე სხვა თეატრებშიდაც დავიწყე სიარული: მცირე თეატრში ვნახე მეტად საყურადღებო წარმოდგენებიც და გავეცანი ჩვენსასახელო თანამემამულეს ალექსანდრე სუმბათაშვილ-იუჟინს. მან როგორღაც თითქო დამიანლოვა. ის რომ მაშინ მოსკოვში თავმჯდომარე იყო ქართული საზოგადოებრივი ორგანიზაციისა და ყოველ 14 იანვარს მისი მეთაურობით (ახლა სვეტებიანი დარბაზი) მაშინდელ თავად-აზნაურთა კლუბში იმართებოდა ქართული საღამოები. ამ საღამოებში მონაწილეობას ღებულობდნენ მოსკოვის საუკეთესო-არტისტული ძალები უსასყიდლოდ, მხოლოდ სტუდენტობას ევალებოდა, მათ ხლებოდნენ და ცალ-ცალკე სათითაოდ ეკიპაჟით მოეყვანათ საღამოზე, მე მაშინ თან მქონდა წაღებული და ჩოხა-ახალუხს ვიცეამდი. ხშირად მე და ზემოხსენებული ივლიანე ქავთარაძე (იხაც ჩერკესკით) ტვერის ბულვარზე გავისეირნებდით ხოლმე. მოსეირნეები ღიმილით და ხალისით შემოგვცქეროდნენ.

არ ვიყავით ცუდი სანახავეები.

მახსოვს, ერთხელ, ერთმა გენერალმა ჩამოგვიარა ქალებთან ერთად, ცოტა ხანს შედგა, შემოგვაჩერდა და ქალებს ხმა-შალლა გადაულაპარაკა „*Хорошие люди*“ ამაზე ჩვენც გაგვეცინა და იმათაც.

და აი როდესაც მოახლოვდა ქართული საღამოს დღე, იუ-ენმა დაგვიბარა ქართული სათვისტომოს ზოგიერთი წევრი და ყველას დაგვაწავლა, თუ ვის რა გაგვეკეთებინა. მე მითხრა: „თქვენ, კნიაზ შალვა, ჩაიცვით თქვენი ჩერკესკა, ეახელით არტიტ ქალს მიტკევიჩის და საღამოს რვა საათისათვის მოგვიყვანეთ“ მეც ძალიან გამეხარდა, რადგანაც მიტკევიჩის ქალი იმდენად თავის არტიტობით არა, რამდენადაც თავის სილამაზით იყო განთქმული. ვეახელი, ცოტახანი დამაცდევინა, რომ მორთულიყო. შემდეგ ჩავჯექით კარეტაში და გამოვსწიეთ საკრებულოსკენ. კარეტაში მხოლოდ ჩვენ ორნი ვართ: ეს იშვიათი სილამაზის ქალი, საუცხოვოთ მორთული და საუცხოვო სურნელება მოფრქვეული და მე, ქართველი ახალგაზრდა რაინდი, მაგრამ უბედურება! ამ რაინდმა არ იცის თუ რითი გაართოს ეს წარმტაცი ბანოვანი. დიდხანს ვართ ჩუმად, მხოლოდ ისევ მან გამომიწვია სალაპარაკოდ:

— თქვენ ქუთაისიდან ხართ?

— დიახ.

— მე ვყოფილვარ ქუთაისში, გასტროლებზე და არასოდეს არ დამავიწყდება იქაური დროსტარება და სიამოვნება. როგორ არის კნიაზი ბონდო?

აქ გამახსენდა თუ როგორ დატრიალებდნენ თავს ამ მიტკევიჩის ქალს ქუთაისის მოქეიფე თავად-აზნაურები, განსაკუთრებით ბონდო მიქელაძე და საშა ერისთავი...

ვიცი რომ მომეცა შემთხვევა, მეც გამება ფლირტი ამ კარეტაში, მაგრამ ხმას ვერ ვიღებ. თითქოს დამბლა დამეცა. უცხო ქალებთან, ისიც ლამაზებთან, ზოგჯერ მჭირდა ასეთი საქციელი, უკან დახევა. საერთოდ ლამაზ ქალებთან ჩემ დამოკიდებულების შესახებ სადღაც ამ ნაწერში მაქვს ნათქვამი... ამა-სობაში ასე მდუმარეთ მიგვიყვანა ეკიპაჟმა საკრებულოში. იქ მიტკევიჩის ქალი ჩავაბარე მორიგ დიასახლისებს, იმათაც მა-

შინვე მიუჩინეს მას შამპანიურის კიოსკი. მის შემდეგ, არც იმ სადამოს მიტკევიჩის ქალს არ გავკარებთ და არც სხვაჯან არასოდეს არ მინახავს.

სადამო კი დიდებული გამწვიდა. მოსკოვის საუკეთესო არტისტები თითქოს ერთი მეორეს ეჯიბრებოდნენ თავიანთი ხელოვნებით და დიდ ოვაციებს იწვევდნენ. აგრეთვე მეტად კარგი შთაბეჭდილება დატოვა ქართველ სტუდენტთა ხორომ, რომელიც მოამზადა მაშინ მოსკოვში მცხოვრებმა. შემდეგში ცნობილმა კომპოზიტორმა, დიმიტრი არაყიშვილმა.

ბოლოს გამოვიდა თვითონ იუენინი და წაიკითხა რუსული თარგმანი ბარათაშვილის „მერანისა“. ის ხომ დიდი დეკლამატორიც იყო.

საერთოდ იუენინი მაშინ უკვე დიდად მიჩნეული არტისტო, დრამატურგი და საზოგადო მოღვაწე იყო. დიდათ მომზადებული, დიდი გონების პატრონი. მუდამ იყო სასურველი წევრი მოსკოვის მოწინავე საზოგადოებისა, იმავე დროს იყო საქართველოს დიდი პატრიოტი, რასაც ის სიტყვებით კი არა, მოქმედებითაც ამჟღავნებდა. არა ერთი ქართველი სტუდენტი და ინტელიგენტი მოუწყვია მას სასწავლებელში თუ სამსახურში.

სწორედ იმ წელიწადს დაბეჭდა ჟურნალში მისი განთქმული პიესა „ღალატი“. დადგა კიდევ თავის რეჟისორობით მცირე თეატრის სცენაზე, მე კი იმდენად გამაბედნიერა, რომ „ღალატის“ პრემიერაზე სრულიად უსასყიდლოდ პარტიერის სავარძლის ბილეთი გამომიგზავნა.

საუცხოვო წარმოდგენა იყო. პირველად ვნახე დიდებული ერმოლოვა საპასუხისმგებლო როლში. ის ასრულებდა ზეინაბს და რამდენი გულწრფელობა, რამდენი პათოსიანი ნიუანსი ჰქონდა მოხმარებული ამ დიდად რთული როლის განსასახიერებლად. დიდებული იყო აგრეთვე განთქმული ლენსკი ანანისა როლში. ნამდვილი ქართველი ჰქონდა გლეხი იდგა თქვენ თვალწინ. სხვებზე ბევრს ვერაფერს ვიტყვი, ოთარბეგის როლს თვითონ იუენინი არ ასრულებდა მაშინ, არამედ საერთოდ საუცხოვო მსახიობი მცირე თეატრისა რიბაკოვი, და მე ვერ დამაკმაყოფილა, რადგან ის უფრო მაგონებდა მაზეპას და არა ქართველ ფეოდალს. მაინცაღამაინც მე ამ სადამოს უდიდესი ესთე-

ტური პატრიოტული სიტკობება ვიგობენი ერმოლოვასა და ლენსკის საოცარი სცენიური ოსტატობით.

ამის შემდეგაც იუეინს ჩემთან ურთიერთობა არ შეუწყვეტია. მოსკოვში ყოველ ჩემ ჩასვლისას უთუოდ უნდა მენახა და ისიც უთუოდ მპატიეებდა თავის სახლში, ხშირად სადილადაც. მისი თბილისში ჩამოსვლის დროს ხომ ვასო აბაშიძეს და მე თავიდან არ გვიშორებდა. ისე ეხლაც მაქვს შენახული მისი სუცხოვო წერილები ჩემდამი და მათ შორის საოცარი შეფასება ჩემი პიესის „გუშინდელნი“-სა, რომლის წარმოდგენა მას ბათუმში ენახა და აგრეთვე ჩემთვის დიდად საამაყო მომართვა ჩემს საიუბილეო საღამოზე მოსკოვში. მე აგრეთვე წილად მხვდა უკანასკნელად გამოეთხოვებოდი მის ძვირფას ნეშტს, როდესაც მას თბილისზე გავლით მოსკოვს მიასვენებდნენ, თბილისის სადგურზე უამრავმა ხალხმა მოიყარა თავი მის პატივსაცემად და მე მერგო გამოსათხოვარი სიტყვებს თქმა და აგრეთვე გახეთ „ზარია ვოსტოკაში“ სამგლოვიარო წერილის დაწერა.

მოსკოვში კი, რასაკვირველია, სხვა თეატრების გარდა მე უფრო ხშირად ვესწრებოდი სამხატვრო თეატრის სპექტაკლებს. დიდათ მოვიხიბლე ამ თეატრის რეჟისორული ხელოვნებით, საერთო საკვირველი ანსამბლით, მათ ჰყავდათ წამყვანი არტისტები, რომლებიც შემდეგში დიდად ცნობილი შეიქნენ, როგორც მაგალითად კაჩალოვი, მოსკოვინი, კნიპერ-ჩეხოვა, მაგრამ სხვა არტისტებიც, სრულიად უბრალო როლების შემსრულებლებიც, თითქოს დიდის უბრალოებით, მაგრამ მაღალ ხარისხოვან ოსტატობით ასრულებდნენ დაკისრებულ სათევარებს. მართალია მე მათთან არ შევესულვარ სამეცადინოთ ასე როგორც შემდეგში ჩვენი ცნობილი რეჟისორები აკაკი ფაღავა და აწ განსვენებული შალიკაშვილი და წუწუნავა, მაგრამ ისე ხშირად ვესწრებოდი მათ წარმოდგენებს, რომ ჩემის ფიქრით ბევრი რამ გაუგე მათ სისტემას და სცენიურ ოსტატობას, ასე რომ, როდესაც საქართველოში დავბრუნდი და კვლავ შევეუდექი ქართულ სცენაზე მუშაობას. შეძლებისდაგვარად ვცდილობდი „მათი ხაზით“ მემუშაენა, განსაკუთრებით ჩემი რეჟისორობის დროს და მათი უნარით წამყვანა სპექტაკლები; ასე რომ, მოსკოვიდან საერთოდ ხელცარიელი არ დავბრუნებულ-

ვარ. მართალია, არც გიმნაზიის ატესტატი მიმიღია, არც უნივერ-
სიტეტში შევსულვარ დიპლომის ასაღებად, მაგრამ მოსკოვში
მაინც ბევრი რამ შემიძინა როგორც საზოგადოებრივად, ისე
ჩემ სპეციალობაშიაც. აქ თვითონ სამხატვრო თეატრის ხელმ-
ძღვანელობა. განსვენებულ ვახტანგს ძალიან დიდი გეგმები
სკის მეტად ზრდილობიანი მოპყრობა და ხანგრძლივი საუბარი,
განსაკუთრებით ქართულ თეატრზე. რაც შეეხება ნემიროვიჩ-
დანჩენკოს, იმასთან უფრო დავახლოვდი მოსკოვში მეორედ
ჩასვლისას. მაშინ როდესაც ვახტანგ მკედლიშვილის მიერ და-
არსებულ ქართულ დრამატიულ სტუდიაში მიმიწვიეს ერთ-ერთ
ლექტორად და მკედლიშვილის უეცარი გარდაცვალების შემ-
დეგ, საქართველოს მთავრობამ მე მომანდო ამ სტუდიის ხელ-
ძღვანელობა. განსვენებულ ვახტანგს ძალიან დიდი გეგმები
ჰქონდა და საბოლოოდ უნდოდა, რომ სტუდიაში ოთხი წლის
მუშაობის შემდეგ, თავისი საკუთარი თეატრი შეექმნა საქარ-
თველოში. ანისთვის ჩავიდა წინასწარ თბილისში და გასინჯვის
შემდეგ იქ შეაგროვა მომავალ სტუდიაში მომუშავე ახალგაზრ-
დობა.

ვახტანგ მკედლიშვილი, როგორც მკითხველს მოეხსენება,
იყო მორიგ რეჟისორად სამხატვრო თეატრში, სადაც ის იყო
მარჯვენა ხელი თვითონ სტანისლავსკისა. სხვათა შორის მორიგ
შეტერლინგის პიესა „ლურჯი ფრინველი“ სტანისლავსკის გე-
მით ვახტანგის დადგმული იყო და ამ წარმოდგენას დიდი მო-
წონება ჰქონდა მოსკოვში.

სტუდიაში მან საქართველოდან მოსკოვში ათიოდე ახალგაზრ-
და ქართველი ჩაიყვანა. სხვადასხვა საგნების შესასწავლად მან
მოიწვია უფრო სამხატვრო თეატრიდან სპეციალისტი ლექტო-
რები, მათ შორის იყვნენ ბარატოვი. ესლაც ცნობილი რეჟისორი
მოსკოვში. პედაგოგი დემიდოვი. აგრეთვე პედაგოგი-რეჟისო-
რი კოტლუბაის ქალი და კიდევ მეტყველების, ფიზკულტურის,
ფარეკაობის და ცეკვის მასწავლებლები. ყველა ესენი მართლა
კარგად ყავდა შერჩეული განსვენებულს და მათი ლექციები და
პრაქტიკული მეცადინეობა უსათუოდ დიდად გამოსადეგი და
ნაყოფიერი იყო, მაგრამ საცოდავს არ დასცალდა, რომ თავის
დიდი საქმე ბოლომდე მიეყვანა, თურმე გულით იყო ავად-

მყოფი და ერთ საღამოს თავის კაბინეტში მუშაობის დროს სული დაღია. ამის შემდეგ ამ მშვენიერი საქმის გაძღოლა შედამაწვა. მეც განსვენებულის ნაკვალევს მივყევი და მისი გეგმით ვმუშაობდი, მაგრამ უნდა აქვე ითქვას, რომ ჯერ ვახტანგის სიცოცხლეშივე ბევრი მტრები გაუჩნდა ამ სტუდიას, განსაკუთრებით საქართველოდან.—ვინ არის მკედელიშვილი, რა გამოჩენილი ხელოვანი ის არის, ერთი მორიგი რეჟისორია საქართველო თეატრისა, ან რა ნივთიერი სახსრებით წაუძღვება საქმესაო. დაბეზლება დაბეზლებაზე მიდიოდა საქართველოს მთავრობაში. მხოლოდ როდესაც მკედელიშვილი გარდაიცვალა, მაშინ მე მომდგნენ—ვინ არის ვილაც ძველი თავადი, რა ესმის თეატრალურ ხელოვნებისა, ის ხომ სცენისმოყვარეობდა ერთ დროს და ამისთანა დიდი საქმის ჩაბარება უმართებულოაო. ის კი არა ერთხელ თვითონ სტალინს მიართვეს ქაღალდი, ვილაც დადიანი გამოგზავნეს აქ ქართულ სტუდიის ხელმძღვანელად და ის ახალგაზრდობას უქადაგებს, რომ საქართველომ თავის საკუთარი მეფე უნდა იყოლიოსო. მე გავვოცდი, როდესაც სტალინმა ეს ქაღალდი შე გამომიგზავნა. მეც მაშინვე შევეცადე, რომ მოსკოვში ჩვენს საქართველოს წარმომადგენლობას გამოეყო სპეციალური კომისია სტუდიის საკითხის შესასწავლად. კომისია შედგა, სასაცილოდაც არ ეყოთ დაბეზლებაში მოხსენებული ამბები, მაგრამ ამ დროს მოსკოვში იყო საქართველოს განათლების კომისრის მოადგილე მარიამ ორახელაშვილი და იმან თქვა ამ საკითხს ჩვენ საქართველოში გადავწყვიტავთო. საქართველოში კი სტუდიის მტერ-მოყვარეებმა იმდენი მოახერხეს, რომ მთავრობას გამოატანია გადაწყვეტილება სტუდიის დახურვისა.

აგრეც მოხდა, სტუდიელები დარჩნენ უპატრონოდ, მაგრამ მათ სასახელოდ უნდა ითქვას, რომ ისინი არ დაიბნენ და მაინც მოსკოვში განაგრძეს მეცადინეობა სხვადასხვა პედაგოგებთან, ასე რომ ამ სტუდიიდან არიან გამოსული უკვე ცნობილი თეატრალური მოღვაწეები: ბებე თუმანიშვილი, რომელიც ამჟამად მოსკოვის პუშკინის სახ. თეატრის რეჟისორია, და საქართველოში მომუშავე რეჟისორები: ნიკოლოზ გოძიაშვილი, გიორგი ყურული, დავით სულიაშვილი და განსვენებული ტიციაან

შარაშიძე, რომელმაც თავი გამოიჩინა მოსკოვის ოპერის თეატრის რეჟისორობაში. და აგრეთვე გიორგი ჭავაშვილი, რომელიც მუშაობდა საქართველოს სხვადასხვა თეატრებში.

აქვე არის მოხსენებული, რომ ჩვენმა მთავრობამ ერთ დროს დაარსა მოსკოვში საქართველოს კულტურის სახლი, რომლის გამგეთაც მე ვიყავი მიწვეული, მაგრამ არც ამ სახლს დასცალდა ფრთების გაშლა, თუმცა ის იყო პოულობდა მოსკოვში საქ-
მაო პოპულარობას, მაგრამ სტუდიის დახურვასთან ერთად ეს სახლიც დახურეს.

ასე რომ მოსკოვში ჩემი მეორეჯერ ყოფნის შემდეგ დავრჩი ხელმოცარული და გულდაწყვეტილი, მაგრამ სწორედ ამ დროს თბილისიდან მომივიდა ტელეგრამა, რომ მე საქართველოს მთავრობისაგან დანიშნული ვარ განათლების კომისარიატთან არსებულ ხელოვნების განყოფილების თავმჯდომარის მოადგილედ. თავმჯდომარედ კი იყო მეტად უზადო პარტიული მოღვაწე განსვენებული სეონ თოხაძე და მეც შევუდექი იქ სამსახურს.

ამ განყოფილებაში მე წინათაც ვმსახურობდი და მებარა რესპუბლიკის თეატრების ხელმძღვანელობა, ეს იყო მაშინ, როდესაც ჩვენში პირველად ჩამოყალიბდა საბჭოთა ხელისუფლება და განრიგდა მაშინდელი კომისარიატების სექტორები და განყოფილებები, მაგრამ ამაზე სხვა ალაგას მექნება ლაპარაკი, მხოლოდ, როდესაც მეორეჯერ მიმიწვიეს ამ განყოფილებაში მე, უკვე როგორც თავმჯდომარის მოადგილე, განვაგებდი ამ განყოფილების ოთხივე სექტორს: ლიტერატურისას, ხელოვნებისას, სახვითი ხელოვნებისა და თეატრებისას. მეგობრები დამცინოდნენ კიდევ შალვა ენციკლოპედისტი გაგვიხდაო, მაგრამ ლიტერატურა და თეატრები კიდევ ხო, მხოლოდ მხატვრობას, ფერწერას და მუსიკას ვნახოთ, როგორ მოუვლისო. საყვარელი კოტე ფოცხვერაშვილი ხშირად მეკითხებოდა: „შალვა, აბა თუ იცი მუსიკაში კონტრაპუნქტი რას ნიშნავსო“, მაგრამ მე ყველა სექტორებში მრჩეველები მყავდა მოჩენილი: ლიტერატურაში—საშა აბაშელი, სახვით ხელოვნებაში მხატვარი პრინცესკი, მუსიკაში—მელიტონ ბალანჩივაძე და თეატრების საკითხებში აკაკი ფაღავა და სანდრო ახმეტელი.

უცნაური დრო იყო. ზოგიერთი დამსახურებული პარტაუ-
ლიც კი ვერ ერკვეოდა ხელოვნების საკითხებში და ერთხელ
ასეთ კურიოზსაც კი წავაწყდა: რომელიღაც მოსკოვიდან ჩა-
მოსული ვიოლინოს დამკვრელი კონცერტს მართავდა, ასეთ
საჯარო გამოსვლებზე ნებართვა მე უნდა მიმეცა, როდესაც
აფიშა მომიტანეს ხელისმოსაწერად, ჩემს კაბინეტში იჯდა ერ-
თი ხანდაზმული ბოლშევიკი და როდესაც გაიგო რაშიაც იყო
საქმე, მითხრა: „შალვა, რას ჩადიხარ, რის ნებართვას აძლევ,
ვიოლენჩელო ეს ხომ ბურჟუაზიული საკრავიაო“. იყო ამისთა-
ნა სხვა კურიოზებიც, მაგრამ მე აღარ გამოუდგები, იქ სამსახუ-
რის დროს არავითარი საყვედური არ მომხვედრია. იმავე დროს
მე მომანდევს სახალხო თეატრის რეჟისორობა, მეც ეს უფრო
პიტაცებდა, ვიდრე ადმინისტრაციული გამგებლობა და მთე-
ლი საღამოობით ვიყავ რეპეტიციებზე და წარმოდგენებზე; აქ
უნდა დავიტრაბახო, რომ პრესა და საზოგადოება ძალიან მხარს
მიჭერდა ჩემ რეჟისორულ მუშაობაში. აქვე უნდა მოვიხსენიო
მეტად ნიჭიერი და თეატრალურად კარგად მომზადებული ჩემი
თანაშემწე, ან როგორც მაშინ ეძახდნენ სცენარიუსი განსვენე-
ბული ბადრიძე.

ამ მუშაობაში ისე გავთამამდი, რომ იმ დროს მოსკოვიდან
გასტროლებზე ჩამოსული იუჟინი წავიყვანე ერთ-ერთ ჩემ წარ-
მოდგენაზე. სპექტაკლი დადად მოეწონა და მიქო ჩემი რეჟი-
სორული მუშაობა, განსაკუთრებით მასიური სალიანგო სცე-
ნებში, თან ანტრაქტის დროს მითხრა: „რამდენი ხანია მცირე
თეატრში ვცდილობთ და ასეთი მასიური ანსამბლი არ გამოგ-
ვიდისო“. შემდეგ ავიდა ფარდა ახდელ სცენაზე და ხალხს წაუ-
კითხა თითქმის ლექცია საერთოდ სახალხო თეატრების მნიშვნე-
ლობაზე და, ჩვენც, მთელი სახალხო თეატრის შემადგენლო-
ბა და მისი ხელმძღვანელობა ქებით მოგვიხსენია.

რამდენიმე წელიწადი ვმსახურობდი ორივეგან, შემდეგ მო-
აღწია ჩემმა პირველმა იუბილემ — ოცდახუთი წლისთავმა ჩე-
მი მუშაობისა და მეც საუბილეო საღამოზე სამადლობელ სი-
ტყვაში გამოვთქვი. რომ ამიერიდან ვტოვებ მეტქი სასცენო ას-
პარეზზე მუშაობას. და მართლაც ამის შემდეგ, რომელიმე შემ-
თხვევით წარმოდგენაში თუ არა, არც რეჟისორობა გამიწევია



შალვა დადიანი მეფე ღირის როლში. 1911 წ.

და არც სცენაზე გამოვსულქარ როგორც მსახიობი. თუმცა თეატრს საბოლოოდ არ გავყრივარ, წინათ ეწერდი პიესებს. ახლა კი სამუდამოდ გადავბარგდი დრამატურგიაში. აქ მინდა მოვიხსენიო, რომ ნაყოფიერი გამოვდექი, თითქმის ორმოცამდე პიესა მაქვს დაწერილი და მიხარია, რომ ზოგიერთი მათგანი ახლაც იდგმება ჩვენს თეატრებში. მანამდე კი სად, საქართველოს რომელ თეატრებში არ მიმუშავენია! ყველა ქალაქებში, სადაც კი ხანგრძლივი პროფესიული სეზონი ეწყობოდა და ზოგანაც უფრო სცენისმოყვარეებიდან იყო შემდგარი დასი. საერთოდ იმ დროს პროფესიული მსახიობებიც სხვა დაწესებულებებშიაც მსახურობდნენ, თვითონ თბილისშიაც კი,—მაგალითად ისეთი თვალსაჩინო მსახიობები, როგორებიც იყვნენ კოტე შათირიშვილი. გიორგი კანდელაკი და სხვა. მსახიობის ჯამაგირი არ ჰყოფნიდა ადამიანს. შემოსავალი ხარჯებს ვერ ჰფარავდა, ხანდახან ილია ჭავჭავაძის მეოხებით ბანკი თუ გაიღებდა რაიმე სუფსიდიას ან დრამატიული საზოგადოება გამონახავდა რაიმე სახსარს ხარჯების დასათარავად. იმის გამო კი რომ მსახიობებს უხდებოდათ სხვაგან სამსახური, რეპეტიციები მხოლოდ საღამოობით წარმოებდა, რითაც, რასაკვირველია, დასის მეცადინეობის დრო ძალზე შეკვეცილი იყო. ეს განსაკუთრებით იგრძნობოდა ბაქოში. სადაც ორი-სამი პროფესიონალი მსახიობი იყო მიწვეული, დანარჩენები სცენისმოყვარეთა კადრებით იყო შევსებული. მხოლოდ უნდა ითქვას, რომ ეს სცენისმოყვარეები შემკობილნი იყვნენ სწორუპოვარი სასცენო ნიჭით, მათგან ამჟამად უმეტესობა თითქმის გარდაცვლილია, გარდა პატივეცემულ არტემ ახოზაძისა, რომელიც იყო საერთოდ მომზადებული კაცი და რეზონიორების როლებში მეტად დასაფასებელი იყო. ისე კი ბაქოს შემადგენლობიდან ირჩეოდნენ: ქალებში—ნადირაძე, წულუკიძე (დედა ჩვენი მსახიობ თამარ წულუკიძისა); მამაკაცთაგან—ვ. საყვარელიძე, გიგა მატარაძე, პავლიაშვილი და ანტონ ჭუმბურიძე; ასე რომ ბაქოს წარმოდგენები, ხშირად, თბილისის ქართულ წარმოდგენებს არ ჩამოუვარდებოდა. განსაკუთრებით მაშინ, როდესაც მოწვეული რეჟისორები ედგათ სათავეში—შალიკაშვილი, წუწუნავა და ამ სტრიქონების დამწერიც. რეპერტუარიც ძალიან ხელგაშლილად

იყო წარმოებული. მაგ. აქ დაიდგა გედევანიშვილის ფერეას ზღაპარი „სინათლე“. რასაც დიდი ხარჯი და მომზადება სჭირდებოდა და აგრეთვე გოგოლის „რევიზორი“, ჯიაკომეტის „ივლითი“ და სხვ.

ბაქოს სეზონებს აწარმოებდა ადგილობრივი წერა-კითხვის გამავრცელებელი საზოგადოება და ისინი უძღვებოდნენ სეზონის ნივთიერ მხარეს. იმ დროს ბაქოში დიდიძალი ქართველობა იყო თავმოყრილი, იყვნენ შექმლებულნიც და თავის წვლილს არ იშურებდნენ საზოგადო საქმისათვის, მაგრამ მთავარი ის არის, რომ თეატრის ხელმძღვანელთა სათავეში იდგა ერთი დიდი ქართველი ინტელიგენტი—მიხეილ თაქთაქიშვილი—მამა ჩვენი ცნობილი კომპოზიტორის ოთარ თაქთაქიშვილისა, მას შემდეგ, აგრეთვე ნათელი პიროვნება ქართულ ჟურნალისტიკაში, კარგად ცნობილი ილია აღლაძე. მხოლოდ მუდმივი ლალა იყო ქართული თეატრის თავდადებული მუშაკი დათიკო თედეიშვილი. პროფესიონალთაგან კი ჩემსობას ბაქოს დასში მონაწილეობდნენ მსახიობები: ქეთევან ანდრონიკაშვილი, ცაცა ამირეჯიბი, ელო ანდრონიკაშვილი და დავით აწყურელი. ბაქოს თეატრმა იარსება საბჭოთა ხელისუფლების დამყარების პირველ წლებშიაც. შემდეგ კი—ქართველობის უდიდესი ნაწილი დაუბრუნდა თავის სამშობლოს და სპეციალური ქართულ დასის ყოლა ბაქოში არ წარმოადგენდა დიდ საჭიროებას.

ახლა სულ სხვაა. საქართველოში მგონი ოცდაჩვიდმეტი პროფესიონალური თეატრია და ყველგან მეტნაკლებ წარმატებით სწარმოებს აქტიური მუშაობა. ბევრმა მათგანმა უკვე იჩინა თავი და ჩვენი თეატრალური ხელოვნება ამაყობს მათი სახელით.

მხოლოდ გული არ მითმენს აქვე არა ვთქვა, რომ მკაფიო მეტყველების საქმე ქართულ თეატრში დღემდე კიდევ ვერ სდგას თავის სიმაღლეზე არამც თუ პერიფერიებში, არაჲდ თვითონ ჩვენს ცენტრალურ თეატრებშიდაც; მაგ. როდესაც უნდათ, რომ ღრმა სულიერი განცდა მოქმედი პირისა გადასცენ, ამ დროს ხმას უდაბლებენ და თითქმის ჩურჩულში ვადადიან, ისეთ ჩურჩულში, რომელიც აუდიტორიას არ ესმის და მაყურებელი ხედავს მხოლოდ აქტიორის ტუჩების მოქრა-

ობას. აქტიორი კი დიდად კმაყოფილია, თვალები უბრწყინავს, სახე უნათის, რადგან ჰგონია, რომ დიდის ხელოვნებით გადმოსცა მეტად მახვილი დრამატიული ნიუანსი; როგორც ვთქვი ეს დიდ თეატრშიდაც სჭირთ, უფრო ახალგაზრდობიდან გამოსულ მსახიობებს. ეს ვიცი საიდან მოდის: ზოგს უნახავს და ზოგს გაუგონია, რომ მოსკოვის სამხატვრო თეატრში ძალიან უბრალო, თითქმის სასაუბრო კილოთი, ყოველგვარ პათოსის გარეშე, გადმოსცემენ თავიანთ სათქმელს და ზოგიერთ სასცენო ნიუანსების გადმოცემის დროს ხმას კიდევ უფრო უმდაბლებენ და თითქმის ჩურჩულებენ, მაგრამ სცენაზე ჩურჩულიც არის და ჩურჩულიც! სცენაზე ხომ თითქმის ყველაფერი პირობითია, მას აქვს თავისი კანონები და მათი განმარტოება ვულგარობამდე მიგვიყვანს ხოლმე. სცენაზე ჩურჩული კი ისეთი უნდა იყოს, რომ ქანდარახედაც გარკვევით უნდა მოიხმინოს მაყურებელმა. დიდი თეატრის მსახიობებს ბაძავენ პერიფერიებშიდაც, რაიც იწვევს მაყურებლის უკმაყოფილებას.

მეტყველებაში აქვთ კიდევ ერთი ნაკლი ჩვენს ახალგაზრდა მსახიობებს, მაგ. „ლ“ს მეგრული შერბილებით გამოსთქვამენ ხოლმე, თუნდაც გამოსათქმელი მეგრული არც კი იყოს, მაგ. „ყველაფერი“. ასეთი წარმოთქმა დიდად ეჩოთირება ქართულ ყურს.

ამეების შესახებ არაფერს არ ამბობს ხოლმე ჩვენი თეატრალური კრიტიკა და რეცენზია, თორემ თავის დროზე რომ შეენიშნა ეს ნაკლოვანება თვით დიდ მსახიობთათვისაც, მაშინ ეს უხიაგი მოვლენა ამჟამად აღმოფხვრილი იქნებოდა.

თეატრში მუშაობის დროს წილად მხვდა, ჩემის ხელმძღვანელობით პირველად გამოსულიყვნენ დიდ სცენაზე აკაკი ხორავა, აკაკი ვასაძე, განსვენებულნი მიშა გელოვანი და ელო ანდრონიკაშვილი, ყველა ესენი გარდა ელო ანდრონიკაშვილისა, მთელმა კავშირმაც კი იცის, თუ რა დიდი მსახიობებიც არიან და რა დიდი ადგილი უჭირავთ საერთოდ საბჭოთა კავშირის სასცენო ხელოვნებაში. განსვენებული მიშა გელოვანი იყო მეტად ნიჭიერი მსახიობი დრამატიულ თეატრისაც, მაგრამ მან ძალიან მალე გადაინაცვლა კინემატოგრაფიაში და ყველას გვაზსოვს თუ რა დიდი სახელიც მოიხვეჭა. მისი გარდაცვალება

შემდეგ ჩვენ, ქართველ მსახიობებს, და, თეატრალურ საზოგადოებას გვინდოდა მისი ნეშლი საქართველოში გადმოგვეტანა, ნაკრამ მოსკოვის თეატრალურმა საზოგადოებრიობამ ეს არ იწევა და დიდის გამოჩინებით დაასაფლავა კიდეც მოსკოვში ნემიროვიჩ-დანჩენკოს და სტანისლავსკის გვერდით. დამარხვაზე წარმოიქმნა მრავალი საუცხოვო სიტყვა მოსკოველ თეატრალურ მოღვაწეთაგან და აგრეთვე საქართველოდან ჩასულ დელეგაციის წარმომადგენლებისაგან — ვერიკო ანჯათარძის და ვასაძის მიერ.

რაც შეეხება ელო ანდრონიკაშვილს—ეს იყო ცოცხალი ნიკის მსახიობი ქალი. ფრიაღ მომზადებული ადამიანი, განათლებული, საფრანგეთში სორბონაში განსწავლილი და დიდი ქართველი პატრიოტი. ის სანამდე არ დაავადდებოდა თითქმის მთელი ოცდაათი წელი ემსახურებოდა ქართულ თეატრს. ის სხვადასხვა სეზონებში მსახურობდა ქ. თბილისს, ქუთაისს, ბაქოსა და ბათუმში. ის მეტ წილად ახალგაზრდა ქალების როლებს ასრულებდა როგორც დრამატიულს, ისე კომიკურს და თავის ნიჭის მეოხებით მუდამ სასცენო ხელოვნების სიმამლავზე იღვა. მის მიერ შესრულებული როლები მაყურებელს იტაცებდა, იპყრობდა და ხიბლავდა. ამის დამამტკიცებელია ის რეცენზიები, რომელიც იბეჭდებოდა პრესაში. და რომლებშიაც აღფრთოვანებით იყო მოხსენებული მისი სასცენო ხელოვნება. მის დასში ყოფნას ამხანაგებში შეჰქონდა დიდი ხალისის და მხიარულების გარდა, როგორც სულიერი სიფაქიზისა და კეთილშობილი ზნეობის ნაკადი. ამხანაგებს დასში დიდათ უყვარდათ. ელო იყო ბუნებით თანაზიარ და კარგი საამხანაგო, მიუხედავად იმისა, რომ იყო პირდაპირი, პირში მთქმელი და არავის ცოტა გადახრილ საქციელსაც კი არ აპატიებდა. იმავე დროს, გარდა სასცენო მოღვაწეობისა, ის ეწეოდა ლიტერატურულ მუშაობასაც. მას აქვს დაწერილი პატარა საბავშვო მოთხრობები, რომლებიც იბეჭდებოდა ჟურნალებში „ჭეჭილსა“ და „ნაკადულში“. ამას გარდა იმას აქვს ნათარგმნი კარგი ძალი პიესები ჩვენი რესპუბლიკის თეატრების შესამდიდრებლად, აგრეთვე მას მიუძღვის დიდი ამაგი ერთ დროს „მოგზაურ“ დასას ჩამოყალიბებაში და ისიც იყო ერთ დროს გაწვეული ნოვორო-

სიაში ქართველ მუშებრს მიერ სხვა ამხანაგებთან ერთად საგასტროლოდ.

სამწუხაროა, რომ ელოს თავის სიცოცხლეში არ ეღირსა გარდა მორიგი ბენეფისებისა. მიძღვნოდა საჯარო სამადლობელი საღამოები, თუმცა ხანში რომ შევიდა, დაავადების მიზეზით, ჩამოშორებული იყო სცენას და ამით უნდა აიხსნას გულგრილობა მისი ხსოვნისადმი.

მგონი რამდენიმეჯერ ვთქვი ამ ჩემ ნაწერში, რომ პირადად მე არტისტული მოგზაურობით, თავის დროზე შემოვლილი მაქვს მეთქი თითქმის მთელი საქართველო და როდესაც ბათუმში ამხანაგებთან ერთად „მოგზაური“ დასი დავაარსე, რუსეთის ზოგიერთ ქალაქშიაც გავმართე ქართული წარმოდგენები. ეს იყო პირველი გასვლა ქართული მთლიანი დასისა რუსეთში. „მოგზაური“ დასი დაარსდა 1913 წელს ბათუმში. დასში ირიცხებოდა თორმეტამდე ადამიანი: ორი ქალი და ათი მამაკაცი. მათ შორის იყვნენ ანდრონიკაშვილი ელო, ბეჟანიშვილი რუხანა, აწ განსვენებულნი ყალაბეგიშვილი სანდრო, ხარაზიშვილი სტიოპა, ხურციძე სამსონ, ურუშაძე ზაქრო და ამაჟამად ქუთაისის თეატრში მომუშავე რესპუბლიკის დამსახურებული არტისტი მურუსიძე ანდრო.

უნდა ითქვას რომ მართლა კარგი ამხანაგობა გვექონდა ჯერ თვითონ ბათუმში იქაურ კარგა მოზრდილ დასში, სადაც მუდმივ არტისტებათ ირიცხებოდნენ მეტად ნიჭიერი არტისტები: მიხეილ გელოვანი, შემდეგში ცნობილი კინომსახიობი და დათიყო მგალობლიშვილი, რომელმაც აგრეთვე გადაინაცვლა მოსკოვის ოპერეტაში და გარდაცვალებამდე მოსკოვის საზოგადოებრიობაში დიდი სახელიც მოიხვეჭა. ამათ გარდა დასში ირიცხებოდნენ ოლია ლეჟავა, რონელი ბაბო, ლოლობერიძე ლიპა. იყვნენ კიდევ ჩვენთან ლადო სარელი, ალიოშა ჯაყელი, კოლია მამულაიშვილი და სხვა. ბათუმშივე საქმე ისე გამოეწყო, რომ ჩვენმა წარმომადგენლებმა ისეთი დიდი ყურადღება მიიქციეს პრესისა და საზოგადოებისა, რომ ჩვენ წარმოდგენებზე დასასწრებლათ გურიიდან, ფოთიდან და ქუთაისიდანაც კი მოდიოდნენ მაყურებლები. ამის მთავარი მიზეზი ის იყო, რომ ჩვენ თითქო არ გვყავდა რჩეულები. არ ვიცოდით უფროს

უმცროსი აქტიორის რანგები. დღეს თუ ერთი რომელიმე ჩვენ-
თაგანი ასრულებდა წამყვან და დიდ როლს, ხვალ მეორე პიე-
საში სრულიათ უბრალო და თითქმის უსიატყვო როლში გამო-
დიოდა და ე. წ. სტატიტის როლს ასრულებდა. ამისათვის სპექ-
ტაკლები გამოგვდიოდა დიდად მწყაზარი, ანსამბლიანი. იმავ
დროს ჩვენ თბილისიდან მოგვყავდა გასტროლებზე, თავ-თავის
დროზე, ჩვენი სახელოვანი არტისტები: ფეფიკო მესხი, ნუცა
ჩხეიძე, ლადო მესხიშვილი, ვასო აბაშიძე, ვალერიან გუნია და
სხვ. ან ამ ბათუმის დასმა წარმოშვა „მოგზაური“ დასის შემად-
გენლობა. ჩვენ არ შეგვეძლო რომ ბათუმის მოცულობით დი-
დი დასი გადაგვერიცხა „მოგზაურში“, რადგანაც ამას დიდი ნივ-
თიერი ღონე სჭირდებოდა. ამიტომაც მხოლოდ თორმეტიო-
დე კაცისაგან შევადგინეთ „მოგზაური“ და რამდენიმე თვის
განმავლობაში ვდგამდით წარზოღვენებს სხვადასხვა დაბა-ქა-
ლაქებში. მაგრამ ესეც ისე გაგვიჭირდა, რომ ბოლოს, უსახს-
რობის გამო, დავიშალენით. მაინცდამაინც ყველა ჩვენი არტის-
ტები მოეწყვენ სხვადასხვა თეატრებში და განაგრძეს თავიან-
თი სასარგებლო მუშაობა.

იმავ დროს მე აზრად მომივიდა, რომ თბილისში მოგვე-
წყო ქართველ არტისტების და საერთოდ ჩვენს თეატრში მო-
მუშავე ადამიანების ყრილობა.

ამისათვის წერილი დავბეჭდე მაშინდელ გაზეთ „ცნობის
ფურცელში“. ამას სხვა მწერლები და არტისტები გამოეხმაურ-
ნენ და იმ ზაფხულს მგონი 1914—1915 წ. შესდგა კიდევ ეს
ყრილობა თბილისში. ყრილობის თავმჯდომარედ ავირჩიეთ ჩვე-
ნი დიდებული მწერალი აკაკი. პრეზიდიუმშიდაც აგრეთვე იყო
არჩეული ჩვენი საზოგადო მოღვაწეები და თვალსაჩინო არ-
ტისტები, ყრილობამ დიდი გამოხმაურება ჰპოვა მთელ საქარ-
თველოში, რადგანაც ეს იყო პირველი ყრილობა არა თუ რო-
მელიმე ოფიციალურ დაწესებულებებისა, არამედ შეკრება თე-
ატრალურ ხელოვნების გარშემო, იყო წაკითხული რამდენიმე
მეტად საგულისხმო მოხსენება და აგრეთვე გაიმართა მეტად
წესიერი, თითქმის აკადემიური პაექრობა ორატორებისა. სხვა
ღონისძიებათა შორის ყრილობამ დაადგინა, რომ შექმნილიყო
საქართველოს მსახიობთა პროფესიონალური კავშირი. დიდ-

ხანს არ გაუვლია, რომ ეს კავშირიც დაარსდა და ის მუშაობდა საქართველოში საბჭოთა ხელისუფლების დამყარებამდე.

ასე რომ, როგორც ვხედავთ, მთელი ჩემი სიჭაბუკე შევეწირე უფრო თეატრს და ისიც მეტ წილად ამ დარგში ქუთაისში შემუშაობლი.

თამამად შეიძლება ითქვას, რომ ქართულმა თეატრმა გამოიწვია უნივერსიტეტის მაგივრობა. ჩემი საზოგადო აზროვნებაც აქ, ამ ატმოსფეროში მომწიფდა. ბევრი რამ შემძინა დრამატულმა რეპერტუარმა და სასცენო ოსტატობამ. ცხოვრებას კი კარგათ გამაცნო ადამიანების ერთი მეორესთან დამოკიდებულებამ და ქართული თეატრის ყოველდღიურმა კირვარამმა. ბევრი რამ შევიძინე, როგორც ჩვენი კორიფეებისაგან, ისე დასის რიგითი წევრებისაგანაც.

და ვიყავ ისევ და ისევ მოფილოსოფოსო „ტლუ ბიჭი“, ცოტა უფრო „ფეხმოკიდებული“. ჩემი უდიდესი მრწამსი მაინც ის იყო, რომ ხელოვნება იხსნის კაცობრიობას ცხოვრების ღუბკირ მხარეებისაგან და მეც თეატრალურ ხელოვნების ხაზით განვაგრძნობდი ხალხის სამსახურს. თუმცა ცხოვრებაში ჩემ მუშაობას ჰქონდა სხვა დარგიც საასპარეზოთ.

ეს იყო მწერლობა.

ჩემი მხარობა

მსახიობობის დროსაც მე მწერლობასაც ვეწეოდი და აქა-იქ ვბეჭდავდი კიდევ ჩვენს პერიოდულ ორგანოებში ჩემს ნაწარმოებებს. უფრო ნაყოფაური მაინცა და მაინც ვიყავ დრამატურგიაში.

ეს გამოიწვია იმ გარემოებამ, რომ ჩვენი დრამატიული რეპერტუარი საერთოდ ღარიბი იყო და თითო ოროლას გარდა, მაშინ ჩვენ არცა გვყავდნენ ქართველი დრამატურგები. ცნობილი შიუკაშვილი, გელევანიშვილი და შანშიაშვილი, ყველა ესენი ჩემ დროს თითქმის და ჩემთან ერთად არიან გამოსულნი დრამატურგიის ასპარეზზე.

მე კი გავბედე ჩემი თავი დრამატურგიაში იმიტომ მეცადა, რომ მეგონა ცხოვრების საკმაო ცოდნაც მქონდა და თეატრალური ხელოვნებისაც. თან ასეთ შემოქმედებას მაძალებდა ქართული პიესების სიმცირე.

სწორედ ამ დროს არის დაწერილი „მღვიმეში“, „შენი კირანე“, „გუშინდელნი“ და სხვ.

ასე რომ რაკი ერთხელ ფეხი შევდგი დრამატურგიაში დღეინდელ დღემდე ამ ქანრში მუშაობას განვაგრძობ. ორმოცამდე ორგინალური პიესა მაქვს დაწერილი, ამდენივე თარგმნილი და გადმოკეთებული.

ხედავთ როგორ ვტრაბახობ!

საერთოდ კი ვატყობ, რომ იმ კაცის ცხოვრება, რომლის აღწერაც მე ვიკისრე ე. ი. ჩემი თავისა, მაინცდამაინც საინტერესოდ არ გამოძის.

მკითხველი უთუოდ მოელოდა, რომ შალვა დადიანი თუ შესამჩნევი არა, განსხვავებული პიროვნება მაინც იქნებოდა, მაგრამ მოტყუვდა ამ ნაწერის ავტორი. ამის გამო მოტყუვდნენ



მეგობრული შარკი. დრამატურგი შ. დადიანი.
მხატვარი გორდელაძე.

მკითხველებიც. შეიძლება ისიც კი გაიფიქრონ: ბევრი ვერაფერი შვილი ყოფილა ეს კაციო.

ამისათვის მიუხედავად იმისა, რომ აღებული ცხოვრება დიდს არაფერს წარმოადგენს, მე მაინც ამ ნაწერში შუა ტყავებამდე ძლივს მივალწიე. ამიტომ მეც და ჩემი მკითხველებაც კიდევ უნდა აღვიჭურვოთ მოთმინებით, რომ მე ჩემი განვავარძო.

მაშასადამე ვაკვრით მაინც მინდა მოვიხსენიო, თუ რას წარმოადგენდა იმ დროს ქართული თეატრი თავის შინაარსით, შემადგენლობით და საქმიანობით.

შინაარსით მეტ წილად პატრიოტული პიესები იყო გაბატონებული: „სამშობლო“, „ლალატი“, „და-ძმა“. ყოველ სეზონში ეს პიესები უნდა დადგმულიყო და ისიც ხანდახან რამდენიმეჯერ, მაშინ როდესაც სხვა პიესებს სეზონში ერთჯერ თუ შენვდებოდათ რიგი დასადგმელად. „სამშობლოთი“ უმეტეს ნაწილად უნდა გახსნილიყო სეზონი.

ჩვენ დროს კი მოხდა ერთი გაკვირვების გამომწვევი გარემოება: რუსთაველის თეატრმა დადგა პიესა „ფლანდრია“ საიდანაც არის გადმოკეთებული ეს „სამშობლო“. პიესა ეკუთვნის ფრანგ ცნობილ დრამატურგს ვიქტორიენ სარდუსს, მაგრამ ფრანგულად „ფლანდრია“ კი არა ჰქვია, არამედ „ლაპატი“, რაიც ქართულად ნიშნავს სამშობლოს. ეს პიესა თავის დროზე ქართულად გადმოაკეთა დრამატურგმა დავით ერისთავმა. და ამბობენ, მისმა წარმოდგენამ თბილისსა და ქუთაისში დიდი აღელვება და აღტაცება გამოიწვიაო, განსაკუთრებით იმ ალაგას, როდესაც სცენაზე გამოაქვთ საქართველოს დროშა. ეს იყო ცარიზმის შავბნელ რეაქციის დროს და ეროვნული გრძნობა საქართველოში ძლივ-ძლივ ღვიოდა და აი ამ პატრიოტულ წმინდა გრძნობის გამოღვიძებას ემსახურებოდა მაშინდელი, უწინარეს ყოვლისა, გაზეთი „დროება“, ქართული თეატრი, ილიას და აკაკის დიდებული კალამი და გოგებაშვილის „დედა-ენა“. „სამშობლოს“ დადგმამ კი უფრო ცხოვლად იმოქმედა მაყურებელზე, და აი ხსენებულ დროშის გამოტანის დროს აუდიტორია ფეხზე დგებოდა თურმე და ცრემლმორეული ერთი პეორეს ეხვეოდა. ასეთი დიდი სამსახური მიუძღვის პიესა „სამ-

„შობლოს“ ეროვნულ გრძნობის გამოღვიძების საქმეში, ასე, რომ ეს პიესა, მიუხედავად მისი დრამატიულ ნაკლოვანებისა, ქართულ თეატრს უნდა ჰქონდეს თავის დიდ საგანძურში მოკრძალებით შემონახული. ისიც უნდა გვახსოვდეს, რომ „სამშობლოს“ დადგამ ქართულ სცენაზე დიდი განგაში გამოიწვია რუსულ რეაქციონურ პრესაში, რაზედაც ჩვენში ხმა ამოიღეს ილიას მეთაურობით ჩვენმა მოწინავე მწერლებმა და რუსეთში ცნობილმა დიდმა მოაზროვნემ და კრიტიკოსმა მიხაილოვსკიმ. ჩვენ კი ახლა დავდგით „ფლანდრია“ და როდესაც ამის შემდეგ დაიდგა „სამშობლო“ იმავე რუსთაველის თეატრის მიერ დამსწრე ახალგაზრდობამ თქვა თურმე „ოჰ, ეს ხომ იგივე „ფლანდრია“-ო. ასე რომ სარდუს პიესის პირდაპირ თარგმანმა, იმერულად რომ ვთქვათ, გამოიწვია „გაცუცურაება“ ქართული თეატრის ტრადიციისა.

მანამდე კი ქართულ თეატრში, როგორც ვთქვი, იმ დროს მეტწილად ისტორიული პიესები იდგმებოდა და ამან გამოიწვია მიმბაძველობა. ასე რომ ზოგჯერ შემთხვევით მწერლების მიერ დაბალი ხარისხის ისტორიული პიესებიც იწერებოდა და იდგმებოდა.

სხვა ორიგინალური ქართული პიესები არსად სჩანდა, თუ არ ვიანგარიშებთ ჩვენი სასახლო დრამატურგის აექსენტის ცაგარლის, ზოგიერთ მახვილ ნაწარმოებს და დიდი აკაკის გამოღიმებას ქართულ დრამატურგიაში.

დრამატურგიაში მუშაობდა აგრეთვე ჩვენი ცნობილი ხალხოსანი პოეტი რაფიელ ერისთავი, მაგრამ ის უფრო გადმოაკეთებდა პიესებს რუსულიდან და ძალიან მარჯვეთაც, ისე რომ კაცს ორიგინალათ ეჩვენებოდა, მაგრამ გადმოკეთებაში პირველი ადგილი დაიკავა ვალერიან გუნიამ. ხშირად მთელი სეზონები იკვებებოდა გუნიას მიერ გადმოკეთებულ პიესებით. ამისათვის დიდი მადლობის ღირსია გუნია, რომ ქართულ იერს არ ამორებდა ჩვენს რეპერტუარს.

იმავე დროს ქართულ თეატრში იდგმებოდა უცხო კლასიკოსებიც, განსაკუთრებით მაშინ, როდესაც ჩვენი თეატრი დაამშვენა უებრო ლადო მესხიშვილმა. შექსპირი, შილერი, გუცოვი და სხვა ლამაზ სვეტებათ ჩაუდგნენ ქართულ თეატრს, მაშინ

წერდა დიდებული ილია ქართველ არტისტებზე დაახლოებით ასე:

„ჩვენმა არტისტებმა მსოფლიო გენიოსები გავვიშინაუ-
რესო“.

რეპერტუარის მხრივ ასე იყო საქმე, ხოლო რაც შეეხება დასების შემადგენლობას, გარდა ჩვენი დიდი კორიფეებისა. შედგებოდა უფრო შემთხვევითი ელემენტებისაგან: ოთხკლასამდე მიღწეული ახალგაზრდა, რომელმაც სწავლაში ვერ იხეირა და თვითონ გამოვიდა ან გამოაგდეს სასწავლებლიდან მოდიოდა ქართულ სცენაზე, აგრეთვე მოდიოდნენ ისინიც, ვინც ვერსად სამსახურში ვერ გამოდგნენ და ეს იმიტომ კი არა რომ მათ მოწოდება ჰქონდათ სასცენო ხელოვნებისადმი ან იმისათვის, რომ ქართული სცენა მათ ნივთიერად უზრუნველყოფდა, არამედ იმათ მსახიობობა იოლ სამუშაოდ მიაჩნდათ, ამათ გარდა თეატრში სამსახური საზოგადოებაში ერთგვარ მდგომარეობას უქმნიდა მათ. ამიტომაც დასში დენადობაც დიდი იყო. რადგან სასცენო ნიჭი იშვიათად თუ ვინმეს გამოაჩნდებოდა. არც განათლება, არც ცხოვრების ცოდნა ამკობდა მათ, თუმცა იმავე დროს ზოგიერთი მათგანი თითქმის უსწავლელი მეტაღ სასარგებლო წევრიც ხდებოდა ქართული დასისა, როგორც მაგალითად, ქართული თეატრის ცნობილი მოკარნახეები: კოლია გალუსტოვი და ბეგლარ ახოსპირელი. რომელიც იმავე დროს იყო მშვენიერი პოეტი და შეიტანა წვლილი ქართულ პოეზიაში. თავის მხრივ აგრეთვე თამაზიშვილი ერთგული მუშაკი თეატრისა, რომელიც დაბალი წრიდან იყო გამოსული, მაგრამ მშვენიერი მსახიობიც იყო. ვერათერს ვიტყვი წინანდელ მოკარნახეებზე, რომლებიც იყვნენ თავის დროზე ცნობილი მწერლები—გრიგორ ყიფშიძე და არტემ ახნაზაროვი—ისინი ჩემ დროს არ ყოფილან, მხოლოდ საყვარელი იოსებ გრიშაშვილი მგონი ერთ დროს ეწეოდა ამ ხელობასაც.

ხშირად იყო ისეთი, რომ თეატრში მოვიდოდა და მსახიობათ ჩაირიცხებოდა ფრიად მწყაზარი. ლამაზი გარეგნობის ახალგაზრდა დარდიმანდი, მახვილი ენის პატრონი, მომღერალი, მოცეკვავე, გაბედული ცხოვრებაში, მაგამ სცენაზე არაფრად არ ვარგოდა, ეს იყო ერთი ფენა, ქართულ დასში მომუშავეთა

გეორგ ფენაში კი იყვნენ ბუნებით სასცენო ნიჭით შემკულნი, მოწიადებულები, განვითარებულებიც, მაგრამ ისინი თეატრის გარდა მსახურობდნენ სხვა დაწესებულებებშიაც, უფრო ამის გამო იყო, რომ რეპეტიციები ქართულ თეატრში მიმდინარეობდა მეტ წილად სალამოობით, რადგან დასში მომუშავე ნაწილს დღისით არ ეცალა, რაც, რასაკვირველია, სასცენო მუშაობას დიდად აბრკოლებდა.

ქალების მხრივ ხომ უფრო ცუდ მდგომარეობაში იყო საქმე, იმ დროს საზოგადოების ყველა ფენებში გაბატონებული იყო ის აზრი, რომ ქალს სცენაზე მუშაობა სახელის გატეხის მეტა არაფერს მოუტანს, რომ სცენაზე საერთოდ გარყვნილებაა გაზეფებული და სხვ. თუმცა სცენისმოყვარეებში ერივნენ მაშინაც ნიჭიერი სათეატრო ახალგაზრდები; ისინი ჩვენ გვეხმარებოდნენ, განსაკუთრებით პროვინციაში, სადაც ჩვენ გვიხდებოდა წარმოდგენების მართვა, ზოგიერთი მათგანი სასცენო ნიჭის პატრონი იყო და გულით უნდოდათ დასში ჩარიცხულიყვნენ, მაგრამ დედამა და ნათესაობა ამის ნებას არ აძლევდა. რამდენჯერ შევსწრებივარ მათ უმანკო ცრემლებს, მაგრამ ჩემთვის და ჩემი ამხანაგებისათვის შეუძლებელი იყო ესეთი ოჯახების რწმენის შერყევა.

ახლა გავიხსენოთ თუ ნივთიერად რა ასაზრდოებდა ქართველ მსახიობს?—რასაკვირველია უწინარეს ყოვლისა წარმოდგენების შემოსავალი, მაგრამ ეს იყო ისეთი მერყევი წყარო, რომ ხშირად სალაროში შემოსული ფული იმ ღამის თეატრის ხარჯსაც ვერ წვდებოდა.

ამისათვის კვლავ დიდი ილიას მეოხებით, დიმიტრი ყიფიანისა და დიდებულ აკაკის დახმარებით ოთხმოციან წლებში დაარსდა თბილისში „ქართული დრამატიული საზოგადოება“. წესდების ძალით. გარდა საერთოდ ქართულ თეატრალური დონის ასამაღლებელ ღონისძიებებისა. მათ ჰქონდათ დავალებული დასის ნივთიერი უზრუნველყოფა და მართლაც ზოგჯერ დრამატიული საზოგადოება თვითონ ინახავდა დასს სხვადასხვა საქველმოქმედო ღონისძიებით შემოსულ ფულებით, ზოგჯერ კი. როდესაც ნივთიერი საშუალება იმდენი არ ჰქონდა მაშინ, რომ სეზონი არ გამცდარიყო, მსახიობთაგან შესდგებოდა ამ-

ხანაგობა, ის უძღვებოდა საქმეს და დრამატიული საზოგადოება კი ზოგჯერ, შეძლებისდაგვარად, აძლევდა სუფსიდიას. როდესაც დრამატიულ საზოგადოებას ჰყავდა დასი თავის ხარკზე აყვანილი, მაშინ თვითუღმსახიობს ჰქონდა დანიშნული განსაზღვრული ჯამაგირი. ჯამაგირებში სხვაობა იყო, რადგანაც გამოჩენილ დიდ მსახიობებს ეძლეოდათ მეტი და დანარჩენებს კი ნაკლები. ამხანაგობის დროსაც ასე იყო მხოლოდ იმ განსხვავებით, რომ არც ერთ მსახიობს განსაზღვრული ჯამაგირი არა ჰქონდა, არამედ შემოღებული იყო ე. წ. სამარკო სისტემა. დასი სამ კატეგორიანად იყო გაყოფილი და დიდსა და წამყვან მსახიობებს ეძლეოდათ, ვთქვათ, ათი მარკა, მეორე კატეგორიისას ექვსი და მესამეს ოთხი. ყველა ამ მარკების ჯამზე იყოფოდა შემოსავალი და ხშირად ვიანაჩრობით გაგვექონდა სეზონი.

პირადად მე ჯამაგირზე იშვიათად ვყოფილვარ და თუ მკონია ჯამაგირი ხუთ თუმანს არ ავცილებულვარ. საერთოდაც ასი მანეთი იყო უდადესი განაცვეთი ჯამაგირისა და ეძლეოდა ლადო მესხიშვილს ან ვასო აბაშიძეს და ზოგჯერ ვალიკო გუნიასაც, როდესაც ის იყო დასის ხელმძღვანელად და რეჟისორად.

იყო ერთი კიდეც თითქო საკვირველი სახელმწიფო კანონი. თეატრების სეზონი უნდა დაწყებულიყო შემოდგომაზე არა უადრეს სექტემბრის თვისა და დასრულებულიყო თებერვალში, როდესაც დიდი მარხვა იწყებოდა. ეს იყო სასულიერო სინოდის დადგენილების თანახმად შემოღებული. ასე რომ ქართველმა მსახიობმა, გარდა ამ მოხსენებული ექვსი თვისა, არ იცოდა, თუ შემდეგში რატი ეცხოვრა. წარმოდგენის ნებას იძლეოდნენ მხოლოდ ნაადგომევეს და რაკი მაშინ ჩვენ არ გვყავდა ანტრეპრენიორი და არც მეცენატი ვინმე (დრამატიული საზოგადოება ზაფხულში არ კისრულობდა სეზონის გაქლოლას), ამიტომ მსახიობები იძულებული ვიყავით ამხანაგობა შეგვედგინა, მაგრამ ამ ამხანაგობასაც ხომ სჭირდებოდა ერთგვარი თანხა საქმის წასაყვანად. ამიტომ ყველა ჩვენგანი, ვისაც ამხანაგობაში შესვლა უნდოდა. შევავროვებდით თავის წვლილს ჩვენს ოჯახებში ან როგორმე ვალად ვისესხებდით და მოვაბამდით საქმეს თავს.

ამ შემთხვევაში მე სხვებზე უფრო ბედნიერი ვიყავი, მკო-

თხველმა ჯერ არ იცის, რომ მე ცოტაოდნად შეძლებულ ოჯახიდან ვარ გამოსული, მამაჩემს, სხვათა შორის, ჭიათურაშიდაც ქონდა მამული შავი ქვისა, როდესაც ჩემზე გადმოვიდა მამაჩემის მემკვიდრეობა, რასაკვირველია, შავი ქვა მეც მერგო. ცხადია. მე თვითონ არ ვეწეოდი შავი ქვის მრეწველობას. საერთოდ ცხოვრებაში ცუდი პრაქტიკოსი ვიყავი, მაგრამ დადგებოდა თუ არა დიდი მარხვა, ჩემთან ჭიათურიდან მოდიოდნენ პატარა მრეწველები შავი ქვისა: ბერძნები, ქართველები და შემომთავაზებდნენ, რომ სოფ. რგანში მაგალითად „მამუკიახო“ გაქვთ (შავ ქვიანი ადგილის სახელი), ის მოგვეცით იჯარით და ხუთას მანეთს მოგართმევთო. მეც ვაპრობას არ დავუწყებდრ, სიხარულით ვართმევდი ამ ფულს. ისინი კი, რომ წავიდოდნენ, თურმე, სულ დამცინოდნენ—სულელია ეს დადიანი, „მამუკიახო“ ხუთასი მანეთი კი არა, ათასი მანეთი ღირს მისი იჯარაო. ამის გამო ჭიათურის არემარეზე იქაურ მემამულეებსა და მრეწველებს შორის დიდხანს მქონდა შერჩენილი სულელის სახელი. მე კი მოვიგდებდი თუ არა ამ ხუთას მანეთს ხელში, დავუძახებდი ჩვენს მსახიობებს, ეს უფრო ქუთაისში, დავუძახებდი და ვეტყოდი: აბა ბიჭებო. შევადგინოთ ამხანაგობა, ხუთასი მანეთი გვაქვს, ხუთასი!.. და იყო ერთი ზეიმი და ხტუნვა-ცეკვა. თან მეხვეოდნენ და მკოცნიდნენ, რომ ასე ვზრუნავდი მათთვის.

აქვე უნდა ითქვას ქართული დასის ზნეობის შესახებ. მე არ მახსოვს, რომ მსახიობებს ერთი მეორეში რაიმე ინტრიგები ჰქონოდათ. შეიძლება პატარა რამ უსიამოვნება, რომელიც არასოდეს არ გადაზრდილა დიდ შურიანობასა და სიხარბეში, თუ კი ვინმე ამისთანა გამოჩნდებოდა ჩვენს შორის, ის ჩვენთან დიდხანს ვერ იბოგინებდა და ქალების მხრივ ხომ არც ერთ ჩვენ მამაკაც მსახიობს დასში მოსამსახურე მსახიობ ქალთან რომანი არ გაუჩაღებია, მხოლოდ თუ ერთი მეორე შეყვარებიათ, შეუღლებულან კიდევ. ქართული დასი, განსაკუთრებით ქუთაისში, წარმოადგენდა თითქო ერთ ოჯახს, ყველანი ვიყავით ერთი მეორის დაძმანი და არასოდეს არც ერთ ჩვენთაგანს ერთი მეორისადმი დამოკიდებულება არ გაცდენდა ამ კეთილშობილურ გრძნობას.

ჩემსობას ქუთაისის დასში ირიცხებოდნენ მუდმივად ჩვენი სასახლო სახალხო არტიტი ნუცა ჩხეიძე და განსვენებული დესპინე ივანიძე.

ნუცა ჩხეიძეს ხომ ხელის გულზე ატარებდა მთელი ქუთაისის საზოგადოება და ჩვენ არტიტებს ეს ჩვენთანად, ჩვენი ოჯახის წევრად მიგვაჩნდა, თითქო რაღაც ნათესაურ კავშირს ვგრძნობდით მისდამი. „ნუცა უქეიფოდ არის“, „ნუცას რაღაცა უჭირს“ და თვითეული ჩვენგანი მზად იყო მისდა სამსახურად. საზოგადოებიდან ხომ ბევრი ყავდა თავყვანისმცემელი, მაგრამ არასოდეს მათი გულისთქმა კეთილშობილ თავაზიან კარებს არ გასცილებია. რასაკვირველია, ამის მიზეზი თვითონ ნუცას მაღალი ზნეობა იყო და იმავე დროს დასის ოჯახური მისდამი განწყობილება, ხოლო როდესაც დრო დადგა, მას შეუყვარდა ცნობილი პირველ ქართველ საოპერო მომღერლის ფილიმონ ქორძის ვაჟი—მიხეილი. კაცი ფრიად განსწავლული უმაღლეს ცოდნით აღჭურვილი და შემდეგში დიდი გემოვნების რეჟისორი ქართულ თეატრში.

დესპინე ივანიძე კი აგრეთვე იყო დიდი თავდაცული ადამიანი და როდესაც გულწრფელად შეუყვარდა ქართული თეატრის მსახიობი დათიკო ჩარკვიანი, მას ცოლად გაჰყვა კიდეც. ასეთივე იყო, სამწუხაროდ, ადრე გარდაცვლილი, ახალგაზრდა გვეტაძის ქალი, რომელმაც თავის სასცენო ნიჭით თავი იჩინა საზოგადოებაში და ესეც შემდეგ გათხოვდა კიდეც ერთ ახალგაზრდა მასწავლებელზე.

ზოგჯერ ქალთაგან სხვა შემთხვევითი სცენის მოყვარებებიც გამოდიოდნენ ჩვენთან დასში. ზოგი მათგანი ეტანებოდა კიდეც ფლირტს, მაგრამ როდესაც მოხვდებოდა ჩვენს თითქოს მონასტრულ რეჟიმში, ძალიან მალე ჩამოგვეცლებოდნენ ხოლმე და ამ მხრივ ქუთაისში ჩვენი შემადგენლობა ოაზისს წარმოადგენდა.

სხვა მხრივად ქუთაისის ჩემსობას მრავალრიცხოვანი მოწინავე ინტელიგენცია ჰყავდა, მაგრამ ჩვენი დასი მათ შორისაც ოაზისს წარმოადგენდა, რადგან ჩვენ, მსახიობები, როდესაც შეცადინეობის შემდეგ ერთად ვრჩებოდით. თუნდაც უბრალო პურის ჭამის დროს, გვქონდა კამათი საჯარო საკითხებზე და

ვეწვდით დიდ პაექრობას რადგანაც თვითეული ჩვენგანი ვკუთნოდა ზემონსენებულ პარტიათაგანს.

...თბილისში მე სცენაზე მხოლოდ ერთხელ ვიყავ დასში ჩარიცხული ისიც იმ დროს, როდესაც ჩვენში რევოლუციური მოძრაობა გაძლიერდა. თბილისის ქუჩებზე მაშინ ხშირი იყო დემონსტრანტების გამოსვლები, და ერთ დროს მათ მთავრობა ხელს არ უშლიდა. ეს ის დროა, როდესაც მაშინდელმა მეფის ნაცვალმკვარანცოვ-დაშკოვმა რევოლუციონერებს თოფები დაურიკა, იმავე დროს შეადგინა თბილისის დამცველი ერთგვარი არალეგალური კომიტეტი, უბნებათ დაპყრო მთელი ქალაქი და თვითეულ უბანს მიუჩინა დამცველი რაზმები. ერთ-ერთ რაზმში მეც მოვხვდი და თოფი ხელში მეც დამაქერინეს მაშინ, როდესაც თოფის და საერთოდ იარაღის ხმარებისა არაფერი გამეგებოდა. გარდა იმისა რომ სცენაზე მქირდებოდა ზოგჯერ იარაღის ხმარება, მაგალითად, როდესაც სცენაზე ჩემი მოწინააღმდეგე უნდა მომეკლა და ამისათვის უფრო ხშირად რევოლვერი უნდა გამომეყენებინა. მეც პიესაში აღნიშნულ დროზე ჭიბიდან ამოვიღებდი რევოლვერს, დაუმიზნებდი მოსაკლავ კაცს და იმ დროს კულისებში გაისმოდა რევოლვერის გასროლის ხმა, ჩემი რევოლვერი არაფერ შუაში არ იყო, ჩუმად იყო, მაგრამ მოსაკლავი კაცი კი წაიქცეოდა და აი ასეთი „მცოდნე“ კაცი იარაღისა, მოვხვდი დამცველ რაზმში, რაზმები დამ-დამობით მუშაობდნენ. მე მხვდა გრიბოედოვის ქუჩის დაცვა სხვებთან ერთად, ჩემ რაზმში უფრო ინტელიგენტები იყვნენ: ექიმები, ექილები, ინჟინრები და, როდესაც გაიგეს, რომ მე კნიაზი კაცი ვარ, იფიქრეს, რომ გმირობას ეს უფრო გამოიჩინსო და მეთაურად ამირჩიეს. უნდა ვთქვა, რომ ბუნებით თითქო უშიშარი ვიყავ, მაგრამ მეომრულ გმირობის გამოჩენაზე კი გული ნაკლებ მიმიწევდა.

დაღამებიდან გათენებამდე დავდიოდით გრიბოედოვის ქუჩაზე რაზმელები და უფრო საუბრებში ვიყავით გართული, ვანსაკუთრებით კარგი მოსაუბრე იყო ვექილი ბერნშტეინი. რეებს არ გვიაშობდა, როგორ გულით გვაციანებდა ხოლმე. ერთხელ დამით, შუაღამე გაცილებული იყო, სასამართლოს ქუჩიდან მოისმა თოფის გასროლის ხმა. მეც, როგორც მეთაური, მაშინ-



ლევ კობახიძე და შალვა დადიანი.

ვე იქით გავიქეცი, თითქო დიდი მეომარი ვყოფილიყავი და ჩემ-
თან ახლო მდგომ ამხანაგებსაც ვანიშნე გამომყოლოდნენ, მაკ-
რამ გასროლის ალაგას რომ მივედი, ენახე რომ იქაური რაზ-
მელები გულით ხარხარებდნენ. უკან მოვიხედე—დავინახე, არა-
ვინ არ გამომყოლოდა. მე კი შევუერთდი ამ მოხარხარეებს, ვკი-
თხე, რა აცინებდათ და თან თოფის გასროლა რას ნიშნავდა,
ამიხსნეს, რომ ერთ-ერთ რაზმელს, რომელიც ჩემსავეთ გამოც-
დილი ყოფილა. „ჩხიკინი“ დაუწყია თოფისთვის და უნებ-
ლიეთ გავარდნია, ასე რომ არც მაშინ და არც შემდეგში არა-
ვითარი შეტაკება ჩვენს რაზმს არავისთან არ მოსვლია.

მეც ასე დავასრულე ჩემი „გმირობის“ ამბები. მხოლოდ
ერთხელ მაინც შევიქენ მსხვერპლი „ქვეშარიტ რუსების“ (იყო
ასეთი პარტია) დემონსტრაციისა. ეს იყო პოლიციის მიერ შემ-
ზადებული დემონსტრაცია. ისინი მოდიოდნენ დიდი რიხით და
სიმღერით თან მოყვიროდნენ თურმე: „ქულები მოიხადე-
თო“, რადგან მაღლა ხელით მოკქონდათ ნიკოლოზის სურათი.
მე ეს შეძახება არ გამიგონია და ქუდდახურული ბეგლარ ახოს-
პირელთან ერთად ვიდექი იმ ალაგას, სადაც ეხლა კავშირ-
გაბმულობის სასახლეა. წამოვიდა დიდი ჯგლითი დემონსტრან-
ტებისა, დამეტაკა, შუბლში ჩამარტყა რაღაც წვეტიანი და
წამაქცია. კარტეფი იყო თურმე. იმავე დროს ისინი შესულიყ-
ნენ კლასიკურ გიმნაზიაში და მოწათფები დაერბიათ. მე კი ბეგ-
ლარმა წამომაცენა და თავისისხლიანი მიმიყვანა ჩემ ბინაზე (მე
იქვე ახლოს გრიბოედოვის ქუჩაზე ვიდექი). პირველი დახმა-
რება აღმომიჩინეს ჩემ მეზობლად მდგარ ოპერის ბალერინებ-
მა, მერე ექიმიც როგორღაც მოიყვანეს და იარა თანდათან
მომირჩა, ამ ჭრილობის ნიშანი ეხლაც აჩნია ჩემ შუბლს, რო-
გორც დიდი მეომარის საბრძოლო ნიშანი.

ეხლა კი დავეთხოვით მაშინდელ თბილისის რევოლუციურ
ამბებს და გადავიდეთ ჩემ მწერლობაზე.

ჩემი მწერლობა კი უფრო გაღვივდა თბილისში.

თბილისი!

რამდენი მიმზიდველობა აქვს ამ სიტყვას და შინაარსი, რამ-
დენი მომზიბელელობა აქვს უოველი ქართველისათვის, თურ-
ნაც თბილისში ის არასოდეს არ ყოფილაყოს. განაგონით მა-

ინც იცის მორკბულობა თავის დედაქალაქისა. ამაზე უდიდესი ქალაქი მას არ ეგულება საქართველოში.

ის დედაქალაქია!

საქართველომ შექმნა თავისი დედაქალაქი თბილისი და თბილისმა შექმნა საქართველო.

ეს იცის ისტორიამთავრად ჩაუხედავმა ქართველმაც თითქოს შეუგნებლად, მაგრამ ინტუიციით კი. თავი მოაქვს თავის თბილისით, განსაკუთრებით ბოლოხანებში.

აქ არის მისი საკუთარი ქართული მთავრობა ქართველების მიერ შემდგარი.

აქ არის მისი საკაცობრიო უმწვერვალესი ცოდნის კერა: სამეცნიერო აკადემია, სამხატვრო აკადემია, სასოფლო სამეურნეო აკადემია, კონსერვატორია, ახალგაზრდობის განმანათლებელი, სპეციალური თუ საერთო დიდი ცოდნის მიმნიჭებელი უნივერსიტეტი და სხვადასხვა ტექნიკუმები და სასწავლებლები.

საუცხოვო თეატრები. მათ შორის ორი დიდი ქართული თეატრი რუსთაველის და მარჯანიშვილის სახელობისა. დიდი სახელი აქვთ მოხვეჭილი ამ ორ თეატრს მთელს კავშირში და იყნობენ საზღვარგარეთაც.

მწერალთა კავშირი და აგრეთვე სხვადასხვა დარგის დაწესებულებები, სადაც მუშავდება და მტკიცდება რესპუბლიკის საერთო აზროვნება, საჭირო საკითხების გადასაწყვეტად და სხვადასხვა.

მე ბავშვობისას ჩამოვედი პირველად თბილისში. მაშინაც კარგა მოზრდილი ქალაქი იყო, მაშინაც კარგი ქუჩები ამშვენებდნენ ქალაქს, განსაკუთრებით ე. წ. გოლოვინისა და მიხეილის პროსპექტები, ახლანდელი რუსთაველისა და პლეხანოვის გამზირები. გოლოვინზე იყო მაშინდელი მთავრობის საადმინისტრაციო სახლები ჩამორიგებული და მათ შორის დიდი სასახლე „ნამესტნიკისა“ თავის დიდი ბაღით, სადაც ახლა პიონერთა სასახლეა მოთავსებული. მის გასწვრივ ორიოდ ნაბიჯზე სამხრეთით იყო კარგა მოზრდილი ქარვასლა სათავადაზნაურო ბანკისა, რომელსაც მეთაურობდა დიდი ილია ჭავჭავაძე. მისი მეოხებით სწორედ ამ შენობაში მოთავსდა ქართული დრამა-

ტიული თეატრი, სადაც ამჟამად გრიბოედოვის სახ. რუსული თეატრია და აქვე გაიშალა მაშინდელი წერა-კითხვის საზოგადოების საქმიანობა, მისი გამგეობა, წიგნის მალაზია ძველ მანუსკრიპტთა წიგნსაცავი, მუზეუმები და სხვ.

აქ ილიას კაბინეტში იკრიბებოდა მაშინდელი თბილისის და სხვა კუთხეებიდან ჩამოსული ინტელიგენციის წარმომადგენლები და ჰქონდათ სჯა-ბაასი მაშინდელ საქართველოს საკიბოროტო საკითხებზე. ამ ქარვასლის პირდაპირ დავით სარაჯიშვილის სახლში მოთავსებული იყო ილია ჭავჭავაძის გაზეთ „ივერიას“ რედაქცია, რომელიც შემდეგ გადავიდა კუკიის ხიდ გაღმა ნიკოლოზის ქუჩაზე ნომერი ოცდაერთი, სადაც ერთხანს თვითონ ილია ცხოვრობდა.

ასე რომ, თუ შეიძლება ასე ითქვას, ეს არე-მარე იყო ჭიპა ქართული აზროვნების წარმოშობისა.

თვითონ ქალაქი ჩემსობას იწყებოდა ნავთლულიდან და თავდებოდა ვერის დაღმართის დასაწყისში. მის შემდეგ კი ვერაზე თითქმის სრული სიცარიელე იყო, აქა-იქ თუ იდგა ქონხები.

ჩემ თვალწინ გაიზარდა თბილისი, მაგრამ განსაკუთრებოთ ალორძინდა საბჭოთა ხელისუფლების დამყარების შემდეგ.

ისტორიულად კი თბილისი, როგორც ვიცით, საქართველოს მედროშე იყო და ამ დროშის წართმევას ელამუნებოდა ირავლივ შემოქრილი მუსულმანური სახელმწიფოები: სპარსეთი, თურქეთი და ასე წარმოიდგინეთ, პატარა ლეკებიც კი, მაგრამ დედაქალაქის ამ შავზნელ დღეების აღწერას დავეთხოვოთ და გონების თვალით წარმოვიდგინოთ მშვენიერი და ბედნიერი დღეების წუთები დედაქალაქში.

აი თუნდაც ვახტანგ გორგასალის დროს. წარმოვიდგინოთ, რომ მან მცხეთიდან თუ უფლის ციხიდან თბილისის მინდვრებისაკენ გადაინადირა: თქმულების თანახმად წინ ხოხობი აუფრინდა და თავისი შევარდენი მას მიუტია. ფრინველებმა კი იფრინეს. იფრინეს, ერთმა გულგახეთქილმა, მეორემ კი საომარ გუნებაზე მდგარმა, მიღწიეს გოგირდის ცხელ წყლებს და ხოხობი შიშისაგან შივ ჩაფრანდა, შევარდენიც თან ჩაჰყვა და ორთავენი შივ ჩაიხარზნენ. გორგასალაც მივიდა და ნახა როგორ

დალუპულიყვნენ ფრინველები. თქმულება ამბობს, რომ გორგასალმა მაშინ გადაწყვიტა დედაქალაქი აქ გაეშენებინა. რასაკვირველია სინამდვილეში ასე არ იყო. აქ ქალაქის გაშენება გამოწვეული იყო სხვადასხვა სოციალური, ეკონომიური და პოლიტიკური მიზეზებით, ქართველობა გორგასლანამდენაც მოაწყოდა თბილისისაკენ, მხოლოდ უნდა ეთქვათ, რომ ვახტანგმა მათ განზრახვას თავი მოაბა.

საქართველოს მატრიანეში კი სწერია, რომ ქალაქი ვახტანგის ვაჟმა დაჩიმ გააშენაო.

ასე იყო თუ ისე, მე რომ მკითხვით, თბილისის ღერბათ ხობს და შავარდენს ავირჩევდი, რადგანაც ხობი მიეტად ლამაზი: კობთა და უწყინარი ფრინველია, რაც ძალიან შეეფერება გარეგნულად ქართულ სილამაზეს და მოხდენილობას, „შიგნატიკურად“ (ილიას სიტყვაა) კი თითქო გამოთქმულია ქართველობის ძირითადი ხასიათი (უწყინრობა). შავარდენი კი იმავ დროს ქართული გმირული სულის გამომხატველია.

მაგრამ ჩვენთვის თბილისი და მისი არე-მარე ისტორიულად საყვარელი უნდა იყოს იმ მხრივაც, რომ სხვა დიდ წინაპართა გარდა აქ ბრძანებულა დიდი დავით აღმაშენებელი და აქ გაუცია მას მისი ბრძნული განკარგულებები ქვეყნის ასაღორძინებლად; აქ უსეირნია უებრო თამარ მეფეს და თან ხლებია ამაღლა მაშინდელი ფილოსოფოსებისა, მხედართ მთავრებისა, პიიტიკოსებისა და მათ შორის გენიოსს რუსთაველს. და წარმოიდგინეთ ეს ხალხი ჩაცმული მეთორმეტე საუკუნის ქართულ ლამაზ ტანსაცმელში, ფარჩისა და ატლასის ქსოვილისაგან შენაკერი, თან მათი საუცხოვო ქართული მწყაზარი და ლამაზი სახეები, დინჯი, ტკბილ-სასმინარ—ქართულით მოსაუბრე და მე არა მგონია არ მოიხიბლოთ.

აქვე შეიძლება წარმოიდგინოთ, რომელიმე ბრგე მოყვანილობის ვაჟკაცი, რომელიც დგას უნარნარესი ქალწულის წინაშე სადღაო განრიდებულ ალაგას. მარტონი არიან და ვაჟი მოუთხოვს ქალიშვილს, რომელიღაც უკანასკნელი ნადიმის ამბებს.

— შენ რატომ არ იყავ, ნაზიბროლა?—ეკითხება ვაჟი, მაგრამ ნაზიბროლა რაღაცას თავისთვის ჩაილაპარაკებს, ამას ვაჟი

ყურადღებას აღარ აქცევს და განაგრძობს თავის თხრობას და ლამაზ, წარმტაც სიტყვებში გამოხატავს თავის აღტაცებას ნახულ ნაღიმობის გამო. თან, ეტყობა, მის გულს ბაგა-ბუგა გააქვს, ქალი კი ზოგჯერ შეანათებს თავის სხივოსან თვალებს ვაჟის მთელ აღნაგობას და შემდეგ კი თითქოს დარცხვენით ქუთუთოებს ჩამოუშვებს, თან წითლდება. ორთავეს ეტყობა, რომ იმას არ ამბობენ, რაც გულში აქვთ, არამედ ჩვეულებრივ საუბარში მარხავენ თავიანთ წმინდა გრძნობებს. ასე იმყოფებიან კარგა ხანს მანამ, სანამ ამხანაგები ან უფროსები მათ არ დაუძახებენ.

აქ კარგი იყო მთვარეც მეხსენებინა, რადგანაც ასე იყო მიღებული ძველ მწერლობაში, როდესაც განმარტოებულ ახალგაზრდა ქალ-ვაჟს დაგვიხატავდნენ. ახლაც ზოგჯერ მიბნედილ მთვარის შუქზე გვიჩვენებენ შეყვარებულებს...

მაგრამ მე ეხლა მოგიწოდებთ ერთ სენაკში, რომელიც განათებულია მხოლოდ კრაქის სინათლით და კიღობნისებურ მაგიდასთან მიმჯდარია გრძელი თეთრწვერა მოხუცი, რომელიც სწერს საქართველოს მატყანეს.

და ასე სულ დღევანდელ დღემდე მიდის ჩვენი დედაქალაქის ცხოვრება მაღალ საკაცობრიო საგანთა გამოკვლევა და შესწავლაში, სატრფიალო უბიწო შეხვედრებში, ადამიანთა მეგობრობის განმტკიცებაში და მე არა მაქვს ზემოთ ნათქვამი, რომ იმ დროს დიდათ გაღვივებული იყო ქალაქს ხელოსნების საუცხოვო საქმიანობა და მათი ნაწარმოები: ბეჭდებით, სამაჭურებით, ცხენის უნაგირებით, მათრახებით, ქალის და ვაჟის ფარჩის და ატლასის საუცხოვო ტანსაცმელით და სხვა საუცხოვო სამკაულით ივსებოდა დედაქალაქი. იმავე დროს თბილისში იბეჭდებოდა და მტკიცდებოდა ქართული ეროვნული თუ საკაცობრიო სხვადასხვა გამოკვლევებზე დამყარებული მაღალი აზროვნება და კაცობრიობის ნაწილი ეცნობოდა ქართულ ეროვნულ სულს. სამხედრო მორკმულოება, ხომ ყველასათვის დასაუნახავი იყო და ირგვლივ მდებარე სახელმწიფოები დაწყებული ბაზანტიითა და სპარსეთიდან და გათავებული წინა აზიის პატარა სასულთნოებით მორიღებით და მოკრძალებით იყვნენ საქართველოსადმი.

დღეს ზომ საბჭოთა ხელისუფლების დროს, სრულიად განათლებული და კომუნიზმის ბრწყინვალე მზით განათებული, მოწინავე რიგებში დგას ჩვენი რესპუბლიკაც.

მე რომ ჩავედი თბილისში ჩემი მოწინავეობისას ჯერ კიდევ ცარიზმის დრო იყო ცხრაასიანების პირველი ნახევარი და მაშინდელი რუსული რეჟიმი დიდათ ხელს უწყობდა „ტუზემცების“ გარუსებას, მაგრამ საქართველოს ნაციონალური ნაკადული ძლიერი იყო და მიუხედავად იმისა, რომ ვაქრობა-მრეწველობაში და სხვა მაშინდელ სახაზინო დაწესებულებებში მეტწილად არა ქართველები იყვნენ, თბილისი მაინც ქართულ კულტურის კერად გამოიყურებოდა.

მეც, როგორც კი დაარსდა ქართველ მსახიობთა პროფესიული კავშირი, რაც ზევით მაქვს მოხსენებული, ცოტა ხნის შემდეგ არჩეულ ვიქენ ამ კავშირის თავმჯდომარედ და ამის გამო უკვე ჩავტრიალდი თბილისის მოწინავე ინტელიგენციაში.

ამის გამო მე გავეცანი თბილისში მცხოვრებ საზოგადო მოღვაწეებს.

იმ დროს უკვე მთელ საქართველოში, მაშასადამე, უმთავრესად თბილისში, სამი პარტია იყო ჩამოყალიბებული: სოციალ-დემოკრატებისა თავის ორი შტოთი: ბოლშევიკების და მენშევიკების. ფედერალისტებისა და ნაციონალ-დემოკრატებისა. ყველა ამ პარტიას თავისი გაზეთები ჰქონდა და მე დრო დროთი ყველა ამ ორგანოებში ვთანამშრომლობდი, რადგან მე არსებითად არც ერთ პარტიას არ ვეკუთნოდი. ისე კი ლიტერატურული გზა გავიკაფე უფრო გაზეთ „ცნობის ფურცელში“ და ეს იმიტომ. რომ რედაქციაში ჩემ მწერლობას გაუჩნდა დიდი ხელის შემწყობი მფარველი ილია ალლაძე.

ილია ალლაძე იყო თვალსაჩინო ჟურნალისტი და იმავ დროს ჩეტად ნათელი პიროვნება, რომელსაც ძალიან აფასებდნენ საერთოდ თბილისის ლიტერატურულ წრეში და იყო დიდათ ხელის შემწყობი ახალგაზრდა მწერლებისა. ასე რომ მე მისი მეოხებით თითქმის ჩემი ყველა ჩამოკრულები გაზეთ „ცნობის ფურცელში“ მაქვს მოთავსებული. ამგვარმა მისმა გამხნეებამ პირადათ მასთან ძალიან დამახლოვა და ხშირად მისი ტკბილსასმინარი საუბარი ჩემთვის მეტად სასარგებლო იყო. ასე დავრ-

ჩით ნამდვილ მეგობრებად სულ მის გარდაცვალებამდე, როდესაც ის უკვე გაზეთ „კომუნისტში“ მუშაობდა. ბაქოშიაც ყოფნისას იქაურ სეზონებს მოუწყინარი და გონიერი რეცენზენტი იყო და აქაც დიდათ ხელს უწყობდა რეპერტუარის მაღალ დონეზე დაყენებას და არტისტების ღირსეულ გაწრთვას. იმავ დროს გარდა ჟურნალისტობისა ის ეწეოდა მთარგმნელობასაც და აი მაგალითად ლ. ტოლსტოის „ომი და მშვიდობა“ პირველად მის მიერ არის თარგმნილი ქართულად.

ჩემი ბებერი გული დიდი მადლობით იხსენიებს მის დადამაგს ქართულ ჟურნალისტიკაში და პირადათ ჩემთვის ხომ მისი ხსოვნა წარუშლელია ჩემი შეგნების უკრედეგში.

ილია აღლაძე დიდი მუშაობის უნარის პატრონი იყო და მისი აზროვნება მუდამ იყო შეფარდებული ქართულ პატრიოტიზმსთან და საკაცობრიო მოწინავე ზრახვებთან.

ის ერთ დროს ილია ჭავჭავაძის გაზ. „ივერიაში“ მუშაობდა და მას ჰქონდა ილიასაგან გამოყოფილი ამ დიდი კაცის ზოგადი თვისებები, როგორც მაგალითად: სიღინჯე აზროვნებაში, სისპეტაკე ლიტერატურულ საქმიანობაში და ქართული ენის სიწმინდის დაცვაში. ის მშვენიერი მოქართულე იყო. ცნობილია, რომ ილიას თავის რედაქციაში შემოკრებილი ყავდა მუდმივი თვალსაჩინო თანამშრომლები: გრიგოლ ყიფშიძე, არტემ ახნაზაროვი. ივანე ახალშენიშვილი და სხვა. მათ შორის ილია აღლაძეც მისი ხელდებული იყო.

ამ დროს კი მე ძალიან დაუუახლოვდი გაზ. „საქართველოს“ რედაქციას. ეს უფრო იმიტომ რომ ამ გაზ. რედაქტორი სანდრო შანშიაშვილი მის რედაქტორობამდე მყავდა გაცნობილი და ერთი მეორის მეგობრად ვითვლებოდით და ვითვლებით დღესაც, მხოლოდ ეს პირადი მეგობრობა მარტო ჩვენი ცხოვრების ერთი მეორის დამოკიდებულებაში კი არ გამოიხატებოდა, არამედ ორთავენი გულითადათ ვაფასებდით ერთი მეორის ლიტერატურულ შემოქმედებას და აი მე პირველად დავდგი ქუთაისში მისი ისტორიული პიესა „უგვირგვინო მეფენი“, რომელმაც; დიდი მოწონება დაიმსახურა ქუთაისის და თბილისის სცენებზე. მან კი პირველად დაბეჭდა თავის „საქართველოში“ ჩემი ისტორიული რომანი „უბედური რუსი“ შემდეგში „გიორგი რუ-

სად“ წოდებული. თუმცა ამ გაზეთში ამ რომანის დაბეჭდვა არ დასრულებულა, რადგანაც მაშინდელმა ცენზურამ გაზ. „საქართველო“ დახურა.

რაკი სტუკამ მოიტანა აქვე უნდა მოგახსენოთ, რომ ამ რომანის დაბეჭდვა განაგრძო პატივცემულმა პავლე ინგოროყვამ თავის ურუნალ „კავკასიონში“.

ამ ხანებში ჩამოყალიბდა საქ. მწერალთა კავშირი, რომლის პირველი ქართული წესდებაც უნდა დავიტრაბახო, რომ ჩემი შედგენილია.

იმ დროს თბილისში სრულიად ახალი კაცი ვიყავი და რაკი გარემოებამ მოიტანა რომ მე საზოგადოებრივ მუშაობაში მონაწილეობა მიმელო, დიდის ყურადღებით ეპყრობოდნენ ჩემ საქმიანობას და ხშირად მამხნეებდნენ ხოლმე, მაგალითად, როდესაც კავშირის წესდება შევადგინე. რასაკვირველია, კავშირის დამაარსებელ საორგანიზაციო კომისიას წინასწარ წავუკითხე და მახსოვს ნიკო ნიკოლაძემ ძალზე მომიწონა. თქვენ წარმოიდგინეთ რა გუნებაზედაც დამაყენებდა ასეთი დიდი კაცის გამხნეება. ამას ბანი მისცა ცნობილმა მოწინავე პოეტმა კოტე მაყაშვილმა და ამის შემდეგ დიდხანს ყელმოღერებული დავდიოდი.

და აი კოტე მაყაშვილი. ჯერ გარეგნობით: მაღალი, ტანადი, ლამაზი პირისახის, შავგვრემანი კაცი, მეტის მეტი თავაზიანი. გულკეთილი, გრძნობიერი. უმაღლესი ცოდნით ცყო აღჭურვილი, რუსეთში ჰქონდა დამთავრებული უნივერსიტეტი და სტუდენტობიდანვე ანვითარებდა თავის უთუოდ შესანიშნავ პოეტურ ნიქს ქართულ ენაზე, მაგრამ საქართველოში დაბრუნდა თუ არა, მაშინვე ჩაება საზოგადოებრივ მუშაობაში და პოეტურ შემოქმედებისათვის ნაკლები დრო დაურჩა. ასე რომ მისი მწერლობითი მემკვიდრეობა მცირე მოცულობისაა.

ის ხშირად იგონებდა ერთ კურიოზს მისი ცხოვრებიდან: როდესაც რუსეთის იმპერატორი, ნიკოლოზ მეორე, სტუმრად ჩამოვიდა თბილისში, რასაკვირველია, მას დახვდა წარმომადგენლები თავად-აზნაურობისა, ქალაქისა და სხვა ასეთი დაწესებულებებიდან. მაშინდელმა ქალაქის თავმა ხატისოვმა იკისრა. რომ იმპერატორისთვის გაეცნო ინტელიგენციის



სანდრო შანშიაშვილი და შალვა დადიანი.

წარმომადგენლები და სხვათა შორის წარუდგინა კოტე მაყაშვილი, როგორც საქართველოს ენობილი პოეტი. ამან იმპერატორმა ხელი ჩამოართვა კოტეს და უთხრა: „Очень рад, я читал Ваши произведения“. ირგვლივ აქა-იქ ჩაფრთხუნეს. კოტემ კი დაბლა თავი დახარა და გულში გაიფიქრა: „რას ამბობს ეს ნიკოლოზ მეორე, ქართული არ იცის და რუსულად სად ვექნები წაკითხული, როდესაც ქართულადაც კი ცალკე წიგნად არა ვარ გამოცემულიო“, ამის გახსენებაზედ მუდამ გულიანად იცინოდა და ჩვენც გვაიცინებდა. ისე კი როგორც კერძო, ისე საზოგადოებრივ ცხოვრებაში იყო დიდად სპეტაკი ადამიანი, მოუფერავი, დიდი პატრიოტი საქართველოსი და მუდამ საწალმართო აზროვნების მიმდევანი, ამიტომ იყო. რომ მის მცნობს ყველას უყვარდა და არ იყო ისეთი საზოგადოებრივი რამ წამოწყება, რომ ის არ გაერიათ. და აი ეს საუცხოო კაცობა როდესაც მწერალთა კავშირი დაარსდა, არჩეულ იქნა მის თავმჯდომარედ და ის იყო თავმჯდომარე საბჭოთა ხელისუფლების დროსაც, გარდაცვალებამდე და აი ამ დაწესებულებას მუდამ თავს დასტრიალებდა და ბევრი რამაც გაუკეთა თავის დროზე, რაც ახლა შეიძლება წერილმანად გვეჩვენოს, მაგრამ მაშინ კი ძალიან საჭირო იყო. თვით ის შენობაც კი, სადაც ახლა მწერალთა კავშირა მოთავსებული. კინალამ წაგვართვეს, მაგრამ კოტეს შუამდგომლობამ და ახსნა-განმარტებამ ზემდგომ ორგანოების წინაშე, მწერლებს დაუტოვა ეს სარაჯიშვილის ყოფილი სასახლე.

უნდა გავიხსენო ერთი შემთხვევაც, რომელიც მასთან ერთად გადამხდა. არ ვიცი რა მიზეზის გამო, ზოგიერთი ჩვენი მწერალი და მათ შორის გრიშაშვილიც დაატუსაღეს. კოტე გაემართა მთავრობისაკენ და მეც თან წამიყვანა. აქვე უნდა ვთქვა, რომ მე თავიდანვე ძალიან დამიახლოვდა და უჩემოდ თითქმის არც ერთ საზოგადო საკითხს არ სწყევტდა.

წამიყვანა და ვეახელით კოტე ცინცაძეს, რომელიც მაშინ შინსახკომს განაგებდა. ეს ის კოტე ცინცაძეა, რომელზედაც მაშინ სახუმარო ჭორი დადიოდა, რომ კოტემ შეუთვალა ენობილ მწერალსა და „თეატრი და ცხოვრების“ რედაქტორ იოსებ

იმედაშვილს. რომ „ნუ იმალები, ხომ იცი ვერსაც წამიხვალ, მაგრამ რაც უნდა ეცადო, მე მაინც შენ არ დაგატუსალებო“.

ჩვენ კი. კოტე და მე, დიდი ზრდილობით მიგვიღო ცინცაძემ, ძალიან თავაზიანად მოგვისმინა და როდესაც ავეუსხენით, რომ დატუსალებულებს არავითარი პოლიტიკური დიდი დაწაშაული არ მიუძღოდათ. მაშინ გვკითხა ვინ უთავმდებებს იმათ, რომ თუნდაც ასეთ არა დიდ დანაშაულს აღარ ჩაიდენენო. მაშინ კოტემ დიდის რიხით განუცხადა, რომ თავმდები მე და შალვა ვართო. ამაზე ცინცაძეს გაეცინა, შემოგვხედა და გვითხრა: „თქვენ კი გენდობითო?“ ამაზე დავინახე, რომ მკაშვილი გადაფითრდა, მე კი გამელიძმა, მაგრამ უთუოდ ეს ღმეჭა უფრო იყო ვიდრე ღიმილი. მაგრამ თავისუფლად ამოვისუნთქეთ. კოტემ და მე მაშინ, როდესაც ცინცაძემ ჩვენი თანდასწრებით ტელეფონით უბრძანა, რომ ტუსალები გაენთავისუფლებინათ. და აი ასე ძვირფასი კოტე მკაშვილი სანამ ცოცხალი იყო მუდამ ჩვენი მწერლების ლალა და მოსარჩლე იყო.

შედარებით ახალგაზრდა გარდაიცვალა. ამ მოწიფულ კაცს. სწრაფი კლუჭი შეეყარა და ეს ბრგე კაცი მძიმე ავად გახდა. ამბობდნენ. რომ ამ ხანში ასეთი სენი არ ემართებათო. უკვირდით მისი ავადმყოფობა. ჩვენ მწერლები, რასაკვირველია. მივედით მის სანახავად. უნდა გენახათ, როგორ გაეხარდა. როგორ გვეალერსებოდა თვითეულ ჩვენგანს, სულ „გენაცვალე“ და „შენი ჭირიმეთი“ გველაპარაკებოდა. ეტყობოდა გრძნობდა მის მოახლოებულ აღსასრულს. მაგრამ ამაზე თავის შესაბრალებლად სიტყვაც არ წამოსცდენია.

დიდათ დააღონა საქართველოს მოწინავე საზოგადოება მისმა სიკვდილმა და დიდის გამოჩინებით დაიმარხა კიდევ დიდების პანთეონში, სადაც, სხვათა შორის, პოეტმა პაოლო იაშვილმა წარმოსთქვა თავისებური ბრწყინვალე სიტყვა.

როგორცა ვთქვი, ჩემი მწერლობა თბილისში უფრო გაღვივდა. მაგრამ ამავე დროიდან თბილისში დაიწყო ჩემი, თეატრის გარდა, საზოგადოებრივი მუშაობა. ეს იყო 1921 წელს, საქართველოში საბჭოთა ხელისუფლების დამყარების დროს. მართალია. ამის წინათაც ვიყავ თბილისში მენშევიკების დროს

ნაცხოვრები და როგორც ზეითაც მაქვს მოხსენებული, ქართველი მსახიობების პროფკავშირის თავმჯდომარედაც ვიყავ იმ დროს არჩეული, მაგრამ ჩემი უფრო ინტენსიური მუშაობა საზოგადოებრივ დაწესებულებებში დაიწყო სწორედ 1921 წლიდან, რომლის შემდეგაც მე თითქმის თბილისში დავსახლდი, აქ მოვიდგი ფეხი და დრო დროთი თუ არა, სხვაგან საცხოვრებლად საქართველოში ფეხი არ გამიდგამს.

საბჭოთა ხელისუფლების დამყარებიდან კი სრულიად შეიცვალა უწინარეს ყოვლისა დედაქალაქის ცხოვრება და ქართული კულტურული დონის ამაღლება, განშტოება და აღორძინება. მაგალითად: დაარსდა სამეცნიერო აკადემია, სამხატვრო აკადემია, კონსერვატორია, მწერალთა კავშირი ხომ არსებობდა, მაგრამ ამას მიემატა „ცისფერყანწელების“ მძლავრი ჯგუფი, რომელსაც ხელმძღვანელობდნენ პაოლო იაშვილი. ტიცციან ტაბიძე და ვალერიან გაფრინდაშვილი; აგრეთვე უფრო დახვეწილად ჩამოყალიბდა პროლეტარული მწერლობა ნოე ზომლეთელის და სანდრო ეულის მეთაურობით. ამ ჯგუფებს კიდევ მიემატა სრულებით ახალგაზრდა მწერლები—საგან შემდგარი „მემარცხენეთა“ წრე, რომელშიაც ირიცხებოდნენ—სიმონ ჩიქოვანი, ბესო ჟღენტი, ნოზაძე, ჩაჩავა და სხვანი. ყველა ამათ გაიჩინეს თავ-თავიანთი ორგანოები, რომელთა შორის უფრო ხანგრძლივად იარსება „ქართულმა სიტყვამ“. „ლომისმა“.

ამ დროს კიდევ მწერალთა კავშირის უფროსთა თაობიდან გამოიყო ერთი ჯგუფი, რომელმაც თავისთავს უწოდა „არიფიონი“ და თავის არსებობისას გამოსცა ალმანახისებური კრებული. კრებულში მონაწილეობდნენ: მიხეილ ჯავახიშვილი, სანდრო შანშიაშვილი. ლეო ქიაჩელი, კონსტანტინე ჭიჭინაძე. გერონტი ქიქოძე, მაშინ სულ ახალგაზრდა მიხეილ მრეველიშვილი და ამ სტრიქონების დამწერი. „არიფიონის“ კრებულმა დიდი აურზაური გამოიწვია დანარჩენ მწერლებში და ხშირად თავს ესხმოდნენ ამ ჯგუფს როგორც პრესაში. ისე სხვადასხვა საზოგადო კრებებზე. პროლეტარულ ჯგუფის მწერლებიდან სხვებზე უფრო მწვავედ გამოილაშქრა ბელეტრისტმა პავლე საყვარელიძემ. რეაქციონერებად მიიჩნია არიფიონე-

ლები და ამ ჯგუფის საწინააღმდეგო ბრძოლისაკენ მოუწოდა აუდიტორიას. არცერთ ამ ჯგუფთაგანს დიდხანს არსებობა არ დასცლია. რადგანაც პარტიისა და ხელისუფლების ზემდგომ-მა ორგანოებმა გააერთიანეს ყველა ესენი და შექმნეს ერთი დიდი სრულიად საქართველოს საბჭოთა მწერლების კავშირი, რომელიც დღესაც არსებობს, და აი ამ დროს იყო, რომ მეც დავიწყე ჩემი პირველი ისტორიული რომანის „უბედური რუსის“ შემდეგში „გიორგი რუსად“ წოდებულის წერა.

რამ გამოიწვია ამ თხზულების დაწერა?

რომ მოვიწიე, ჩემს ერთგვარ აღშფოთებას იწვევდა ის ვარემოება. რომ ჩემის ფიქრით. ჩვენი ისტორიის წარსული არ იყო სათანადოდ გაშუქებული, განსაკუთრებით ჩვენს მხატვრულ ლიტერატურაში.

ჩვენი დიდებული პოეტები: ილია და აკაკი წერდნენ თავის შედეგებს პოემებას სახითაც. მაგრამ მათ შინაარსად აღე-ბული ჰქონდათ ისეთი ეპიზოდები, როდესაც საქართველო გაბმული იყო მოგერიებით ომში და დიდ ვაჟკაცობასაც იჩენ-და. სულიერ დიდ სიგმირეს, მაგრამ საქართველოს წარსულის მაღალი დონე, მისი სულიერი სიმაღლე აქ არსად სჩანდა. მაშ რას მოგვითხრობდნენ ჩვენი ძველი მატრიანეები, რომ ჩვენ ვვქონდა საოცარი თავისთავადი ზუროთმოსღერება, რომლის გეგმა და მშენებლობის სიმწყაზრე ახლაც აკვირვებს საზღვარ-გარეთელ სპეციალისტებსაც კი, უაღრესად შესანიშნავი მუსი-კა. თვით ხალხის მიერ შექმნილი კონტრაპუნქტი, რაიც ძველ-თაგანვე. საქართველოს ერთიან სახელმწიფოდ ჩამოყალიბე-ბიდან; საუკუნოების მანძილზე გვქონდა საგანძურში, მაშინ როდესაც ამისთანა რამ მეათე, მეთორმეტე საუკუნეებში ეე-როპასაც კი არ გააჩნდა; ბრწყინვალე საერო და სასულიე-რო ლიტერატურა, სადაც ყვაოდა პოეზია, ფილოსოფია და სხვა მეცნიერული დარგი; როდესაც ჩვენ გვქონდა ჩვენი სა-კუთარი აკადემიები გელათში, იყალთოში და სხვა, სადაც მა-შინდელი ახალგაზრდობა ეწაფებოდა უმაღლეს საკაცობრიო ცოდნის მწვერვალებს, იმას გარდა, რომ საბერძნეთში იგზავ-ნებოდა ქართველი ახალგაზრდობა განათლების მისაღებად და აქ კიდევ შინ არაბულ და სპარსულ ლიტერატურას უშინაურ-

დებოდა. სად მოსჩანდა ამისი კვალი XIX საუკუნის მწერლების ნაწერებში? ან მაშინდელი სამეფო წესწყობილების ანარეკლი, თუნდაც, მაგალითად თამარ მეფის დროს, განსაკუთრებულ „კარავში“ დამუშავებული კონსტიტუციის დებულება მაშინდელ მოწინავე პირთა და მკოდნეთაგან. ეს იმ დროს, როდესაც ინგლისს თავის „ხარტია“ არ ჰქონდა ჩამოყალიბებული და ბევრი სხვა საშინაო წამოწყებანი.

ან საიდან გაჩნდა რუსთაველი? ციდან ხომ არ ჩამოვადებოდა თუ მას თავის სახლში, თავის საშობლოში არ ჰქონდა მომზადებული ნიადავი თავის გენიოსობისათვის.

ყველა ამაზე ვწუხნდი ჩემებურად და აფორიაქებული ვიყავი, მართალია, ახალგაზრდობაშივე გადაკითხული მქონდა დაბეჭდილი ისტორიული თხზულებანი როგორც ძველი, ისე ახალი: „ქართლის ცხოვრება“, ვახუშტი, დიმიტრი ბაქრაძე, მოსე ჭანაშვილი, ცამციცი-ბამაშვილიც კი, მაგრამ. ჯერ ერთი. ბელეტრისტიკის მუშტრისთვალით არ ეუყვირდებოდი იმას, რაც საკირო იყო და მეორე კი, სანამ ჩვენმა სახელოვანმა ისტორიკოსმა ივანე ჭავჭავაძემ არ გამოაქვეყნა თავისი ნაშრომები, მანამ კიდევ არა მქონდა ჩვენი წარსულის თვისება კარგა წარმოდგენილი.

რალა თქმა უნდა. რაც მე აქ ზემოთ ჩამოვთვალე იმის აღწერას, მაშინაც ვგრძნობდი, რომ ვერ შეეძლებდი. მაგრამ სადმე ერთი საყურადღებო ეპიზოდის გამოკერას კი ვლამობდი.

და იი თამარ მეფე და მისი ხანა.

იმ დროს უკვე დიდად მოკეთებული, გაძლიერებული, მორკმული და სახელოვანი ბიზანტია ისტორიულ პირობების გამო უკვე ჩამოქვეითებული იყო და არაბეთსაც თავისი ძველი გავლენა აღარა ჰქონდა. ამ დროს კი საქართველო თავისი კულტუროსობით და სამხედრო ძალდონით უკვე დიდად შესამჩნევი იყო. ამისთანა ხანა გვქონია ქართველებს და ამას ყურადღება არ უნდა მიექცეს? მე რე კიდევ თამარის დროს მეტად საყურადღებო ეპიზოდს წავაწყდი, თამარის გათხოვების საკითხს, რასაც მოყვა ტრაგიკული ბედი იური დოლოგორუკისა.

როგორც იტყვიან შემოვიწყვე საჭირო წიგნები, შევაწუხე ჩვენი დიდი ისტორიკოსი ივანე ჯავახიშვილი ჩემი შეკითხვებით: რა ტანისამოსი ეცვათ მეთორმეტე საუკუნეში ქართველებს — ფეოდალებს, ვაჭრებს, გლეხობას, მონაზვნებს; რას სვამდნენ, რას ჭამდნენ, როგორ ილხენდნენ, როგორ ცეკვავდნენ, როგორ მღეროდნენ, როგორი საკრავიერები (თვითონ ჯავახიშვილის ტერმინაა) ჰქონდათ და სხვ. ისიც ჩვეულებრივი თავაზიანობით და დაუზარებლად იძლეოდა ხან ზეპირ პასუხს და ხან მიმითითებდა აქა და აქ, ამ მანუსკრიპტში მაიღებ ახსნა-განმარტებასო. აგრეთვე ვაწყუხებდი მოსე ჯანაშვილს და თითქმის ყველა საომარი იარაღების სახელწოდებანი მან მომაწოდა, განსაკუთრებით ასრებინა, რაც მე ჩემ რომანში უხვად მაქვს წარმოდგენილი. არტიკლებშიდაც მომიხდა მუშაობა და ასეთი გარჯათა და მეცადინეობით თითქმის მთელი ათი წელიწადა ვწერდი ამ ნაწარმოებს, დაბეჭდვის შემდეგ რომანმა დიდი გამოხმაურება გამოიწვია და უმეტესობას უკვირდა, ნუ თუ ამისთანა წარსული გქონდაო? მე კი გულში, როგორც ყველა ავტორს, მახარებდა ჩემი ნაწერის ასეთი გულთბილი მიღება, მაგრამ განსაკუთრებით ის, რომ ახალგაზრდობას მაეცი საშუალება აღძროდა ინტერესი თავის სასახლო წარსულისადმი, ჩემზე უფრო კარგად შეესწავლა და ეამაყა თავის წარსულით.

მხოლოდ ახლა, ბოლო ხანებში, ერთი-ორი სამი წელიწადია, რაც ზოგიერთი კრიტიკოსი მოუბრუნდა ამ რომანის გარჩევას და მე ვფიქრობ დაუკვირებლობის გამო დამიწუნა მთელი მიმართება რომანის შინაარსისა, ამას სამწუხაროდ აპყვა ზოგიერთი პიროვნება და მხარი დაუჭირეს ასეთ გამოხდომებს. ამას იმიტომ ვამბობ ასე თამამად, რომ ერთმა პიროვნებამ, როდესაც მწერალთა კავშირში მორიგ კრებაზე არჩევდნენ ამ ჩემ რომანს და მე ჩემ საპასუხო სიტყვაში გამოვეცამათე მომხსენებელს, შესვენების დროს მკითხა: „კუხმა რუსი მართლა გყავთ გამოყვანილიო“. მე დიდი ბოდიშით მოეახსენე, რომ არ გქონიათ წაკითხული მეთქი და ასე... ბევრი რომანის წაუკთხავად მაკრატოებდა.

მთავარი ბრალდება ის იყო, რომ მე რუსეთის სასიკეთო გავლენა საქართველოზე არ აღვნიშნე, თუ ვერ აღვნიშნე, და თითონ საქართველოს მაშინდელი მდგომარეობაც მეტად შელამაზებულად მქონდა აღწერალი.

ჩემი პასუხი მაშინაც ეს იყო და დღესაც ეს არის, რომ მე არაფერი შელამაზებული არა მაქვს. არამედ ყველა ჩემ მიერ გამოყვანილი მოვლენები და სახეები ისტორიულ დოკუმენტებზეა დამყარებული, რადგან მე გარდა ქართული წყაროებისა, ამ ეპოქის გარშემო, გადაკითხული მქონდა რომანის დაწერის დროს ბიზანტიური, არაბული, სომხური, რუსული და სხვა დოკუმენტები, რუსულის გარდა, რასაკვირველია, ყველა თარგმანებში და აქედან ჩემს მიერ დიდის მოკრძალებით აშენდა, ასე ვთქვათ, ეს ჩემი ბელეტრისტული „კოტეჯი“. რაც შეეხება რუსეთის გავლენას მეთორმეტე საუკუნეში, საქართველოსთან დამოკიდებულობის დროს, რაღა თქმა უნდა, სრულიად არ იგრძნობოდა, რადგანაც მაშინ რუსეთი არ იყო გაერთიანებული ერთ სახელმწიფო ერთეულად, არამედ იყო დანაწილებული ანუ, იმერულად რომ ვთქვათ „დაწიწილაკებული“ პატარ-პატარა სამთავროებად: პსკოვისა, ნოვგოროდისა, ზოგოლუბოვოსი და სხვ. ასე რომ მაშინ რუსეთს არ შეეძლო გავლენა მოეხდინა სხვა სახელმწიფოებზე არც თავის კულტურით და არც თავისი მეომრული ძლიერებით. როგორც ზემოთ ვთქვევ, მაშინდელი მთელი კაცობრიობის ყურადღება მეტწილად ბიზანტიაზე, არაბეთზე და საერთოდ აღმოსავლეთზე იყო მიპყრობილი. ასე რომ ჩემ რომანში ამ მხრივაც ისტორიულ სიმართლისთვისაც არ გადამიხვევია. მე მგონია, რომ დოჟაჯერე აუდიტორია, რადგანაც მომხსენებელს საპასუხო სიტყვა აღარ უთქვამს და არც არავის ჩემი პასუხის შემდეგ ხმა აღარ ამოუღია.

მოკლედ ასეთია ჩემი რომანის „გაორგი რუსის“ დაწერის და ბედის ისტორია.

მას შემდეგ ძალიანაც გამიშინაურა ჩვენმა ლიტერატურამ და მეც შეძლებისამებრ ვბეჭდავდი პატარ-პატარა მოთხრობებს და პუბლიცისტურ წერილებს ჩვენს ორგანოებში.

ეს იყო საქართველოში საბჭოთა ხელისუფლების დამყა-

რების დროს, როდესაც ფართოდ გააღო კარება ყოველგვარი კულტურული მუშაობისათვის, საქართველოშიც აღორძინდა როგორც ქართული მხატვრული ლიტერატურა ყველა თავის შეშავალა დარგებით: პოეზია, პროზა, დრამატურგია, ისე მუსიკა თავის ოპერებთ და სიმფონიური ნაწარმოებებით; ხუროთმოძღვრება თავისი ახალი ძიებებით და მიდგომით; ფერწერა და ქანდაკება, რომელთაც გაუჩნდა დიდად ხელოვანი ოსტატები ქართველებიდგან და სხვ.

მე კი განსაკუთრებით დრამატურგიაში ამ დროს შევქმენი „თეთნულდი“, „კაკალ გულში“, „ნაპერწყლიდან“ და სხვ. პიესა „ნაპერწყლიდან“ კი ისეთი პოპულარული გახდა და იმდენად გაითქვა სახელი, რომ გადაითარგმნა რამდენიმე ენაზე და დიდგა კიდევ მოსკოვსა და ლენინგრადში და რუსეთის სხვა პერაფერიის თვალსაჩინო ქალაქებში. დაიდგა აგრეთვე სომხეთში, აზერბაიჯანში, ყაზახეთში, დაღესტანში, ბელორუსიასა თუ უკრაინაში. არ დადგმოლა, მაგრამ გადათარგმნილი კია ჩინურ და ჩეხოსლოვაკურ ენებზე.

სულ ბოლო ხანებში კი, 1957 წელს, კვლავ ბელეტრისტიულ ნაწარმოებით გამოვმზეურდი. ეს არის ჩემი უკანასკნელი რომანი „გვირგვილიანების ოჯახი“, რომელმაც არამც თუ ჩვენიში. არამედ თერთონ მოსკოვშიც, ჩვენი დეკადის დროს, მეტად კარგი შეფასება მიიღო და დღეს 85 წლის კაცს, მართალია. თავდახრილი ჯდომა მიყვარს, მაგრამ როდესაც წამოვდგები და გავიარ, ჩემა დამფასებლების მიერ გამხნეებული, წელში ვსწორდები და ყელი მოღერებული მაქვს.

აი ეს არის სულ ჩემი ცხოვრების საგზალა მწერლობაში, რომელიც, მე მგონია, ურცხვენლად მიმიყვანს საფლავამდე და მეც ჩემი აღსასრულის დროს ლოცვა-კურთხევას შემოვეუთვლა ჩემ სათაყვანო სამშობლოს, მის ნიჭიერს და გონიერ ხალხს. გარეგნულადაც სანიმუშო სილამაზით შემკულს, ცხოვრების სიხალისით აღსავსეს, გამრჯესა და მოწინავეს.

ახლა მინდა გავიხსენო ეს გარემოებაც, თუ საერთოდ მე როგორა ვწერ, როგორი „მარიფათის“ მწერალი ვარ.

როდესაც რაიმე იდეა, თემა დამიპყრობს, ან თუნდა სრულიად უბრალო რამ სუუეტი, მაშინ ამის გარშემო დიდხანს



შალვა დადიანი და აკაკი ხორავა
სასტუმრო „მოსკოვის“ ზედასართულის აივანზე.

ვფიქრობ. მე ამჟამად ვეხები ჩემ მხატვრულ მოცულობით დიდ ნაწერებს. პუბლიცისტიკა კი ეს საყოველღიურო ამბავია.

დიდხანს ვფიქრობ, ზოგჯერ წლობითაც კი და რაკი თავში ჩამექდობა იღუა, ჩემი ფაქრი სულ ამის გარშემო ტრიალებს, სულ ერთია მარტო ვარ, თუ საზოგადოებაში, ჩემ გარშემო ქეიფია, ლხინი და მოლხენა, თუ გლოვა და ტირილა, უბრალო შეხვედრის დროსაც მეგობრებთან, ნაცნობებთან, რასაკვირველია, მხარს ვუჭერ მათ გასაუბრებას, მაგრამ ჩემი სახის გამომეტყველება სადღაც სხვაგან მაინც არ გამიბრბის. ვერავენ ვერ შეამჩნევს, თუ რაღაც საკუთარ დიდ ფიქრს მოუპყრია.

ერთხელ ვწერდი: ჩემ თითებს ვერასოდეს ვერ ნახავთ მელნით დასვრილს, როგორც ეს წერის დროს ზოგიერთებს ემართებათ ხოლმე. ასე რომ ვერავენ ვერ იტყვის ამ მხრივ, რომ მე მწერალი კაცი ვარ, აგრეთვე აქაც ვერავენ იტყვის, რომ მე მოაზროვნე კაცი ვარ. მართალია. თითქოს უფრო მოლუშული სახე მაქვს, მაგრამ სხვები ამბობენ, შალვა მუდამ აღიმისო, უდარდელი კაციაო და ეს უფრო მაშინ მემჩნევა, როდესაც ჩონა-ახალუხით ვარ გამოწყობილი.

ასეთი მატყუარა კაცი ვარ და აი გავიდა წლები: ჩემი იღუა თითქოს უფრო მომწაფდა და მეც ჩემ თავს ჩემ გუნებაში უფრო ვარწმუნებ, რომ ესლა შემიძლიან წერაც დავიწყო მეტი და საღაც უნდა ვიყო, მიეუჭდები მაგიდას, შეიძლება ფანჯარასაც და ირგვლავ რაც უნდა ხმაური იყოს, ვაი უშველებელი, მე ხელს ვერ შემიშლის. ის კი არა. ასეთ წერის დროს, რაიმე გარეშე კითხვით თუ მომმართა ვინმემ, მე მზამზარეულ პასუხს ვაძლევ, ამის შემდეგ კვლავ ჩემ საწერს განვაგრძობ.

წერათ კი ძალიან ჩქარა ვწერ და წლობით მოფიქრებულ თხზულებას ხშირად რამდენიმე თვეში ვათავებ. იმავე დროს ჩემი ნაწერის შავს, საკვირველია. მაგრამ არასოდეს არ ჩავასწორებ ხოლმე. პირდაპირ ჩემ შავს გადავცემ რედაქციას ან გამომცემლობას.

დადად გაოცებული შევიქენი, როდესაც გავიგე, რომ ლევ ტოლსტოიმ თვითონ, თავის ხელით თექვსმეტჯერ გადაწერა

მისი დიდებული რომანი „ომი და მშვიდობა“. ამას გარდა ცნობალია, რომ ლევ ტოლსტოი, მისი ნაწერის ანაბეჭდებს რომ მოუტანდნენ კორექტურისათვის იმდენ რამეს ჩაასწორებდა და ჩაუმატებდა, რომ ასოთამწყოები ჯავრობდნენ თურმე — ეს რა დიდი სამუშაო მოუცილო. ასე იქცევიან თურმე სხვა დიდი მწერლებაც როგორც უცხოეთში, ისე ჩვენშიაც. მე კი ამ მხრივ დაჩაგრული კაცი ვარ. ეტყობა, რომ არა ვარ მაღალი დონის მწერალი. რაც შეეხება ჩემ სიჩქარეს წერაში და საერთოდ ჩემა ნაწერის გამოქვეყნებისას მეგობრები და ამხანაგები დიდად გაკვირვებულები იყვნენ: ზოგჯერ მართლა უღარდელ კაცად მივაჩნდით, პირდაპირ ვთქვით — ქარაფშუტად და ამიტომ არც ჩემი აზროვნებასა სწამდათ რამე. ისე კი ამხანაგები თითქოს მეხუმრობოდნენ: „შალვა, როდის ასწრებ წერას, სულ სარდაფებში ხარ, რესტორნებში, ჩაის კიქით ხელში ღვინო გიჭირავსო, როგორ ახერხებ ამასო?“.

და იყო ერთი ხორხოცი.

აქ ესეც გამახსენდა და უნდა ვთქვა, განსაკუთრებით ახალგაზრდობისას მსახიობებს არ სწამდათ ჩემი მსახიობობა, გაიხახოდნენ — რა მსახიობაა, რას გვეჯაჯგურება, ეგ უფრო მწერალია და დაჯდეს და წეროსო. მწერლები კი ამბობდნენ — რა მწერალია, ხომ მსახიობობს და დარჩეს მსახიობად, ამ მწერლობას რას ეძალებათო. და ასე კინალამ აკაკის იგავარაკას გმირად გამხადეს ზოგიერთის თვალში, ხომ გახსოვთ: „ერთმა უგნურმა თავუნამ იუჟადრისა თავობა“. მაგრამ ეტყობა, ბოლოხანებში, ჩემი სიცოცხლის მანძილზე ჩემმა მოუწყანარმა გარჯილობამ მათი მოსაზრება გააბათილა.

საზოგადოებრივი სამსახური

ახლა კი ვილაპარაკოთ საერთო ჩემ საზოგადოებრივ სამსახურზე.

ამის სათავეც თბილისში უნდა ვეძიოთ, რადგან მწერლობასთან ერთად თბილისში მომხიდა საპასუხისმგებლო სამსახური.

მე თბილისში სანამ საბოლოოდ ფეხს მოვიდგამდა, მანამ ოცსა და ოცდაერთი წლების სეზონებში, ქუთაისის დრამატულ საზოგადოებისაგან, ქუთაისის დასში ხელმძღვანელად და რეჟისორად ვიყავე მიწვეული. სეზონი კარგად მიდიოდა, ვდგამდი უფრო ქართველ ავტორების პაესებს, როგორც მაგალითად: რამიშვილის „სალომეს ოჯახს“, გერგესელის „ბურუსს“, გულისაშვილის „დრონა მეფობენ“, ჩემს „ვარამს“ და მთელი დასი იმსახურებდა საზოგადოების სიყვარულს და პატივსაცემას. იმ დროს შემოვიღე კიდევ წესად, რომ მცოდნე ხალხს წაეკითხა ჩვენთვის ლექციები: თეატრალურ ხელოვნებაზე, დრამატურგიაზე საერთოდ, ევროპიულ თეატრების და კერძოდ საქართველოს ისტორიაზე, მკაფიო მეტყველებაზე და აგრეთვე ფიზიკურ ვარჯიშობაზე, ფარიკაობა, ცეკვა-როკვა როგორც ევროპიული, ისე აზიური და სხვ. ამ ზომებმაც გამოაცოცხლა დასის მუშაობა. სწორედ ამ დროს მოხდა რუსეთში გადატრიალება და მენშევიკების მთავრობაც იძულებული შეიქნა კულდამოძებული ზღვით ევროპისკენ გაპარულიყო.

მანამდე რას არ წერდნენ მენშევიკური გაზეთები ბოლშევიკებზე. მათ ბარბაროსობაზე, ადამიანთა დაუზოგავობაზე და დიდად აშინებდნენ ქართველ ხალხს და აგულიანებდნენ მათთან საბრძოლველად, მაგრამ „არ გარდავალს გარდუვა-

ლი“ და თებერვლის 25-ს საქართველოში საბჭოთა ხელისუფლების დამყარება გამოცხადდა.

ქუთაისშიაც მამროსონის უღელტეხილიდან მოდიოდა ბოლშევიკური ჯარი და, მიუხედავად მენშევიკების წინასწარ დაშინებისა, მათ არავითარი ექსცესები არ მოუხდენიათ. ქუთაისშიაც დაფრთხა ხალხი, განსაკუთრებით მას შემდეგ, რაც თბილისიდან მატარებლით მენშევიკურმა მთავრობამ ჩამოიარა. მათ ჩამოსვლის დროს არავითარი დემონსტრაციები თუ მანიფესტაციები მათ საპატივცემულოდ ქუთათურებს არ მოუწყვიათ, ისე უმნიშვნელოდ, ჩაილულის წყალივით გადნა მენშევიკური ხელისუფლება. მათ წასვლას შემდეგ ბოლშევიკებისადმი შიშის გამო დაიკეტა ბაზარი, ღუქნები, დაწესებულებები. თითქო ქალაქი ცოცხალ ადამიანებისაგან დაცარიელებულიყოს.

მსახიობებსაც, რასაკვირველია, შეეწყვიტეთ წარმოდგენები ვიფიქრეთ იმაზე, თუ მოსალოდნელ შიმშალისაგან თავი როგორ დაგვეღწია. ამისათვის შევადგინეთ მცირე კომისია ცნობილ მსახიობის ალექსანდრე იმედაშვილის მეთაურობით, რომელმაც გაგვიჩინა სურსათ-სანოვავის პირველ ხანად ერთი კვირის მარაგი მაინც. ჩვენ ძალიან კმაყოფილები ვიყავით.

ბოლშევიკების ჯარი შემოვიდა ქალაქში და გამოცხადდა, რომ ქუთაისის ქალაქის კომენდანტი არის კოლია წულუკიძეო. თქვენ გახსოვთ ამ ჩემი ნაწერიდანაც საქართველოში რას წარმოადგენდა კოლია. ყველა გააკვირვა ჯერ მისმა ბოლშევიკობამ და შემდეგ ასეთმა თანამდებობამ. მე კი, ცოტა არ იყოს, გამეხარდა, რადგან ვიფიქრე, რომ როგორმე ვნახავ და გავახსენებ ჩვენს ძველ მეგობრობას და ამითი შეიძლება თეატრი და დასი მაინც გადავარჩინო, როგორც მაშინ მე მეგონა, ბოლშევიკურ ჯარის უხეშობას მეთქი, მაგრამ მისი ნახვა, ცოტა არ იყოს, ძნელი გამოდგა, ჯერ ერთი იმიტომ, რომ ოთხი საათის შემდეგ ქალაქში სიარული აკრძალული იყო თუ რამე საში არ ექნებოდა კაცს, მეორე ის, რომ თვითონ კოლია ძალზე მოუცლელი იყო თურმე თავის სამსახურის გამო და იმდენი ხალხი ესია გარშემო, რომ მასთან ახირებულად ვერ მაღწევდი. მაგრამ გამოვიდა ახალი განცხადება (ასეთ განცხადებებს

საერთოდ ქუჩებში თვალსაჩინო ალაგას აკრავდნენ) რომ კოლიას მაგივრად ვილაც ახალი, რუსი იყო დანიშნული და ასე სულ რამდენიმე დღის განმავლობაში თითქმის ყოველ დღე ინიშნებოდა ახალ-ახალი კომენდანტები, ამასობაში ჩვენ, დასის წევრები, ვიყავით შექუჩული ჩვენ ჩვენ ოთახებში და იმედაშვილასაგან დილდილაობით განაწილებულ ულუფით ვიკვებებოდით.

• ერთხელ შინ ვართ მე და მსახიობი ელო ანდრონიკაშვილი. (მაშინ ის უკვე ჩემი მეუღლე იყო). იქნებოდა სადილობის დრო, რომ ოთახის კარებზე დაგვიკაკუნეს. გავაღეთ და დავინახეთ, რომ ახალგაზრდა რუსის ჯარისკაცები კარს მოგვდგომოდა. არ.თქმის, რომ მაინცდამაინც გვესიამოვნა მათი მოსვლა, რადგანაც ხმა იყო გავრცელებული, რომ ადამიანებს ოჯახში უხტებიან ბოლშევიკები, ოჯახს აუფორიაქებენ და სრულად უმიზეზოდ ატუსაღებენო კიდევ, ხოლო თუ ვინმეს ჰალსტუკიანს ნახავენ, იქვე მიახვრეტენ ანუ თავს წააგდებინებენო, მაგრამ ჩვენი სტუმრები ძალიან თავაზიანად და პირზე ღიმილათ შემოვიდნენ ჩვენთან. გაჩერდნენ შუა ოთახში, მათ შორის ყველაზე უმცროსმა ოთხივე კედელი მოათვალიერა. თვალების მეტყველებაზე შევატყვე. რომ ხატს ეძებდა პირჯვარის დასაწერად. ამანაც, ცოტა არ იყოს, გულში გამაცინა და თან დამამშვიდა. მივხვდი, რომ ჩვენს ასაკებად არ იყვნენ მოსულნი. ერთმა მათგანმა მოითხოვა კიდევ — არაყი არა გაქვთო, მაგრამ ელომ მაშინვე მოუბრუნინა პური, ყველი. რაღაც შექამადი და ერთი ბოთლი ღვინო, მშვენიერად შეექცნენ, მადლობა გვითხრეს და წავიდნენ.

ასეთი მათი საქციელი გადავეცათ ჩვენი დასის წევრებს და მათი აფორიაქებული გუნებაც დამშვიდდა. იმავე დღეებში უეცრად მოვიდა ერთი ახალგაზრდა რუსის ჯარისკაცი და მკითხა, თეატრის რეჟისორი თქვენა ხართ? მეც დავუდასტურე. მაშინ მან შეუვალად გამომიცხადა: მე უნდა წამომყვეთ: კრებაზე გიბარებენო. მე და ელომ ერთი მეორეს გადავხედეთ. მაგრამ წაუსვლელობა „არ ეგებოდა“ და მეც წავეყვი ჯარისკაცს. ჯარისკაცმა მიმიყვანა იმ შენობაში. სადაც წინეთ შავიქვის მრეწველთა საბჭო იყო მოთავსებული და ერთ დროს

გიორგი ზდანევიჩი და კიტა აბაშიძე თითქმის მთელი იმერეთის კულტურულ საქმიანობას უდგნენ სათავეში.

ამ შენობაში რომ შევედი, უკვე კარგა ბლომა ხალხი იყო თავმოყრილი. აქ იყო იმ ინტელიგენციის ნაწილი, რომელსაც ვერ მოესწრო გახიზვნა ქუთაისიდან და ამჟამად ახალი ხელისუფლების განკარგულებაში იყო მოქცეული. მე რომ მოვედი, კრება არ იყო დაწყებული, მაგრამ კიდევ რომ შემოგვემატნენ, მაშინ წამოდგა ერთი ახალგაზრდა ჩერკესიანი კაზაკი და კრება გახსნილად გამოაცხადა. თან ურჩია შეკრებილებს, რომ კრების თავმჯდომარე აერჩიათ. თან ესეც დააყოლა — მე გირჩევთ თქვენი საყვარელი საზოგადო მოღვაწე და თეატრის რეჟისორი შალვა დადიანი ამ კრების თავმჯდომარედ აირჩიოთო. მე გავცბუნდი, გამაკვირვა ჩემმა დასახელებამ მაშინ, როდესაც ამავე კრებას ესწრებოდნენ ქუთათური ჩემზე გამოცდილი საზოგადო მოღვაწეები. და გამაკვირვა იმანაც, თუ საიდან მიცნობდა ეს კაცი. ამ დასახელებას შემდეგ დარბაზში სიჩუმე ჩამოვარდა და ისევ ამ კაზაკმა აიმაღლა ხმა: „ეტყობა, სხვა კანდიდატები არა გყავთ, მაშ ვინც დადიანის მომხრე ხართ, ხელი ასწიეთო. დამსწრეებმა ხელი ასწიეს, მაშინ მოვიდა ჩემთან კაზაკი, დამსვა სათავმჯდომარეო სკამზე, თვითონაც გვერდით მომიჯდა და დაბალი ხმით მითხრა: „მე პოლიტხელი ვარ აქ ჩამოსული ჯარისა და მინდობილი მაქვს, რომ გავაცნო ხალხს ჩვენი პროგრამა ხელოვნების დარგში და თბილისში გასაგზავნად ხელოვანთა პროფკავშირის ყრილობაზე დელეგატი ავირჩიოთო. ამას ყველაფერს გამოუცხადებთ ხალხს ჯამერე სიტყვას მე მომცემთო. მე გულში მაკვირვებდა ესეთი სიჩქარე კრებას წაყვანისა და მოქნეული მუშაობა, მაგრამ დავალეული მაინც შევასრულე.

კაზაკმა დიდხანს ილაპარაკა, თუ როგორი შეხედულების არის პარტია საერთოდ უპარტოო ხალხის დამოკიდებულებაზე პარტიასთან, საერთო მუშაობის წარმართვაზე და განსაკუთრებით ლიტერატურის და თეატრის წარმართვაზე. მისმა საუბარმა გამოაწვია კამათი, მაგრამ ის არც ერთ შენიშვნას არ იზიარებდა და პირდაპირ დიქტატურულად ამტკიცებდა თავის დებულებებს. როდესაც დამსწრენი სიტყვას თხოულობდნენ

და მოლაპარაკეთა სია კარგა გიზარდა, კაზაკი ისევ წამოდგა და გამოაცხადა: „ჩვენ დისკუსია კი არა გვაქვს დღეს ამ საკითხზე, არამედ მე გაგაცანით პარტიის შეხედულება და მისი გადაწყვეტილება და ჩვენც ამას უნდა დავემორჩილოთ“ ამაზე ხმა არავის ამოუღია. კაზაკმა კი განაცხადა ახლა გადავიდეთ მეორე საკითხზე და თბილისში წამსვლელი დელეგატი ავირჩიოთო, ჩემი მხრით ვასახელებ დადიანსო, ცოტა შეჩერდა, მერე იკითხა ვინ არის წინააღმდეგო. ხმა არავის ამოუღია, ისევ იკითხა ვინ არის მომხრეო და... ამირჩიეს.

მივხვდი რასაკვირველია, იმისათვის კი არ ამირჩიეს, რომ მე ვჯობდი სხვებს. არამედ უფრო იმატომ რომ მაშინ არავინ იცოდა ბოლშევიკების დამოკიდებულება „ამ საქმისადმი“ და... მე გამწირეს.

კაზაკი ძალიან მხარულ გუნებაზე დადგა და მითხრა ან ორ საათში მე და შენ მატარებლით თბილისში უნდა წავიდეთო.

მე მაინც მაკვირებდა ასეთი სწრაფი გადაწყვეტილება საკითხებისა: ერთი, ორი, სამი! და არავითარი გაკვიანურება. კრებასა და კამათისა, საქმე მორჩომილი იყო. კრების შემდეგ კაზაკმა გამომიციხა — შენ დასს განკარგულება მიეცი, რომ წარმოდგენები განაახლოს და ამას გარდა ნება დართეთ, რომ ჩვენი ჯარის დრამატულმა წრემ თქვენს თეატრში წარმოდგენები გამართოსო. ჩემთან წამოდი მარტო შენ. მე ვიცი, რომ შენს ზოგიერთ არტისტს უნდა თბილისს გამგზავრება, მაგრამ ამის ნება არ მისცე, დელეგატი მარტო შენა ხარ და შენ უნდა წამოხვიდეთ. მაშინ ძალიან ანგრეული დრო იყო, — შენშევიკები წავიდნენ და საბჭოთა ხელახუფლება გამოცხადდა საქართველოში, მაგრამ საერთოდ სახელმწიფო აპარატი მოშლილი იყო. მათ შორის რკინიგზაზე მსვლელობაც. ამ დროს ბათუმში წარმოებდა ოსმალებთან ომი და ბოლშევიკების მცირე ნაწილმა მიიღო მონაწილეობა, მაგრამ შემოსეული მტერი მაინც ქართველების არალეგალურმა რაზმმა დაამარცხა, ამ ომის დროს კი ბევრი იყო დეზერტირი, მათ შორის რუსის-ჯარის ნაწილებიდანაც ცალ-ცალკე მოიპარებოდნენ ბათუმი-

დან. რაკი რკინიგზა არ მუშაობდა ზოგი მათგანი რჩებოდა ოხუროვითში, სამტრედიისში, ცხაკაიაში, ზოგი ფეხით მიდიოდა თბილისისკენ სანამ, შემთხვევით, თბილისისკენ მიმავალი საბარგო მატარებელი არ შეხვდებოდა, მაშინ ეს გამოპარულენი შეესეოდნენ მატარებელს და იყო ერთი ვაა უშველებელი მათ და მატარებლის მოსამსახურეთა შორის.

კაზაკმა ჩვენც ასეთი საბარგო მატარებლით წამოგვიყვანა ქუთაისიდან. ამ მატარებლით ჩემს გარდა მოდიოდნენ: მარიამ ორახელაშვილი, ბუდუ მდივნის ცოლი, (მენშევიკების მიერ დატუსაღებულნი და ამჟამად განთავისუფლებულნი ბათუმის სატუსაღოდან) პოეტა საბა აბაშელი, სოლომონ ახვლედიანი და კიდევ სხვა ინტელიგენტები, რომელთა სახელები არ მახსოვს. კაზაკმა იკისრა ჩვენი მატარებლის კომენდანტობა და დეზერტირებს ჩვენთან არ უშვებდა, ერეკებოდა. თან უცხადებდა, რომ ის არის კომენდანტი ამ მატარებლისა და მიჰყავს თბილისში საქართველოს ახალი მთავრობა. მე და აბაშელი ჩუმჩუმად ვიცინოდით, რომ კაზაკმა ორთავენი „მოგვათავსა“ საქართველოს მთავრობაში, საერთოდ მხარულად ვმგზავნობდით, კაზაკიც ხშირად გვაკითხავდა ხომ არაფერი გჭირდებათო, მაგრამ ზესტაფონამდე მაინც სამი დღე ვარეთ. ზესტაფონშიაც კარგა ხანი შეგვაჩერეს და სადგურის პერონზე ჩასვლის ნება არ მოგვცეს, მაგრამ ჩვენ მაინც გავსწიეთ საბარგო რონოდის კარები განზე და იქიდან მივჩერებოდით სადგურს; არც იქ ჩანდა ვინმე მოარული ან მგზავრი, მაგრამ უეცრად ჩვენ წინ გაჩნდა პოეტი ღვანკითელი რკინიგზელის ფორმაში წითელი ქუდით (მაშინ ზესტაფონის სადგურის უფროსი იყო), რომ დაგვინახა მოგვესალმა და თან ხმამაღლა დაიწყო ყვირილი: „რა გვიქნეს ამ ოხრებმა, მთელი ქალაქი გაგვიჩანაგეს, ოი, წყეულები, წყეულები“. უმატა და უმატა ყვირილს. წარმოიდგინეთ, რა გუნებაზე დავდგებოდით ვინც რონოდაზე ვიყავით გადამდგარი, ზოგიერთ ჩვენგანს შეეშინდა და მიიმალ-მოიმალნენ, მე და საშა კი მაინც ვეკითხებოდით სხვადასხვა რამეს, რომ ხელი შეგვეშალა მისი ენაწყლიანობისათვის, საშამ კითხვა კიდევ: „სხვა როგორა ხარ, ვარდენ,



შოლოხოვი, ვანდა ვასილევსკაია და შ. დადიანი.
მოსკოვი, 1941 წ. უმაღლეს საბჭოს მე-8 სესიაზე.

ხომ ყოჩაღად ხარო“, მაგრამ კიდევ უარესი გამოვიდა. იმან გაჭავრებულმა უპასუხა „რალა ყოჩაღად, ჩემო საშა, გუშინ დილით ჩემი ძმა დამიხვერიტეს ამ წყეულებმა“ მოყვა და მოყვა, მაგრამ ამ დროს ვარდენთან ვლაც რკინიგზელი მივიდა, რალაცა უთხრა და წაიყვანა. არ გასულა დიდი დრო და ჩვენი მატარებელიც დაიძრა. ვარდენმა კი მიმავალი ჩვენი რონოდარომ დაინახა, ქუდი მოისვლია და დიდხანს გვიკრავდა თავს.

წავედით.

თბილისში დიდ შეკრებილებში მოვხვდით. აქ იყვნენ მწერლები, არტისტები, და საერთოდ ხელოვნები. მათ უკვე ჩაეტარებინათ ხელოვანთა კავშირის ორგანიზაცია და შინი ხელმძღვანელობის არჩევნები. თავმჯდომარედ აერჩიათ ვალერაან გუნია. ახლა კი იმის საკითხი იდგა თუ განათლებას კომისარიატიდან ახლად ჩამოყალბებულ ხელოვნების სამმართველოში ვინ უნდა აერჩიათ რესპუბლიკის თეატრების გამგედ, სხვა სექტორებს გამგეები უკვე არჩეულნი იყვნენ: მუსიკის განყოფილებაში მელიტონ ბალანჩივაძე, ლიტერატურაში — საშა აბაშელი და მხატვრობაში — პრინცესკა. ამ ყრილობას ხელმძღვანელობდა განათლების კომისარი და დამხმარებლად ჰყავდა ცეკას წარმომადგენელი ლეეან ლოლობერიძე და არჩილ მიქაძე. აი ამათ წამოაყენეს ჩემი კანდიდატურა, სხვებიც იყვნენ მსურველები ამ თანამდებობის მიღებისა, მაგრამ ზემდგომმა ორგანოებმა რატომღაც ჩემს კანდიდატურას დაუქირეს მხარი.

ამგვარად, პირველად ჩემს სიცოცხლეში, გავხდი სახელმწიფო სამსახურის კაცი. მე სრულიად გამოუცდელი კაცი ვიყავი ასეთ სამსახურისათვის, მაგრამ განა მარტო მე? მთელი ქართველობის ის ნაწალი, რომელიც მაშინ ჩაება საბჭოთა სამსახურში. აგრეთვე. გამოუცდელები იყვნენ, რადგან ჩვენ ვიცნობდით მხოლოდ ბოლშევიკების მთავარ იდეას, მაგრამ არ ვიცოდით თუ ეს იდეა სამსახურის წვრილმანებში როგორ გამოგვეყენებინა.

ამისათვის ჩვენ მოგვიჩინეს დასახმარებლად ჩამოსული რუსი კომუნისტები, მაგრამ, საწუხაროდ, ზოგი მათგანი პარ-

ტიასთან მიტმასნილები აღმოჩნდნენ, ამისათვის ბევრი შეცდომებაც გვექონდა, ზოგჯერ ისეთი გასაოცარი წინადადებები გვეძლეოდა, რისი განხორციელებაც ჩვენთვის მიუღებელი იყო.

მაგალითად: ჩვენი წინადადება დაისვა, რომ ქართული სასტამბო შრიფტი და საერთოდ ქართული ანბანის გამოსახულება უკუგვეგდო და სამაგიეროდ შემოგველო ლათინური. ამან ჩვენი დიდი აღშფოთება გამოიწვია, რადგან ცნობილია, რომ ჩვენი ანბანის ბგერები სხვებზე უფრო სრულყოფილია და თან მარტივი: როგორც იწერება ისე იკითხება, არა გვაქვს „მოლალატე“ ანბანები, როგორც ზოგიერთ სხვა ენაში, განზე რომ გახტებიან და სულ სხვა ბგერებს გამოსცემენ, ამასთან ქართული ანბანის მოყვანილობა ერთობ მხატვრული რამ არის და არ არის სიმარტივე თუნდა ლათინურივით. ჩვენ იძულებული ვიყავით მიგვემართნა ზემდგომ ორგანოებასათვის და იმათ ეს წინადადება უკუაგდეს.

ამას გარდა საბჭოთა ხელისუფლების დამყარების პირველ დღეებშივე დაარსდა ტელეგრაფის სააგენტო, სადაც ოფიციალურ ცნობების გარდა, ქვეყნდებოდა საქართველოსათვის სრულიად მიუღებელი ცნობები, მაგრამ ესეც ზემდგომ ორგანოების მეშვეობით თანდათანობით მოისპო.

ერთი სიტყვით ასეთი დრო იყო, რომ ყველა დარგში ყველაფერი ახლებურად უნდა გაკეთებულიყო. ჩემის აზრით კარგი ის იყო, რომ დაარსდა გაზეთი „კომუნისტი“ ქართულ ენაზე და რუსული „ზარია ვოსტოკა“, რომლებიც უფრო გზავნებით და პარტიული სისწორით ამუშებდნენ საჭირო საკითხებს, ამასთანავე გახსნეს ქართული დრამატიული თეატრი და მას კომისრად დანიშნეს ცნობილი ქართველი მსახიობი იუზა ზარდალიშვილი, რომლის ინიციატივით და შუამდგომლობით რუსულ თეატრის შენობას ეწოდა რუსთაველის სახელობის თეატრი. აგრეთვე ამუშავდა ოპერის თეატრი, რომლის დირექტორადაც დააყენეს მაშინ ცნობილი თეატრალური მოღვაწე და მუსიკის კარგი მცოდნე კოლია ქართველიშვილი.

იმავე დროს თბილისში გასტროლებზე იყო ჩამოსული რუსული დრამა, რომლის მთავარი რეჟისორაც იყო კოტე მარ-

ჯანიშვილი. ქართული დრამატიული თეატრი არც თავის რეპერტუარით და არც სასცენო ოსტატობათ ვერ აკმაყოფილებდა იმ დროის მოთხოვნილებებს, ამისათვის შედგა რამდენიმე კრება მთავრობის წარმომადგენელთა თანდასწრებით და საქმის გამოსასწორებლად და განსაახლებლად მიაწვიეს კოტე მარჯანიშვილი. ის იმ დროს უკვე ცნობილი იყო, როგორც ერთი უნაჰიერესთაგანი რეჟისორი და თეატრის ხელმძღვანელი მთელ რუსეთში და ამიტომ მისი ქართულ სცენაზე გადმოსვლა, რასაკვირველია, ყველასათვის სასურველი იყო.

როგორც ვიცით, განსვენებულმა კოტემ სავსებით გაამართლა მასზე დამყარებული იმედები და პირველივე სპექტაკლით „ფუნტე ოვე-ხუნა“ (ცხვრის წყარო) გამოიწვია დიდი აღტაცება და თან დიდი შეხლა-შემოხლაც, სწორედ ამ ხანად დასში მყოფმა ახალგაზრდობამ ჩამოაყალიბა ერთგვარი წრე, სახელწოდებით „დურუჯი“ და მისმა კოტა არა მართებულმა მანიფესტმა და გამოსვლამ გამოიწვია დიდი პოლემიკა.

ამ პოლემიკაში მეც ჩავერიე. თეატრის განახლებასა და კარგ ოსტატობას სულით და გულით მეც მივესალმე, მხოლოდ ქართული თეატრის ძველი ტრადიციებისა და წინანდელი მოღვაწეების დაწუნება უმართებულოდ მევიჩინე, ყოყლოჩინობა დაეუწუნე.

პირველ ხანებში, როგორცა ვთქვი, მე განვაგებდი თეატრალურ განყოფილებას, მაგრამ იმავე დროს მე მებარა კინემატოგრაფიის საქმეების წარმართვაც, კინემატოგრაფია მხოლოდ ერთი ორი წლის შემდეგ გამოგვეყო. ასე რომ მანამდე დიდათ დატვირთული ვიყავ სამსახურით: ცალკე თეატრებსა და ცალკე კინემატოგრაფიის საქმეებით. მაინცდამაინც კინემატოგრაფიაში ჩემი უფროსობის დროს დაიდგა „არსენ ჯორჯიაშვილი“ (გრიგოზნოვის მკვლელობა) და „სურამის ციხე“, პირველის რეჟისორი იყო ბარსკი და მეორისა ივანე პერესტიანი, შემდეგში დიდი მოამაგე ქართული კინემატოგრაფიისა. ამ რეჟისორებმა ორთავე ამ სურათში მეც მიმალღებინეს მონაწილეობა ეპიზოდურ როლებში. ერთ დროს კიდევ მელიტონ ბალანჩივაძე ქუთაისის გადაიყვანეს იქაურ ახლად გახსნილ მუსიკალურ სასწავლებლის დირექტორად და მუსიკალური

სექტორის ხელმძღვანელობა მე მომანდევს. ასე რომ, როგორც ზევითაც მაქვს ნათქვამი, მაშინ მართებულად დაიცინებოდა პატივცემული კომპოზიტორი კოტე ფოცხვერაშვილი: „რაც იცის შალვამ მუსიკის? კონტრაპუნქტიც არ იცის რას ხიშნავსო.“

ისე კი მთლიანად განათლების ხელოვნების განყოფილებაში მცოდნე ხალხს ჰქონდათ თავი მოყრილი; განყოფილებას უფროსად იყო სეონ თოხაძე.

ეს სეონ თოხაძე იყო მართლაც ნათელი პიროვნება. უბრალო, ჰუმანიტარული პარტიული და კარგი ქართველი. მართალია, ის ხელოვნების საქმეებში კარგად ვერ ერკვეოდა, მაგრამ საკითხებს წინასწარ რაც შეიძლება დაწვრილებით ეცნობოდა და ამას გარდა გამოცდილ და სპეციალურად ხალხს ეკითხებოდა, თან დადგენილებებსაც უცებურად არ გამოიტანდა; დიდი სიყვარულიც ჰქონდა დამსახურებული თანამშრომლებსა და საზოგადოებაში. მაგრამ ბევრის გაკეთება არ დასცალდა, რადგან კუქას წყლულით იყო დაავადებული და ამან უძროვოდ მოუღო ბოლო.

სამხატვრო ნაწილს განაგებდა მხატვარი გრინევსკი, რომელიც თითქმის გაქართველებული იყო. კარგად იცნობდა ქართულ ყოფა-ცხოვრებას და ერთ დროს საუცხოოვო რეალისტურა ილუსტრაციები გაუკეთა ილია ჭავჭავაძის მხატვრულ ნაწარმოებებს. მეტად კეთილი კაცი იყო, ზუსტად შემსრულებელი მასზე დაკისრებულ მოვალეობისა. თან თითქო უსიტყუო კაციც იყო, ჩუმა და მოკრძალებული, მაგრამ ერთხელ ხმა აიმაღლა. როდესაც განათლების კომისარიატის თანამშრომლებს შაბათობა გაგვამართვინეს და მართლაც მიზანშეწონილად არ იყო გამართული ეს შაბათობა. განათლების კომისარიატის ეზოში ეყარა დიდძალი ხარახურა და ნაგავი, იმის მაგიერად, რომ ჩვენ ეს გაგვეწმინდა, წაგვიყვანეს კუქაის სასაფლაოზე, სადაც დახვავებული იყო თუნუქის დაზიანებული ნავთის ჰურჭლები და ეს ჰურჭლები იქვე სასაფლაოს მოედანზე სხვა ადგილას დაგვაცრევიანეს. თითქმის მთელი დღე მოუძნდით მუშაობას და ყველანი უკმაყოფილო ვიყავით, რომ ეს

ჩვენი მუშაობა მიზანს მოკლებული იყო. გაგვახსენდა დოსტოევსკის ნაწერი, სადაც ის იგონებდა, რომ კატორღაში ყოფნის დროს კატორღელებს ხის ფიცრები მოგვეცეს გასათლელად, პირველ ხანს ძალიან გაგვეხარდა, რადგან გვეგონა, რომ კატორღელებს სასარგებლო საქმეს გვაკეთებინებდნენო, მაგრამ როდესაც გავიგეთ, რომ ეს ფიცრები არაფრისათვის არ იყო გამოსადეგი, სრულიად მოვეშვიტ და მოვდუნდითო. ჩვენც, სსენებულის შაბათობის მონაწილეებს ასე დაგვემართა. შაბათობაზე დილათ მივყავდით და საღამომობით გვაბრუნებდნენ, ჯარისკაცებივით ვიყავით გამწკრივებულნი და ერთი ვინმე ნასაღდათარი „ერთი ორის“ (АТБ, ДВА) ძახილით გვერეკებოდა. ქალაქის მცხოვრებლები შესცქეროდნენ ამ ჩვენს მსვლელობას და უკმაყოფილოდ თავს იქნევდნენ. ამის შემდეგ, ერთ დღეს გზაში შემხვდა ერთი პატივცემული ქართველი მანდილოსანი და შორიდან დამიძახა „აქ მობრძანდით შალვა, აქ მობრძანდითო!“ ეს ასეთი კილოთი იყო ნათქვამი, როგორც დამნაშავე ბავშვს უფროსი დაუძახებს ხოლმე — აქ მობრძანდი, აქაო! ამ ქალბატონთან რომ მივედი, არც გამარჯვება მითხრა და არც ხელი ჩამომართვა. პირდაპირ შემომიძია: „შე უბედურო, შენც მოღალატე შეაქენი?“

უნდა გავიხსენოთ, რომ პირველ ხანებში საბჭოთა ხელისუფლების დამყარებისა, ამ ხელისუფლებას ქართველი ინტელიგენციის ერთი ნაწილი ალმაცერად უცქეროდა და ყველა იმ ქართველებს, რომლებმაც ბოლშევიკებთან თანამშრომლობა დაიწყეს, მოღალატეებათ თვლიდნენ. ამ ქალბატონმაც ასე გამაპინტრიშა.

ჩვენს განყოფილებაში იყო აგრეთვე ჩვენი საყვარელი პოეტი საშა აბაშელი. ვინც კი იცნობდა საშას, ყველა იტყვის, რომ ანგელოზი კაცა იყო. ის განაგებდა ლიტერატურულ სექტორს და ქართული წიგნების გამომცემლობას ხელმძღვანელობდა. ჩუმი, ხუმარა, დიდად განათლებული, ფრიად შოშიადებული, თითქო იოლად აკეთებდა თავის საქმეებს.

დასასრულ ჩვენი სახელოვანი კომპოზიტორის მელიტონ ჰალანჩივაძის შესახებ: მან სამსახურის დროს ბევრი რამ გააკეთა მუსიკის დარგში, რასაკვირველია ზემდგომი ორგანოების

ხელისშეწყობით; ეხლანდელი კონსერვატორია, რომელიც მაშინ მხოლოდ მუსიკალურ სასწავლებელს წარმოადგენდა, კონსერვატორიად აქცა თავის პროგრამით და მდგომარეობით. აგრეთვე მეორე მუსიკალური სასწავლებელი, ზაქარაა ფალიაშვილის მიერ დაარსებული, კონსერვატორიას შეუერთა. ქუთაისში კიდევ დაარსა სამუსიკო სასწავლებელი, რომელსაც აჰეამად მისი სახელი ეწოდება. იმავე დროს თავისი ოპერა „თამარ ციხერი“ სავსებით დაასრულა და ორკესტრის ნაწილიც დაამუშავა ჩერეპნინის და ფოცხვერაშვილის დახმარებით; ხოლო როცა ჩვენში დასრულდა ზაქესის მშენებლობა, ამის შესახებ კანტატა დასწერა, რომლას ტექსტიც პირველად მე დამამუშავებინა. საერთოდ იყო დიდი მუსიკალური ნიჭის პატრონი და საოცარი სმენაც ჰქონდა. ხშირად ვყოფილვართ ერთად სადმე ბაღში და რომელიმე ხის ძირში ფოთლების შრიალი მოუსმენია, რასაც ას ისეთ ალტაცებაში მოჰყავდა, თითქო რომელიმე კომპოზიტორის სიმფონია მოესმინოსო. თან იყო მეტად სამეგობრო კაცი, თავისებური ხუმარაც, ამხანაგებს გვიყვარდა მასთან ჯდომა და საუბარი და ისიც თავის ჭკვიანურის, მაგრამ იუმორით აღსავსე ანეგდოტებით გულაანად გვაცივებდა. მე ახლაც მახსოვს მისი ნამახვილევი ჩემ შესახებ. სწორედ იმ დროს მე ვიყიდე ტყავის ტანისამოსი: ქურთუკი, შალვარი, ქუდი და ფეხსაცმელი სულ ტყავის მქონდა. პირველად რომ ჩავიცვი და სამსახურში მივედი, მელიტონს შევხვდი. მივესალმე და შევეხუმრე: — მელიტონ, არ გეცოდები სულ გატყავებული ვარ მეთქი! მაშინ ერთი აღმაცერად შემომხედა, თვალი ამაველ-ჩამაველო, შემდეგ კა მითხრა: — ეეე! — შეგვიანებით იცოდა ლაპარაკი — „ააარა, შალვა ვილაცა გაგიტყავებია“.

მაინცადამაინც ჩვენ ყველანი ვეჩვეოდით სამსახურს განსაკუთრებით მას შემდეგ, რაც ერთგვარ ინსტრუქტორებად მოგვევლინენ მოსკოვიდან ახალი ამხანაგები. ერთი იყო ტრუნინი რუსეთის ე. წ. „სტარობრიადელ“ სექტის წევრი, მაგრამ უკვე გაბოლშევიკებული და საერთოდ კარგი განათლებას კაცი, მეორე კი ალექსანდრე პოკროვსკი, მეტად ნათელი პიროვნება, პარტიის ერთგული წევრი, რომელიც ახლაც მოს-

კოვში სამსახურშია და განაგებს რუსეთის თეატრალურ საზოგადოებას. მართალია ამ საზოგადოების თავმჯდომარედ ითვლება დიდად ცნობილი ქალი იაბლოჩკინა, მაგრამ სინამდვილეში კი აქტიური გამგე საზოგადოებისა პოკროვსკია და კარგი ას არის, რომ დიდი ნღობა და საყოველთაო პატივისცემა აქვს დამსახურებული. ეგ ორი გვიხსნიდა ჩვენ თუ მოსკოვში როგორ არის მოწყობილი „ნარკომპროსის გლავკების“ მუშაობა, თორემ პირველ ხანებში, ჩვენი განათლების კომისრები ამ საქმეში გამოუცდელნი იყვნენ და არც ერთ მათგანს ჩვენთვის დაწვრილებით არ განუმარტავს ჩვენი ფუნქციები და არ მოუცია დაწვრილებითა განრიგი.

ის კი არა მე პირადად არ ვიცოდი თუ რა და რა დაწესებულება იყო ჩემი „ოეოს“ ქვემდებარე და ერთხელ მომივიდა ასეთა „კანფუზი“: რაღაც საქმის გამო ჩვენი ოპერის დირექციას გაუგზავნე ასეთი მიმართვა „გთხოვთ ესა და ეს საქმე გაგვიკეთეთ მეთქი. პოკროვსკიმ, რომ ეს ქალაქი ნახა, ბევრი იცინა და გამისწორა: „შალვა ნაკოლაევიჩ, შენ მოკითხვის ბარათს ხომ არ სწერ, შენ იპათი უფროსი ხარ და ოფიციალურად უნდა მიმართო“ ასეთი სიტყვებით: წინადადება გეძლევათ და სხვა“.

არ შეიძლება აქვე არ მოვიხსენიო შემდეგი; პირველ ხანებში ჩვენს თანამშრომლებს არსად ფული არ ეძლეოდათ, არამედ მათ მაკემული ჰქონდათ ულუფის ბარათი და ამის მეოხებით ღებულობდნენ სათანადო დაწესებულებებიდან სურსათ-სანოვაგეს, ტანსაცმელს და სხვა ოჯახისათვის საჭირო მასალებს. მხოლოდ როდესაც „ჩერკონეცი“ შემოიღეს, მაშინ ყველანი ფულათაც ვღებულობდით გასამრჯელოს. ზოგჯერ ამ ფულების მიღება იგვიანებდა. თეატრების საწილად, ჩემი თანამდებობის გამო, მე უნდა დამერიგებინა. ერთხელ ძალიან დააგვიანდა თეატრების ფულის დარიგებას, ერთ საღამოს განათლების კომისარა და მე დავესწარიო „კრივოი ჯიმის“ სპექტაკლს. ეს იყო რუსული მინიატურების თეატრი, რომელსაც განაგებდა იმ დროს ესტრადის ცნობილი არტისტი კუ-

ლიბინი და აი ნე რომ დაძინახა, ასეთი სახუმარო ექსპრომტი-
სტყორცნა:

Я пою не хуже цыганки Анны...
Когда же нам даст денег Дадиаши!

მაგრამ ამის შემდეგ მალე მოვალა ფულები და კომისარმა მიბრძანა, რომ ოპერის თეატრისათვის პირადათ მე წამელო. მათი წილი. ეს უფრო იმიტომ, რომ ოპერაში სუთასზე მეტი კაცი მსახურობდა და ყველაზე უფრო ისინი „ქუტყურებდნენ“, მაგრამ ფულის მიტანა გაჭირდა, მაშინ კი კიდეც ბონები იყო ხმარებაში და ათასი მანეთის ბონს ერთი დიდი ტომარა მაინც ქარდებოდა. ასე რომ იძულებული ვიყავი ორი დიდი საბარგო მანქანა მექირავებინა და ასე წაულე ბონებით ვავსილი ტომრები, როდესაც დაინახეს, რომ მივედი და ფულები მიუტანე, მათ სიხარულს საზღვარი არ ჰქონდა. ცხადია, რომ იმ დღეს ჩემზე უფრო საყვარელი კაცი მათ არ ჰყავდათ.

რასაკვირველია, ასეთი მდგომარეობა ჩერკონეცის გამოშვების შემდეგ მალე შეიცვალა და ხელფასის დარიგების საქმე ნორმალურ კალაპოტში ჩადგა.

იმავე დროს პერიფერიის თეატრებზე უნდა გვეზრუნა. ქუთაისსა და ბათუმში დიდი ოქტომბრის შემდეგ იქ დარჩენილ მსახიობთაგან მალე შედგა ამხანაგობათა დასები და წარმოდგენები გაჩაღდა, მხოლოდ ქიათურაში მე მივიანდე გაფანტულ დასების შეკრება იქაურ ძველს რევოლუციონერს და გამოცდილ სცენისმოყვარეს მირიან ჭანიშვალს. აგრეთვე ავამუშავეთ სიღნაღისა და თელავის, აგრეთვე ველისციხის დრამატიული წრეები. რეპერტუარი გვიჭირებდა საქმეს როგორც ცენტრში, ისე პერიფერიებში, მაგრამ პირველ ხანად წარმოდგენების დასაწყებათ დიდი სამსახური გავვიწია ლუნაჩარსკის „მეფის დალაქმა“ და აგრეთვე ჩემმა „როს ნადიმობდნენ“.

ამგვარად თეატრები ამოძრავდნენ და თანდათანობით, შეძლებისამებრ დამაკმაყოფილებლად მიჰყავდათ საქმე.

იმავ დროს მუშაობდა განათლების კომისარიატთან „პრო-

ლეტკულტი“, რომელსაც განაგებდა ჩვენი პოეტი სანდრო ეული და ჰყავდა თავისი დასი, რომელსაც რეჟისორობდა ამხ. კობახიძე. შემდეგში ზომ კიდევ უფრო გადახალისდა სათეატრო მუშაობა რესპუბლიკაში — მარჯანიშვილის მეოხებიც. რუსთაველის თეატრმა დაიჭირა წამყვანი ადგილი და ამასთან მის მიერ დაარსებულმა თეატრმა, რომელიც ამჟამად მის სახელს ატარებს, ისეთი სახელი მოიპოვა, რომ ორი თეატრი ცალ-ცალკე გასტროლებზედაც კი იყო გაწვეული მოსკოვსა და კიევში.

იმავ დროს მე ვიყავი მიწვეული სახალხო თეატრში რეჟისორად, სადაც იმჟამად მუშაობდნენ ნიქიერი და თვალსაჩინო ძალები — ნიკო გოცირიძე, ჯაბაური, მისი მეუღლე, შემდეგში ცნობილი სახალხო არტისტი სოსო რომანიშვილი, მისი და სონია, ვანო მინდელი, თამარ გოგოლაშვილისა, ანკარა, (ყიფშიძისა) და სხვ. უმრავლესობა სცენისმოყვარენი იყვნენ, მაგრამ ძალიან კარგი ოსტატობით ძლევდნენ რთულ პიესებს და კარგი სახელიც ჰქონდათ მოპოვებული საზოგადოებაში.

მე პირადად თეატრში მუშაობა ყოველთვის უფრო მიტაცებდა, ვიდრე მოხელობა ადმინისტრაციულ დაწესებულებაში. არ მიშვებდნენ, მერე როგორღაც მოვახერხე და თავი გავინთავისუფლე, მაგრამ დაწესებულებაში სამსახურს მაინც ვერ ავცდი. მწერალთა კავშირში ამირჩიეს დრამსექციის თავმჯდომარედ და დამნიშნეს „საულის“ დირექტორად. სიტყვა „საუდიც“ ჩემსობას არ ერქვა ამ დაწესებულებას — ეს ნიშნავს „საავტორო უფლებათა დაცვის“ კანტორის შემოკლებულ სახელს. კარგა ხანს ვმსახურობდი მწერალთა კავშირში, მაგრამ ამ დროს შემუშავდა საკავშირო კონსტიტუცია და არჩეულ იქნა უმაღლესი საბჭო, საქართველოდან სხვათა შორის, მეც მხვდა ბედნიერება ვყოფილიყავ დეპუტატად არჩეული თორმეტი წლის განმავლობაში და ბევრი ვერაფერი, მაგრამ მაინც და მაინც ჩემს საარჩევნო უბანში დავეხმარე — ზოგან წყალი გამოეყვანათ, ზოგან გზები გაეყვანათ და ზოგან სკოლები დაეარსებინათ. ეს უფრო აღმოსავლეთ საქართველოს რაიონებში, რადგანაც კავშირის საბჭოში სწორედ აღმოსავ-

ლეთ საქართველოს მშრომელთაგან ვიყავი წარგზავნილი.

დაუფიწყარია ჩემთვის თვითონ არჩევნების პროცესი, მე, როგორც დეპუტატობის კანდიდატს, უნდა მომეველო ყველა ის უბნები. სადაც მე მირჩევდნენ ე. ი. დაწყებული ყაზბეგიდან ყარაიხამდე, უფლის ციხიდან საგარეჯომდე, ამათ მოვლას მე თითქმის ერთი თვე მოუნდი და როდესაც მოახლოვდა 12 დეკემბერი 1937 წლისა, წინა დღით დავბრუნდი თბილისში და ვეახელ პარტიის ცენტრალურ კომიტეტს ანგარიშის ჩასაბარებლად. იქ მითხრეს, რა ზინდა აქაო — მე უპასუხე, ჩამოვედი იმისათვის, რომ ჩემი ხმა არ დავეკარგო და მივცე იმათ, ვისაც თბილისი ირჩევს მეთქი. გაეცინათ, მითხრეს, როგორ გეტყობა, რომ ძველი ინტელიგენტი ხარო. დაბრუნდი ეხლავე და იქ, სადაც შენ გირჩევენ, მიეცი შენი ხმაო. როგორ, ჩემ თავს მე მივცე ხმა მეთქი? ამაზე მიპასუხეს, რომ შენ შენ თავს კი არ აძლევ ხმას, არამედ პარტიულებისა და უპარტიოთა ბლოკსო.

მე ავდექი, წაველ დიღომში და დიდებულად გავათეთრე ჩემი თავი. მაგრამ მანამდე კიდევ მახსოვს ერთი ეპიზოდი: ჯერ სულ პირველად უკვე გაზეთებში იწერება წერილები და ახსნა-განმარტება დეპუტატების არჩევნების ჩასატარებლად.

არჩევნებამდე ერთ დღეს ვზივარ შინ ჩემს კაბინეტში და ჩემთან მოვიდა სტუმრად ახალგაზრდა სიმპატიური კაცი ამს. ლომიძე, რომელიც მაშინ თბილისის გარეუბნის რაიკომის მეორე მდივანი იყო, მითხრა, წამომყევი საარჩევნო უბნებში და ხალხს გააცანი, როგორი უნდა იყოს დეპუტატიო. ეს მაინცდამაინც არ გამკვირვებია, რადგან ვიცოდი, რომ მწერლებიც დაყავდათ სააგიტაციოდ. წავყევი. ჩავედით ავქალაში. იქ ხალხს თავი მოეყარა. ადგილობრივმა კოლმეურნეობის თავმჯდომარემ გახსნა კრება და სიტყვა მე მომცა, მეც ავდექი და შეძლებისამებრ განვმარტე დეპუტატის რთული მოვალეობა. ეს არც ისე გამკვირვებია, რადგან იმ დროს სტალინს უკვე წარმოთქმული ჰქონდა თავისი ცნობილი სიტყვა დეპუტატის მოვალეობაზე, ამ სიტყვაში ხაზგასმული იყო, რომ დეპუტატი არის ხალხის მსახური, ეს დებულება ჩემთვის, როგორც მკითხველმა ამ ნაწერიდან იცის, ძალიან

გულის ახლო იყო, რადგან ბავშვობიდან ჩანერგილი მქონდა, რომ ხალხის სამსახურია უდიდესი მოვალეობა ადამიანისათვის. მეც გაუტეე ჩემ სიტყვაში და რაც შემეძლო შინაარსიანად და ლამაზად ვილაპარაკე. ჩემ შემდეგ წამოდგა ერთი იქაური კოლმეურნე და განაცხადა, რომ დადიანს მშვენიერად ცოდნია დეპუტატის მოვალეობა და სხვა კანდიდატი რად გვინდა, ეგ ავირჩიოთო. ეს რომ გავიგე, თავზარი დამეცა, ჩემთვის ეს სრულიად მოულოდნელი იყო და გადავხედე ჩემ გვერდით მჯდომ პატივცემულ ლომიძეს. ის ჩუმ-ჩუმად იცი-ნოდა. მე თითქო მაინც გაოგნებული ვიყავ, მაგრამ აგერ წამოდგა იქაური მასწავლებელი ქალი, შემაქო და შემამკო და იმანაც განაცხადა, რომ დადიანი უნდა ავირჩიოთო. შემდეგ წამოდგა კომკავშირელი და იმანაც ასე და... ის იყო ამირჩიეს კიდევ.

მთელი ეს პროცესი რომ მოთავდა, მივმართე პატივცემულ ლომიძეს და გახარებულმა ვუთხარი ეს ყოველივე ხომ გვირგვინია ჩემი ცხოვრებისა.

ერთხელ მოვხვდი ყაზბეგში, იქაც გამოდიოდნენ მიტინგზე და მე მაქებდნენ და მადიდებდნენ, თან ურჩევდნენ ხალხს მე ავერჩიეთ. მათ შორის გამოდგა ერთი ხანშესული ადამიანი და სხვათა შორის ასე თქვა: „ხალხო! იცით ეს ვინ არის, დადიანია, თავის ქვეყანაში მთავარი იყო და ხალხს აწიოკებდა. მადლობა ღმერთს ჩვენ მაგისი ყმები არ ვიყავით“. მე კი გულში გავიფიქრე, რას ამბობს ეს კაცი, რატომ იღუპავს თავს, მაგრამ უეცრად მოუხვია: „ვენაცვალე ჩვენს მთავრობას, რომ ჩვენი მსახური გახადაო“. სიცილი, ხარხარი და... მერე ამირჩიეს.

ერთხელ კიდევ, ყარაიაზში მივდიოდით. დეპუტატების კანდიდატებად ორნი: ჩვენი მეცნიერებათა აკადემიის პრეზიდენტი პატივცემული ნიკოლოზ მუსხელიშვილი და მე.

ყარაიაზამდე მოგვეგებნენ ცხენოსნები და დამბაჩების სროლით მიგვაცილეს საარჩევნო მოედნამდე. იქ შემოგვესია ხალხი, განსაკუთრებით ქალები და მუსხელიშვილს და მე გულზე ხელს მოგვისვამდნენ და გვეუბნებოდნენ... „მანულუმ“. ეს სიტყვა მგონი „გენაცვალე“-ს უდრის.

ავედით კათედრაზე, მაგრამ ამ დროს რა მოხდა? ხალხისაგან წამოვიდა იმდენი ყვავილები და თაიგულები, რომ მუსხელიშვილი და მე სულ დაგვეფარეს.

ვთქვარო—რა ვქნა ახლა, გადავიბერტყო ეს ყვავილები და რა საკადრისია, თუ არა და სამოძრაო არა მაქვს, პირი მიჩანს მხოლოდ. მეც გამახსენდა და ამომრჩევლებს მოეახსენე: ფუტკარს ყვავილებიდან გამოაქვს წვენი და ხალხს უბრუნებს და მეც თქვენ ყვავილებს გიბრუნებთ მეთქი და ვისროლე და ვისროლე თაიგულები ხალხში. განვთავისუფლდი, მერე მოვეყვი და ვთქვი ჩემი სათქმელი, ყურში კი მესმის, როგორ მეგობრულად, ჩურჩულით მლანქლავს მუსხელიშვილი—„შენ გამოძვერი, მაგრამ მე რა ვქნაო“, მაგრამ ისიც „გამოძვრა“.

ბევრი ვიციანეთ.

ყველა ამეების შემდეგ მუდამ სამსახურში ვიყავი და ვარ, მაგრამ ეს სამსახური ყველა არჩევითია და უფრო ნებაყოფლობით საზოგადოებებში.

ამგვარად, მე უკვე მივედი უკანასკნელ კარიბჭემდე, ჩემი ცხოვრების.



შალვა დადიანი პიონერებთან. ბორჯომი. 1958 წ.

უკანასკნელი ნაბიჯი

ამ ჩემ „რაც გამახსენდაში.“ ძალიან „აღუნ ჩარეკათ“, შეიძლება ცოტა არეულადაც, მაგრამ მე მაინც გვიამბეთ ჩემი ბავშვობის და სიჭაბუკის ამბები, ჩემი მსახიობობა, ჩემი მწერლობა და ჩემი სამსახური, რისგანაც შესდგებოდა მთლიანად ჩემი ცხოვრება.

უნდა გამოვტყდე, რომ კარგი სიბერე დამიღდა, ხალხისაგან ზედმეტად პატივცემული ვარ და პარტიისაგან და ხელისუფლებისაგან მოალერსებული და გამხნევებული.

მიუხედავად ჩემი ოთხმოცდაოთხი წლისა (1958 წ.) ჯერ კიდევ არ დამკარგვია ხალისი და უნარი მუშაობისა და შეძლებისამებრ კვლავ განვაგრძობ ჩემს მწერლობას და საზოგადოებრივ სამსახურს.

ასე რომ ამჟამად პანაშვილის მეტი არაფერი არ მაკლია, მაგრამ როდის იქნება ეს, ამას, რაც არ უნდა მოვიწოდო, მაინც ვერ გეტყვით.

მანამდე კი ჩემს სათაყვანებელ სამშობლოს, ჩემს სასიქაღულო ქართველ ხალხს ვუძღვნი უაღრეს მადლობას, რომ მეც ერთ რიგით კაცად გამომიყვანა ამ ქვეყნად, თან გამოვთქვამ სრულ რწმენას, რომ ჩვენი ქვეყნის მომავალი ბრწყინვალეა.

კურთხეულ იყოს მისი გზა.

რაც შეეხება იმ წვალეებს, რაც ჩემ გამო ჩემმა მეუღლემ ნინა გეორგევნამ (ასე ვეძახი) ჩემი ნაამბობის ჩაწერით განიცადა, ვთხოვ მის სულგრძელობას, მომიტეოს.

శ్రీకృష్ణ

ეკეკი

როდესაც ასე მარტო სახელით ვიხსენიებთ ამ დიდებულ პოეტს, ეს კადნიერება კი არ არის, ან უხეში მოურჩეულობა, არამედ ეს ჩვენი სიყვარულია, ხალხში განმტკიცებული.

სიცოცხლეში ამ სახელით ვიცნობდით და მისი გვარი ჩვენთვის სავალდებულო არ იყო. ეხლაც ესეა.

აკაკის ეს სხვა შარავანდედ-მოსილი სახელია ქართველთათვის.

ამ სახელის გახსენებაზე ჩვენი ნახსოვრობა მხოლოდ ამ დიდ პოეტს მიადგება. ესეც კია: თვით სახელი „აკაკი“ მხოლოდ აკაკის შემდეგ მოედო ქვეყანას. აკაკისობას კი მეტად იშვიათი სახელი იყო.

თვითონაც ასე აწერდა თავის ნაწერებს თავიდანვე, გარდა ზოგიერთი პირვანდელი ლექსისა, ამ სახელით გაგვიშინაურდა.

ამიტომ, მე მგონი, მის ხსენებაზე ჩვენ ვალდებულნიც კი ვართ მხოლოდ სახელით მოვიხსენიოთ ეს ბუმბერაზი.

ეს ხომ მარტო მისი სახელი არ არის, ეს ხომ, თუ შეიძლება ესე ვსთქვათ, მისი მარკაა, მისი ფირმა.

და ამიტომ ასეც უნდა დარჩეს საქართველოსათვის... და აკიდარჩა კიდევც.

მეც ყოველ მის გახსენებაზე ასე ვამბობ და ასევე ვწერ... აკაკი! მხოლოდ გახსენებაც არის და გახსენებაც.

ქუთაისში, ქალაქის ბაღში, ოდესღაც „ბულვარად“ და იმერულის მახვილობით „გულვარად“ წოდებულში, დგას აკაკის ძეგლი.

კარგი მოფიქრებული.

კვარცხლბეკზე დგას საეარძელი და შიგ ზის კარგა იმპოზანტური ნაკეთი ვინმე ხანდაზმულ ადამიანისა.

პოზა და მთელი აღნაგობაც თითქო შეეფერება აკაკის სი-
დარბაისლეს, მხოლოდ... ეს—მომიტეოს მოქანდაკემ—აკაკი
არ არის.

ასეთი ფიგურის შეიძლება იყოს ვინმე უცხოელი ბანკირიც,
ვინმე მინისტრიც და სხვა, მხოლოდ არა აკაკი თავის პოეტური
მკვნებარებით, თავის უებრო ღიმილით, რაც მისი შეუდარებე-
ლი მახვილობის ერთგვარი გამოწიქნია.

ასე შეშინია მეც ამ გახსენების დროს.

რადგანაც აკაკის ხსოვნისა მხოლოდ ნაფინჩხრები მაქვს შე-
მორჩენილი და მთელი მისი ახოვანება, ის, რითაც ძლიერი იყო,
რითაც მომხიბლავი იყო კერძო ცხოვრებაშიაც, სამწუხაროთ,
ჩემი ხსოვნის საგანძურს განრიდებული აქვს. მაგრამ რაკი დიდ-
ბუნებოვან ადამიანის „ცხვირის დაცემინებაც“ უნდა იყოს
დაუფიწყარი, მოვიგონებ ზოგიერთ ეპიზოდს მისი ცხოვრები-
დან.

* * *

აკაკი ჩემი ბავშვობის დროს მყავს გაცნობილი. ჩვენი ოჯახი
მაშინ თბილისში ცხოვრობდა და მამასთან ხშირად შემოდის-
და აკაკი. როგორც შემდეგ გავიგე, მაშინ არჩევდნენ „ვეფხის
ტყაოსანს“. განსაკუთრებული კომისია იყო მწერალთა და
მკვლევართა მიერ შემდგარი. ცდილობდნენ ტექსტის დადგე-
ნისათვის. მამაჩემიც, ნიკო დადიანი, როგორც ქართულის კარ-
გი მკოდნე და მწერალი, აგრეთვე ღებულობდა ამ კომისიაში
მონაწილეობას. ეს გარემოება უახლოვებდა მამას აკაკის.

მახსოვს აკაკის ჭაღარა მხოლოდ იქა-აქ ერევოდა მაშინ და
უფრო წვერებში. თვალებიც მაშინ სრულიად ჯანსაღი ჰქონდა
და პირდაპირ, ცოცხლად გამოიხურებოდა.

მომხიბვლელი მოსაუბრე იყო და მომჭადოებელი ღიმილის
პატრონი. მისი გაცილება მართლა რომ სიხარულს ჰფენდა იზ-
გვლივ.

ბავშვები ძალიან უყვარდა და მახსოვს, როგორ მართობდა.
პირადად მისგან ვისწავლე ერთი მისი პატარა ზმა კურდ-
ღელზე:

„ჩამბაკურ დღე ლილას იღებს,
ლამ-ლამობით ღებავს შალსო“.

ასე რომ აკაკისადმი სიყვარული ბავშვობიდანვე მომდევნა. ამიტომაც გასაკვირი არ არის, რომ მეც პატარაობისას აკაკის მეგობრად მიმაჩნდა თავი.

ცხადია, ასეთი პაწია მეგობრები მას ჩვენი ქვეყნის ყველა კუთხეში ჰყავდა მონადირეებული და მეც მათ შორის ვამაყობდი ამ დიდი კაცის ასეთი დაახლოვებით.

ერთ დროს, ეს უკვე ქუთაისში, აკაკი ეწვია მამას. მაშინ თავის პიესა „მედია“-ს სწერდა. მამასთან ერთად ამოწმებდა ზოგ ძველი სიტყვის მნიშვნელობას და მედიას ამბების უფრო ქართულ ვარიანტებს.

მე მაშინ წამოჩიტული ვიყავი და კარგად მახსოვს ზოგი რამ, მაგ. თვით სახელი „მედია“-სი.

აკაკიც და მამაც იმ აზრისანი იყვნენ, რომ „მედია“ ქართულიდან არის გაბერძნულებული და ქართულად კი გამოითქმის „მე დია“-თ, რადგან ეს ძველებურად უნდა ნიშნავდეს „მე ქალი“ (ვარ)-ს. „დია“ მეგრულად ქართულ „ქა“-ს უდრის, ე. ი. „ქალო!“-ს. თან შეეკვირვების დროს ხმარობენ.

აგრეთვე ქალაქის სახელწოდება „აე“ და მეფის სახელი „ოეტეს“ თუ „აეტეს“. ქართულად „იათა“ ქალაქი ყოფილა. ოეტესიც, ან ეხლა იშვიათად, მაგრამ მაინც ხმარობენ „ოტია“, ამ „იათა“-დან არის თურმე წარმომდგარი.

ასე რომ აკაკიმ შემდეგში ეგრეც იხმარა თავის პიესა „მედია“-ში. მხოლოდ აქ საყურადღებო კიდევ ის არის, რომ პირველად პიესა მამას რომ წაუკითხა, პროზად იყო დაწერილი და შემდეგ კი, როგორც მოგეხსენებათ, მთელი ტექსტი პიესისა ლექსად არის წარმოდგენილი.

მაშასადამე, აკაკის ასეთი მანერა ჰქონდა მოცულობით დიდ ნაწარმოებთა წერის დროს: ჯერ პროზად დაიმუშავებდა, შემდეგ გალექსავდა.

ამ ჩემ აზრს ამტკიცებს აკაკის სრულ თხზულებათა ერთ-ერთ ტომში მოთავსებული პროზაული ვარიანტი „პატარა ეახი“-სა.

ამ გვარად ბავშვობიდანვე აკაკიმ ძალიან შემაჩვია თავის თავს.

კიდევ ჩემი ამბავი.

ერთხელ მაქვს ნათქვამი და ეხლაც ვიმეორებ, რომ სხვების გახსენებაზე შენ თავს ვერ აცდები. ზოგჯერ ისე გამოგივა, რომ ვისაც იგონებ, ის სულ მიიჩრდილება და შენ კი გამოგიდის „მე, მე!“, „მე აქ ვიყავი“, „მე რომ ეს ვთქვი“, „მე რომ ეს საქმე გავაკეთე“ ან „მე და ის“, ამ „მე-ს“ მაინც წინ ვხმარობთ ხოლმე.

ეს, რასაკვირველია, უმართებულოა, მხოლოდ თავის თავის აცდენა ცოტა ძნელია, მაგრამ „მე და ის“-მეთქი მაინც ვეცდები არა ვთქვა.

განსაკუთრებით ასეთ დიდებულზე, როგორც აკაკია.

ეს ამბავი აგრეთვე ეკუთვნის ჩემს ახალგაზრდობას.

დავინახე—აკაკი ჩემს პირდაპირ, მარტო მობრძანდება.

ცნობილი საზოგადო მოღვაწე გიორგი ზდანოვიჩი ახალი დაბრუნებული იყო კატორიიდან. ქუთაისის ინტელიგენციამ მას სადილი გაუმართა, ზიონის გადაღმა მხარეს, ცნობილი ქუთათური მოღვაწის კოტე ბაქრაძის სახლში, დიდიძალი საზოგადოება იყო შეკრებილი. ქალებიც, კაცებიც. ეს ზაფხულში იყო და ამიტომ სტუდენტობაც ბლომად იყო.

იშვიათად მახსოვს ასეთი მწყაზარი დროს გატარება. განსაკუთრებით ამ მხრივ, რომ აქ არ იყო ჩვეულებრივი თავ-გადაღებული ღვინის სმა, ყანწები, დაძალება და სხვა. იყო მხიარულობა, სიმღერა, ოხუნჯობა და... კამათი საზოგადოებრივ საკითხებზე.

ჯერ ერთი თვით გიორგი ზდანოვიჩის დაბრუნებას ყველა სიხარულით ეგებებოდა და მასზე დიდ იმედებს ამყარებდნენ. სვამდნენ მის სადღეგრძელოებს, მაგრამ ეს არ იყო ზარტო მისი სადღეგრძელო, რამდენადაც უფრო იყო პროგრამული სიტყვები ინტელიგენციის მომავალ მუშაობაზე საქართველოში.

ეს კი გადადიოდა ზოგჯერ ცხარე კამათშიც, რაიც შემდეგ ისევ ნელდებოდა ხუმრობით, სიცილით, ქალების კეკლუტობით და იმ დროს საქართველოში პირველი, კონსერვატორია-

დასრულებულ, ოპერის მომღერალ ქართველი ქალის, მაშო ძნელაძის მოხდენილი სიმღერებით.

აკაკი დიდხანს ჩუმად იყო. ესე იგი „რეჩები“ არ წარმოუთქვამს. ხანდიხან თუ გაიელვებდა მისი ნაკვესები, ღვინოს ხომ ცნობილია, რომ თითქმის არ სვამდა, უფრო ყურს უგდებდა სხვა მოსაუბრეებს, თუ მოკამათებებს. მაგრამ აგერ ერთმა სტუდენტმა ხმა აიმაღლა მთელ ქართველ მოღვაწეებზე და მთავარ აზრად ის გაატარა თავის სიტყვაში, რომ მათი გაკეთებულო საზოგადო სარბიელზე და მწერლობაშიც, არც თუ ისე დიდი ღირებულებას წარმოადგენს, რამდენსაც მათ აწერენო და სხვა ამისთანები. ამაზე, მახსოვს, კოტე ბაქრაძე შეეხიტიყვა და დაიცივა ძველი თაობა. მათ დამსახურებად ჩაუთვალა ეურნალ-გაზეთების, ქართული თეატრის დაარსება, საადგილ-მამულო ბანკის მოგვარება, წერა-კითხვის საზოგადოების მოქმედება და სხვ.

მაგრამ ამან მოწინააღმდეგენი ვერ დააკმაყოფილა. ყველაფერი ეს უსუსურ წამოწყებად ჩასთვალეს და ბანკის მოქმედება ხომ პირდაპირ უარყოფით მოვლენად აღიარეს, როგორც გამლატაკებელი იმავე თავადაზნაურობისა, ვისთვისაც ის იყო დაარსებული, და გამამდიდრებელი იმ საზოგადოებრივ ფენისა, რომელიც საქართველოსთვის უცხო ელემენტს წარმოადგენდა.

ეს ჯერ კიდევ ის დრო იყო, როდესაც „მესამე დასი“ არ იყო ჩამოყალიბებული და რევოლუციური, მარქსისტული აზროვნება ესრედ წოდებულ პროტესტანტებსაც ჯერ კიდევ არ ახლდათ.

ბანკის მავნებლობის დასადასტურებლად მოწინააღმდეგეებმა თვით აკაკის ავტორიტეტიც მოიშველიეს, რომ აკაკი თავიდანვე ნიკო ნიკოლაძესა და გიორგი წერეთელთან ერთად წინააღმდეგი იყო ბანკის დაარსებისაო.

ამაზე სთხოვეს აკაკის გამოეთქვა თავისი აზრი. დიდხანს უარობდა—სასიამოვნოს ვერას ვიტყვიო, მაგრამ მაინც წარმოსთქვა ცხარე სიტყვა.

სამწუხაროდ, მე მთელის სიზუსტით არ შემიძლიან ამ შესანიშნავი სიტყვის აღდგენა, იგი აღსავსე იყო აკაკისებურ მახვილობით, შემკული იყო არაკებით, კაზმულ-სიტყვაობით, მფრი-

ნავი ფრაზებით, მე მხოლოდ შემიძლიან გავიხსენო ის, რომ აკაკიმ ძალიან შორს დაიქირა ძველი თაობის ამაგის ხელ-აღწებით უარისყოფა, ახსნა და განმარტა რა პირობებში უხდებოდათ ან წერა-კითხვის საზოგადოების დაარსება, ან ქართული თეატრის მოწყობა და მით უფრო ჟურნალ-გაზეთების წაძღოლა, როდესაც რომელიმე პერიოდული გამოცემის ნებართვის ასაღებად დიდი პროტექცია იყო საჭირო და ისეთი რედაქტორის შერჩევაც, რომელიც მთავრობისათვის სანდო პიროვნებად უნდა ყოფილიყო მიჩნეული; რომ რედაქტორობაზე ერთ ღროს ისეთ თითქოს მთავრობას თვალშიაც კარგად მიჩნეულს ნიკოლოლობერიძესაც კი უთხრეს უარი და ვინმე ქანანოვსაც, რომელიც მაშინდელი რეჟიმის თვალსაზრისო ნოხელეც კი იყო და სხვ. ილია ჭავჭავაძესაც ძალიან გაუჭირდა თავის გაზეთებასა და ჟურნალის რედაქტორობის ნებართვაო. ეხლა საცენზურო პირობები, რომლის გამოისობით საგაზეთო სტატიებში სიტყვა „საქართველო“ და „სამშობლო“-ს ხმარებაც კი სახიფათო იყო და ზოგჯერ შეუძლებელიც. აქვე მოიხსენია ილია ჭავჭავაძის ამაგი ბანკის საქმეში დადებითად, რამაც ბევრი აქ დამსწრე გააკვირვა.

უკვირდათ აკაკისაგან ილიას ქება, რადგან ამით ერთხელ კიდევ იფანტებოდა ის ლეგენდა, რომლითაც აკაკი ილიას მაგინებლად იყო გამოყვანილი. იმის შესახებ კი, რომ ის ოდესღაც თითქო წინააღმდეგი იყო ბანკის დაარსებისა, ისა სთქვა, რომ ის ამ ტიპის, საიპოტეკო ბანკის დაარსების წინააღმდეგი იყო, თორემ პრინციპში ისიც მომხრე იყო იმის—ქართველ საზოგადოებას ჰქონოდა ისეთი საფინანსო დაწესებულება, რომელიც საზოგადოებრივ საჭიროებას გაუძღვებოდა. დღეს კი, განსაკუთრებით ილიას მეოხებით, ამ ბანკის შემწეობით იკვებება ჩვენი სკოლები, თეატრი, თვით გაზეთიც კი და სხვა საქველმოქმედო ქართული დაწესებულება, ეს კი ძალიან დიდი საქმეა ჩვენთვის, რომლებსაც არამც თუ პოლიტიკური ავტონომია არა გვაქვს, არამედ რუსეთში რომ კულმეკვეცილი ერობა არის, ისიც გი არ გვადირსა რუს ხელმწიფის ბიუროკრატიამო. ასე რომ ჩვენი ბანკების ხელ-აღებით უარყოფა სრულებით უკუაგლო.

შემდეგ მიუბრუნდა ახალ თაობას და, ეტყობოდა გულის ტკივილით, განაცხადა: ეხლა რას ვხედავთ? თითო-ორიოლა აუ გამოდის თქვენთაგანი საზოგადო სარბიელზე, თორემ უმეტესობა მხოლოდ სტუდენტობის დროს გაპყვირის სამშობლოს სიყვარულზე, საზოგადოებრივ მუშაობაზე და ყურს გვიყრუებს ათასი გეგმებით მომავლისათვის და ბაჟი-ბუქობს, მაგრამ უნივერსიტეტს გაათავებს თუ არა, დიპლომს ხელში იგდებს, ბრუნდება სამშობლოში და თავის საპირადო ღუქანს აღებს.

განმარტა: ღუქანია ადვოკატის კაბინეტი თუ კანტორა, ან ექიმის მისაღები ოთახიო.

ამ დროს მართლაც უფრო ამ ორ პროფესიას ეტანებოდა ახალგაზრდობა, სხვა რამ დარგი თითქმის არც აინტერესებდათ. მაგ. ქართველი ინჟინერი ჩვენში პირდაპირ სანთლით საქმბარი იყო.

— აღებს ღუქანს, საზოგადო საქმე კი...

მახსოვს ესე სტქვა:

— ილიასი არ იყოს: „ძმანო ფეხებზე ჰკიღია“.

შევამჩნიე: უმრავლესობაზე ვერ დასტოვა მზიურ აკაკის სიტყვამ კარგი შთაბეჭდილება.

შეიქმნა გადალაპარაკება: „მოხუცი ბუზღუნებს“, „ეგეც ჩამორჩენილია ცხოვრებას“ და სხვ.

ერთმა ვიდაცამ კიდევ ილაპარაკა და დღეინდელი კამათა მამების და შვილების ჩვეულებრივ შეტაკებად მონათლა.

ხოლო აკაკი ამ დროს უკვე ღიმილით ეუბნებოდა მეზობლებს: „აკი ვთქვი სასიამოვნოს ვერას ვიტყვი-მეთქი“.

მაშინ წამოვდექი მე: იმ ჟამად საზოგადოებისათვის თითქმის სრულიად უცნობი ახალგაზრდა, 19—20 წლისა. თუ ვინმე მცნობდა, ისიც მხოლოდ მამიჩემის შვილობით; წამოვდექი და სიტყვა გამოვიტხოვე.

ყველა, სმენად იქცა. უთუოდ უკვირდათ—რას იტყვის ეს ჰაბუკიო?

მე დავლიე მომღერალ ქალის მაშო ძნელაძის სადღეგრძელო. ეს ისეთი დისონანსი იყო ამ სერიოზულ კამათის შემდეგ, რომ ბევრს დამცინაეი ღიმილი შევატყვე სახეზე.

უთუოდ იფიქრეს—აღტყინებულ ჰაბუქს მოსწონებია მოზ-

დენილი მომღერალი ქალი და იმდენად ზრდილობა და თავდა-
კერილობაც ვერ მოუხმარია, რომ ჩვენ ყურადღებას ამაზე
აჩერებსო.

მაგრამ მე, მაშინდელი ჩემის წარმოდგენით, სულ სხვა სა-
ზოგადოებრივი მნიშვნელობა მინდოდა ამ სადღეგრძელოსა-
თვის. საქართველოს სპეციალისტები არა ჰყავს, ყველა თითქმის
უნივერსალები არიან და ჩვენ კი სპეციალისტები გვჭირდება-
მეთქი. ძნელადის სადღეგრძელოს კი იმიტომ ვსვამ, რომ ის
სპეციალისტია თავის დარგში და ჩვენც სხვა დარგშიაც გვჭირ-
დება ისეთი განსაკუთრებით მცოდნეები-მეთქი.

ის იყო სიტყვა, ჩემის ფიქრით დამაჩერებლად დავასრულე
და აქა-იქ ტაშის და მოწონების ხმაც გავიგონე, რომ აკაკის შევ-
ხედე...

თავ-ზარი დამეცა:

სახე მოკმუხნოდა, მარცხენა თვალი მოეწკურა (მაშინ თვა-
ლები არ ჰქონდა დაზიანებული) და საერთოდ სახეზე უკმაყო-
ფილება ჰქონდა აღბეჭდილი.

დიდათ დავლონდი.

მაგრამ კრებულის მხიარულება წავიდა თავის გზით, აკაკიც
გამხიარულდა და ბოლოს ერთი თავისი, მაშინ ახლად-დაწერი-
ლი ლექსიც კი წაიკითხა, მგონი „როცა ვიყავ ახალგაზრდა“.

გამიგონია, რომ ამ ლექსმა ერთხელ საყვარელ აკაკის კინა-
ლამ კურონოზული უსიამოვნება მიაყენა.

ერთ-ერთ ავადმყოფობის შემდეგ საჩხერეში დაბრუნებულ
აკაკის მისმა მოგვარებებმა სადილი გაუმართეს. სადილს ესწრე-
ბოდა პოეტი გრიშა აბაშიძე. საკვირველი ნიქის პატრონი, მშვე-
ნიერი ორატორი და მახვილი ენის კაცი.

აკაკის სთხოვეს რაიმე წაეკითხა დამსწრეთათვის და მანაც
წაიკითხა „როცა ვიყავ ახალგაზრდა“.

რალა თქმა უნდა, ლექსმა დიდი აღფრთოვანება გამოიწვია,
მაგრამ როგორც კი მიწეღდა საზეიმო განწყობილება და ერთ-
გვარი ბუნებრივი სიჩუმეც ჩამოვარდა, წამოდგა თურმე გრი-
შა აბაშიძე და განაცხადა:

— ძალიან უიღბლო კაცი ვარ. აი ეს ლექსი, ეხლა ბატონმა
აკაკიმ რომ წაიკითხა, ჩემია, მაგრამ ვინ დამიჩერებს, ხოლო
დასამტკიცებლად ეხლავე ზეპირად წაგიკითხავთ ამ ლექსსო...

და მოჰყვა და მოჰყვა თავიდან ბოლომდე შეუმცდარად, სიტყვა-სიტყვით „ჩააბულბულა“ ეს საუცხოვო ნაწარმოები.

ყველა გაშტერდა, ყველამ კარგად იცოდა, რომ გრიშა პოეტი იყო და ძალიან მარჯვე პოეტიც.

შეიქმნა მეტად უხერხული მდგომარეობა.

ვინც ეს აპბავი მიაბზო, იმან მითხრა:

„ყველას გვეწყინა: რაში დასჭირდა დიდებულ აკაკის გრიშასათვის ლექსი მოეპარა, განა თვითონ ვერ დასწერდა ამაზე უკეთესად? და ყველანი შეწუხებული ვიყავით. თვითონ აკაკი ხომ მეტისმეტად გაოცებული იყო და იმანაც კი ვერაფერი მოახერხა, რომ ეს მძიმე წუთი როგორმე გაექარწყლებია.

მაგრამ თურმე ისევ გრიშამ იხსნა საზოგადოება „შეცბუნებინაგან“. რომ შეატყო ყველას შეწუხება, ისევ თვითონ აიმაღლა ხმა:

— ნუ შეწუხდებით, ბატონო ეს ჩემი უბედური ნიჭის ბრალია, ასეთი საკვირველი მახსოვრობა მაქვს, აკაკი რომ ამ თავის შედეგს გადმოგვცემდა, მე თვითეულ მის სიტყვას ვიხსომებდი და ის იყო, შემდეგ ზეპირად გადმოგვცით. თორემ ლექსი, რასაკვირველია, აკაკისა არის და მე აქ არაფერს შუაში ვარ.

ატყდა ხარხარი, კისკისი და ყველას გულს მოეშვა.

აკაკიმ კი მოიხზო გრიშა, გადაეხვია და უთხრა:

— უბედური კი არა ბედნიერი ნიჭი გქონია და სხვასთან ეგ აღარ ჩაიღინო, თორემ მე არაფერი და სხვას კი გააუბედურებდი ამ დროს წამოდგა თურმე ბიჭიკო წერეთელი, განთქმული თავისი ხუმრობით და აკაკის მოახსენა:

— ეგ დარიგება მაგაზე არ გასქრის, ბატონო აკაკი, დაუნდობელი აბაშიძეა, შენც კი არ დაგზოგა და სხვას რას უზამსო. აბაშიძეები ხომ მუდამ წერეთლების მტრები იყვნენ. აგერ მე. პოემა მაქვს დაწერილი ჩვენს ციხე „მოდინახე“-ზე და... გრიშას ხომ არ წაუკითხავ და არა, მაგრამ მომიტევეთ და არც თქვენ, ბატონო აკაკი, წაგიკითხავდით, რადგანაც პოეტები უცნაური ხალხი ხართ, წამართმევთ და გამაუბედურებთო.

ამანაც სიცილი გამოიწვია, მით უფრო ყველამ იცოდა ბიჭიკო წერეთელი პოემის დამწერი კაცი არ იყო. წერეთლების სუფრა გაუდგა თავის გზას.



აკაკი რომ თეატრის დიდი მეგობარი და მოამაგე იყო, ეს უკვე ცნობილია.

თერთნაც გამოსულა თურმე სცენაზე ახალგაზრდობისას, როგორც მსახიობი, შემდეგში—როგორც დეკლამატორი და მკითხველი თავის ლექსებისა.

ის იყო ზოგჯერ რეჟისორიც და ავტორი ხომ კარგა ბლომა პიესებისა.

მხოლოდ მე აქ მინდა ყურადღება მივაქციო აკაკის ორ თვისებას თეატრთან დამოკიდებულებაში: აკაკი, როგორც მეგობარი და გამამხნევებელი ახალგაზრდობისა და აკაკი, როგორც მაყურებელი სპექტაკლისა.

ახალგაზრდობას თეატრში ის მუდამ გულისხმიერად ეპყრობოდა. მაგალითად, ამჟამად რესპ. დამსახ. არტისტი ნიკო გვარამძე „პატარა კახი“-ს როლში მისგან არის გამხნევებულად და, თუ შეიძლება ასე ითქვას, დალოცვილი. ასევე ბევრი სხვებიც და მათ შორის ეხლა რესპ. დამსახ. არტისტი არეთა ლოლუა.

იღვმებოდა განსვენებულ დრამატურგ შიუკაშვილის პიესა „სიმახინჯე“. პიესის დამდგმელმა, რეჟისორმა ვალ. შალიკაშვილმა მთავარი როლი ახალგაზრდა ქალისა პიესაში მიანდო მაშინ სრულიად გამოუცდელ მსახიობს არ. ლოლუას. ყველას უკვირდა, ეშინოდათ ახალგაზრდა მსახიობისა, რეჟისორსაც აფრთხილებდნენ, მაგრამ მან თავისი გაიტანა და აი წარმოდგენას აკაკიც დაესწრო.

მეორე დღეს ქართული თეატრის სარეპეტიციო დარბაზში შემოვიდა აკაკი, ახალგაზრდა მსახიობი თავისთან მოიხმო, გვერდით მოისვა და შეაქო: „კარგი იყავი, ჩინებულაია, ევრე დაკვირვებით განაგრძე მუშაობა და მე ვეცდები მოსკოვში სპეციალურ სასწავლებელში დრამატიულ საზოგადოებამ გაგისტუმროსო. მხოლოდ... ქებამ არ გაგაბრუოს და კუდი ყავარზე არ გადოვო“.

ასე იყო სხვებთანაც და ამიტომ იყო, რომ თეატრალური ახალგაზრდობაც მასთან ახლო ყოფნას და მის ისედაც მომხიბვლელ საუბარს ეტანებოდა.

აკაკი, როგორც მაყურებელი, ერთხელაც მაქვს აღნიშნული, მეტად უშუალო იყო და გულდია.

მე მინახავს, ასე ვთქვათ, აკაკის რანგის მაყურებელი თეატრში. წინადაც და ეხლაც, ყველა. ესენი ფილოსოფოსებიცაა სხედან თავიანთ სავარძელში და რაც უნდა სასაცილო ადგილი იყოს პიესაში, ღიმილსაც ვერ შეატყობთ; და თუ რამე დრამატული მომენტია, ამასაც ვერ შეამჩნევთ—იქონია მასზე ვაჟლენა თუ არა. უთუოდ იმეტირებ, რომ სირცხვილად მიაჩნიათ დარბაისელმა აღამიანებმა თავიანთი გრძნობები საჯაროდ გამოამჟღავნონ...

აკაკი-სულ სხვა იყო, ის ცოტა რამ სასაცილოზედაც სცენაზე გულით ხარხარებდა; სამწუხაროზე—დაღვრემილი იყო, მის ბიბლიურ სახეზე ამჟარად იხატებოდა სცენებით გამოწვეული მღელვარება.

მახსოვს, ერთხელ ქუთაისში მის მიერვე დაწერილ ვოდვილზე „ბუტიანობა“, რა გულით ხარხარებდა. განსაკუთრებით მოეწონა იმერლის როლში ამჟამად ხანდაზმული, რესპ. დამს. არტ. ვ. ბალანჩივაძე; მაგრამ ამ ვოდვილის ასრულებისას მოხდა ერთი კურიოზიც. მაშინ მე ვრეჟისორობდი. ვოდვილში ორი წყვილი ცოლქმარია. მე შევუკვეთე, რომ ქმრებიცა და ცოლებიც ერთნაირად ყოფილიყვნენ გამოწყობილნი და ქმრებიც ერთნაირი პარიკებით, ერთნაირის „ბაყებთ“, მაგრამ უღლვაშონი ყოფილიყვნენ, სულ დამავიწყდა, რომ ორივე ქმარს თავთავის ალაგას აქვს ასეთი ფრაზა: „მაშინ შემირცხვეს მე უღვაში“, და სხვ. მივიკირს, რომ არც მსახიობებს გაახსენდათ მათი უღვაშების ამბავი და გამოვიდნენ ჩემი მითითებით უღლვაშებოდ. მოვიდა დრო და უნდა წარმოთქვან: „მაშინ შემირცხვეს მე უღვაში“. წარმოთქვეს მაშინაღურად და სახტად კი დარჩნენ, პირზე უღლვაში არ ქონდათ. დარბაზში საშინელი ხარხარი ატყდა.

რასაკვირველია, სიცილი გამოიწვია არა პიესის ვითარებამ, ან მსახიობთა შესრულებამ, არამედ ჩვენმა დაუკვირებლობამ და ვიმეორებ რეჟისორულმა „ჭკუის ძალის დატანებამ“.

აკაკიმაც ბევრი იცინა, თუმცა წარმოდგენის შემდეგ ამოვიდა ჩვენთან და მანუგეშა: „ეგ არაფერია. შეიძლება კაცს უღლვაში არ ჰქონდეს და მაინც თავის უღლვაშის შეურცხვენლობაზე ილა-

პარაკოსო. აი გიორგი ღოდობერიძეს ხომ იცნობ, ამჟამად ერთი კაცია ჩვენში, რომელიც უღვაშებს იპარსავს, მაგრამ ამას თამამად შეუძლიან თავის უღვაშის შეურცხვენლობაზე ილაპარაკოსო“.

მართლაც, იმ დროს ამ საპატიო პიროვნების გარდა საქართველოში თითქმის არავინ არ იპარსავდა უღვაშებს და ცნობილი იყო, როგორც ყოველად უმწიკვლო პატიოსნების პატრონი.

აკაკის გულიანი ხარხარი მახსოვს კიდევ ქუთაისში, მისი ბრწყინვალე იუბილეს დროს.

ქუთაისი, ცნობილია, რომ დიდებულად დაუხვდა საყვარელ მოამაგეს. დიდი სიხარული, ალტაცება იქამდე, რომ მისთვის საგანგებოდ მორთულ თეთრ ცხენებიან, ქუთაისში იმ დროს ცნობილ მეეტლე მელიას ეტლს ახალგაზრდობამ ცხენები გამოსხნა, თვით შეება, და ასე მიიყვანეს თეატრის კარებამდე მსცოვანი იუბილარი.

რასაკვირველია, ზღვა ხალხი დაესწრო ამ ზეიმს, მაგრამ დასწრების ბევრი მსურველი მაინც გარედ დარჩა.

ამან გვაფიქრებინა მსახიობთა ამხანაგობას, გვეთხოვა აკაკისათვის,—ეხლა ჩვენთვის, მსახიობებისათვის ეცა პატივი და ნება დაერთო, რომ მეორე საიუბილეო საღამო ჩვენ, მსახიობებს მოგვეწყო.

დაგვთანხმდა. საღამოს მოწყობა არ იყო ძნელი, რადგანაც მთელი მხატვრული პროგრამა მსახიობების მიერ იყო შესრულებული და რაც შეეხება ოფიციალურ ნაწილს—სიტყვებსა და ადრესებს—ესეც ხომ უხვად იყო, რადგან პირველ საღამოზე ბევრი საგულისხმო დაწესებულება და პიროვნება დარჩა გამოუსვლელი. ასე რომ, ეს საღამოც ნაკლებ სხივოსანი არ გამოსულა.

მხოლოდ... თითქმის ყოველთვის იუბილეების დროს, თითო კომიკური რამ უნდა შემოიქრას ხოლმე.

აქაც ვერ გადავრჩით.

ქუთაისში იყო ერთი პატივცემული, ხანდაზმული პედაგოგი, სულაქველიძე, აკაკის დიდი მოთაყვანე. ამანაც ითხოვა სიტყვა და როგორც იმ საღამოს გამგემ, ნება დაერთე, რადგანაც დარწმუნებული ვიყავი რომ გამოცდილი პედაგოგი დარბაისლურ სიტყვას იტყვდა.

გამოვიდა: არაფერი; ყოველივე რიგიანად. მისალმება, შექება და ისიც მოკლედ, გაუქიანურებლად. თითქო დაასრულა კიდევ, მაგრამ რაკი ამ ღინჯმა კაცმა მოისურვა და უთხრა აკაკის—ახლა შენი „პოპუნა“ უნდა წაგიკითხოვო.

აქ მოხდა, რაც მოხდა.

ეს გრძელ წვერება ჰალარა კაცი დატრიალდა სცენაზე: ხან ზტის, ხან ვითომ ნამგალს იქნევს და მკის ყანას.

ისეთი „ტკვარცალი“ გადგა თეატრის დარბაზში რომ... „სკდებოდა კედლები“.

აკაკი ხომ თავის ყვავილებით მორთულ ლოქაში, იმერლები, რომ იტყვიან, „გადაფიჩინდა“.

ძალიან უხერხულ მდგომარეობაში ჩავდექ. როგორც ვთქვა, საღამოს ხელმძღვანელი ვიყავ და არ ვიცოდი როგორ ჩამეყენებინა კალაპოტში საღამოს მსვლელობა.

მაგრამ როგორც იყო დაასრულა სულაქველიძემ თავისი „დეკლამაცია“ და მეგონა თუ „მოვრჩით ტანჯვას“, მაგრამ ეხლა ატყდა ისეთი ტაშის ცემა, რომ ყურთა სმენა აღარ იყო.

მიხვდებით როგორი ტაშის ცემა იქნებოდა, რა ხასიათის. ეს იყო რაღაც ნერვიული ამბავი: სიცილი, კისკისი და ტაშა, ტაში განუწყვეტელი, გახურებული, თითქოს დასასრული არ უჩანდა, ისეთი.

სწორედ ამ დროს ვიღაცა მადლიანი წამოდგა პარტერიდან და მკექარე ხმით მიმართა აკაკის: „ბატონო აკაკიო“ და მშვენიერი ბარიტონული ტემბრით წაიკითხა ლექსი: „გულს ვერ გაპიტებს ჰალარა“.

ამან მოახდინა სასწაული. გვიშველა, ხალხი „მოასულიერა“.

შემდეგ ყოველივე რიგზე წავიდა: საღამოს დასასრულ ვეახელით აკაკას, სალაროს შემოსავლიდან რამდენიმე ასი მანეთი მივართვით. გაიღიმა, მადლობა გვითხრა და თქვა:

— ჩემი იუბილეებიდან პირველად არის, რომ ნაღდ ფულს ვღებულობ.

თურმე საიუბილეო კომიტეტი თბილისშიც და ქუთაისშიც მას ხელზე ფულს არ აძლევდა. უნახავდნენ და უნდოდათ გამოზოგვით, თვე და თვე მიეცათ ერთგვარი რაოდენობით,—იცოდ-

! ნენ აკაკის ქალღმრთის თამაში უყვარდა და ეშინოდათ ერთბაშად არ წააგოსო.

კომიტეტის ესეთი „აპეკუნობა“ კი სწყინდა მხცოვან ადამიანს.

ჩვენ, მსახიობებმა არ ვიცოდით კომიტეტის ესეთი დადგენილება და რომ გვცოდნოდა კიდეც, რა უფლება გვქონდა ჩვენას ინიციატივით მოწყობილ საღამოდან იუბილარისათვის შემოსავალი არ გადაგვეცა.

და. ეტყობა, ამით ცოტა გავახარეთ.

* * *

მე სულ წვრილმანებს ვიხსენებ, მაგრამ ამ წერილს აკი სხვა პრეტენზია არც შეიძლება რომ ჰქონდეს.

მანც გავიხსენოთ ზოგიერთი სახალისო ეპიზოდი მისი ცხოვრებიდან:

კიდეც ქუთაისი. ვახლავარ ცნობილ საზოგადო მოღვაწეს, მაშინდელ ქუთაისის „არისტიდს“—ასე უწოდებდნენ კირილე ლორთქიფანიძეს, რომელიც ამ წერილში ზემოდაც ვახსენე, ესეც მშვენიერი მოსაუბრე იყო და დიდი, ცხარე ორატორი ქუთაისის კრებებისა (ბანკში, ქალაქის საბჭოში, თავად-აზნაურთა კრებებზე). ვსაუბრობთ ქართულ თეატრზე; მაშინ „თეატრსა და ცხოვრება“-ში იბეჭდებოდა აკაკის მოგონებები ქუთაისის თეატრალურ მოღვაწეებზე. ამ მოგონებებში კირილეც იყო ნახსენები და ეს დარბაისელი მოხუცი მიაშობდა მის „აქტიურობის“ ამბავს.

• სხვათა შორის, მიაშობ, რომ ერთხელ ილია ჭავჭავაძის „გლახა კრიაშვილს“ ვთამაშობდით, მე „მროვი პოსრედნიკის“ როლს ვასრულებდი, მაგრამ ნატო გაბუნიას ქალმა ქვრივის როლში და კოტე ყიფიანმა გლახა კრიაშვილით ისე გამიტაცეს, რომ ჩემი სათქმელი დამავიწყდა, როლიდან გამოვედი და, ისე ვხითხითებდი, შენი მოწონებულო. მეორე დღეს მე ავთ დავწერე რეცენზია გაზ. „დროება“-ში და მოვითხოვე, რომ კირილე ლორთქიფანიძე სცენიდან გაეძევიებინათო.

ესა და სხვა ამგვარები რომ მიაშობ, ამ დროს ჩვენს ჰორიზონტზე გამოჩნდა აკაკის ბიბლიური ფიგურა. უკვე ნაავად-

მყოფარი, თვალეზ-დღზიანებული, მადრამ მინც ლომ-ფაფარ-
გადაყრილი, მალლიდგან გადმომყურე.

კირილე, ეს დინჯი კაცი, თითქოს ატოკდა აკაკის დანახვანზე
და სიხარულით მიეგება. აკაკიმაც თავისებური ღიმილით ჩა-
მოართვა ხელი და მაშინვე პირში მიახალა:

— კირილე, ფეხისადგილში წასვლისას, შალვარს კიდევ იც-
ვლი“?

უნდა გენახათ, როგორ გამოიცვალა კირილე, აღფრთოვანე-
ბის ნაცვლად უსაზომო წყენა დაეტყო და ხელიც აღარ ჩამო-
ურთმევია, ისე გაგულისებულა გაეცალა გულით საყვარელ
ადამიანს. ჩაუშხამდა შეხვედრა.

აკაკიმ სიცილი გააყოლა და მიამბო—კირილეს ჩეუელებად
აქვს, ფეხისადგილში იმ შალვარით არასოდეს არ წავა, რომე-
ლიც საგარეთო აცვია, უთუოდ გამოიცვლისო, ეგ ხომ წმინდა-
ბერია. კარგად აქვს მაგის პედანტობა აღწერილი ნიკო ნიკოლა-
ძეს თავის „ჩვენი სტუდენტობის დრო“-შიო.



პირადად აკაკის კვიმატონა ერთხელ მეც მომხვდა.

თელავში ვიყავი, წარმოდგენებს ვმართავდი. აკაკი ჩამობ-
რძანდა..

აკაკის ჩამოსვლა დღესასწაულად იქცა და კახელობა ღირ-
სეულად დაუხვდა: საღამოები, წარმოდგენები,—დავდგით მი-
სი „თამარ ცბიერი“-ც, სიტყვები, მისალმებანი, საჩუქრები.

ივლისი იყო და მოაღწია ილიაობამაც. მაშინდელი წერა-
კითხვის საზ-ბის თელავის განყოფილება ყოველ წლივ იხდდა-
ილიაობას და ამ დღისათვის ილიას სოფელ ყვარელში, ილია-
ებოში, აწყობდა საღამო-წარმოდგენას, რომლის შემოსავალს-
საქველმოქმედო მიზნებს ახმარდა.

ასე იყო იმ წელსაც და, რალა თქმა უნდა, რომ აკაკიც მო-
იწვიეს საღამოზე. ყველანი ვემზადებოდით ზემისათვის და
აკაკის დაეტრიალებდით თავზე. ჩვენთან რეჟისორი და დრამა-
ტურგი კოწო ანდრონიკაშვილიც იყო. ძალიან გვაქებდა მეცა-
და კოწოსაც აკაკი: მშეენიერი მწერლები ხართო, კიდევ უკე-
თესი აქტიორ-რეჟისორებიო.

მოგვშორდა კოწო და მოგვიბრუნდა აკაკი:

— ამაზე უნიკო, უნდილი მწერალი და ქართულის არ მცოდნე ჩემს სიცოცხლეში არ მინახავსო.

თვითონ გაიცინა და მე კი მიხვდებით, რა გუნებაზედაც დაედგებოდი: რომ მოგვშორდე, რას იტყვის? გამახსენდა, გუშინ კიდე როგორ შემაქო საზოგადო შეკრებილებაში, რალაც სიტყვა წარმოვთქვი და მითხრა: რომაელ ორატორს მომაგონებო. რას იტყვის ეხლა, რა ვქნა? გადაკწყვიტე, სანამ სხვა რამეზე გუნება არ შეეცვლებოდა, არ მოგვშორებიყავ, რადგან გამახსენდა ერთი იმერული ამბავიც. ყოფილა თურმე ერთი აზნაური ჭაფარიძე. კაცი მქირდავი და ყველას მაგინებელი. ერთ დღით ქუთაისში შეხვედრია თავის დროზე კარგად ცნობილი საზოგადო მოღვაწე, ნაფიცი ვეკილი, სცენის დიდი მოყვარული, მშვენიერი აქტიორი, მახვილი და ნიჭიერი მოწინავე ინტელიგენტთაგანი ანტონ ლორთქიფანიძე, სიძე დიმიტრი ყიფიანისა.

ანტონი თურმე მიეჩქარება სასამართლოში, გადაუდებელი საქმე აქვს, მაგრამ შეხვდა ჭაფარიძეს და ჭაფარიძემ გაუბა ბაასი, ამას გადასწვდა, იმას „მოსცხო“, ეს გააბიბრუა, ის აგინა; ანტონს ეჩქარება, მაგრამ რა ქნას—იცის, თუ გაშორდა, არც ამას დააყრის ხეირს. ბოლოს გადაწყვიტა.

— დათა, ჩამოვჯდეთ აგერ ბულვარში, რა ვქნა, სასამართლოში საქმე მაქვს, ვერ მივუსწრებ და წავაგებ ნამდვილად, მაგრამ ვერ მოგვშორდები შენი ყია-მყრალობის ამბავი რომ ვიცი, არ დამზოგავ და არ მინდაო.

გამახსენდა ეს ამბავი, მაგრამ მართლაც და სადამდე უნდა მეცადნა? მერმე სწორედ იმავე კოწო ანდრონიკაშვილმა მიამბო, რომ საოცარ აკაკის მიწასთან გავესწორებინე, განსაკუთრებით ილაშქრებდა ერთ ჩემს ლექსზე—„მზოლოდ შენ ერთს“.

• • •

სიტყვამ მოიტანა და სალიტერატურო კურიოზისათვის გამბობთ ამ ლექსის თავგადასავალს.

ნინო ჩხეიძის ბენეფისი უნდა გაგვემართნა ქუთაისში. განსვენებულმა ლადო მესხიშვილმა ურჩია, კარევეის პიესა „Рокко-

вой шаг“ და სათარგმნელად მე მომანდო. როგორი თარგმანიც იყო, თქვენ იქიდან განსჯით, რომ თვით სათაურიც კი უზერიოდ ვთარგმნე და „უბედური ნაბიჯი“ დავარქევი. მაგრამ საქმე ეგ არ გახლავთ. პიესაში ერთი სასიმღერო ლექსიც იყო „Тенё одной“ და ამ სიმღერას პიესისათვის ისეთი წნიშვნელობა აქვს, რომ უთუოდ უნდა თარგმნილიყო. მეც გადავთარგმნე. მუსიკა მორაგო,—იყო ასეთი მსახიობი,—კოტე სარჯველაძემ. ეს იყო და ეს. ისე გავრცელდა თვით მელოდიაც და ჩემი ნათარგმნი ტექსტიც, რომ ხალხი ახლაც მღერის, მხოლოდ არავენ იცის, ვისია მუსიკა და საიდან არის ტექსტი. ის კი არა, ერთ დროს რუსეთში დაიბეჭდა კიდეც ეს რომანსი და ზედ დააწერეს „Грузинская народная песня“. მაგრამ საქმე ამით არ გათავდა. გრ. ვოლსკიმ თარგმნა ეს ლექსი ქართულიდან და დაბეჭდა გაზ. „Новое обозрение“-ში, თუმცა არ დააწერა, რომ თარგმანია. თითქოს თავისუფალი არანეირობაა, მაგრამ ტექსტები რომ შედარდეს, იგრძნობთ ნათარგმნობას.

ამას კიდევ დაემატა ერთი კურონოზიც:

გახურებული მსოფლიო ომია 1914 წლისა. ვსადილობთ სასტუმრო პალას-ოტელში. რესტორანი სავსეა სამხედრო პირებით. უეცრად ერთ მაგიდაზე ვიდაც გენერალმა იმპერატორის სადღეგრძელო დალია და ყველა იქ მყოფთ მოუწოდა სადღეგრძელოს დასაღვევად, მუსიკამ „Боже, царя храни“ შეასრულა.

ახლა სხვებმა სხვა მოითხოვეს და ამას მოჰყვა ინგლისური ჰიმნი, ფრანგული, იაპონური, იტალიური და სხვა, ერთი სიტყვით, გერმანიის წინააღმდეგ ყველა სახელმწიფოსი და თითქმის ერთ საათს გაგრძელდა ჰიმნების დაკვრა.

რომ მოსრულდა ეს ჰიმნები, ვიდაც სამხედრომ წამოიძახა—აბა ქართული ჰიმნიო. მემუსიკეები შეშფოთდნენ, მაგრამ უეცრად ფირიყორმა ნიშანი მისცა და ჩემს გაოცებას საზღვარი არ ჰქონდა, რომ ქართულ ჰიმნად ჩემი და სარჯველაძის „მხოლოდ შენ ერთს“ მოვისმინე.

გულში მეცინებოდა. ვინ იცის, რომ ამ სახელდახელოდ შეთხზულ ქართულ ჰიმნის ერთი მონაწილე აქ ზის-მეთქი!

აი ეს მრავალ-ჭირნახული ლექსი იყო, რომ დიდ აკაკას ამფოთებდა.

მართალიც იყო, რასაკვირველია! ლექსი მეტად პრიმიტიულია და პოეზიის საგანძურის კარებთან თუ დადგება.

ამას გარდა ვილაცამ დაბეჭდვის დროს უკანასკნელი ფრაზაც დამიმახინჯა, მე მაქვს:

სიცოცხლეშიც, საფლავშიაც
შენთან ერთად, შენთან ერთად“

ვილაცამ კი გამისწორა

აქაც, იქაც შენთან ერთად!..“

რა არის ეს „აქაც იქაც“ ეხლაც არ მესმის.

დიდ მგოსანს სწყინდა, რომ ხალხი ამ უხეირო ლექსს მღეროდა და ამის გამო გაზეთ „თემში“ მოათავსა კიდევ წერილი და მშვენიერი ლექსიც „მხოლოდ შენ ერთს“-ის თემაზე, ეს იმღერეთო.

მაგრამ უცნაურობა: აკაკის თითქმის ყოველი ლექსი მეორე დღესვე სასიმღეროთ იქცეოდა და ეს თვით მის მიერ რეკომენდებული „მხოლოდ შენ ერთის“ სამაგიერო, ხალხმა არ იმღერა.

თურმე ხდება ლიტერატურაშიც ასეთი კუროზები.

მე მგონი, კარგი იქნებოდა ახლა მაინც რომელიმე ჩვენ კომპოზიტორს მიექცია ყურადღება აკაკის დასახელებულ ლექსისათვის და გადაეტანა სამღერლად შესაფერ მუსიკაზე.

ამით, სხვა არა იყოს რა, პოეტის სურვილს შევასრულებდით. მაგრამ დაუბრუნდეთ კახეთს.

ივლისის 20 ცოტა დრუბლიანი იყო, იქა აქ ცრიდა კიდევ, მაგრამ ქარი არა ქროდა, გრილი და სამგზავროდ საამური დღე იყო.

დილა ადრიან ჩავსხედით ეტლში: აკაკი, ქართ. დრამის მსახიობი ელო ანდრონიკაშვილი, განსვენებული ნიკიფორე მაძინაიშვილი (ადგილობრივი ქალთა გიმნაზიის დირექტორი და წერა-კითხვის განყოფილების თავმჯდომარე) და მე.

მე და ელოს წარმოდგენა უნდა მოგვეწყო.

ეტლი დაიძრა და აკაკიმაც დაიწყო: რა არ გვიამბო, ვან იცის ბევრი ფანტაზია ერია მის ნაამბობში, მაგრამ ყურადღებას ვერ მოაშორებდით, რადგან ტკბილის და ზოგჯერ გესლიანი ჰუმორით იყო მოთხრობილი.

ჩამოვწერ ზოგიერთს:

მოწათფობისას მე და კირილე ლორთქიფანიძე ერთ სკამზე ვიჯექით გიმნაზიაშიო, რუსული კარგად არ ვიცოდით, ბევრი სიტყვები არ გვესმოდა, და, თუმცა ვცდილობდით ჩვენი სიტყვით მოგვეთხრო, მაგრამ ხშირად უაზროდ ვზეპირობდითო.

ერთხელ ისტორიის გაკვეთილი იყო და უნდა მეამბნა რუსეთის და შვეციის ომის ამბავი, პეტრე დიდის და კარლოს XII შეტაკებიდანო. დავიწყე ძალიან მარჯვედ და ბოლოს იმით გავათავე, რომ ვთქვი: „Русские войска разбили шведов под предводительством Пуха и Праха“-მეთქი.

„რაო“ წამომწვდა მასწავლებელი და რომ კიდევ გავუმეორე, კეთილი კაცი იყო და კი არ გამიჯავრდა, სიცილი აუტყდა. ამ დროს კირილემ ჩამჩურჩულა: „რა ღმერთი გაგიწყრა „Пух როგორ არ იცი რა არისო“

— რა არის მეთქი?

„Пух“-ი ბურტყლს ქვია, აგერ ბაზარში რომ ჰყიდიან“.

ჰოო „Прах“-ი რაღა არის მეთქი?

Прах-იო? პრახი არც მე ვიცი რა არისო.

— ან ასეთი გაწვალებით ვსწავლობდითო.

შემდეგ გადავიდა მის ბიძაშვილს ბეჟან წერეთელზე. ბეჟანი მამულების მომხვეჭი კაცი იყო და ამას თავისებურად დაცინოდა აკაკი.

— ბეჟანმა არც მე დამზოგა და ეზოზე აღგელი ჩამომიქრაო, მაგრამ ამისათვის სასამართლოსათვის არ მიუმართავს, საჩივარი კი არ გაუბამს, სულ სხვა ხრიკს მიმართაო. ბეჟანს ბევრი ლორები ყავდა, ზამთარში გადმოუშვებდა ამ ჩემს ეზოში და ლორები აჩიჩქნიდნენ მიწას. ვეხვეწებოდი, ნუ მიოხრებ ეზოს შენის ლორებით, მაგრამ ბოდიშს იხდიდა, ბიჭმა თვალა ვერ მიატანაო და სხვა. ეზო რჩებოდა აჩიჩქნილი. დიდ მარხვაში გავიხედე, დილა აღრიან ამდგარა ბეჟანი და ამ ჩემს ეზოში იქით აქეთ დაიარება. გამიკვირდა, რად აურჩევია დილის

მოციონისათვის ჩემი ეზო, მაგრამ ამ სეირნობის მიზეზი მხოლოდ ნააღდგომევეს გავიგე, როცა ჩემს ეზოში მშვენიერი სიმინდი წამობიბინდაო. თურმე ნუ იტყვი, ბეჯანი რომ დასეირნობდა, ჯიბეში სიმინდის მარცვლები ჰქონდა ჩაყრილი, ჯიბეები გახეული ჰქონია, რომ დადიოდა ღორების ნაქუჩზე სიმინდს თესდა და საყანე ადგილს იფლობდაო.

რა გვეთქმოდა აკაკის ამ ოხუნჯობაზე, კარგი მოგონილი იყო.

შემდეგ გადავიდა უფრო საზოგადო საკითხებზე და მაშინდელი ინტელიგენცია და თავადაზნაურობა ბევრ რამეში გაამტყუნა: უწნობები არიან, უნიათონიო და ერთი მაგალითი მოიყვანა თავადაზნაურთა საზოგადოებრივი საქციელისა.

საქართველოში რომ ნიკოლოზ I ჩამოვიდა, ყველგან დიდის ამბით მიეგებნენ და განსაკუთრებით ქართლ-კახეთის თავადაზნაურობა, ერთ სადილზე ისე გაამხიარულეს, რომ კარგად გამოათვრეს კიდევცაო. მთვრალმა იმპერატორმა განუცხადა შაჰ-პინძლებს, რომ „ისე ვარ კმაყოფილი თქვენის დახვედრით, რასაც კი მთხოვს ჩემი სასიქადულო ქართველი თავადაზნაურობა, მზად ვარ შევასრულოვო“. დიდი მადლობა გადაუხადეს ჯა თვითმპყრობელის ყოვლად შემძლე სიტყვა გულში ჩაიდევს. მეორე დღეს წარუდგა ნიკოლოზს დეპუტაცია და მოახსენა, რომ „ჩვენ ვერ გავბედავდით ამ თხოვნით მოგვემართა, მაგრამ თქვენმა მეფურმა სიტყვამ და დაპირებამ გაგვაბედინაო“. ნიკოლოზი აცახცახდა თურმე ამ სიტყვებზე, როგორც შემდეგ გამოიჩქვა, ეგონა თავადაზნაურობა საკუთარ მეფეს მოითხოვს, ავტონომიურ დამოუკიდებლობას მოიწადინებსო და მზად იყო კიდევცო, რადგან მეფურ სიტყვას ვერ გადაუვიდოდა და სულ თავბედს ოწყევლიდა, ეს რა მივქარეო, მაგრამ მოტყუვდა, რადგან თავადაზნაურობამ დიდი ბოდიშით, დიდი მოიარებით თხოვა: „მარილზე დიდი ბაჟია დადებული და გთხოვთ შეგვიშსუბუქოთო“. აი ხომ ხედავთ, ქართველებს თხოვნის შნოც არა გვაქვსო, ნაღვლიანად დაამთავრა აკაკიმ.

ამ ამბებში თურმე უკვე ყვარელს ვიყავით მიახლოვებული, მომხიბლავ საუბარში არც კი შეგვიძინე. უეცრად ჩვენს ეტლს ორმოციოდე ცხენოსანი შემოეერთა და ეტლი შეგვი-

ჩერა. მართალი გითხრათ, პირველ ხანად შეეკრთი. იმ არე-მარეზე იმ ხანად ყაჩაღობა იყო და მეგონა თუ თავს დაგვესხენ, მაგრამ სანამ რასმეს მოვისაზრებდი, ცხენოსნები ელვის სისწრაფით ცხენებიდან ჩამოხტნენ, ერთი ტანმორჩილი კახური ჩოხა-ახალუხით გამოწყობილი, თავზე ნაბადის ქუდით, წინ წამოდგა და მშვენიერის მკექარე ხმით აკაკის მიესალმა.

აკაკის საუბარმა სულ გადამავიწყა, რომ ყვარელს ქაზეიმოდ მივიდიოდით და. ცხადია. ყვარელის მოსახლეობის წარმომადგენლები აკაკის შემოეგებებოდნენ.

იმ წამსვე ეტლიდან ჩამოვხტით ყველანი, მხოლოდ აკაკი ფეხზე წამომდგარი ჩავტოვეთ ეტლში.

საუცხოვო სურათი იყო. ეს ჭარმაგი ადამიანი, მაღლიდან გამომწყურე, ეტლში გამართული, მართლა რომ ბიბლიური ფიგურა დიდი პოეტისა და ქვევით, ხალხის წარმომადგენელი დელეგაცია, რომელიც შეფრთხევით შეჰყურებდა საამაყო ადამიანს; ნიავი ოდნავ აქანებდა აკაკის ჭაღარა ფაფარს, გარინდულ ბუნებაში კი სქეჰდა პათოსიანი, მაგრამ დროის შესაფერი, მშვენიერის ქართულით ნათქვამი სიტყვა ტანმორჩილი ადამიანისა.

მან მოიხსენია, სხვათა შორის, რომ სახელოვან ილიას სოფელი ბედნიერია, როცა ეგებება სასიქადულო აკაკისო და მქვევრმეტყველურად შეამყო ორი დიდი კაცის სახელი.

შევატყვე, რომ აკაკის ცრემლი მოერია და თითქოს სულ გამოიცვალა. ეს აღარ იყო ის აკაკი, აგერ რამდენიმე წუთის წინად ისე შინაურულად რომ გვიამბობდა უცხო რამეებს.

აქ მისი ნაკვეთი არამც თუ ფიზიკურად, არამედ მორალურადაც თითქო მაღლა დადგა.

დანაოკებულ სახეს თითქო ჭიხარული გადაეფინა, მაგრამ ოდნავ სევდაც, შეიძლება განუხორციელებელ სურვილთა გამო, მაინც დაეტყო.

განა აკაკიმ არა სთქვა:

„მაგრამ ეჰ, კმარა, სჯობია,
ფრთა შეეაკვეცოთ სურვილსა:
თორემ რა მოჰკლავს უძლეველს
მამულიშვილის წყურვილსა!“.

დიდი მოქირნახულე იდგა ჩვენს წინ. გამკრიახი და მომავლის იმედით გაამაყებული, მაგრამ პირადად თავმდაბალი და ღმობიერი.

მახსოვს, იქვე საბასუხო სიტყვაში შემდეგიც გაურია: „ჩემი თავიცი, ილიას თავიცი მხოლოდ აჩრდილია იმ მომავალ გმირებისა, რომლებიც მომავალში თქვენგან გამოვლენო“...

წარმოდგენის დროს წვიმა წამოვიდა, მაგრამ მოზღვავებული ხალხი არ დაშლილა და არც აკაკი დაძრულა თავის ადგილიდან, ქოლგა მოართვეს და ამ კარავიდან გულ-მოდგინეთ ისმენდა ილიას „დედა და შვილს“.

ვახშმად ძალიან გამხიარულდა. ჩაჯდა გლეხებში და მრავალი მოსწრებული სიტყვა უძღვნა. ლექსებიც წაუკითხა, გაუშონაურდა და გაიშინაურა ისე, რომ ერთმა მოხუცებულმა გლეხმა, მახსოვს, ასეთი ექსპრომტიც უძღვნა:

„ზამთარში შაშვი რომ გალობს,
ზაფხულში — შვილო-გოგია,
მეცა ვთხზავ ლექსებს, მაგრამა
შენი ლექსები სჯობია!“

აკაკიმ ამაზე ბევრი იცინა.

და ჩვენც ეს მოგონებანი შევაჩეროთ მისი დაუვიწყარი სიტყვით.

၂၀၁၈

სილუაზი ნიკო დადიანისა¹

შვილის გახსენება

სახელი

მე ვსაუბრობ მაჰაჩემზე.

მისი ჩვეულებრივი სახელია ნიკო დადიანი. ოფიციალური— ნიკოლოზ ტარიელისძე დადიანი. მწერლობაში ხელს აწერს „ნ. დადიანი“, იშვიათად— „ნიკო მეგრი“ ან ინიციალებით— „ნ. დ.“ საზოგადოებაში კი თანამედროვენი ეძახიან: „დიდი ნიკო“, „ნიკო ფილოსოფოსი“. სხვა სახელი და სხვა ფსევდონიმი, ან სახელწოდება მას არა ჰქონია არც საზოგადოებრივად და არც შინაობაში.

ბარაბნობა

გარეგნულად მაღალი, წარმოსადეგი კაცი, ცოტა ბეჭებში წახრილი. არც მსხვილი და არც წვრილი. ბრგე შესახედაობისა, მკერივი ტანის პატრონი.

თმა-წვერ ულვაში ქერა აქვს. განსაკუთრებით თმა კარგათ მოწეული სიმინდის ფერი და ბუნებრივად ისეა დაკულულებული „ღელავს, ბზინავს ოქროს ფერად“, თუმცა თან ისე რბილია და სალუქი, რომ თვით ხშირი საეარცხელიც იოლად იგნებს გზას მის სიხშირეში, მაგრამ გარდავლის შექმდეგ თმა ისევე თავის-თავად ხუჭუჭდება.

წვერ-ულვაში უფრო მუქია და ისიც ბუნებრივად დაკრაკნილი. წვერი ოთხი თითის დადებაზე თუ იქნება წამოზრდილი და ულვაშები... კოკობი ულვაშები, რომ იტყვიან, სწორედ ეს უნდა იყოს.

¹ ამ მოხსენების ნაწილი წაკითხულ იქნა ჩემს მიერ 1922 წ. ნოემბრის 2-ს ქ. თბილისის ხელოვნებათა სასახლეში მწერალთა მორიგ საღამოზე და მოსკოვში 1903 წ. სტუდენტთა წარგში.

წვერ უღვაშს შუა უცხოდ შემალულა, ოდნავად გაპობილი, მეწამული ბაგე, რომლის ზემოთა ნაწილიც ქვემო სიბრძნის ბალიშს მყუდროდ ასვენია.

ყველა ამათ თავს ადგას კარგა მომადლო ცხვირი, ცოტა კეხიანი, რომლის ზემოთაც მოთავსებულან თაფლის ფერი, ზომიერი, მაგრამ ცოტა მტკიცეული, ცოტა ელამიც, მხოლოდ მაღალი ნებისყოფის გამომჟებელი თვალები...

— თვალები იმისათვისა მაქვს დაზიანებული, რომ ბავშვობაში სოფლად მხრჩოლავ ქონის სანთელთან მიხდებოდა კითხვა. ხშირად ბუხრის ცეცხლის სინათლეზე და ზოგჯერაც უბრალო კერიის ცეცხლის შუქზეო. — იტყოდა ხოლმე.

ამისათვის სათვალეებს ხმარობს, „პენსენს“, უფრო კვამლის ფერს მზის სხივთა შესანელებლად. ისე კი მხედველობა კარგი აქვს და უსათვალოდ მეცადინეობს.

თვალეზ ზემო, წარბები თითქმის არა ჩანს, ქერა ბუსუსები ნატიფ შუბლის სითეთრეს ეთხზვება, მხოლოდ ეს შუბლი... აი აქ მართლაც დიდი სიმაღლეა.

წინ კარგა ძალზე გამოწეული, ზევით კოხტა ფერდობივით შემგრვალეებული, ფართო მოედანი ნიჭისა და გონიერებისა, გახსნილი და გადამტკიცული.

მხოლოდ ხანდაზმულს უკანასკნელ ხანებში დააჩნდა ორი ღრმა ნაკვალევი...

ეს შუბლთან და... უღვაშ-ზემოც ცხვირის ნესტოსთან ღრმა, მაგრამ შერბილებული.

მთელი სახე კი მსხვილ-ძელიანი, ფართო, ყველგან სიმრგვალეა დამთავრებული და სრულყოფილი.

თავის ქალის სიმრგვალე კი ისე დიდია, რომ მისი ქუდი ბევრს არავის დაეხურება: სახეზე ჩამოეთხატება უთუოდ.

მთელი გამომეტყველება სახისა თითქო მუდამ ოლიმპიური სიმშვიდით არის მოცული და ესეთ აღნაგობის ამ ქვეყნიურობას თუ აცხადებს, ეს მისი საკვირველი ხელები.

ნატიფი, მოგრძო, გამონაკვეთელი, მართლა ბროლის თითები; მოქნილი და საზრისიანი. პოეტურ ფრჩხილთა სადაფი, ვარდისფრად რომ აჰვიებია...

ეს თითები ღირსია, რომ დავით წინასწარმეტყველის ქნარს აუღერებდეს. ან ეპყრას:

„მინა რხეული“.

გულის სახე

მამა თავის დროზე ყრია იმ კომისიაში, რომელიც „ვეფხისტყაოსნის“ დიდ-გამოცემას — გ. ქართველიშვილის — რედაქციას უკეთებდა. ბევრ ყალბ ადგილებს ააციდინა, თურმე, გამოცემა და საერთოდ დიდი გაკვირვება და მოწონებაც გამოიწვია დამსწრეთა შორის ქართული ენისა და ისტორიის ცოდნით, მაგრამ შემდეგში გამომცემელთ ბევრი რამ გასწორებული მაინც გაუსწორებლად დაჩქენოდათ და სხვათა შორის, მახსოვს, ფრაზა „ლახვარი გულსა ხეული“ მამას დიდათ აღელვებდა.

მამას აზრით უნდა ყოფილიყო „ლახვარი, გულ-სახეული“, ე. ი. გულის სახის მსგავსი, გულის მსგავსად გამოსახული ლახვარი. თორემ უკვე გახეულ გულში ლახვარის დასობა ამ ტაეპისათვის უაზრობის გარდა დიდი სისასტიკეც არის და არა ვგონებ ამას რუსთველი ინებებდაო. მაგრამ ეს სხვათა შორის. ეს ცოტა წინ წარბენა...

მიხრა-მიმოხრა დინჯი აქვს, დარბაისლური, აუჩქარებელი. სიარულიც ეგეთი, ცოტა მოღლილი.

ტანს მუდამ ევროპიულად აცვია: შავი სერთუკი, ან გრძელა „პალმერსტონი“ (ინგლისური ყაიდისა). სიქაბუკეში პაქანაკეზიან, ნაცრისფერ შარვალსაც იცვამს, შავი ყაითანი რომ აქვს იქით-აქეთ გენერლის „ლამპასებივით“ ჩაყოლებული. არის ამის სურათიც. შემდეგში კი ზემოხსენებულად აცვია და თავზედაც უმეტესად ევროპიული შავი „ქვაბუნა“ ახურავს. ზოგჯერ გრძელი, ბზინვარე ევროპიული ცილინდრი.

კიდევ ერთი გახსენება მხოლოდ ეხლა პატარა კურიოზის.

დიდი მთავარი მიხეილი

დ. ზესტაფონის სადგურის პერონზე შავს სერთუკში, ხელზე მოსასხამ გადაადებული თავზე გრძელ ცილინდრ დახურული, მამა დასეირნობს. მატარებელმა ჩამოიარა და სადგურთან შესდგა. თურმე მაშინდელი „ნამესტნიკი“, მეფის მოადგილე,

ანუ ნაცვალე, დიდი მთავარი მიხეილი, მიმავლობს თავის ამალით.

მამას არ გაუგია და არც ქული მოუხდია. ვილაც რგანელ გლახს ელაპარაკება.

„ნამესტნიკს“ შეუმჩნევია მამა, მისი ცილინდრ-ქედის შოუხდელობა და... უკითხავს: ვინ არის, სოციალისტი ხომ არ არისო... შექმნილა სწრაფი გამოძიება და შეშფოთებულან მამას მცნობნი. მამასათვის არ გაუგებინებიათ, ისე აუხსნიათ მამას ვინაობა „ნამესტნიკის“ აღიუტანტისათვის. ამათაც მოუხსენებიათ დიდი მთავრისათვის და შეკითხვიან — მოგვაროთ თუ არაო, მაგრამ ვითომ მიხეილს უთქვამს:

„ოსტავტე, ვიდიტე მიწრო ბესედუეტ დოლენო ბიტ სო სვოამ ბივშიმ ილი ნასტოიაშიმ კრეპოსტნიმ!“¹

ეს ამბავი დეკ. ლამბაშიძის გადმოცემულია.

იგი თურმე შემდეგში ეხუმრებოდა მამას: — გიშველა და დიანობამ, თორემ უსიამოვნებას მოგაყენებდნენო და ესაყვედურებოდა დაუდევრობას.

მამას მაინც შემდეგშიაც ცილინდრის ხმარება არ გადაუგდია. თუმცა ისეთი უცხო ხილი იყო იმ დროს, და შეიძლება, ზოგიერთთა შორის, სიცილის გამომწვევიც.

კიდევ მეორე ეპიზოდი მამას დაუდევრობისა:

წითელი პარასკევი

ეს უკვე ჩემსობას. მამას ძალიან უყვარდა ეკლესიაში სიარული. გამოჩინებული წირვა-ლოცვა, გალობა, არქიელის შემოსვა, რელიგიური ცერემონიები. მაშინდელ თბილისელ სემინარისტს უთუოდ ბევრს ახსოვს ხშირად მათ ეკლესიაშიც ჩვენი ოჯახის ბევრი ნაკეთი: მამა, მის გვერდით მისი შვილები, ე. ი. ჩემი და, ჩემი დის მარიამ ანჩაბაძის აღმზრდელი და ჩვენი უფროსი მეგობარი, მაშინ გაუთხოვარი, ფაღავას ასული ნატა და ჩვენ ორნი დაძმანი, მე და მამო. ეს ოთხნი უკლებლივ ვდგევართ წირვაზე, ან მწუხრზე და განკრძალვით ვისმენთ ზღვდეღ-მოქმედებას.

¹ დაეთხოვეთ, ხომ ხელავთ მშვიდობიანად ემუსაიფება თავის ყოფილს, ან ეხლაც მის დროებით ვალდებულ გლახსაო.

მამა მართლაც სულიერად განგეშორდა თითქო და ჩვენთან აღარ არის. იგი თითქო მართლა „ამაღლდა ზეცად“. გამომე-ტყველება შორს არის და სულ სხვა იერით გაშუქებული.

ჩვენ დანარჩენებს გარეგნობა გვიპყრობს მხოლოდ: ზი-ზილ-პიპილები, კმევა, სამოსელი, გალობა და სხვა. გვებზრდე-ბა ეს გაწმობილებული, გაკიბული არქიელის ლიტურგია. მამას კი ეტყობა, — ეს ეხლა ვატყობ, რომ ნამდვილად განიც-დის დიდს განდევნილობას, დიდს დარჩენას თავის თავთან.

ჩვენც გვიპყრობს ასეთი მდგომარეობა მამისა და კიდევ უფრო განკრძალვით და სასოებით შევცქერით ამ ჩვენთვის არაფრის მთქმელ ბრკვეიალა ხატებს, მოლაპლაპე ლამპრებს და წმინდა სანთლებს.

წითელი პარასკევია.

ქ. თბილისში ეს დღე იმ დროს საპარადო დღეთ იყო მიჩ-ნეული: ნამესტნიკი, გენერალიტეტი, ჭარი საპარადო ფორ-მით გამოწყობილი. ეკლესიაში და ეკლესიის გარშემო იყენენ დამწკრივებულნი. საყდარშიაც მხოლოდ შერჩევით უშვებდნენ „დიდთა ამა ქვეყნისათა“.

დღის 2 საათზე გამოქქონდათ გარდმობსნა მაშინდელ ეგზარქოსის კარის ეკლესიიდან და მისვენებდნენ სიონის ტა-ძარში დიდის გამოჩინებით.

მამაც მოვიდა დანიშნულ დროს.

კარებზე პოლიციელები დახვდნენ და არ შეუშვეს. — რა ამბავია? — საპარადოთ არა ხართ გამოწყობილიო. მამას ნალ-ვლიანად გაეღიმა და უპასუხა: „განა ქრისტე საპარადოთ იყო გამოწყობილი, როდესაც ჭვარს ეცვაო“. პოლიციელებმა გზა დაუთმეს ამ მათთვის უცნაურ კაცს.

გარეგნობიდან კიდევ უნდა მოვიხსენოთ მისი ხმა:

ცოტა ბარიტონალური, ლმობიერი, აუმაღლებელი.

მე არ მახსოვს მამას ყვირილი.

სამაგიეროდ, განსაკუთრებით საზოგადო კრებაზე, რომე-ლიმე მკვეთრ წუთს მისი ხმა თითქო არ ამაღლებულა, მაგრამ საკმაოდ ძლიერდება და მისი ფოლადი აკვესებს ნაპერწკლებს.

აქ უკვე შეუვალა იყო მისი ხმა: მტკიცე, დამარწმუნებე-ლი და დამპოროჩილებელი.

მისი საუბარი ხომ განთქმული იყო თანამედროვეთა შორის.

ნეკროლოგში თავის დროზე „უმნიშვნელო მეგობარი“ სწერდა დაახლოებით ასე: „ნუთუ აღარ უნდა მოვისმინო შენი ტკბილი სასმინარი ქართული საუბარიო.“

რალა თქმა უნდა, ეს საუბარი უმთავრესად საყურადღებო მით იყო, რომ იგი განმტკიცებული იყო დიდის ერუდიციით, შეუვალის ლოლიკით და მომხიბლავი აღმაფრენით.

მომხიბვლელობა კი მთელს მის აღნაგობას უხვად ჰქონდა მიფენილი და ძნელად შეხვდებოდა ისეთ კაცს, როგორც წრისაც, როგორც ცოდნისაც არ უნდა ყოფილიყო, რომ ერთხელ ენახა მამა, შემდეგ საათითაც არ დარჩენილიყო და ხელმეორედ არ მოესურვებინა მასთან ყოფნა.

იმიტომ იყო, რომ ცა და ქვეყნის ხალხი ეხვია მუდამ გარს. მაგრამ ამაზე შემდეგ.

ეხლა სად იყო ეს კაცი აღზრდილი, რა შთამომავლობისა და რა წრეში ტრიალებდა?

შთამომავლობა

როგორც ვიცი, ეს იყო დადიანი. საზოგადოდ კი, მოგეხსენებათ, საქართველოში დადიანი თავის დროზე წარჩინებული გვარი იყო. ჩვენს მათიანეს ბევრი ახსოვს ამ გვარის რჩეულთაგანი და მათ შორის განსაკუთრებით თამარ მეფის თანამედროვე ვარდანი, გმირი ცოტნე, დიდი ლევანი, კაცო,¹ დიდი ნიკო, ეს მეორე, ანუ უკეთ პირველი მამაჩემამდე, სამი შესანიშნავი შვილის პატრონი — გიორგისა, ბესარიონისა და პეტრესი, რომელთაც, იონა მეუნარგიას სიტყვით, სამეგრელოს მთავარი-ხუმრობით „სამთა ძმთა მუშეკეტერთა“ ეძახდა თურმე. დასასრულ, თვით უკანასკნელი მთავარი სამეგრელოსი, დავით დადიანი, კაცი მეტად ჭკვიანი და განგებიანი. ამათ გარდა ჭყონდიდელები სხვადასხვა ეპოქისა, რომლებიც უმეტეს ნაწილად დადიანთა საგვარეულოდგან გამოდიოდნენ და იყვნენ მწიგნობარნი, საერთო და საღვთო საქულის მეცნიერნი და ნიჭიერი მქადაგებელნი.

¹ პირველი მთავარი სამეგრელოსი ჩიქვანთა დინასტიიდან,

ასე რომ, დადიანთა საგვარეულოში ტრადიცია კულტურის ნიშნებისა საუკუნოებით გადმოდიოდა ერთის თაობიდან მეორეში და ღრმად ჰქონდა ფესვები გადგმული.

მე-17 საუკუნეში დადიანების, ვარდანძე — ლიპარტიანთა, დინასტია შესწყდა ვაჟების მხრივ და დადიანობა ხელთ იგდო ჩიქვანმა, მაგრამ მთავრის სასახლის და მისი მოგვარეთა ტრადიცია მაინც არ შეცვლილა და ჩიქვანებიდან წამოსული დადიანებიც ისე იღვწენ კულტურის და პოლიტიკის სიმადლეზე, როგორათაც მათი მეწინავენი.

ამგვარად იმ გამონაყოფ შტოსაც, რომელსაც მამა ეკუთვნის, მართებდა დაცვა ნაანდერძევ ტრადიციისა და ამ ნაკვალევზე შექმნა ახალის ღირებულებებისა.

ასე, რომ ამ ოჯახშიაც მისდევდნენ საერთოდ მწიგნობრობას, ჰქონდათ ძვირფასი ბიბლიოთეკა, ძველ ხელნაწერთა და მანუსკრიპტთა, რომელიც უკვე მამაჩემის სიკაბუჯეში დაიწვა და ეგრე სავალალოდ ჰქონდა მამას მთელ თავის სიცოცხლეში. განსაკუთრებით ერთი წიგნი „ნებროთიანი“, რომელიც დიდად შესანიშნავი ისტორიული რამ განძი იყო თურმე და რომელიც შემდეგ აღწერა მამას გადმოცემით თვედორე ქორდანიამ თავის „ქრონიკაში“.

მისდევდნენ შაირთ-მთქმელობას, ლხინის დროს ზმებს და მუნასიბებს, გალობას, მშვიდობიანობის დროს უცხო წიგნთა თარგმანებას და სხვა.

აგრეთვე კანონმდებლობის ცოდნას, მის ცხოვრებასთან შეფარდებას. ეს უფრო იმიტომ, რომ მამას პაპა, ანუ იმერულად რომ ვთქვა ბაბუა ალექსი, იყო უზუნაეს სასამართლოს თავმჯდომარე და მამა კი ტარიელ — მდივანბეგი და მოურავი იმ დროის მთელი სენაკის მაზრისა, გარდა ეგრეთ წოდებულ საჭყონდიდლოსი — აბაშა, სეფიეთი და სხვ. — რომელიც ხელ-შეუხებელივ ეკუთვნოდა ჰყონდიდელს.

მაგრამ რალა თქმა უნდა, ამ ოჯახშიაც უფრო სამხედრო სული ტრიალებდა: თოფ-იარაღი, საქმენი საგმირონი, ფალავნობა, ცხენოსნობა და სხვ. ამგვარი იყო, აგრეთვე, საუკუნოებით გალადებულ ფეოდალთა სულსა და გულში ბევრი უცნაურობა, ბევრი უდიერობაც, ბევრი უსამართლობაც.

ხსენებულ შტოს მამამთავარი, რომელიც სხვა დადიანთა შტოებზე უფრო ადრე გამოეყო მთავრის სასახლეს, იყო გიორგი.

კაცი გოლიათი სანახაობის, დიდი მრისხანე, დაუნდობელი, მაგრამ ეგეც მწიგნობრობაში გაწვრთნილი და უფრო კი, თურმე, დიდი სტრატეგი თავის დროისა, დიდი სარდალი, შემმართებელი და სწორუბოვარი მხედარი.

გიორგი ენათესავებოდა ბაგრატიონებს. მისი დედა იყო ბაგრატიონის ქალი და ამბობენ თეიმურაზ მეორის დროს, მის დასახმარებლად, რომელიღაც ბრძოლაში მონაწილეობა მიიღო და თავი დიდად ისახელაო.

ხსოვნას შერჩა ერთი ნაამბობი, გიორგის ერთგვარად დანახასიათებელი:

აღდგომის წირვა

აღდგომის დღეს თავის ამალით წავიდა გიორგი წირვაზე. სოფლად აღდგომის გამთენია სწირავდნენ ხოლმე, მაგრამ გიორგის, თურმე, მეტად დააგვიანდა, რომ მივიდა, წირვა დაწყებული დახვდა. ფრიად იწყინა, მღვდლის დასჯა მოინდომა, მაგრამ სხვა ველარაფერი მოახერხა და მღვდელს თავიდან დააწყებინა წირვა. აცახცახებული მღვდელი ერთ ხანს უარზე იდგა, ისიც შეჰკადრა — ქრისტიანულის ტიბიკონით ერთსა და იმავე დღეს, ერთსა და იმავე ტრაპეზზე ორჯერ მსხვერპლის შეწირვა (ზიარება) ერთსა და იმავე მღვდლის მიერ არ შეიძლებაო, მაგრამ მრისხანე ბატონის ბრძანებას აბა საით წაუვიდოდა და — დამორჩილდა. მით უფრო, ეგეც უმა იყო გიორგისა. წინათ, ბატონყმობის დროს, ზოგიერთი ყმის ოჯახს მღვდლობა ემართა, თითქო ბეგარასავეით, და ისინიც მღვდლობდნენ. მართალია, ეს აძლევედა ერთგვარ შეღავათს, მაგრამ რაკი ქოთანი ხარ, სულ ერთია, შექოთნე საითაც უნდა იქით გამოგაბამს ყურს.

ა ლ ე ქ ს ი — შვილი გიორგისა და პაპა მამასი.

ეს უფრო სხვა რიგის კაცი იყო თურმე. ეს უფრო დიდი გონების პატრონი იყო, უფრო პოლიტიკოსი, დიპლომატი, კანონების მცოდნე, უფრო მწიგნობარი, ერთის სიტყვით, ჩვენებურად რომ ეთქვათ, უფრო კაბინეტის კაცი, ვიდრე მხედარი და

აკი არც ეტანებოდა, თურმე, სამხედრო საქმეებს. მთავარ ლევანს ძალიან უყვარდა და მთელს სამეგრელოშიაც დიდი სახელი ჰქონდა მოხვეჭილი, როგორათაც ბრძენს, სამართლიანსა და ჭკუის საკითხავ კაცს.

მაშინდელი სამეგრელოს გონება, შინ და გარეთ მმართველი ხელი იყო ალექსი, ხოლო გმირულად ამოწვდილი, მტრის მამაცად მომგერებელი ხმალი -- დიდი ნიკო, რომელმაც შემდეგში ისეთის სიღარბაისლით აგვიწერა პროზათ ფოთის ალების ამბავი და რუხის ბრძოლა.

მთავარი ლევანი ამ ორ შესანიშნავ მოღვაწეზე ამყარებდა თავის სამთავრო საქმეებს და თვით თავის დღეს ნადირობასა, ლხინსა და თავადებთან სტუმრობაში აღამებდა თურმე.

თანაც, თურმე, დიდი მათხოვარი იყო. ე. ი. რომ გეწვეოდა თავის აშალით--ქამა-სმით ხომ გაგაწყალებდა. შემდეგ წასვლისას რაც მოეწონებოდა, უსათუოდ გთხოვდა ხოლმე: ცხენს, ძვირფას რამე ნივთს, ხატს, საქონელს, ქათმასაც კი, თუ ცოტაოდენი განსხვავებული ჯიშის იყო. სამეგრელოში ყველამ იცოდა ეს ამბავი. მაგრამ ბიჭი იყო და უარს ეტყოდა ვინმე, მხოლოდ ერთმა ფალავამ უხერხა.

ფალავას გადაუბრუნებელი

ამ ფალავას მეტად ძვირფასი ცხენი ჰყავდა. თავს ურჩევნობდა. ძუა-ფაფარს რძეში უბანდაო. მაგრამ ლევანის მოლოდინში ერთ საოცარ წნეს შეაჩვია: თავლაში დაბმულ, დაღდასმულ მერანს ყოველ დილით ქალაღს მოუტანდა თვალებთან და იმავე დროს სადგისს უჩხვლევდა. ამ გვარად ცხენი ისე გაიწვრთნა, რომ არამც თუ დანახვაზე, ქალაღის გაშრიანებაზედაც კი ყალბზე დგებოდა. ფალავა კმაყოფილი იყო ცხენით და ულვაშებში ცბიერად იღიმოდა:

მობრძანდა ლევანიც. ქეიფი, ნადიმი, ნადირობა, მთელი კვირა. დაღვა წასვლის დღე.

— ფალავა, ¹ ცხენს გიქებენ. უნდა წაგართვა.

— ინებე, დაღია, შენი ჭირიმე! ჩემი თავი გენაცვალოს!

გამოიყვანეს ცხენი. შეკაზმეს, მობრძანდა მთავარი. იამაღლიდათ მთავარს ცხენის სიკეთე.

¹ მეგრულად ფალავას -ფალავა" გამოთქვამენ. შ. ლ.

ფაღავა კი გულში იცინის, იცის რაც მოხდება. სიხარული ნაადრევია.

და მართლაც...

გზაში აგერ სამი გლეხი წამოჩოქილა, ხელში არზა უჭირავთ.

მთავარი მიუახლოვდა, გლეხებმა გაშალეს არხები, უნდა მიართვან და... აი ამ დროს:

ცხენი ერთი შეხტა და შეტრიალდა, ყალხზედაც შესდგა და მხედარი, მიუხედავად მისი მთავრობისა, მიწას დაანარცხა.

დაუეცილ მთავარს წყევლა ამოხდა ბაგეთაგან და შეჩვენება გაუგზავნა ცბიერ ფაღავას. ძლივს წამომდგარმა ბრძანა: ეს გაუხედნავი ურა უკანვე მიუგდეთ იმ შეჩვენებულსაო...

და აი ამგვარ კაცის მთავრობის დროს ალექსი, პაპა მამაჩემისა, ეხლანდურათ რომ ვთქვათ, ერთსა და იმავე დროს იყო საგარეო, საშინაო და იუსტიციის მინისტრი. მართლაც, ლევანის მთავრობის დროს სამეგრელო მოიცვა შედარებით მშვიდობიანობამ, წესიერების განმტკიცებამ, ქურდობისა და ავაზაკობის აღაგმვამ და აღმშენებლობითმა შემოქმედებამ, ამ ხნის განმავლობაში სამეგრელო არ ჩარეულა არავითარს არც საგარეო და არც საშინაო ავანტიურაში. თუმცა ამისათვის საკმაო მიზეზებიცა ჰქონდა. ამის უმთავრესი ხელის შემწყობი, მახსოვარნი იტყოდნენ, ალექსი იყოვო.

მათგანვე გამიგონია, რომ ალექსის სახელი სამეგრელოს საზღვრებს გარეშეც რომ გეხსენებინა, უთუოდ პატივითა და მოკრძალებით მოგეპყრობდნენო. მათვე მიაძმეს შემდეგი პატარა ეპიზოდი.

კაცი შამფურაჲ

დედალოურში (იმერეთშია, ხონის ახლოს) თავად წულუკიძეს მეტად თავი გააბეზრა თურმე ერთმა მეგრელმა ქურდმა. წულუკიძემაც უშოვა დრო, დაიჭირა მეგრელი, გათოკა, მიაკრა დიდ სარს და ცეცხლს მიუფიცხა. ცეცხლმა რომ კარგა მოუჭირა, მეგრელმა დაიყვირა თურმე მეგრულად: „დოჭვი, დოჭვი, ალექსი პატენისქუაში კოჩი“ (დასწვი, დასწვი ალექსი ბატონიშვილის კაციო). წულუკიძემ რომ გაიგო, მაშინვე ხელი აიღო და გაანთავისუფლა. მეგრელმა იტყუა — ის არ იყო ალექსის კაცი, მაგრამ საფარად იხმარა და გასკრა.

ალექსი ცხოვრობდა ს. ბერთემში, ანუ როგორც ახლა უწოდებენ ბეთლემში, მეტად კოხტა მდებარეობის არემარეში. ირგვლივ დობილოებით შეფენილი (მალლარი ვენახით) გორაკები, ქვევით კარგა ფართეზე დაცემული „ატეხილი ქალა“, მის მკერდზე ლაპსის-ლაზულის ფერი, ჭირხლივით ცივი მდინარე ტეხური და ტეხურის ძირობიანად ცამდე ამაღლებული მწვერვალი, რომლის მოედანზედაც დღესაც ზვიადთ გამოიყურება ისტორიული, ფარნაოზის დროის, ქუჯის ციხე. იმას ქვემოთ კიდევ ტეხურის მარცხენა ნაპირზე, სამხრეთით, ბერთემიდან ორ ნაბიჯზე, ალექსის ნასახლარიდგან ნახევარ კილომეტრზე, ნაქალაქევის სამკურნალო წყლები.

თვით ალექსის ეზო წარმოადგენდა შემდეგ სანახაობას: ეზოს შუაგულ, მომაღლებულ ალაგს ორსართულიანი დიდი სასახლე. ქვევით ქვის პალატი და ზემოთ ხის მკვიდრი წაბლის ფიცრით ნაშენი თორმეტი ოთახი, რომლის წინ და უკან ფართე აივნებია შემოვლებული. განსაკუთრებით წინა აივანია შესანიშნავი, რომელიც რამოდენიმე საუენის სივრცეზე იშლება და აღმოსავლეთით სრულდება პატარა კარის ეკლესიით.

ეკლესიის წინ — ტრადიციული ცაცხვი. აქვს საჯდომები. ეს დარბაისელთა სასაუბრო და ზოგჯერ ალექსის სასამართლო დარბაზიც. სასახლის გარდა ეს კარგა მოზრდილი ეზო გადაჭედლილია კიდევ სხვა შენობებით. ასე რომ ერთის შეხედვით პატარა ქალაქი გეგონებათ. ამ სახლებს, რაღა თქმა უნდა, თავისი დანიშნულება აქვთ: სასტუმრო, სამუშაო, საფარეშო, სომოახლო და სხვ.

გარდა ამისა, აქვეა გარიგებული შესამჩნევი თავლა, საჯინიბო, ბედელი, ხულა, სასიმიინდეები, ბოსელი, ძაღლების სამოახლო და სხვ.

ამ გაშენებულს ეზოში ირევთან გარდა ბატონებისა, ბატონიშვილებისა, მოურაეები, სახუცები, ბზინდარები, ბაზიერები, კურხუალები, საგარეო შინაყმები, ხაბაზები, მზარეულები (გაგესქუები), ფარეშები, მოჯალაბეები, ხელოსნები, დაგლახაკებულნი, გასალოსებულნი, კრეტინები და სხვ.

აქვე არიან გადიები, გამდელეები, მოახლეები, ძიძიშვილები, შებრდილები, ან ობოლი ღარიბი ნათესავის ქალები.

სავსეა ოჯახი.

და ვინ იცის, ეროსი ხშირად შემოეპარება ამ ფართე ეზოს რომელიმე ჩუმი კარებით, ან იქვე ეზოსთან ჩამომდინარე პატარა გურბემიის ხვინკნარით, სილას რომ რბილ ქვეშაგებად, თითქო განგებ, პირი მოუწმენდია.

ათქვირებული გოგოები, შეღწრებული ვაყები. შშენიერი ელენეები და არა ნაკლები პარისები.

ამ ლალ ბუნების ქვეშ... „მომხიბლავ მთვარიან ღამეს“ გაშაბლონებულ სალექსო ფრაზის არ იყოს...

ცაცხვის ძირას დარბაისელნი მუსაიფობენ: ჩიბუხის მოლურჯო კვამლს მიუყვება მათი საუბარი საკირბოროტო, საქვეყნო საკითხებზე.

ზევით გაჩაღებულ სასახლეში დიდი ქალბატონი და სხვა მანდილოსნები ხელ-საქმობენ რაიმე საკირკიტოს, ოქრო მკერდით შეთხზულსა. ეს ან დაფარნაა, ეკლესიაში ბარძიმ ფეშხუმის გადასაფარებელი, ან გობგარი, ქართული კაბის დიღებად გამოსადეგი, ან წულა მესტის მოსირკვა. და ყველა ეს შეზავებულია რაიმე სადარბაისლო ქალური საუბრით, რომელსაც ოდნავ ჭორაობის ელფერი დაჰკრავს.

მოახლენი და გამდელნი კიდევ თავის საღამურ სამუშაოზე არიან მიჩენილნი: ვინ ბაშბას პენტავს, ვინ საბნებს ჰკერავს, ვინ აუთოვებს, ვინ აბრეშუმის შულოს ძათს ფირფიტაზე ახვევს და სხვ. და აქ კი სრულიად გადაბდლილებულა ქორის წითელყვითელი ფართყვაილი. ვის არ გაუგონია „სამოახლოში“ გამოთქმული „აზრი“ და ვაი მას, ვინც აპყოლია... სამოახლო ღირს ასაწერად მოკალმისაგან...

ქვევით ეზოში კი, სამზარეულოში, ისევ ფუსფუსია: ვახშმად ძროხა მზადდება, ინდაურის საცივი და შემწვარი ტაბაკები, აქვე მზადდება ძროხის ბეჭი, გუფთად გატენილი, შეზავებული კოწახურით და სხვა და სხვა უცხო სუნნელით.

მელვინე მარნიდან ღვინოს იღებს ღოქებსა და პატარა „ნიტრებში“.

ხაბაზი ლავაშს აცხობს და თორნის მკადს ბადრ მთვარედ გამოიყვანს.

ვინც კი გადარჩენილია საქმიანობას, გამოფენილია ეზოში და მოახლეებს „ფუწის“ თამაში და „მუხანათობია“ გაუჩაღებია. მოისმის მათგან ახალგაზრდა, უღარდელი, „სიცილ-ტკვარ-ცალი“.

სასახლის ცოტა მოშორებით კი სქექს „შადაელა შაიდა“.

უფრო ახლო, ცაცხვთან, საგარეო შინაყმები მღვზე მიმსხ-დარან და ღიღინებენ უფრო არისტოკრატიულ სასიძღვროებს: „შაფი შაფი“, „გულო, შაგ-გულო“, „არალო“, „სიქოჟული“ და სხვ.

მამა ტარიელი

მამა მომსწრე იყო ამ ამბებისა, ამ ცხოვრებისა და მგონი თვით ალექსისაც, ნახევარი სიყრმე აქ ჰქონდა გატარებული, მაგრამ მამა არ აყვავებდა ცხოვრებას და ვერც მამაზე დააჩნია ეგოდენად თავისი კვალი ესეთმა ცხოვრებამ, როგორც შემდეგში დავინახავთ.

სამაგიეროდ ამ ცხოვრების ნამდვილი პირმშო შვილი იყო მამას მამა ტარიელი.

ალექსის 22 შვილი ჰყავდა თურმე, მაგრამ მათგან დაბოლოს 8 ქალ-ვაჟი შერჩა მხოლოდ და მათ შორის ყველაზე უფროსი ტარიელ, ანუ ტაია.

ეს იყო პირმშო ალექსისა.

და მან მშვენიერად იცოდა სამღვთო წერილი, „ვეფხისტყაოსანი“, თვით იყო შაირთა-მთქმელი, ზმათა გამჩარხველი, ტკბილი მგალობელი ეკლესიაში და სუფრაზე არა ნაკლებ ტკბილი მოღიღინე. ცხენოსანი, მოჭირითე, ომში შეუპოვარი, გამჭრიახი მხედარი და... მოყვარული ქალებისა.

ტანმორჩილი კაცი იყო თურმე, მაგრამ ჩასკვნილი, ბადრი სახის, საამური შავ-ტუხა ვაჟკაცი.

ხასიათით კი უწყალო იყო, არ ჰგავდა ალექსის ლმობიერებით და მის ყმებს სასტიკად ეპყრობოდა.

ერთხელ, თურმე, რომელიღაც გლეხს ცხრა მტკაველი ღორი მოსთხოვა საშობაოთ. არ ვიცი, შეუტრულდა თუ არა ეს სურვილი, მაგრამ თვით სურვილის გამოთქმას ეტყობა წადილი ადამიანის დატანჯვისა.

ერთხელ კიდევ გზაში მომავალს ძროხამ შებღავლა, თურმე, უბრძანა და ძროხას ენა ამოსჭერეს, იქვე, სასწრაფოდ დანთებულ ცეცხლზე, მწვადათ შესწვეს და როდესაც ერთი ლუკმა იგება, მაშინ დამწვიდდა.

მაგრამ ესეთი ხასიათი სრულიად არ უშლიდა ხელს, რომ იგი სახელმწიფო მოღვაწე ყოფილიყო, და როგორც ზემოთ მოვიხსენიე, სქეროდა საპატიო და საპასუხისმგებლო თანამდებობა. სხვათა შორის, გამიგონია, რომ ის დიდი მოწინააღმდევე იყო თურმე რუსეთის შემოსვლისა სამეგრელოში და ეს ემჩნევა იმ მკაცრ კილოსაც, რომლითაც იხსენიებს მას ცნობილი ბოროზდინი თავის ნაშრომში სამეგრელოს შესახებ.

ამგვარად, მე დავასრულე ერთგვარი გენიალოგიური ექსკურსია მამას წინაპრებისა ვაჟების მხრივ. დამრჩენია გაკვრით მოვიხსენიო მისი წინაპარი ქალებიც. აქაც წარჩინებული გვარები, აქაც სხეულის დიდი სილამაზე. აქაც და უფრო აქ მწიგნობრობა, ხელსაქმე, სარისტიანობა ოჯახში, მკურნალობა, ღვთისმოსაობა და სხვ.

აი შათი გვარებიც:

გიორგის დედა იყო ბაგრატიონის ქალი.

ალექსის დედა — ნიჟარაძის.

ტარიელ — ტაიასი — მიქელაძის.

და მამასი — აბაშიძის.

ოთხი წარჩინებული სახლის შვილი ტრიალებდა თანდათანობით ხსენებულ ოჯახში და შემოჰქონდათ თავისი მამულდედულის სიკეთეც და სიღუბეც, გემოვნებაც და აღზრდაც, თავისი გვარისა და ჯიშის კეთილშობილური სულგრძელობა და მხნეობა, მამაცობა, ან ფუქსავატური ამპარტავნება და მედიდურობა.

ყველა ესენი კი სტოვებდნენ თავიანთ ნაკვალევს და ამითა გროვდებოდა ამ ოჯახისათვის როგორც უარყოფითი, ისე დადებითი თვისებები, რომლებიც ამ ქალებს ახლდათ, აგრეთვე ის დიდი ზნეობრივი და გონებრივი საგანძური, რომელსაც ბოლოს უნდა გამოეთქვა თავისი ღირსეული და საუკეთესო სახე: —

ნიკო დადიანი.

მაგრამ ეს მუხლი ჩემი საუბრისა მთლად არ იქნებოდა დასრულებული, უკეთუ ჩვენ ცოტა არ დაუახლოვდებით იმ ნათელ ნაკეთს აბაშიძის ქალისას, რომელიც უშუალოდ იყო მისი აღმზრდელი დედაც, მისი პირველი მასწავლებელიც და მისი წარმტაცი საერთოდ მწიგნობრობისა და კერძოდ მეცნიერებისაკენ.

ქალი არამც თუ ჩვეულებისამებრ მცოდნე იყო ქართული ენისა, ვეფხისტყაოსნისა და სხვა და სხვა ხელსაქმისა, რომელიც თითქოს სავალდებულოც კი იყო მაშინდელი ქართველი ქალისათვის, არამედ საფუძვლიანად იცოდა თურმე, იმ დროის შესადაარად, საქართველოს ისტორია, ვარსკვლავთმრიცხველობა, დიდი ხელთა, რომელიც მეტად რთულს, — მთვარისა და მზის, დრო და ჟამის ტრიალთა აღნუსხვი კომბინაციებს წარმოადგენს. ზედმიწევნით იცოდა საღმეთო რჯული, მაგრამ მართო ისტორია და ლოცვები კი არა, არამედ დოგმატიური გამოკვლევანი და ყოველგვარი საეკლესიო წესები და ტიბიკონი... ასე რომ, ზემდგომი სასულიერო პირნი უფრთხოდნენ მასთან გამოკამათებას და უბრალო ნოფლის მღვდლები შიშით ცახცახებდნენ, წირვა-ლოცვაზე არა შეგვეცდეს—ა, თორემ აბაშიძის ქალთან ხომ მოგვექრა თავიო. ორი მის მიერ მომზადებული მღვდელი თავის დროზე აკურთხა მეტად სასტიკმა ეგზამენატორმა გაბრიელ ეპისკოპოსმა. ერთი იყო სამეგრელოში — შესამჩნევი პიროვნება მის წრეში — მაქსიმე გოგინავა და მეორე იმერეთში — მიხეილ მკედლიძე, ძმა ჩვენს ლიტერატურაში ცნობილი კრიტიკოსის და საზოგადო მოღვაწის ევსტათი მკედლიძისა (ბოსლეველის). სწორედ ამ ევსტათიმ ესეთ ღირსეულ ადამიანის გარდაცვლისას, 1880 წ. ფრიად გულთბილი და სრულიად დამახასიათებელი წერილი მოათავსა მაშინდელ „დროებაში“.

განსვენებული ხომ აგრეთვე დიდი მცოდნე იყო ძველი კარაბადინებისა და ზოგიერთის უებარის წამლებისა, რომელთა შორის ზოგიერთი ამჟამათ თვით მედიცინასაც უწყამებია.

ამგვარად, ეს ქალი წარმოადგენდა თურმე ისეთ ტიპს ქართ-

ველი ქალისას, როგორსაც მთელი მე-19 საუკ. ქართული ლიტერატურა მიჰგოდებდა და მიჰქვეითებდა.

მამაც აუჩივლდა ერთ თავის ლექსში — „დედების ძღვენი“ ასეთი ტიპის გადავარდნას და ამ ლექსის თავშივე ამბობს:

„ჩვენს „უდებობას“, ჩვენს უბედობას
არ აუჩივლდეთ აღარ გვარგია,
მიტომ, რომ აგერ დაიწყებს მხობას
ძველი „დედების“ რაც ამავგია.

რადგანაც:

„აღარ ახარებს ნორჩსა ყურებსა
მშობლიურ ენის ხმა მშობლიური:
აწ აღარ უკრავს ტებილ ჩანგურებსა
ქართველი დედის ხელი ღვთიური“.

თავის თანამედროვე ქალს, მამას შეხედულებით, ახასიათებს:

„კაზმა-ჩაცმაზე მუდამი ზრუნვა,
უკადრისობა, ჯაფის თაკილი,
აშიკთა დევა, სულ მათთან ხტუნვა,
დღე ზანტი ძილი, ღამე ღვიძილი.
გრძელი კუდები, თმა ყვავთ-ბუდები,
წელი ნაქაჯი, ჯინჯელის ნამგვანი,
პუქ-პუქ-ჭღუბები, სქლად ნაცუდები.
ქლეთილ-გლეხილი პირი და ტანი...“ და სხვ.¹

სამაგიეროდ ძველი დედები ესე ჰყავს მამას წარმოდგენილი:

„სიტყვაში — სიტკბო, ხელში — საქნარი,
ტკუაში — ცოდნა მართებულისა,
ქცევაში — სიბრძნე წყნარ-უკვეხარი,
გულში — წამება წმინდის რჯულისა,
აზრში — მამული, სახლი და შვილი,
განსჯაში — რწმენა წარმატებისა,
ფიქრში — ერის სვე, ერის წადილი,
ხელში — ბეჭედი ღვთის ხატებისა....

¹ XIX საუკ. 70-80 წლების მოდახეა აქ ლაპარაკი.

ესენი ყველა ამკობდა ქალსა,
ქალსა დედასა და ქალსა ცოლსა“ და სხვ.

ასე რომ ამ სტრიქონებში კარგა გამოსჩანს პიროვნება დედა მისისა.

როდესაც მარიამ აბაშიძის ქალი შემოვიდა ტაიას ოჯახში, ოჯახის მსვლელობამ სულ სხვა სახე მიიღო: გარეგან, შინაგან. ის კუთხე — ძვირეები უსამართლობისათვის რომ ამოშვერილ იყვნენ, თითქო ხელოვანის ხელით გადაიხერხა და მომრგვალდა, ის საჩხვლეტი ისრები ფუყე ამპარტავენობით წინ რომ იყო გამოწეული, უქმად, გადავარდა და ის მეჭექები და სოკოებიც ცრუმორწმუნეობით რომ იყო აღმოცენებული, ნელი-ნელ აღმოიფხვრა, რადგან ოჯახში დაისადგურა სათნოებამ, ღმობიერებამ, მიტევებამ ერთის მხრივ, თავის დროის ცოდნამ, მაღალმა გონიერებამ, მტკიცე ლოლიკამ მეორის მხრივ და თანდათან განქარდა საწყვედიადო უკეთურობანი.

ამ სახლში ამიერიდან აღარ ჰქონდა ადგილი ძალმომრეობას, განუკითხაობას, მეძაეობას, ეს ყოველივე შეცვალა ზნეობის გამტკიცებამ, სისპეტაკემ და სამართლიანობამ.

ათასი მლოცველი გაუჩნდა მარიამ აბაშიძის ქალს. სულიერად შეჭირვებულნი, ნივთიერად დაზარალებულნი, ადამიანთაგან შევიწროებულნი, სხეულით დააეადებულნი. ყველანი „აბაშიხე“-სთან ჰპოვებდნენ შვებას.

ჩვენ ქვემოთ დავინახავთ, რომ ამ ღირსეული ქალის სასახელო შვილს მის სიცოცხლეში არც ერთი დედის მიერ შთანერგილი ეს სიკეთე უკუ არ უგდია.

და აი ადვილად მიხვდებით, თუ ესეთი დედა რა ნანასაც დამღერდა ერთადერთს, პირველსა და უკანასკნელს ვაჟს, „ბამბის ქულა პატარა ნიკოს“.

სიზრდე

ნიკოც, ლაპარაკი და ნალაპარაკევის შეგნება რომ შეიძლო, დედის კალთაში ისმენს საარაკო აზრებს საქართველოს ჭირგადახდილობისას, ებრაელთა წარმტაც, სიბრძნით აღსავსე ლეგენდებს, ანციფრებს მის გონებას ცთომილთა გარიგებულობა, თანავარსკვლავედნი, ირმის ნახტომი, ხომლი, მარეხი და

ხარის თვალა. აცინებს და თან დიდ სასჯელს აყენებს მის ნორჩ გუნებას ზოგიერთ ცხოველთა და მცენარეთა ამბები. თან გულს საამურად ხედება კარის ეკლესიაში მშვენიერი, გამწყაზრული წირვა-ლოცვა და მამამისის სხვებთან ერთად მოღუღუნე, ცამდე ამყვანი გალობა.

წამოიჩიტა?

— წიგნები. ჩაყვითლებული გრავნილები, პაპირუსის ფურცლებიც-კი, ან ყდიანი ძველი, მრგვალი, შავი, მურაქაფის მელნით, თვალეში რომ გეტყვებიან, ისეთი ასოებით მოხაზული და სინგურებით მოკიკვიკებული, წამლით დახატული, დეკადენტური ფიგურები, წელში აგერ აგერ რომ გადაიმტვრევა ისეთი ქალისა, ან უჩვეულო, შავი და სქელი წვერულვაშის ვაჟკაცები, რომელთაც თავზე ჩაფხუტი ხურავთ და ხმლები, ჩხირივით წელზე ძელებივით გადმოჰკიდებია.

მაგრამ ამას თავის დროზე მამა უკეთ აგვიწერს თავის „ფაცხაში“.

მარტოობა

ერთი თითქოს ანორმალობა:

იგი თითქო არც იმდენად ერევა თავის ტოლ-ამხანაგების თამაშში და „ღლაბუცობაში“. სამოახლოს სრულიად არ ეკარება, თუმცა იმდენი მიმზიდველები ჰყავს იქითკენ—გამდღელები, გაღიები; მათ მიერ მორთმეული ხილი, ტკბილეულობა. ან შინაყმები ან პატარა ფარეშები, ხელზე მოსამსახურეები რაჟ არ მორთმევდნენ. მათემატიკურის სისწორით გამოჰკრილს. კოდალას (პატარა ისარი), მშვენივრად ჩამოსხმულს და კობტად მოღუნულ მშვილდს, ზედ რომ მტკიცე ლარი უბია, პატარა გოგროქინას... რა გინდა სულო და გულო... ვის არ უნდა ასიაშოვნოს ერთადერთი მემკვიდრე სამეგრელოში განთქმულის პირის ტაია დადიანისა, ანუ ბატონიშვილისა, როგორც სამეგრელოში საზოგადოთ ეძახდნენ ყოველ დადიანს „ბატონისქუა“, მხოლოდ მთავარს, პირადათ მას, უწოდებდნენ — „დადიანს“.

ჰო და ვის არ უნდა ასიაშოვნოს ასეთ მემკვიდრეს და მერე მარტო ტაიასი კი არა, მთელი ალექსის ოჯახისა. რადგან სხვა ძმები ტაიასი უშვილებოთ გადადიან. მხოლოდ ერთს ბიძას ბე-

სარიონს, მამა უკვე დაეაქაცებულ იყო, რომ ვაჟი შეეძინა. მახლობელთა აზრით-კი არამც თუ აქ, სამეგრელოში, ამ შტოის დადიანების მემკვიდრეა პატარა ნიკო, არამედ იქ, იმერეთშიაც აბაშიძეების დიდი სამემკვიდრეოც დარჩება, რადგანაც მარიამის ერთადერთ ძმას ივანე აბაშიძეს შვილი არა ჰყავს: ასეც მოხდა, მაგრამ ამაზედაც თავის დროს.

ერთი სიტყვით, მამა ფიზიკურ გაწვრთნას არც თუ იმდენად ეძლევა და ეს გარემოება მას შემდეგში არ მიაჩნია სანაქებოდ.

— „ცალ-მხრივი აღზრდა არ ვარგაო“ — იტყოდა ხოლმე.

სიყრმის გეგობარი

თუმცა ამ ხანებში მას ჰყავს ერთი თავისი ტოლი, უბირი ვინმე, მეტად მალხაზი, გონებიანი და ჯანსაღი ბავშვი, გუშინდლურათ რომ ვსთქვათ, უკანონოდ შობილი ტეტუია. ეს არის მისი სიყრმის ფიქრთა მეგობარი, შემდეგში თითქმის შუახანადღე, განუყრელი ამხანაგი და თანამშრომელი.

ეს მშვენიერი კაცი სწორედ შუახანის იყო, რომ დიფტერიით უეცრად გარდაიცვალა და სამუდამოდ გამოუგლოველი დარჩა მამას გულში. იგი დაიმარხა ისე, როგორც უფროსი ძმა მამასი და დამარხულია ჩვენს საგვარეულო სასაფლაოზე.

მარიამი იმასაც ეგრე ასწავლიდა, როგორც ნიკოს. მხოლოდ საბრალო ტეტუიას ვინ აცლიდა ბატონიშვილისავეთ ვარსკვლავთმრიცხველობაზედაც თავი დაედო და მართალია ნიკოს სიყვარულისათვის ბევრი უპირატესობა ჰქონდა მინიჭებულს, მაინც უბირი ვინმე იყო და უმთავრესად ხელზე მოსამსახურეთა ზრდიდენ.

მაინცდამაინც გარდატეხის დრო დადგა. ნიკო იმ ასაკშია, რომ სერიოზული სწავლა უნდა დაიწყოს.

უკვე სხვა დროა, სხვა მოთხოვნილება.

ტაია უარზეა. იმას სავალალოდ ისა აქვს, რომ მას ღირსეული შვილი არ დარჩება. მას არ მოსწონს „ვარსკვლავთმრიცხველი“ შვილი. ხმლის მოქნევა არ იცის, დამბაჩის გასროლა. ვაიმე მამულო დაღუპულო!..

მაგრამ ბოლოს მაინც მოტყდა.

ცოლის რჩევამაც უთუოდ თავისი გაიტანა, საკუთარმა გამჭირიანობამაც.

და აი ტაიამ მთავარს ნებართვა გამოსთხოვა შვილისათვის, რომ ქუთაისის კეთილშობილთა სასწავლებელში, მერმინდელს პირველ გიმნაზიაში, სწავლა მიეღო.

უამისობა არ შეიძლებოდა.

ასეთივე ნებართვით იყო მამასთან ერთად გაშვებული შემდეგში მისი დიდი, გულითადი ამხანაგი დავით ანჩაბაძე, თავის ღრობზე პეტერბურგში ცნობილი ვეჭილი, განთქმული სპასოვიჩის თანაშემწე.

ამგვარად, მამას ბედი სამუდამოდ გადაწყდა.

იგი სამუდამოდ ჩამოშორდა ძველ ფეოდალურ ოჯახის სულთქმას და მიწი იღვებით ცხოვრებაში სიარულს.

სწავლა

სასწავლებელში იგი ითვლებოდა თურმე ერთ საუკეთესო მოწაფედ და ისე იოლად სწავლობდა, რომ ორი წლის შემდეგ ნება გამოითხოვა და სულ ერთიანად ჩააბარა მაშინდელი მთელი კურსის სრული ეგზამენი. ეს ძალიან უჩვეულო და რთული საქმე იყო მაშინ, და მოწაფეებსაც და მასწავლებლებსაც თითოთ საჩვენებლათ ჰყავდათ თურმე.

მიხ. ნაკაშიძის ნაამბობი

კლასში მხოლოდ ფორმისთვის იჯდაო — მიამბობდა მამას თანდასწრებით მისი ნაამხანაგარი მიხეილ ნაკაშიძე, ბაქოში გუბერნატორობის ღროს რომ მოკლეს. — გაკვეთილებს აღარ ეკითხებოდნენ და ეგეც მუდამ რაღაც გარეშე წიგნს ჩაჰკირკიტებდა: ან ფილოსოფიური შინაარსისა იყო, ან ბუნებისმეტყველებიდან, ან რაიმე ისტორიული გამოკვლევა, ან კიდევ მისი საყვარელი ატრონომია ან სხვა რამ მეცნიერული საგანი. აღარც ამას უშლიდნენ. პირიქით, ჩვენ გვაყვედრიდნენ თქვენც აგრე მოგეცემათ ნება, თუ მაგასავით მომპირნე და მეცადინი იქნებითო. ჩვენ კი მაგისი ჯავრი გვკვირდა, მაგრამ სხვაფრივ გვიყვარდა, ყველაფერში კარგი სამეგობრო იყო, გარდა ქეიფისა და ჩვენც ამიტომ არ ვაკადრებდით, თორემ ისე კი გეწყინდა მაშხილებელ ჰინდისივით ყოველდღე თავს წამოგეყუდოდაო. ასეთი საძაგელი კაცი იყო მამაშენიო.

შენხუმრებოდა მხიარული მოხუცი.

და მართლაც ეტყობა, რომ სწორედ ამ ხანებში მამა საფუძვლიანად შეუდგა თვითგანვითარებას და ხარბად დაეწაფა იმ გონებრივ წყაროს, რასაც კი იძლეოდა მაშინდელი სამეცნიერო ლიტერატურა და ქუთაისის შესაძლებლობა.

ლოლობერიძეები

ქუთაისში ამის შესაძლებლობა იმ უამარ არსებობდა სწორედ იმ ოჯახში, საცა მამა მოწაფეობის დროს ცხოვრობდა.

ეს ოჯახი იყო ოჯახი ლოლობერიძეებისა.

ამ ლოლობერიძეების ოჯახიდან წამოვიდნენ ცნობილი მოღვაწეები მე-60 წლებისა: ბესარიონ, ნიკო, გიორგი და სისო, პირველი სტუდენტები იმერეთისა.

ეს ოჯახი იყო მაშინდელი ცენტრი იმერეთისა, მოწინავე აზრთა მატარებელი.

ამ ოჯახში გაისმოდა საუბარი და სჯა-ბაასი მაშინდელი საზოგადოებრივ, საჭირობოროტო საკითხებზე, პოლიტიკაზე, ეკონომიურ საკითხებზე, სამეცნიერო საგნებზე, საქართველოს ისტორიულ წარსულზე, თანამედროვე სავალალო მდგომარეობაზე, სტამბაზე, გაზეთზე, ბანკზე, ყველა ამეებან დაარსების საქმირობაზე და სხვ.

აბა რალა თქმა უნდა, რომ ნიჭიერი და მაღალგონიერი ახალგაზრდა ხარბად შეისუნთქავდა ასეთ მამრთელეებელ ჰაერს და თავგადადებით ჩაუღრმავდებოდა ხსენებულ ოჯახის მდიდარ ბიბლიოთეკას.

იმავე ხანებიდან თვითონაც იწყო წიგნების გამოწერა და ბოლო ხანებში მისი ბიბლიოთეკა რომ გადაგეთვალე რებინათ, ჩვეულებრივ კლასიკოსებისა და მეცნიერული წიგნების გარდა, შეხედებოდით სპეციალურ სახელმძღვანელოებს, სხვადასხვა წერილმან გამოკვლევებს, ბედეკერისებურ გამოცემებს, ატლასებს, სხვადასხვაგვარ აღმანახებს, და საერთოდ ასეთ საცნობარ ბროშურებს.

არაფერი არ გამოეპარებოდა, ყოველივე იყო მისთვის რთული შესასწავლი და საინტერესო. ახალი გამოგონება ტექნიკაში, ახალი გამოკვლევა, ისტორიული, ან სხვა რომელაჰე სამეცნიერო საკითხისა და განსაკუთრებით მეღაცინაში, უსა-

თუორ ჰქონდა შექენილი და იყო მისი შესწავლისა და შეთვე-
ლების საგანი.

ასე სკირდა სულ სიკვდილამდე. ხანში შესული, 52 წლის
კაცი ქაბუკურის გატაცებით ეძლეოდა რომელიმე საგნის შეს-
წავლას და სანამ ხელმოდებით და საფუძვლიანად არ შეითვი-
სებდა, მანამ არ მოეშვებოდა.

საკვირველი იყო მისი ერუდიცია, მისი თითქო უნივერსა-
ლობა, მაგრამ მე კიდეც წინ გავრბივარ...

როგორც ზემოთ ვთქვი, ამ ხანებში შეუდგა იგი საფუძვ-
ლიანად თვითგანვითარებას და ხასიათის და მტკიცე ნების-
ყოფის გამოქედვას.

თამბაქო

ამ ხანებიდან საყურადღებოა ერთი ეპიზოდი.

სასწავლებელში ამხანაგთა მიბაძვით თამბაქოს წევას მი-
ვეჩვიეო, იტყოდა ხოლმე. — ვწვედა თავ-გადაღებით, მაგრამ
რომ ჩავუფიქრდი, შევატყვე, რომ ამ ჩვეულებამ დამიპყრო
და მონათ გამხადაო. გადაეწყვიტე აღმეკვეცა თამბაქოს წევა.
ამისათვის ვიყიდე საუკეთესო ხარისხისა და უძვირფასესი,
სურნელოვანი თამბაქო, გავხსენ და მაგიდაზე წინ დავიდე.
თვით კი მეცადინეობას შეეუღლექიო. მალიზიანებდა თამბაქოს
სუნი, ერთი კვირა ვიქცეოდი ასე და ბოლოს ვძლიე...

ამ გამარჯვებამ დიდათ გამახარაო.

მართლაც, ამის შემდეგ არავის უნახავს, რომ მამას თამბაქო
მოეწიოს.

აგრეთვე ებრძოდა სხვადასხვა, შეიძლება წარმტაც, მაგრამ
მანებელ ჩვეულებათა შეთვისებას და სიკვდილამდე გამოსა-
ხავედა შედარებით სრულს და დამოუკიდებელ პიროვნებას,
რომელსაც არავითარი რაიმე აკვიატებული ზნე არა სკირდა.

უნდა ვიფიქროთ, რომ ამიტომ იყო შემდეგში ისეთი დიდი
გავლენა ჰქონდა მის პიროვნებას, მის ზნეობრივ ჭიფაქიზეს,
რომელიც მის მტრებსაც კი სწამდათ. რადგან ის მარტო ჭიფა-
ვით კი არ იყო მქადაგებელი, არამედ თავის ცხოვრებით იყო
ნათქვამის მაჩვენებელი და ეს კი იწვევდა მის მცნობში უშუა-
ლო რწმენას მისი პიროვნებისადმი.

გამოცდები რომ ჩააბარა, განიზრახა, საზღვარგარეთ წასუ-

ლიყო და იქ მიედო სწავლა, იქ გაეფართოვებია პორიზონტი მისი მსოფლმხედველობისა, მაგრამ ამ დროს გარდაიცვალა მამამისი ტაია და დედამ, აბაშიძის ქალმა, თავისაგან აღარ განიშორა საყვარელი შვილი და ოჯახის ერთადერთი პატრონი.

მამას სწამდა დედისადმი მორჩილება და ამ მრწამსს იგი არ წაუვიდა.

შვილები რომ წამოვეზარდეთ, ესლა ჩვენთან ერთად ფიქრობდა საზღვარგარეთ მოგზაურობას, მაგრამ არც ეს მოხერხდა. სამუდამოდ დარჩა სამშობლოში და ჩაება მაშინდელ ცხოვრების უღლის გაწვევაში.

საზოგადოებრივი სამსახური

რა ცხოვრება იყო მაშინდელი ცხოვრება?

უვეცი, უსწავლელი ხალხი. პოლიტიკურად დამონებულ სამშობლო და ეკონომიურად წელგაუმართავი. განსაკუთრებით საქართველოს ის კუთხე, რომლის ღირსეული შვილიც ის იყო. სამეგრელო, აქ კიდევ უფრო საგრძნობი იყო დუხჭირი მდგომარეობა მთელი ქვეყნისა.

იქ უნდოდა შველა, გრძნობა და გონებაც იქეთ უთითებდა, რომ მისი ცოდნა და უნარი იქ მოეხმარა.

უწინარეს ყოვლისა მისი გონება მიიპყრო სოფლის უსწავლელობამ, სულიერმა და ნიეთიერმა გაკირვებამ და ფიზიკურმა ავადმყოფობამ.

ის არ შევიდა არსად სახელმწიფო სამსახურში.

ბევრგზის მიუმართავთ მისთვის მაშინდელ ძალაუფლებებს მქონე პირებს, სიკაბუყეშიც და ხანგადასულობისასაც. შეუძლებელიათ საპატიო თანამდებობანი, მაგრამ მამა არ დათანხმებულა.

მართალია, ის იყო ნიეთიერად უზრუნველყოფილი, დარჩა დიდი სამემკვიდრო, განსაკუთრებით იმერეთში, საცა დედით ბიძამისი, ივანე აბაშიძე, როგორც ზევეთაც მოვიხსენიე, უშვილოდ გარდაიცვალა და დიდძალი მამული დაუტოვა.

— „ბარე ხუთ სოფელს მოეთვლიდი ზემო იმერეთში მამა თქვენის დროს, საცა მონაწილედ ვითვლებოდითო“ — მეუბნებოდა სავანელი, ივანე აბაშიძის ხელოსნად ნამყოფი და ჩემო

შემსწრები ოთხმოცი წლის დათია ამყოლაძე: სვირი, რგანი, ცხამი, სავანე, არგვეთა. აქ ყველგან გვექონდა მამული და რგანში ხომ შემდეგ შავი ქვაც აღმოგვიჩნდაო.

დარბაისლობდა ბევრ რამეს მნახველი და შემსწრე, გონიერი ამყოლაძე.

მამა მარტო ამიტომ კი არ გაუბროდა სახელმწიფო სამსახურს, თვით მისი სული და გული, ანუ უკეთ, მთელი მისი მსოფლმხედველობა წინააღმდეგი იყო მოხელეობისა და თავაზიანად, მაგრამ მტკიცედ და შეუვალ ყოველ ესეთ წინადადებას ჩამოიშორებდა ხოლმე.

და მაინც რა არგუნა კაცს მაშინდელმა ცხოვრებამ?

ბანკირობა, ექიმად ყოფნა, დეპუტატად საკრებულოში სამეგრელოს წარმომადგენლობა და სხვ. ამგვარი მურეხი საქმე. მწერლობა? თეორეტიკოსობა?

თვითონ სწერდა ერთხელ გიორგი წერეთელზე:

„გაჩენილია სამწერლოდ“...

მე მგონია თვით მამა იყო გაჩენილი სამწერლოდ, კაბინეტის კაცად, თეორიების ჩამომსმელად, ფილოსოფიურ სისტემათა გამომქანდაკებლად, მაგრამ...

მბრძანებელმა და მეუფემ,

ცხოვრებამ...

პრაქტიკულ საქმიანობაში დაახურდავა.

სათავისო სინამდვილეში კი მოსაგონად შოამომავლობისათვის, ხელწესახები ნაწარმოები ლიტერატურაში ნაკლები დარჩა...

შეიძლება ამასაც მიეწეროს ის დავიწყების ნაზი ლეჩაქი, რომელიც ეხლანდელთათვის ეგრე მკრთალად აჩენს ამ ახოვან სახეს.

მაინც გავიხსენოთ როგორი იყო საზოგადოებრივი სამსახური:

იმერეთის ბანკი, ანუ „მიხეილის საადგილ-მამულო ქუთაისის ბანკი“, როგორც ვიცით, დაარსდა ბესარიონ ღოღობერიძის მიერ, თითქმის იმავე დროს, როდესაც ილია ჭავჭავაძე აარსებდა ამგვარსავე იპოთეკის ბანკს თბილისში.

ეს იყო დადი პატრიოტული საქმე იმ დროსი, ამის გარ-

შემო ფიქრობდნენ მაშინდელი მოწინაევეები ქართული კერის გაღვივებას.

მამა კი ამ დროს გართული იყო სოფ. ბერთემში ახალგაზრდათა მწვრთნელობის საქმით.

საწურთნელი

ლევ ტოლსტოის არ იყოს, მას ჰქონდა მის ოჯახში მოწყობილი ახალგაზრდათა საწურთნელი, საცა განურჩევლად წოდებისა, ახალგაზრდობას ასწავლიდა წერა-კითხვას, არითმეტიკას, გეოგრაფიას და მეურნეობას.

ჰქონდა ამის სახელმძღვანელოები თვით მის მიერ შედგენილი, მაგრამ ბიბლიოთეკის დაწვის დროს ყველა ესენიც უმსხვერპლნია ცეცხლს. გადარჩენილა მხოლოდ ერთი კონსპექტური მონახაზი გრამატიკის წესებისა.

ამავე დროს იგი გაუტაცნია მედიცინას და დაუწყია მკურნალობა სნეულთა.

პირველი ტრფობა

იმავე ხანებში, ეს უკვე 60 წლების დასასრულია, მის გულში უფეთქია სიყვარულს მომავალ მის მეუღლისადმი და, როგორც თვით ამბობს ერთს ლექსში: „თავსა დაუდგამს ტრფობის გვირგვინი“.

არსებობს დიდი რვეული, ჩაყვითლებულ ქალაღზე ფერმკრთალი მელნით ნაწერისა—

ეს მამას მეუღლის ლიდია წულუკიძის ქალის ნაწერია.

აქ მოთხრობილია ნაზი რომანი ორი ახალგაზრდისა...

ეს თითქო უფრო ბელეტრისტული ნაწარმოებია, ვიდრე დღიური ახალგაზრდა რომანტიულის იერით შეყვარებულის ქალ-ვაჟისა.

და აი ცოლ-შერთულ მამას საკუთარ საქმიანობაში გართულს, ბესარიონ ლოღობერიძისაგან მოუღის წინადადება, რომ იგი გახდეს ახლად დაარსებული ბანკის დირექტორად.

მამა უარზეა — მართალია ცოლიც შეირთო და სოფელსაც. ჩაუბრუნდა, მაგრამ ის კიდევ ოცნებობს საზღვარგარეთ წასვლაზე, ცხოვრების ფართო ასპარეზზე გამოსასვლელად თავი მზად არ მიაჩნია.

ამ დროს მოდის წერილი დედისაგან. დედა წერს თურმე დაახლოვებით ასეთი შინაარსის წერილს: სამშობლომ მოითხოვა, შვილო, შენი სამსახური და შენც უნდა შეასრულო შენი მოვალეობა. წინათ შენი წინაპრები ხმლით საქმიანობდნენ სამშობლოს საკეთილდღეოდ, შენ კი შენი ცოდნა და ნიჭი უნდა მოახმარო ამავე საქმესაო.

თქვენ იგრძნობთ სიმძიმეს ამ წერილისას.

წერილმა გასჭრა და მამა შეუდგა „ბანკირობას“.

* * *

ბესარიონ ლოღობერიძის გარდაცვალების შემდეგ მამა ისრულებდა ბანკის თავმჯდომარის მოვალეობას და ის იყო კადეც ერთადერთი ყველა ბანკის კანდიდატი, მაგრამ აქ მოხდა იმ დროსთვის ერთი უცნაურობა.

მამამ საზოგადო კრებაზე შეიტანა პროექტი, რომ მსესხებელ ებრაელებსაც მისცემოდათ გადამწყვეტი ხმა კრებებზე.

პროექტი არ იქნა კრების მიერ შეწყნარებული და მამა გადადგა თანამდებობიდან და არც შემდეგ ისურვა მისი კანდიდატურის წამოყენება.

ბევრი ჰაი, ჰუი, ბევრს შეხლა შემოხლა, მაგრამ მამა მაინც თავისას დაადგა და...

უმრავლესობა ვერ მიხვდა მამას ასეთ დამოკიდებულებას საზოგადოებრივ მოვალეობისადმი.

საოჯახო უბედურებანი

სწორედ ამ დროს თავს დაატყდა ზედიზედ ოჯახური უბედურებანი: მოუყვდა ორი შვილი.

გარდაეცვალა სატრფო ცოლი. ამათ ზედ მოჰყვა საყვარელი დედამისი, აბაშიძის ქალი და იმავე ხანებში ზემოხსენებული სიყრმის მეგობარი და თან შეზრდილი, მისი შერმადინი ტეტუა.

მეტად სასტიკი იყო ამ ხანებში მამას ბედი. ამდენ ძვირფას და შეუნაცვლელ ადამიანთა დაკარგვა, თქმა არ უნდა, ღრპა კვალს დასტოვებდა მის სათუთ და მგრძნობიარე გულში. ეს ემჩნევა მის ამ დროის ელეგიურ ლექსებს, მიძღვნილს მიცვალებულთადმი:

„—აქა წყვილია დი მწუხარებისა,
 ზღვა მოქვეთინე ცრემლთა ვნებისა,
 აქ შემლაღადი ძმობა ტყეებისა.
 ზარი გლოვისა საობლებისა,
 აქ ჭირი, კვნესა, სოფლის გოდება,
 სატრფო სახელთა მოთქმით წოდება,
 აქ ჰგალობს სულის კავშნის ზარი,
 აქა სდულს ცრემლი შენაგუბარი
 და ზეცის უკვდავ მკვიდრთა სუფევას
 აქ მოასწავებს მხოლოდ სამარი!
 სამარი ბნელი, ცივი, უკუნი
 განხრწნის საუნჯე სულ-შესაძრწუნი.

მახსოვს, ეს ლექსიც და კიდევ ორიოდ, ასეთი სამგლოვიარო: „ლიდიას“, „სახეს“, — „სამებას სამებისად“, გა-
 მოთქმული თავის გარდაცვალებულ ცოლ-შვილზე, მათი სუ-
 რათები, განსაკუთრებულს შავს ჩარჩოში მოთავსებული, მუ-
 დამ ეკიდა მის კაბინეტში და ჩამოფარებული ჰქონდა შავი
 ლეჩაქი.

ამ უბედურებათა შემდეგ იგი ოჯახში დარჩა მარტოდმარ-
 ტო უმეგობროდ და ტოლს მოკლებული. თან ხელში შეეკრჩით
 ორი შვილი, მე და ჩემი და მამო და მთელი სიმძიმეც ყრბათა
 აღზრდისა მას დააწვა.

ასკეტიზმი

პირველს შემდეგ მას ცოლი არასოდეს არ შეურთავს და
 არც არავის ახსოვს, რომ მამას ოდესმე ვინმე საყვარელი ჰყო-
 ლოდეს ან წუთიერად მაინც ქალით გატაცებულყოს.

ამ მხრივ გასაოცარი იყო მისი ასკეტიზმი.

და აკი ჩვენი სახლი მონასტერს ჰგავდა.

მიუხედავად იმისა, რომ ჩვენ სახლშიაც მამას სიცოცხლე-
 ში უამრავი ხალხი ირეოდა და თვით ოჯახშიც ხშირად ოცზე
 მეტი სული ვიყავით ქალ-ვაჟნი, არავითარი არასოდეს რომან-
 ტიული შემთხვევა არ მომხდარა და თუ ვისმეს გრძნობა გას-
 ხლეთია ოჯახში დამყარებულს ფილოსოფიურ ატმოსფეროს,
 თვითაც ჩამოთხოვია ამ ოჯახის წევრობას და საასპარეზო სხვა-
 გან გადაუტანია.

ეს ოჯახი სულ სხვა პაერით სუნთქავდა და ეროსის მალმერ-
თებელნი განკრძალვით იყვნენ.

აქ, როგორღაც სულ მაღალი ატმოსფერო იყო შექმნილი,
სულ სხვაგვარი გატაცებანი მეცნიერებით, ხელოვნებით, სა-
ზოგადო საკითხებით და ქვენაგრძნობანი აქ ვერ ბოგინობდნენ.

ამიერიდგან მამას მთავარი ყურადღება შვილების აღზრდას.
ჰქონდა მიქცეული და...

შვილების აღზრდა

აქაც უცნაურობა გამოიჩინა: არც ერთი შვილი არ მიგვცა-
სადმე სასწავლებელში.

არც ჩემს დას და არც მე არაფერი არ გვისწავლია.

ქართული ანბანიც კი თამაშ-ბურქალში შევითვისეთ სრულ-
ლიად გაუქირვებლად და მოულოდნელად, ჩვენც არ ვიცით
როგორ.

და რუსული ენა ხომ ორივე დაძმანი უკვე 17—18 წლის
ვიყავით, რომ გავიცანით. ამ ენისთვის ესე მოჩიტულებს მხო-
ლოდ რამოდენიმე თვით გვყავდა მასწავლებლები.

იმავე დროს-კი ჩვენს სახლში მცხოვრები ახალგაზრდობა
მამას მეოხებით და ხშირად მისი ხარჯითაც სწავლობდნენ
სხვადასხვა ოფიციალურ სასწავლებლებში: გიმნაზიაში, სემინა-
რიაში, შემდეგ უმაღლეს სასწავლებლებში და სხვ.

ბევრი უძრახავდა: შვილებს არ ასწავლისო.

მაგრამ მისი აზრით — მაშინდელი სკოლა ვერ აკმაყოფი-
ლებდა საღ პედაგოგიურ პრინციპებს: ულაცებდა ტვინს,
რყვნიდა ზნეობრივად და განსაკუთრებით ქართველებს გადა-
გვარების გზაზე აყენებდა.

იანოვსკი

შესამჩნევია მამას პასუხი იანოვსკისადმი.

იანოვსკი ცნობილი რუსის მოხელე იყო ჩვენში. განათლების
ოლქის უფროსი, რაღა თქმა უნდა, ცარიზმის ერთგული იყო,
მაგრამ თანვე ფრთხილი პოლიტიკოსიც და მამასთანა მოღვა-
წეებთან დამოკიდებულებას არ იშლიდა.

ზოგჯერ ჰტუმრადაც გვეწვეოდა ხოლმე საღარბაზოდ და
ერთხელ, საქმე დღეს, შუა დღისას, მე უკვე მოჩიტული 16—
17 წლის ყმაწვილი, სახლში რომ მნახა, ეუცხოვა, ჰკითხა კი-

დედ. მამას — რათ არის სახლში თქვენი ვაჟი, განა არსად არ სწავლობსო?

სინამდვილე რომ გაიგო, მაინც იკითხა; მამ შინ ამზადებთ? ამაზედაც რომ უარი მიიღო, დიდათ გაიკვირვა და ზრდილის დაცინვით კვლავ შეეკითხა:

— მერე რა გნებავთ, რომ მაგისაგან გამოვიდესო.

— უწინარეს ყოვლისა — აღამიანო, უპასუხა მამამ.

მამ რალა იყო ჩვენი აღზრდა?

მამა უმთავრესად ყურადღებას აქცევდა ჩვენი სხეულის სიმრთელეს, გონების შეთამაშებას, გონებრივსავე ჰორიზონტის გაფართოებას და შემდეგში რაც ჩვენ გვინდოდა იმ სპეციალობაზე დადგომას.

სხეულის სიმრთელეს ხელს უწყობდა საარაკო, პირდაპირ მეცნიერული მოვლენა ჩვენი. ძილი თავი, ღროს, წამოდგონა თავის ღროს. სუფთა ჰაერი. ბუნებასთან ახლო ყოფნა. კვება შემრგე და გადაუჭარბებელი და კიდევ ბევრი სხვა წვრილმანი.

გონებრივ ჰორიზონტის გაფართოებას — შერჩეული საზოგადოება. მამასთან ბევრი დადიოდა, მაგრამ ყველანი არ იყვნენ რჩეულნი. და მამა ცდილობდა, რომ ასეთთა გავლენის გარეშე ვყოფილიყავით. აგრეთვე ხელს გვიწყობდა მისი მდიდარი, პირველ ბიბლიოთეკის შემდეგ ახლად მის მიერ შექმნილი წიგნსაცავი და, რაც ყველაზე უმთავრესია, თვით მისი საუბარი ჩვენთან, ან სხვებთან, რომლის მოსმენაც უდრიდა რომელიმე სპეციალისტ პროფესორის ლექციის მოსმენას, რა საგანზედაც გნებავთ.

სპეციალობის არჩევას კი იგი ჩვენ მიერ მოელოდა საზღვარგარეთ, სადაც გამგზავრებას, როგორც არა ერთხელ მოვიხსენიე, სულ ბოლომდე სურვილობდა.

რალა თქმა უნდა, მიმიხვდებოთ, რომ ჩვენი აღზრდის ამბავი მხოლოდ მის დასახასიათებლად არის აქ მოყვანილი.

მწერლობის სტიმია

ამავე დროს იგი თუ ერთის მხრივ შვილების აღზრდასა და თვალყურს ანდომებდა დიდ დროს, მეორე მხრივ დაუღალავად განაგრძობდა ლიტერატურულ და საზოგადოებრივ მოღვაწეობას.

წერდა და თარგმნიდა ლექსებს, მოთხრობებს, დრამებს, რომელთაგან ზოგ-ზოგი იბეჭდებოდა მაშინდელს დრო-გამოშვებით გამოცემებში: უფრო კი, რა თქმა უნდა, მაშინდელ ერთადერთ გაზ. „დროებაში“. იქვე ათავსებდა იგი პუბლიცისტურ წერილებს თანამედროვე საჭირბოროტო საკითხებზე და საჭიროების დროს აწარმოებდა სასტიკ პოლემიკას ბანკის მოწინააღმდეგეთა მიმართ.

შესამჩნევია მისი პოლემიკა ნ. ნიკოლაძესა და გ. წერეთელთან სწორედ ბანკის საკითხის გარშემო. შესამჩნევია სრულა, ჯენტლემენური თავის დაპერა, სადაც პირადობას კი არ ეხეზიან, არამედ გასარჩევი საგანია ობიექტურად აღებული და მოწინააღმდეგე მარცხდება საბუთებით, ციფრებით და შეუვალის ლოდიკის ძალით.

ამ მხრივ მამას სიძლიერე თავის დროს განთქმული იყო. ამავე დროს ლებულობს იგი მხურვალე მონაწილეობას, როგორც ზევით ითქვა, „ვეფხისტყაოსნის“ გამრჩევ, სარედაქციო კომისიაში, საცა თავმოყრილი იყვნენ: გრ. ორბელიანი, ილია და აკაკი, ვანო მაჩაბელი, რაფ. და დავით ერისთავები, იონა მეუნარგია, ინიციატორი ამ კომისიისა და ბევრი სხვა იმ დროის გამოჩენილი მოღვაწენი.

და არ არის ისეთი საზოგადოებრივი დაწყებულება ჩვენი იმ დროის ცხოვრებისა, განსაკუთრებით დასავლეთ საქართველოში, რომ მამა არ მოიწვიონ მთავარ მოთათბირეთ, მამას არ შეეკითხონ. აზრი არ ჩამოართვან, ან თვით იგი არ გახადონ აქტიურ მონაწილედ კრებებისა და კომისიების თავმჯდომარედ და სხვა.

სულ ერთია საქმე შეეხება რკინიგზის გაყვანას, თავად-აზნაურთა კრებების. თუ ბანკების საკითხს, გამომცემლობის საქმეს, რომელიმე ახალი დრო-გამოშვებითი ორგანოს დაარსებას, გალობა-სიმღერების შეკრებას, ერობის შემოღებას და სხვ. და სხვ.

მამა ყველგან არის მიჩნეული ჭკუის საკითხ კაცად, აუცალებელ თაოსნად.

თვითონ მამა კი გარდა ისეთი ლიტერატურული და საზოგადოებრივი საქმიანობისა დიდ-ყურადღებას აქცევს ჩვენა

ვაჭრობა-მრეწველობის აღორძინებას. — აქ არის ხსნაო, ხშირად იტყვის ხოლმე და ამ მოსაზრებით ხელმძღვანელი იგი იწყებს ქიათურის რკინიგზის გაყვანის საქმეს. სამეგრელოში ტყეებისა და სამკურნალო წყლების ექსპლოატაციის მოგვარებას, მაგრამ, სამწუხაროდ, ამ საკითხებში მაშინდელი ობიექტურ პარობების გამო, ვერც ერთი ეს საქმე ვერ გვირგვინდება მისდა სასურველად.

ქიათურის რკინიგზის გაყვანის უფლება ჯერ მამას მისცა მთავრობამ და როდესაც ბელგიელი კაპიტალისტები მამას მიერ მოწვეულ იქმნენ და საქმე საქმეზე უნდა მიმდგარიყო, თვით მთავრობამ მოისურვა თავის ხარჯით ამ გზის გაყვანა და კერძო პირთ, რაღა თქმა უნდა, ეს უფლება ჩამოერთვა.

ტყისა და სამკურნალო წყლის საქმე კი ჩვენებურმა, იმ დროინდელმა მრავალ-მონაწილეობამ დაჭუბა. რადგან მათი, ამ მონაწილეთა, შეთანხმება ყოვლად მოუხერხებელი შეიქმნა.

ეს საქმეები კი წლობით წარმუშავდნენ და, რაღა თქმა უნდა, ყოველივე ამას გაძლოლა სკირდებოდა, მისი დიდი ენერგია, დიდი დრო და დიდძალი ხარჯი. ასე რომ ბოლო ხანებში, ერთ დროს კარგა შეძლებული კაცი, უკვე ნივთიერ გაჭირვებასაც განიცდიდა. დრო კი იმდენი წაიღო უველა ამ პრაქტიკულმა გარჯილობამ, რომ მისი ლიტერატურული განზრახვანი, სამეცნიერო და ტექნიკური თუ წმინდა სიტყვაკაზმული ნაწარმოებნი, ზოგი დაუმთავრებელი დარჩა და ზოგიც სრულიად განუხორციელებელი.

ბინადრობა

გამუდმებით იგი ერთს ალაგას არა ცხოვრობდა, რადგან სოფელში სახლი სიკაბუჯის დროს დაეწვა თავის ძველ, შესანიშნავ ბიბლიოთეკასთან ერთად. და დაეწვა თურმე იმავე დროს ბევრი საუკეთესო ნაწერი და გამოკვლევანი, რასაც მუდამ მტკივნეულად გაიხსენებდა და რასაც ეგრე ვწარედ დასტირის ერთს თავის ლექსში:

ხმა ჩონგურისა ტკბილი მესმოდა,
მას მაგონებდა, რაცა მელმოდა:

ქარბონითა ამევსო სული
მეტად ღმობილი დამერღვა გული.

გულა სადგური კმუნვის მწყვრეულის,
იქ მასპინძელის და შეჩვეულის;

მაგრამ ეს კმუნვა კი სტუმარია,
რადგან უეცრად შენაყარია...

მსურს რომ შევკაზმო ცრემლით გალობა,
ჩანგსა ვამღერო ცეცხლის წყალობა:

მაგრამ რომ არ მაქვს. არ შემრჩენია,
რაც ყველას უფრო მოუთმენია:

რასა შევაწყო საბრალო ხმები,
საგლოველები, გულის მწველები? —

არ მაქვს ქალღმის ერთიც ნაჭერი,
არცა კალამი გამონაჭერი,

რომ მას შეეჩვილო ეს გაჭირვება,
გამოვსცე სიტყვით ჯავრი. კვირვება;

ვუთხრა ნღველი ჩემი მტკივანი
და განსაცდელი მყვირალ-მკივანი;

ყოვლისფრისაგან მაქვს არაფერი —
ჩემი ნაკითხი, ჩემი ნაწერი:

სულის და გულის ძვირფასი განძი,
სიყრმის გონების ჭკუის ნღვაწი;

გრძნობის და ნიჭის ნამუშევარი,
მეცნიერების შენაწევარი;

გამოცდილების, განსჯის ნაყოფი,
კაცობრიობის ვალი საყოფი.

საწადელ ტკბილათ მოსაგონრები,
თავის სიცოცხლის შესაწონრები.

შეთვისებულნი ნივთები ბევრი,
შეუღველი, თან-დასაჭერი....

ყოფა ჩვეული მეტად ძნელა,
საშინელია და უაქებელია.

მათი ჩამიქცევს გულს ნოგონება,
სულს მიპატრონებს ნე დაღონება.

მძვინვარე ცეცხლმა ერთად შესჭამა
ნათხზავი ლექსი, პოემა, დრამა.

მქონდა საქონი ყველა, რაც არის,
აწ დამრჩა მათ წილ მარტო ნაცარი!..

პარმონიითა ამევსო სული
და მწადას გალობა ცრემლთან ლექსული¹.

ასე რომ უსახლ-კარობის გამო ხშირად ხან იმერეთში იყო, ხან სამეგრელოში და ბოლო ხანებამდე სულ სხვადასხვა სოფლებში.

ბოლო ხანს კი მე-90 წლებიდან აიშენა სოფ. ბერთემს პატარა, მაგრამ მეტად მოხერხებული და კობტა სახლი, ევროპიულ მანსარდათ, სხვადასხვაგვარ საოჯახო საჭიროებისათვის გამწყობრული, რაიც თავის დროზე აღწერილი ჰქონდა გაზ. „ივერია“-ში მაშინდელ სამეგრელოს კორესპონდენტს ნიკო ობუჯელს.

ისე კი სამსახურის დროს, უფრო ქუთაისში ცხოვრობდა, მაგრამ მისი საყვარელი ქალაქი მაინც თბილისი იყო და ზამთრობათ იქ ბინადრობდა ხოლმე.

აქ კი, მის სახლში მუდამ თავს იყრიდნენ იმ დროს თვალსაჩინო მოღვაწენი და იყო, როგორც ეტყობოდათ, მათი საყვარელი შესაქრებელი ალაგი.

ქართველ მოღვაწეებში მამა ყველას თანაზიარად ექცეოდა და თვით მისდამი არა კეთილად განწყობილთაც მოსაწონს უწო-

¹ ლექსი დაწერილია სახლისა და ბიბლიოთეკის დაწვის მეორე დღეს დილთ 1868 წ. ასე რომ, რაც მანამდე ჰქონდა დაწერილი, თაქმის ყველა დაღუპვია და თუ ამის წინადროინდელი ნაწერი რამ დარჩენია, უფრო ხშირად გადაწერილი არის სხვების ხელით. თვით კი შემდეგში მოცულობის გამო ეკრას გზით ვერ აღადგინა ზოგი ნაწერი. რომელიც, ეტყობოდა, მისთვის მეტად საგულისხმო და საყურადღებო იყო. შ. დ.

ნებდა და სათანადოთ აფასებდა, მაგრამ ილიასთანა მაინც არა-
ვინ არა სწამდა.

ილიას გამო მისი აკროსტიხი, ეს მხოლოდ ქებათა-ქებაა და
სხვა არაფერი.

აი ისიც:

იმას ვერა გავს ვერავერ
გრძნობის მცოცხლები მწერალი,
ლოპია ოდეს განრისხდეს,
მუდამ ძმობისა მღერალი,
იტყვის მართალს და გზიანსა,
უპყრია მართლის მწვერვალი,
არის გულ-წრფელი, ზნე-ქველი,
მხნე მსრბოლი, მოუფერალი“.

ამ აკროსტიხებს ანუ ზმა-კიდურებს მამა ათავსებდა გაზ.
„ივერია“-ში. ყოველ დღე იბეჭდებოდა თითო-თითო ანბანი
რიგზე და იყო ვინმე თვალსაჩინო მწერლის, ანუ მოღვაწისად-
მი მიძღვნილი.

სანიმუშოდ მოვაყვან კიდევ ზოგიერთებს.

აი მაგ. რას სწერდა იგი

აკაკიზე:

ამერ-იმერთა სვის ხატად თავის-თავ გამოჰკრილია,
კიდის კიდემდე ცნობილი, ცის ნიჰად მოვლენილია.
ამერ-იმერთა სვის ხატად თავის-თავ გამოჰკრილია,
კილო უქცევი, ლექს-მარჯვე, თვით მოქართულე ტკბილია,
იწყველის ერისა წყლულებით, — მისი ნამდვილი შვილია!

გიორგი ვარიშელაძე:

გაჩენილია სამწერლოდ, სხვა საქმე მას არ უხდება,
ირჯება სხვა ასპარეზზე, ცოდვილობს, ცუდად წუხდება,
ორ ნესვსა ისევ კალამი არჩიოს, ფუჰად ნუ ცდება,
რაცა გულს ერჩის იგი ქმნას, ნიქს განზედ რად გაუხტება,
გონება მრავლად ნაწვართი ერის წინ ნუ გაუქმდება,
იღვაწოს მოწოდებდესებრ, ის რწმენა ნუ წაუწყდება!

ვალსა უხდის სამშობლოსა წერით, თარგმნით, სამსახურით,
 არცა ამღვრევს ღვიძლსა ენას უცხო წყობით, უსახურით,
 ნებაზე თხზავს, სწორად თარგმნის — არ დაათრევს ავტორის
 ყურათ;
 ოთხ-ხუთ ენას შეაწონებს, რომ გამოსთქვას მისებურით.

ნიკო ნიკოლაძე:

ნურას მკითხავ ამ კაცისას საამბობელს, მოსათხრობელს,
 ის რომ არის, ღმერთმა მოგცეს, — გასახელებს, დაგაშვენებს.
 კლდესა დაღეწს. ზღვას გააპობს. თვით ეშმაკსაც გააქენებს.
 ორპირ მახვილს მედგრად იქნევს,—ხან მტრებს კოდავს,
 ხან თვისკენებს.

ლამაზათ სწერს, მძინვარედ გზობს, ზარ-დაცემით შეაჩვენებს.
 აღმასისა გველის სახეთ, თავს კუპრ-ცეცხლად მოგაჩვენებს,
 ძვირად ნახავ დადგომილსა. სულ მიდმოებს, არ ისვენებს,
 ერთხელ წერდა თვისს ენაზე, ახლა?.. ახლაც ახსოვს
 ჩვენებს...

და ბევრი სხვები. აღმოსავლეთ და დასავლეთ საქართვე-
 ლოს მოწინავენი 80-მდე ჰყავს ასახული. ზმაკიდურებს ერქვა
 „არჩილური“. რადგან, როგორც ვიცით, საქართველოს მწერალ
 შეფეს, არჩილს, თავის ნაწერებში გარჩეული ჰყავს მისი თანა-
 მედროვე მწერლები. ესეც, მამას ზმა-კიდურებიც, ხასიათით
 არჩილისებურს წააგავდა. გარდაცვალების ერთი წლის შემდეგ
 ერთ, ცალკე პატარა წიგნაკად გამოიცა ეს ლექსები. გაზეთებში
 კი მამა ამ ლექსებს ხელს არ აწერდა და ამან ეტყობა შეცდო-
 მაში შეიყვანა განსვენებული ვანო მაჩაბელი და, როდესაც ილი-
 ას წინააღმდეგ რაღაც ბროშურა გამოსცა ილიაზე დაწერილი,
 ზემომოყვანილი ზმა-კიდური ხელზე დაიხვია და აღიას დასწაჰა
 ამ ლექსის ავტორობა... მერე, რაღა თქმა უნდა, ვანოსთვისაც
 გამოირქვა ყოველივე, მაგრამ დასტამბულს რაღა ეშველებოდა.

თვითონ ვანოც ხშირი სტუმარი იყო მამასი და ორივენი

ერთჰანეთის დიდათ აფასებდნენ. მაგრამ მამას ნეტი დამფასებელი და თაყვანისმცემელიც უფრო ახალგაზრდობაში, მაშინდელ სტუდენტობაში, მოეპოვებოდა.

საკმარისია გავიხსენოთ დაუვიწყარი გაზაფხულები ქუთაისისა, საცა სასტუდენტოთ განზადებული, ახლად გიმნაზიის კურს-დამთავრებული ახალგაზრდობა დღე მუდამ გარს ერტყა მამას. მათ შორის ერთენ: ნიკო მარი, პეტრე მირიანაშვილი, მიხეილ მღვდლისშვილი (მღვდლიევი), ცნობილი იურისტი. ძმანი ლორთქიფანიძეები—ალექსანდრე და იასონ, ჩვენი ცნობილი საზოგადო მოღვაწენი და ბევრნი სხვანი, რომელნიც ამჟამად ჩვენი ქვეყნის საკეთილდღეოდ სხვადასხვა ასპარეზზე კეთილად მუშაობენ. აგრეთვე შეიძლება მამას სულიერ აღზრდილებათ ჩაითვალოს განსვენებული კრიტიკოსი ევსტათი მჭედლიძე (ბოსლეველი), ლიტერატორი და გრამატიკოსი პოლაკვიტარძე, რომელსაც ბევრი რამ ცნობები მამასაგან შეთვისებული აქვს მის ნაშრომში ჩართული, ილია ჭყონია, დუტუ მეგრელი, სვ. ქვარია, სამსონ ყიფიანი და კიდევ ბევრი სხვა.

ყველა ამათ განუცდიათ მამას საარაკო, უნივერსალური მომზადება. მისი ზედმიწევნითი ცოდნა საქართველოს წარსულსა და განსაკუთრებით ქართული ენისა და მისი ხსენებული შეუვალი ლოდიკის ქვითკობა.

ზოგმა მათგანმა წერილიც უძღვნა მამას ხსოვნას გარდაცვალების ჟამს და დუტუ მეგრელს ხომ კარგა, ხელ-მოღებით დაწერილი ნეკროლოგიც აქვს მოთავსებული 1896 წ. ჟურ. „მოამბეში“, დეკემბრის №-ში. მახსოვს რომ ყველა ესენი შეფრთხინვით უსმენდნენ მამას, იწერდნენ სამახსოვროდ უბის წიგნებში მის მიერ განმარტებულ სიტყვებს, ეკამათებოდნენ ზალისით და ემსგავსებოდნენ ძველ ბერძენთა რომელიმე სკოლის ფალოსოფოსთა კრებულს, საცა ან პლატონი იყო ცენტრი ყურადღებისა და აღტაცებისა, ან სოკრატე და ან არისტოტელე.

ორატორობა

ხოლო მამას ლაპარაკი შესამჩნევი იყო საზოგადო შეკრებულებაში. ან კრებებზე, ან ჩვენებურ საზოგადო ზეიმებზე, ან ვისთვის დასაფლავებაზე. მაგ. დიპტრი ბაქრაძის დასაფლავება-

ზე პირდაპირ პროგრესული სიტყვაა ნათქვამი მამას მიერ. მაგრამ იგი უფრო შესამჩნევია საზოგადო კრებებზე:

თუ მომხსენებელი არ არის, იგი პირველ ხანებში ჩუმად არის. მაგრამ აგერ გამწვავდა მდგომარეობა, ან სიმართლე მიიჭმალა და საკერძოვო, საზოგადოებრივი ფერუქარულით წამოვიდა წინ.

მამა წამოდგა.

რაც უნდა დიდი ხმაური იყოს, განსაკუთრებით დასავლეთ საქართველოში, საცა ეგრე ადვილად მოიკიმება ხოლმე კრებებზე ერთი-მეორის დასაკოდი მშვილდ-ისარი, მყის, რაღაც ჯადოსნურ ძალით, სრული სიჩუმე ბატონდება.

მამა არა ჩქარობს.

თითქოს ნელის ხმით, მაგრამ მკაფიოდ, ყველასათვის გასაგონათ იწყებს ლაპარაკს.

თქვენ ატყობთ, რომ წამოწითლებული სახეები თანდათან მშვიდდება, ხანჯალზე გაკრული ხელი ნელა შორდება სატყეარს და მყარდება „კაცთა შორის სათნოება“, საკითხი ღებულობს თავის გარკვეულ სახეს: რეზუმე დგება მიუდგომელი და მიზან-მეწონილი.

გააფთრების მაგივრად მშვიდი მსვლელობა კრებისა, დინჯი გადაწყვეტა საკითხისა.

მამას თანამედროვე თვალსაჩინო ინტელიგენტი ალექსანდრე ქოჩაქიძე, პოეტ ჭალადიდელის ძმა, მეტყობდა, როცა მამას გაიხსენებდა ხოლმე:

— „მამას დიდი შემკრებლობითი ნიჭი ჰქონდა, ანალიზის უნარი და შემდეგ ამ შემოკრებილ აზრებს ერთს თავის სისტემაში ჩამოადუღებდა და ისე გადმოგვცემდა ხოლმე კრებებზე, ნამდვილი სათავემჭდომარეო კაცი იყოვო.“

და ასე იყო სულ ყოველთვის, ყოველ კრებებზე, სხდომებზე. მამა თითქმის ყოველთვის უკანასკნელი ლაპარაკობდა და მის ხელში ყოველი რთული, აბუწული-დაბუწული საგანიც მარტივდებოდა, ახლოვდებოდა, ადვილად დასანახი ხდებოდა, თათქო ადვილი გადასაწყვეტიც.

ერთი სიტყვით მის ხელში მუდამ ყოველი, თითქო ცხრა-კლიტულით დაკეტილი ცხეები, უბრალოთ იღებოდა.

და ისვენებდა ადამიანთა კრებული, სუნთქავდა თავისუფ-
ლად, რომ მძივე ტვირთი ასე ადვილად მოიშორეს.

შენ

იხლა მამას დღე.

სოფლად და ქალაქად.

რა თქმა უნდა საღ რაობას შეაქვს თავის ნიუანსები, მაგრამ
ეს მაინც ნიუანსებია.

დილა.

გვიან დგება. რადგანაც გვიან წვება.

10 საათიდან იწყება ცხოვრება.

პირის დაბანამდე გრძელი ხალათით მოსილი. საწოლ
ოთახში მიდი-მოღის და თავს სავარცხლით ივარცხნის.

გამომეტყველება არ გვეკუთვნის ჩვენ: იგი შორს არის სად-
ღაც. თავის თავთან. შეიძლება ლოცულობს. ნუ გამოელაპარა-
კებით. ხელს ნუ უშლით.

რამდენიმე წუთი. შეიძლება ათიც, ასეთი მდგომარეობა.

შემდეგ პირის დაბანა. შემოსვა, ჩაი.

გაზეთები მოსულია. ნუ წაუკითხავთ, არ იამება, რამე სხვა
ნაწარმოების წაკითხვა ხომ ყოვლად შეუწყნარებელია, რად-
გან...

დილა შენია. დილით ადამიანის ტვირთი დასვენებულია, მე-
ტი ინტენსიობა შეუძლია, მაშასადამე მეტი შემოქმედებაც და
აქ კი არ უნდა შემოერიოს სხვა ვინმე. გენიოსიც იყოს თუნდა.
წვრილმანი. ყოველ-დღიური გაზეთი ხომ, მით უფრო.

ჩაიც მალე თავდება და აი მიღის თუ სამსახურშია, მაგ-
რამ ბანკის შემდეგ აკი ის არსად სამსახურში არ არის. ბოლო
ხანებში თუ იყო სამეგრელოს თავად-აზნაურთა წოდების
გამრჩეველ კომისიაში. ისიც საპატიო წარმომადგენლად. აქ
მხოლოდ სხდომებს ესწრება და არა ყოველ-დღიურათ მოხე-
ლესავით მსახურობს.

მაშასადამე. თავის დროს გამნაწილებელი თვით არის და
აი თერთმეტის ნახევარზე ის უკვე თავის კაბინეტშია. დიდი,
გრძელი, ფართე საწერი მაგიდა, ფაიფურის საუცხოვო სა-
მელნეთი, შანდლებით, აურაცხელი ფანქრებით და კალმებით,

დაწერილ და დაუწერელ ქაღალდებით, გადაშლილი წიგნებით აღსავსე. მაგიდის იქით დიდი, ვოლტერული სავარძელთან მისი საყვარელი ქადრის მაგიდა. ეს მაგიდა ველარიტევს გადაშლილ სხვადასხვა ფორმის წიგნებს, ჟურნალებს— ქართულს, რუსულს ფრანგულსაც. იცის ეს ენა იმდენათ, რომ წანაკიფხი გაიგოს. ოცნებობს ინგლისურის შესწავლაზედაც, რადგან შექსპირს თარგმნის და რუსულს ფრანგულს თარგმანს, ვიქტორ ჰიუგოს შვილისას, მეცადინეობის დროს ერთიმეორეს ადარებს.

წიგნები და ჟურნალები გადაშლილია, მაგრამ არსად წიგნების კიდურებზე არავითარი შენიშვნა, წარწერა. ან ფრჩხილით გახაზვა.

ეს ეზარება საშინლად, არც სხვისი მოსწონს ესეთი ჩვეულება. ბარბაროსობათ მიაჩნია.

თვითონ კი ახსოვს ყოველივე: სად, რა.

საოცარი მეხსიერება.

ამა და ამ გვერდზე, აქა და აქ, ესა და ეს.

კითხეთ რაც გინდათ.

შეგიძლიათ კონტროლი გაუკეთოთ: შეუშეცდარია.

თერთმეტის ნახევარზე მიუჯდა მაგიდას და 12-მდე, თუ აუცილებელი არ არის, ნუ შეუშლით ხელს. მნახველებმაც უნდა დაიცადონ. სულიერათ და სხეულთ შექირვებულებმაც. შალე ყველასათვის ფართოდ გაიღება კარები.

ეს მისი დროა.

ამ დროს იწერება მისი ლიტერატურული ნაწარმოები, ან საქმიანი რამ პროექტი, ან დავალებული საზოგადო რამ მოხსენება.

ბოლო ხანებში თვითონ აღარა სწერს. კარნახობს.

ტეტუიას, მისი სიყრმის მეგობრის გარდაცვლის შემდეგ მასთან დაახლოებული, ესე ვთქვათ. მისი პირადი მდივანი და მარჯვენა ხელი საზოგადოთ, განსვენებული ლაზარე რატიანიუზის მაგიდას და ქაღალდზე გადააქვს ნაკარნახევი.

მამა კი მიდი-მოდის ოთახში და ისე კარნახობს.

ლაზარე თუ არ არის შინ, თუ რაიმე საქმის ქაღალდია ან თვითონ სწერს, ან ვინმე დაქირავებული მწერალი, თუ ლი-

ტრატურული ნაწარმოებია, განსაკუთრებით პროზა, ბოლო ხანებში, მე მეძახის, ან ჩემ დას და ჩვენ ვასრულებთ სამუშაოს.

მაგრამ ასეთ ნაწარმოებთა კარნახი და ისიც ჩვენთან სალაპროპით წარმოებს, ისიც ყოველთვის არა.

ეხლა კი ჭერ დილაა და უფრო თვითონ არის მარტო.

შეიძლება ზოგჯერ არ სწერდეს. მაშინ სწავლობს. სწავლობს იმ საგანს. რომელიც ამჟამად დასკვირებია. უბრალოდ კი არ კითხულობს რასმე, თვალის გადასარბენათ, არამედ მეცადინეობს.

12 საათი დადგა, საჩქარო საუზმე, საერთო სასადილოში. აქ შეიძლება გაზეთიც, ჩვენთაგანი ვინმე უკითხავს. აქ შეიძლება სტუმარიც იყვეს ვინმე. ყოველ-დღიური ამბები. მიმდინარე ცხოვრება უკვე შემოიჭრა.

საუზმე დასრულდა და დაიწყო მიღება მის კარზე მოგროვილთა.

უპირველესად ფიზიკურად ავადმყოფნი.

ყოველი ავადმყოფი. ისინჯება საფუძვლიანად. ბევრას გასინჯვას ვერ ასწრებს.

ცნობილი ექიმი სამსონ თოფურია ამბობდა, რომ მამას დიაგნოზი შეუმცდარიყო.

ეს ავადმყოფების გასინჯვა დიდძალ დროს ართმევს და ეტყობა ძალიანაცა ლლის.

სალამოს 6 საათამდე ეგრეა და აი უკვე იწყება კვლავ მისი პირადი ცხოვრება.

სადილია ამ დროს. სადილზე ჭერ შინაურებიც ბლომათა ვართ, მაგრამ უთუოდ არის ვინმე სტუმარიც, ან რომელიმე თვალსაჩინო მოღვაწე, ან ახლად აკოკრებული სტუდენტი და ერთი კი არა, შეიძლება ორი სამიც.

თვით სადილობა მიძღინარეობს მსუბუქ და მხიარულ ფრაზების გრეხილში. ამის მეთაური თვითონ არის.

თამალობა, ღვინის დაძალება. ეს არ არსებობს. თვითონ ნახევარ ბოთლს კარგ, სვირულ ღვინოსას კი უთუოდ გამოსცლის. სვირშია დაბადებული, დედულეთს და ამ ღვინის გემოს იქ შეეჩვია.

კამაც საფუძვლიანო, უხვი მაგრამ გადაუქარბებელი; ნაყ-
როვანებამდე არასოდეს არ მივა.

და აი დასრულდა სადილი, ხილი შემოიტანეს. აქ კი აწყე-
ბა... ლექციები.

რა გგონიათ. მშრალი, მოსაწყენი და ძნელად შესათვისი კი
არა.

თათქო ხუმრობა-ლაღობაში მოხერხებულად ჩაქსოვილი
და შეთხზული, კამათის დროს გამოტყვერება რაიმე მეცნიერუ-
ლი საგანი, ან საზოგადოებრივი საკითხი და ამის გარშემო
ჩაქურტლული კიდობანი უტყბო ამბებისა, მომხიბლავ მეტა-
ლორებისა, მათემატიკურ სისწორეთა და სხვა.

სადილის შემდეგ. თუ დააკვირდებით, იგრძნობთ რამდენი
შეიძინეთ. რამდენი რამ გაიგეთ. და ეს ისეთის ქართულით.
ისეთის ცოდნით შემტკიცებული და ცოტა პოეზიის ლაპარაკის
ნაზი შუქით სხივ-მოფენილი, რომ სამუდამოთ გრჩებათ გულ-
სა და გონებაში, ცხოვრებაში სახელმძღვანელოთ და ჭამოსა-
ყენებლათ.

ნიკო დადიანიდან. ვერ იგრძენით ისე. კარგა დატვირთული
წახველით.

ეშმაკი კაცია.

თქვენც... საკვირველი საქმეა; ხელშეორეთ გინდათ მიხ-
ვიდეთ და კვლავ დაიტვირთოთ.

„მერმელა თითზე რას არგებს სასინანულო კბენანი“.

ისე მკირს მე, შემსწრეს და განმცდელს მისი ცხოვრებისა.
არაფერი თავის დროზე არ ჩამიწერია, რაც აქ მოხსენებუ-
ლია, ეს მხოლოდ ხსოვნის „ნაფინჩხრები“.

მერე რამდენი საყურადღებო აზრი, რამდენი მფრინავა
ფრაზა, მახვილად გამართული ნაკვესიც.

მე მეგონა ამას სხვა იზამდა. მეგონა მამა რომ გარდაიცვ-
ლებოდა სხვები დასწერდნენ ხელ-მოღებით მის ცხოვრებას.

ასეთს ძნელს საქმეს ვერ ვებედავდი ხელი მომეკიდა, თო-
რემ 22 წლის ვიყავი მამა რომ გადამეღო, მეც უკვე შედგო-
მილ ვიყავ საზოგადო მუშაობას და, რასაკვირველია, მესმოდა
ფასი და მნიშვნელობა მამას პიროვნებისა...

სანანურად მაქვს ეხლა ეს ყოველივე, მაგრამ... ჯერ მამას
• დღე არ დასრულებულა.

სადილი კი გათავდა.

ეხლა მისაღებ დარბაზში გაველით და მუსიკა...

ჩემი და უკრავს პიანინოზე.

ეს კი ასწავლა. სპეციალისტი ჰყავდა თავის დროზე და-
ქირავებული.

მამოს პიანინოს ემატება თვით მამის დახმარება იქვე
ზღვარს ფასგარმონიაზე და გაისმის უცნაური, სევდიანი, მის
• მიერვე შეთხზული ჰანგები, უსათუოდ ქართულ იერისა.

აქ გავიხსენებ ჩემსავე ნაწერს: („მამა“-დან):

„... მაგრამ ჩვენთან ყოფილხარ — მოითხოვე ჩანგი, ჩან-
გური, გიტარა. დავსხედით ჩვენი მუხის ქვეშ სამივე მამა-
წვილნი. შენ ჩანგური აიღე. ჩემმა დამ ჩანგი, მეც გიტარა და...
გაიხსმა „ძველი ქართული წაპ“, როგორც შენ ეძახდი. ეს მარ-
შია. საომრათ მიმავალ ჯარისა. ბრძოლად მწვევი ხმებია.

„... ხმები იცვლება. ეხლა მოთქმავ, ჩვენი ერის ტანჯვა,
კენესა-ტირილი: — მონობა საშინელი, მონობა ბნელი, ვით
შავი ღამე, — მაგრამ ამ შავ-ღამეშიაც გაინათა უცხო ცისკარ-
მა, საიმედო კილოვნება ჯერ გაუზღდავად ეღერს, მაგრამ აგერ
ვაეკაცდება. მოწიფულდება და თავისუფალი ლაღი ბგერა
ახალგაზრდა ფილტვებისა გარემოს სანეტაროთ ეფინება და
უკვე იწყება ბედნიერება. საზეიმო ხმებით, სამეჭლისო კილოვ-
ნებით თავდება... კონცერტი.

„ეს მართლა კონცერტია, მხოლოდ მას თავისი ჩარჩო უნ-
და. თავისი წრე. ნიკო უნდა, საყვარელი ნიკო დადიანი თავი-
სებური სულის მიმცემი ამ ხმებისადმი, მფეთქავი გული ამ
• მუსიკისა...

გული ადარ ფეთქს! — მუსიკა ადარ ეღერს!“...

მაგრამ გავიხსენოთ კიდევ:

მარტო მამა უკრავს ეხლა.

ეს ყველაზე უკეთესია.

ეს თვითონ არის, მისი თვითებაა, მისი კილო, მისი სუ-
ლისკვეთება.

„არა, ამას ვერ აგიწერთ!

„ეს ჩემთვის ისეთი მიუწვდომელი რამ არის გადმოსაცემად და ისე მწვავე საგრძნობლათ, რომ მირჩევნია მარტო ჩემს ცრემლებში ეპოვო შეება“.

და ასე;

სამუსიკო განყოფილების შემდეგ.

თუ ამის გუნებაზეა, ვმუშაობთ ისევ მის კაბინეტში. ფლობერის „იროლიადა“-ს თარგმნის და გეკარნახობს. ან თავის ქართულ ოპერეტას — „კოტოროულს“.

ან თუ ვინმე დარჩა ისეთი სტუმართაგანი; შეყვება ლაპარაკში და საგანიც მსუქანია, გრძელდება კამათი: ნაშუალამევის 3—4 საათამდე. და ასე ამგვარად მიემართება ცხოვრება.

ეხლა რა უყვარდა და რა სძულდა ამ კაცს, მაგრამ მანამ მოვიყვან კიდეც ერთ პატარა ლექსს, საიდანაც სჩანს რა წარმოდგენისაღ იყო თავის თავზე:

ბამულაშენება

მნახეთ, მიცანით, მე ვარ პოეტი.

და არც უბრალოთ მიეთ-მოეთი.

თუმცა ყოველი, რაც აქვს ბუნებას,

გულსა მიხარებს, მისაქმებს ნებას,

მაგრამ არ ვტყბები მარტო ხის მხერით,
მინდვრის ყვავილით, ბალით და ტევრით.

მე ვერ დამიპყრობს ერთი შევნება,

ვერცა შექცევის მღერით ხსენება;

ვერ მომინდომებს მე ცოტა რამე,

ვერც მზიანი ღღე. ვერც მთვარით ღამე;

ვერ მომიკაეებს ჰაზრსა მასხარა,

ჩემთვის უდიდო არარა კმარა!

მე მიწყობს ფიქრსა სჯა. კიდე-განი,

მე მაქვს მაღალი ყოფის საგანი.

რა იყო ეს „მაღალი ყოფის საგანი“? — ეს მთელმა მისმა ცხოვრებამ დაამტკიცა. ეს იყო ხალხის სამსახური იმ წრეში და იმ პირობებში, რომელშიაც იგი ცხოვრებამ ჩააყენა. მე აქ

ამ წვირე სილუეტში მხოლოდ ეპიზოდები მოჰყავს მისი ცხოვრებისა და არა მაქვს პრეტენზიები მისი საზოგადოებრივ და სალიტერატურო მოღვაწეობის შეფასებისა, რადგან მაინც არა ვკარგავ იმედს, რომ მამას ამ მხრივ შექმნასებელი შემდეგში მოელის. ამისათვის ისევ გადავალ ჩემს გახსენებაზე: რა უყვარდა და რა სძულდა.

მხოლოდ გამოჩენილ პიროვნებათა შორის უყვარდა ლეონარდო და-ვინჩი, ფრანკლინი და ჰუმბოლდტი. მწერლებში ვიქტორ ჰიუგო.

საერთოდ კი რა სძულდა და რა უყვარდა.

ვატქმევინოთ თვითონ:

„გონების სკული შეაჩვენებს და ჩემს სულს სძულს:

1. ვინც ივიწყებს ბევრს კი არა და ბევრისაგან ცოტასაც.
2. ვინც მოძრაობასა და მოქმედებაში არ იჩენს სიმარჯვეს და გულ-მოდგინებას.

3. ვინც დაუდევრობასა და უძებრობას არ ემტერება.

4. ვინც უხვევს და მთლად ვერ გაიტანს სიტყვას ხნის სიზორეში.

5. ვისიც სიარული და სიტყვა ზანტია, დაცემული და უნაღვლობის გამომსახველი, მოშლილი და უღიმღამო.

6. ვისაც ნაფიქრები არ უძღვის სათქვამსა და საქმნელში.

7. ვინც თავს იწვალებს თავისი მოქმედებით და უმოქმედობით და ამ წვალებით ვერას ისწავლის საწინაოდ.

8. ვინც მოუცდელია. გაუსინჯავი, დაუკვირვებელი, წინდაუხვდავი, მაგრამ შეუწყნარებელი და გამოუბრუნებელი თავის ჩვენებითაც.

9. ვინც მოუზომავია და დაუდრეკელი.

10. ვინც თავის წუნს არ ებრძვის, არ იგლეჯს, არ კლავს თავისი დაუძინებელის მეცადინეობით, რჩევით და ნების გაძალუმებით.

11. ვინც თავის კილს რცხვენის მაგივრად აშვენებს გამოზართლებით. პენტს, აზღვაებს, აქებს ორ-პირად, უინიანობს მის ღირსებაზე და თავს ისახელებს მისის კირვებით რომ გამოუნამუსებულა.

12. ვინც უსიყვარულოდ, უწადელ-უმომკირნოდ საქმობს,

გულაგდებულად იქცევა და გულს მორყენის და შეაზარებს მხედველს.

13. ვისაც უყვარს თავის ნაკლებობა ისე, რომ არ ემეტება საძრახად და გასადევნად და სწყინს მისი გმობა და მტყუფნება.

14. ვინც მოჩემპარია ურჩებით, ეინით და გაუტეხელობით.

15. ვინც გრძნობს სიცრუეს თავის სიტყვისას, ან ნაქმარის სიტუდეს და მაინც არ ეშვება თავის ნამუშაის ხრჩობით და ჭკუის შეუპოვრობით.

16. ვინც თავის ტანჯვის მოქცევისათვის შეუშინდება თუ მოერიდება.

17. ვისაც ერთის კეთებაში მეორე ავიწყდება და უხდება.

18. ვინც მოცილის თავის გასაზრდელის და წარსამატებელის ფიქრისა და ცლისაგან.

19. ვინც საქმის შუა გზაზე მოწყინდება და გატუდდება.

20. ვისაც წერილმანი მოქმედების დაჭირება და საქმის მოლოდებაზე მომეტება გულს შეუცვლის, აუგორებს და სხვა საქმეს უადვილესად მოაჩვენებს წახდენა და სიძნელე.

21. ვინც გაუფროთხილებლად, გამოუკვლევლად და მოუმზადებლად დაიხეშებს და შევა და მერე არ ირცხვის გამოსვლას, ან მართლებით მდურვას — „არ მეგონაო“.

22. ვისაც მოუა ისე, რომ არ უნდოდა და მერე წუხილითაც თავს ვერ გაიწრთვის.

23. ვინც თავის შეუწამებლადაც ნელ-ნელა შეურიგდება და შეეთვისება იმას, რაც მისი დამგესვლელი და დამრღვევი, ხასიათის დაძეგმი და დამაუქმებელი ჩვეულება არის, საქმე არის, თუ აზრი და გონებლობა.

24. ვინც თავს წაიხსნის და გაუშვებს იმ სჯულისაგან, რაც შეადგენს მის სამარადსო საგონებელს, წინაძღოლს და უმაღლესს საცადს იმ ფიქრით, რომ „ცოტა ხანს რა უჭირსო“.

25. ვინც სიტყვას შეიჩინებს უმნაშვნელოდ, ან შეაჩინებს სხვას, რომლითაც აუქმებს კაცურ ღირსებას სიტყვის სმენისათვის. ან თუ წარმოიდგენს სრულის ძალით და სიცხოვნით ნალაპარაკებისაგან გამოსვლას თავად საქმის სინამდვილეს და სრულიადის გრძნობით არ მიწვდება, როს გავლა უსუსტებს,

უუფეროებს და განმეორებას დაიჭირვებს და იმასაც არ გაიტანს“.

საჭიროდ მიმანია მის მსოფლმხედველობასთან ცოტა უფრო დაახლოებისათვის გავეცნოთ ერთ მის ლექსს და ერთს მის ოფიციალ წერილს რუსულს ენაზე, საცა იგი საქართველოს ხატებას ერთის მხრივ და მეორეს მხრივ ამავე ქვეყნის, მის თანადროულ პრაქტიკულ საჭიროებათ ნუსხას გადაგვიშლის:

პართა ველია

1.

ეს უცხო მხარე დიად ძველია,
ძველთაგან ყველას სასურველია,
ყველას სასტუმრო, სავალ-საჩემი,
სახეთქ-საბრძოლო... ქართა ველია!

ორს დიდს ზღვას შუა ტურფა ველია,
ყოვლის მშვენებით დაუთვლელია,
მყინვარი მთებით, ცხელი ჭალებით
კაზმულ-ფერადი... ქართა ველია!

ცა ლაყვარდია, ჰავა მრთელია,
თბილია, გრილი, მშრალი, სველია,
საცა „რა გინდა სულო და გულო“!
ყოვლით შემკული... ქართა ველია!

მდინარეები მრავლად მრწყველია,
მთით მოქუხარე, ცეკვით მსვლელია,
„ძვალი და რბილი“ — კლდე-მიწა-ქანი
შემტკიცებული... ქართა ველია!

მთებზე როცა თოვს, — ბარად სთველია,
ყურძნითა სავსე საწნახელია:
აქ ზაფხული დგას, იქ გაზაფხული
მრავალ-ფერ-შემზმნილ ქართა ველია!

ქვეყნად ქვეყანა „უქცეველია“!
დაუგლეჯიათ — ისევ მთელია,
უწევათ, უდაგავთ — დაუწველია,
დაუქცევიათ — უქცეველია!

შემოსევინ — უძლეველია,
შემოხიზვინან — მასპინძელია.
შემოპარვიან მშლელათ და მრყვნელათ,
მაგრამ... იგივე ქართა ველია!

თუმცა ამ ველზე ბევრი მგელია,
ბევრი თაგვი და ბევრი გველია,
მაგრამ სულ ყველას გამრეაელია
გრიგალი... აქ ზომ ქართა ველია!

მთა და ბარია, ზღვა და ხმელია,
სხვადასხვაობით მიმზიდველია,
მაგრამ თვით ხალხიც სხვა ზნე, სხვა ფერი,
სხვა ენა, რჯული — მეტათ კრელია!..

მაღალ-დაბალი, მოკლე, გრძელია,
თეთრი, შავ-ტუხა, მხარ-ბეჭ-სქელია,
ცხვირა, პაჭუა, გრემა, ყუყუნა, —
სულ აქ შეყრილა... ქართა ველია!

ზენა და ქვენა დაუცდელია,
მთის და ზღვის ქარი წილ-მნაცვლელია,
სიცხე-სიცივის, ნამის — სიხმელის,
მსოფლიო ლაშქრის... ქართა ველია!

ვინც ისტორიის გამჩხრეკველია,
აბა მან მითხრას, რაც სათქმელია:
რაც აქ ჰყოფილა, რა არი ახლა
და რაც იქმნება, რაც საქმნელია?..

მომავალის თქმა — ვიცი — ძნელია,
მაგრამ წასული აწმყოს მთქმელია
და ვისაც ესმის მატთანის ხმა
ის იტყვის აქ რა ქართა ველია!

მე მათ ვუამბობ, ვინც მკითხველია,
ვინც გულის წმინდით მძიებელია,
თუ ამ კრელ მხარეს, კრელ-ენა ხალხში
რა სახადს იხდის ქართა ველია! —

მთის მყარი ზურგი — მისი წელია,
შიგ ოქროს გული დაუცლველია,
ხელ-მხარ-მკლავები — რკინა — ფოლადი,

მოუსხლეტელი, დაუღლელი!

ქაონს მოყრილთა ქარივ მგველია.

ძირ-მტიციე მკვიდრთა — მავრა მზრდელა.
და სხვ.

ეხლა რუსული წერილი. ამ წერილის ისტორია ასეთია: 1595 წ. იპერეთში წყალდიდობის მიერ დიდად დაზარალდა სოფლები. ამის გამო გუბერნატორმა ერთგვარი კომისია შეადგინა ინტელაგენტთაგან და დაავალა გამოეთქვათ თავიანთი აზრი გუბერნიის პრაქტიკულ საჭიროებათა გამო. მამამ ასეთი მოხსენება წარადგინა:

«Правильная постановка сельско-хозяйственного дела Кутаисской губернии, при ее физических условиях и географическом положении главным образом может быть указано, как одно из средств к поднятию материального благосостояния не только дворянства, но и всего населения губернии. Настоящее положение этой отрасли народного труда находится в неблагоприятных условиях: во-первых, в виду отсутствия юридически оформленных прав на землю, по размежеванности более чем 90% всего пространства губернии и пронесодящих, благодаря этому обстоятельству, споров, часто шире не оправдываемых не только со стороны частных лиц, но и агентов учреждения министерства государственных имуществ; во-вторых, по неимению под'ездных путей и вообще путей сообщения на целых площадях пространством сотни и даже тысячи квадратных верст, в особенности в нагорных частях большинства уездов и округов, а также мостов в самых нужных пунктах местного и общего значения; в-третьих, по затруднительности сбыта произведений, в особенности кукурузы помимо вышеназванных причин и вследствие нерегулярного отношения спроса с предложением и отсутствия зернохранилищ на местах сбыта, для обезличивания зерна и возможно меньшего колебания цен по произволу перекупщиков; в-четвертых, по недостатку теоретических и практических знаний в рациональных приемах хозяйства и его техники, что в свою очередь обуе-

довлиивает неустойчивость и неуверенность в труде и его результатах: и наконец, в-п я тых, по немнению учреждений мелнпоративного или сельско-хозяйственного кредита.

Экономическая отсталость дворянства и всего населения губернии, обусловливаемая вышеприведенными причинами в крае, находящемся в наилучших климатических и почвенных условиях и изобилующем естественными богатствами, может быть только устранена постановкой сельского хозяйства на рациональных началах, путем устройства низших, технико-агрономических школ в уездах и среднего сельско-хозяйственного заведения с техническим же отделением в Кутаисе, для подготовки сведущих хозяев и работников.

Непормальность землевладения может быть устранена лишь размежеванием земель; почему ускорение выслепнением земельной собственности для каждого хозяина и вообще для всего населения, как равно и для Министерства Государственных Имуществ является делом неотложной важности.

Устройство под'ездных путей как общественных, так и Министерства Путей Сообщения дало бы выход на рынки для сбыта произведений, как сельско-хозяйственным, так и горным, и возможность легкого и постоянного сообщения населения в видах беспрепятственного движения грузов горного и кустарного производства и отхожего промысла по всякое время года. Поэтому проложение означенных дорог и постройки мостов на реках в нужных местах уездов и округов, представляется в настоящее время настоятельной необходимостью.

Устройство зерно-хранилищ на стапциях Зак. жел. дороги в кукурузном районе Кутаисской губернии с правом вараитных свидетельств поставить кукурузное дело вне произвольных кризисов и возвысить рыпочную репутацию самого зерна, обезличенного и очищенного от сор и посторонних примесей и таким образом обеспечить правильную, ежегодную выручку производителям сего главного продукта нашего земледелия.

Для улучшения пород рогатого скота и вообще домашних животных желательно учредить случные пункты с улучшенными породами более культурных стран. При опытных фермах некоторые из вышеизложенных школ и частных хозяйств, землевладельцев, чтобы этим путем распространить более сильный рабочий, молочный и промышленный скот. Также самое можно сказать о домашних птицах, составляющих немаловажное подспорье в хозяйстве.

Вместе с тем даровая раздача хозяевам подлосев известных сортов американских лоз, отвечающих условиям данной местности, гарантировала бы виноградарство от филлоксеры; равным образом распространение тем же путем здоровой грены шелковичного червя дало бы благодетельный толчок вновь восстанавливающемуся в губернии шелководству.

Тот же самый способ распространения желателей и для семян американского хлопка, прививок ценных фруктовых деревьев, семян и селенцев чая, маслины, рамии и других фабричных растений, коим благоприятствуют природные условия губернии.

Обилие растительного и минерального топлива и естественных сил рек и ветра ставит на первой очереди вопрос об их утилизации для развития горной, сельско-хозяйственной и кустарной промышленности и необходимость в людях, знакомых практически с лучшими техническими способами того и другого производства. Этой нужде отвечают выше-сказанные отделения при сельско-хозяйственных школах; по совершенно обеспечило бы подобные всеобщие нужды губернии предполагаемое на Кавказе высшее политехническое училище.

О всех этих признанных и высшей администрацией губернии мерах и подпитию материального благосостояния дворянства и вообще населения губернии не раз выражалось желание и дворянством и местным отделом Императорского общества Сельского хозяйства и приносились посильные жертвы к их осуществлению, но в виду вышеотмеченных пе-

благоприятных условий и возрастающих оскудевший, обеднели и задолженности дворян, они оказались не по средствам дворянства и при настоящих условиях вряд ли они окажутся посильным для него.

По мнению комиссии, означенные меры могут быть осуществлены лишь взаимными условиями Правительства и общества, без различия сословий. Разрешение этой трудной задачи в высшей степени было бы облегчено и упрощено, если бы земские поступления Кутаисской губернии, обложившей в высшем размере, были бы направлены на удовлетворение этих настоятельных нужд всех сословий. Справедливость и польза такого направления местных земских сборов стоит вне всякого сомнения и имел в результате усиление и платежных сил губернии, являющихся естественным последствием материального достатка и благосостояния, могут с лихвою вознаградить принесенные жертвы и Правительством и дворянством и вообще всем населением.

При таком назначении местных ресурсов об руку с учреждениями меллиоративного, или сельско-хозяйственного кредита со стороны Правительства и общества, в связи с предполагаемыми рельсовыми путями, соединяющими портовые города губернии и внутренние области Империи с центрами земледельческими и промышленными и прорезывающими центральные места богатейших в Закавказьи районов в земледельческом и горном отпопешиях и сетью подъездных путей к этим магистральным жел.-дорожным линиям и их ветвям, будет вполне обеспечено, как материальное, так и умственно-нравственное преуспешие страны на почве взаимного сочетания усилий Правительства, дворянства и всего общества.

Устранение вышеуказанных неблагоприятных условий только что сказанными мерами, совместно осуществляемыми Правительством, дворянством и всеми сословиями губернии будет, по убеждению комиссии, также радикальным средством к устранению отрицательного и вредного направления энер-

გნი და სისრულეების მრავალი, რომელიც, იხილეს და აღმოაჩინეს, რომ ისინი, როგორც უკვე აღვნიშნავთ, არ იყვნენ დასრულებულნი და მხოლოდ ნაწილობრივ იყვნენ დასრულებულნი. ამიტომ, როგორც უკვე აღვნიშნავთ, მათი დასრულება და მათი სისრულეების მრავალი, რომელიც, იხილეს და აღმოაჩინეს, რომ ისინი, როგორც უკვე აღვნიშნავთ, არ იყვნენ დასრულებულნი და მხოლოდ ნაწილობრივ იყვნენ დასრულებულნი.

ეს კაცი ამ ქვეყნად ცხოვრობდა მხოლოდ 52 წელიწადი და მის სიცოცხლეში ღირსეულად ტრიალებდა თანამედროვეთა შორის. ეკირა ღირსეული ალაგი საზოგადო მოღვაწისა და შესამჩნევი ქართველისა, ჰქონდა თავის დროზე დიდი სახელი და ნდობა მოპოებული, იყო ყველას მიერ პატივცემული და თითოეული საჩვენებელი. ხოლო ამჟამად ცხოვრების პირობებით, იგი მოუტყუელი შეიქნა, რომ თავის ნამდვილსა და პირდაპირ დანიშნულებას მტლად დასდებოდა და შთამომავლობისათვისაც დაეტოვებინა ის დიდი საგანძური, რომლის მოცემაც მას შეეძლო.

ეს საგანძური კი, მე მგონია, იყო უფრო სფერო ფილოსოფიისა, სფერო საქართველოს ისტორიისა და ლინგვისტიკისა...

ამ მხრივ დიდად შესანიშნავია მის მიერ წაკითხული ლექციები, რომელთა ტექსტიც, სამწუხაროდ, არ დარჩენილა, რადგან თვით არ უყვარდა წინდაწინ წერა და შემდეგ თქმა.

წინდაწინ შემზადება შუშხს უკარგავს ნათქვამსო — იტყოდა ხოლმე და ამიტომ დარჩენილია მხოლოდ ამ ლექციების პროგრამა და დაწერილებითი კონსპექტი.

აი პროგრამაც:

საჯარო ლექციის ნარკვევი

„თუ რა განთვინება აქვს ქართველ მოდემს და რა ისტორიული ხატება.“

»

ისტორიული აღზრდა ქართველთა თავისებურის სულისა. აღზრდა სარწმუნოებრივი, წყობითი, მწიგნობრობითი, საზო-

გადოებრივი, თუ რა გამტანობითა ღონე გამოიჩინეს ქართველებმა თავის ისტორიულ ხატების დაცვაში; თუ რა წარმატებითა ღონე გამოიჩინეს ქართველებმა უმაღლესს სულიერისა და გონებითს განვითარებაში.

რამდენად დამოკიდებულია ქართველთ სათვისტომო სულის განკუთვნილებაზე მათი საერო განვითარება.

ბ

თუ რა აღმზრდელიობითი მნიშვნელობა აქვს ქართველებისათვის მათს საერო მწიგნობრობას საზოგადოთ და ნამეტურ სამღვთო და საპოეტო მათი უდიდესის მწერლობისა. სრულიად გამოზეპირება ქართველთა საერო სულის ხატებისა ამ სამწიგნობრო აღზრდაში. თუ რა არის ძველთა ძველი წერილობითი სახსოვარი ქართველთა — „ნებროთიანი“, თავდაპირველი, ქრისტიანობის წინანდელი თქმულებანი ქართველთა შესახებ მათის შთამოსირვისა (შთამოებისა).

გ

საწუთროს განცდა ქართველთა მიერ; მოქცევანი ამ საწუთროს განცდისა: პოეტებრივი, სარწმუნოებრივი, ფილოსოფოსებრივი. თუ რა თვალთ უყურებდნენ ცხოვრებას ქართველები; თუ როგორ ესმოდათ პატივი და სახელი; გმირობა, რაინდობა. ქართველთა სანატრიონი (იდეალი) და საზომი ნივთიერი საღირლობისა მათი ჰაზრით.

თუ რამდენათ გამოსაყენებელია თვით ცხოვრებაში თანშობილი საერო თვისება ქართველთა.

დ

ყოფა-ცხოვრება ქართველთა; მათი განვითარება, მოქალაქობა (ცივილიზაცია); ქალების მდგომარეობა; აღზრდა ყრმათა შინ, დედაწულში, სკოლაში (სასწავლოში).

ე

სამსჯავრო საბჭო ქართველთა, გამგეობა, სახელმწიფო ანაგობის სიმარტივე და ამაზე დამოკიდებული სიმარჯვე კერძო საქმობათა ამ საერო სისხვავის გამოობით. ხელმწიფების

(კუბუტი) ზარი და რიდი; სასულიერო და სახორციელო მთავრობათა ურთიერთი დამოკიდებულება.

3

ხელობანი: ვაქრობა (ფარდა), ფული, ფულის საცვლელი (საეკრმანი) თამაში და შექცევა; დღეობანი; საერთო ღონეცხოვრებისა (რევიზი) ნირი.

რადსტრუვა

დანარჩენი მისი ნაწერები კი შემდეგია:

1. უმთავრესად ლექსები, უფრო დიდაქტიკურის ხასიათისა. სულ „194“ იქნება და ზმა-კიდურები, აკროსტიხები ე. ი. მისი დროის მწერლებისა და ჩვენ მაშინდელ საზოგადო მოღვაწეთა შესახებ, სულ 80.

2. პუბლიცისტური და საპოლემიკო წერილები, სხვადასხვა პროექტები.

3. ზოგი მის მიერ წარმოთქმული სიტყვები, რომლებიც წარმოთქმის შემდეგ არიან აღდგენილნი.

4. ზოგი სახელმძღვანელო წერილები — ანატომიიდან, მედიცინიდან, საგრამატიკო და სხვ.

5. თარგმანები შექსპირისა: კომედია „დიდი ამბავი ტყუილ-უბრალოთ“ და „ჰამლეტი“ გარითმული ლექსით, რომლის თარგმანი დაუსრულებელია. წერილი მოთხრობები სხვა და სხვა ავტორებისა.

7. ზოგიერთი წერილები ნაცნობ მეგობრებისადმი მიწერილი.

6. აფორიზმები და დღიურები.

ყოველივე ეს. უმთავრესად ლექსები და პუბლიცისტური ნაწერები თავთავის დროზე იბეჭდებოდა „დროებასა“, „ივერიასა“ და „თეატრში“. და ამჟამად ჩემ მიერ გადაწერილია რამოცრო ტანის რვეულში შესაფერის შენიშვნებით და განმარტებით და ინახება საქართველოს ლიტერატურულ მუზეუმში.

ბარამბნობა მისი ნაწერის

იგი პირველ ხანებში სწერს ძველის ორთოგრაფიით მაგ. „უ“-ნს ბრჭვუთ ხმარობს და სხვა, მხოლოდ შემდეგ კი თანა-

მედროვე წესით. სწერს წვრილის ხელით და ნაწერს ხშირად ასწორებს. ეტყობა რომ უკანტროლოთ და ურედაქციოთ ხელიდან არაფერს გაუშვებს ხოლმე.

პრესაში მის შესახებ ბიბლიოგრაფიულ შენიშვნებს და ცნობებს ვპოულობთ 1880 წ. ევსტ. მკედლიძის წერილს „დროება“-ში.

1886 წ. „მწყემსში“ X-ს წერილს.

1888 წ. „ივერიაში“ სამს. ყიფიანის შენიშვნას. (თ. ქორდანიას ქრონიკებში ტ. 1).

1896 წ. „ნოვოე ობოზრენიეში“.

„მოამბე“-ში დუტუ მეგრელის, ამავე წელს ვ. გუნიას „საქართველოს კალენდარში“ და სხვ.

თარიღები

იგი დაბადებულია 1844 წ. ოქტომბრის 1-ლს, დედულეთს, სვირში (შორაპნის მაზრა.)

გარდაცვალებით კი გარდაიცვალა ყირიმში, ტავრიდის გუბერნიაში. სოფ. აგაიშანს 1896 წ. ოქტომბრის 12-ს.

იგი იქ სტუმრად იყო ისტორიაში ცნობილ სვანეთის მთავრის კონსტანტინე-მურძაყან დადემუკელიანის შვილებთან, მათ მამულში. დადიშკელიანები, როგორც დამნაშავე პირის მემკვიდრეები, გაძევებულ იყვნენ საქართველოდინ და რუსეთში მისცეს მამული ხსენებულ ალაგას. ერთხანად მათ უფლება არ ჰქონდათ სამშობლოში ჩამოსვლისა. ეს ახოვანი, მართლა სვანურად მოყვანილი შესახედაობისანი — მოსოსტრი, ოთარი, კოწია და თენგიზი, დიდათ პატივს სცემდნენ მამას და ხშირადაც იწვევდნენ თავისთან, მაგრამ 1896 წ-მდე ვერ მოახერხა. ამ წლის შემოდგომაზე კი იქ ჩასვლა ხომ საბედისწეროთაც გაუხდა.

მგზავრობის დროს გაცივდა და ფილტვების ანთებით გარდაიცვალა.

სამეგრელოში კი ჩამოსვენებულ იქმნა ამავე თვეში და დიდის გამოჩინებითაც დამარხა მისმა საყვარელმა ქვეყანამ საგვარეულო სასაფლაოში, სოფ. ბერთემს.

თვალსაჩინო ინტელიგენტი სამეგრელოდან

როდესაც ნიცვალეზულის კუბოსთან ვიდექ და ჩემთან მო-
დიოდნენ მოსამძიმრებები, ერთმა მეგრელმა მითხრა:

„სამეგრელოს დღეს მოწყდა წელიო“. გულწრფელობა
დავიჭერე ამ სიტყვებისა, რადგან მამა მართლაც იყო იმ დროს
სამეგრელოსათვის თვალსაჩინო ინტელიგენტი და მაშინ ასე-
თი კაცის დაკარგვა მართლაც წელის მოწყვეტას უდრიდა.
შენდეგ მოჰყვა, საქართველოს საბედნიეროთ, კეკლუც სამეგ-
რელოდანაც მთელი წყება მოღვაწეებისა გასამშვენებლად და
გასაპატიოსნებლათ ყველა ჩვენთვის სათაყვანო მრავალ კირ-
ნახულ ქვეყნისა და ხალხისა. სწორედ ამ ხნიდგან საერთო
ქართულ მუშაობაში მეგრელებმაც დაიკავეს საპატიო და
ღირსეული ადგილი.

ს ა რ ჩ ე ვ ი

რაც გამახსენდა

1. წინასწარი	5
2. პირველი მოგზაურობა	7
3. უცნაური გემოვნება	10
4. კვლავ მოგზაურობა	12
5. ილია ჭავჭავაძე ჩემს ხსოვნაში	86
6. ისეუ სოფლებში	94
7. ქალაქად	114
8. თეატრის გარშემო	124
9. ჩემი მწერლობა	172
10. საზოგადოებრივი სამსახური	199
11. უკანასკნელი წართქმა	217
12. აკაკი	219
13. მამა	243

რედაქტორი ა. ხაშია
მხატვარი ნ. იანქოშვილი
ტექნიკური თ. შამფორია
კორექტორი ლ. არაბიძე

ფასი 14 მ. 75 კ.

გადაეცა წარმოებას 9/II-59 წ., ხელმოწერილია დასაბეჭდად 17/VI-59 წ.,
ანაწყოების ზომა 5¹/₂×9, ქალაქის ზომა 54×84, სასტამბო ფორმათა
რაოდენობა 21.

უე 03112

ტირაჟი 15000

შეკვეთა № 503.

საქართველოს სსრ კულტურის სამინისტროს გამომცემლობებისა და
პოლიგრაფიული შრეწველობის მთავარი სამმართველოს სტამბა № 2,
თბილისი, ფურცელაძის ქ. № 5.

Типография № 2 Главного управления издательств и полигра-
фической промышленности Министерства культуры
Грузинской ССР. Тбилиси, ул. Пурцеладзе № 5.